



الهيئة العامة لقصور الثقافة

آفاق السينما  
٣٥

سيناريو مسلسل

قاسم أمين

جائزة أحسن سيناريو ٢٠٠٣



محمد السيد عيد

الجزء الأول





الهيئة العامة لقصور الثقافة

آفاق السينما

٣٥

# سيناريو مسلسل قاسم أمين

جائزة أحسن مسلسل سنة ٢٠٠٣

جائزة أحسن سيناريو

جائزة أحسن إخراج

جائزة أحسن تصميم ملابس

الجزء الأول

محمد السيد عيد

تليجرام



سور الزكية



الهيئة العامة لقصور الثقافة

رئيس مجلس الإدارة  
أنس الفقى

أمين عام النشر  
محمد السيد عيد

الإشراف العام  
فكرى النقاش

آفاق السينما

رئيس التحرير  
أحمد الحضرى

مدير التحرير  
محمد عبد الفتاح



## آفاق السينما

٣٥

• مسلسل قاسم أمين ( الجزء الأول )  
• محمد السيد عيد

المراسلات : باسم مدير التحرير  
الهيئة العامة لقصور الثقافة  
١٦ اش أمين سامى - قصر العينى  
رقم بريدى : ١١٥٦١

تطلب « آفاق السينما »  
ومطبوعات الهيئة من :

- منافذ توزيع الأغيار
- منافذ توزيع الهيئة المصرية العامة للكتاب
- منفذ البيع الرئيسى بالهيئة العامة لقصور الثقافة
- مركز النشر الجامعى بجامعة القاهرة

• المراجعة : يعقوب وهبى

• جمع تصويرى : ماجدة عيد

• تنفيذ الغلاف : محمد حافظ

• نوفمبر ٢٠٠٣

• رقم الإيداع : ٢٠٠٤ / ٣٢٥٩

• الترقيم الدولى :

I.S.B.N: 977 - 305 - 675 - 9

الشركة الدولية للطباعة ت : ٨٣٣٨٢٤٠

## فهرس الجزء الأول

٦	مقدمة افتراحان . . أحمد الحضري
٩	قاسم أمين حكاية مسلسل . . محمد السيد عيد
١٩	حلقات مسلسل قاسم أمين . . محمد السيد عيد
٥٥٤	توزيع الأدوار
٥٥٦	المؤلف في سطور

## • صياغة السيناريو

### إقتراحان

يتفق الجميع على أن المرحلة التي تحتاج عندنا في مصر إلى مزيد من العناية والاهتمام من بين مراحل تنفيذ الأعمال السينمائية أو التلفزيونية هي مرحلة كتابة السيناريو ، فقد وصلنا إلى مستوى مطمئن إلى حد كبير في مراحل الإخراج والتصوير والتشغيل والمونتاج . . وأصبح لدينا فنانون نعتز بهم في هذه المراحل ممن يرقون إلى مستوى التنافس في المناسبات الدولية . أما في مرحلة كتابة السيناريو فينقصنا الكثير . ولهذا لم ندخر وسعاً في هذه السلسلة « آفاق السينما » من نشر أعداد تناول كتابة السيناريو سعياً وراء الابتكار والإبداع في هذا الموضوع إلى جانب نشر بعض النماذج المتميزة لتكون مثالا يمكن الإحتذاء به ، وإلى التعبير أيضاً عن تقديرنا للجهد والبحث والابتكار لكاتبى هذه السيناريوهات .

قدمنا في مجال دراسة كتابة السيناريو كتاب « المهنة . . كاتب سيناريو » للكاتب سمير الجمل ، وكتاب « في الدراما التلفزيونية » للكاتب محمد الشربيني . وقدمنا في مجال النماذج كتاب « سيناريو فيلم عرق البلح » لكاتبه المخرج رضوان الكاشف ، وها نحن نقدم في هذا العدد « سيناريو مسلسل قاسم أمين » للكاتب محمد السيد عيد ، وهو السيناريو الحاصل على جائزة أحسن سيناريو عن عام ٢٠٠٣ .

ولصياغة كتابة السيناريو طريقتان . طريقة تتبعها أغلب دول أوروبا وتعتمد على كتابة السيناريو على عمودين في الصفحة الواحدة . . العمود الأيسر منها في اللغة الأجنبية خاص بالحركة والوصف وبعض التوجيهات ، والعمود الأيمن خاص بالحوار والموسيقى والمؤثرات الصوتية ، أى أن أحدهما خاص بشرط الصورة والثاني خاص بشرط الصوت ، داخل كل منظر ولقطاته كما تخيلها كاتب السيناريو . والطريقة الأخرى التي تتبعها الولايات المتحدة الأمريكية وبعض الدول الأخرى ، هي كتابة مايخص الصورة والصوت حسب تطور الحدث على عمود واحد بعرض الصفحة كلها ، وإن كانت السطور الخاصة بالحوار تقل قليلاً في عرضها عن السطور الخاصة بالحركة . وكانت النماذج التي نشرناها من قبل ضمن كتاب « المهنة . . كاتب سيناريو » تتبع نظام العمودين ، بينما كان نموذج « سيناريو فيلم عرق البلح » يتبع نظام العمود الواحد العريض كما ورد في الأصل . وعندما صدرت سلسلة سيناريوهات الأفلام الكلاسيكية في بداية

عام ٢٠٠٣ فإنها إتبتت طريقة العمود الواحد عند ترجمة سيناريو « صمت الحملان » إعداد الزميل عصام زكريا ، وترجمة سيناريو فيلم « رماد وماس » إعداد الزميلة مها لطفى .

ونحن من جانبنا نؤيد طريقة كتابة السيناريو السينمائي أو التليفزيوني بطريقة العمود الواحد العريض ، وإن كان هذا الشكل ليس هو المتبع في أغلب الحالات في مصر حتى الآن . ولاشك أن هذا الشكل هو الأكثر صلاحية للقراءة والمتابعة من جانب سائر القراء والأكثر إقتصادا في حيز النشر ، أما شكل العمودين المنفصلين فلا يستوعبه سوى المحترفون . وقد كان سيناريو مسلسل « قاسم أمين » كما كتبه محمد السيد عيد مكتوبا كالمعتاد على عمودين ، الأيمن منهما للحركة والأيسر لشريط الصوت ، وهذا هو الوضع طبعاً في حالة اللغة العربية . وقد قمنا من جانبنا بتحويله إلى عمود واحد عريض يضم الصورة والصوت معاً دون حذف أى كلمة من كلا العمودين الأصليين ، تسهيلاً للنشر وللقراءة من سائر المهتمين على اختلاف إتنماءاتهم واقتصاداً في عدد الصفحات . وقد يكون في هذه المحاولة ، إلى جانب الهدف الأصلي من نشر هذا السيناريو المتميز والمتفوق على سواء كى يكون نموذجاً أمام القارئ من حيث الجودة وإتقان البحث عن الحقائق التاريخية وادماجها في هذه الصياغة الدرامية الجذابة وتوظيفها في خدمة ماحفز بطل المسلسل قاسم أمين إلى القيام بحركته التاريخية في سبيل تحرير المرأة . . إلى جانب هذا كله إقتراح ودعوة إلى اختيار صياغة السيناريو في عمود واحد عريض . والأمر متروك لتفضيل المحترفين من كاتبي السيناريو من واقع تجاربهم وما يستنبطونه منها .

ويبقى بعد هذا إقتراح آخر ، وهو الإقتراح الذى سبق أن ذكرته من قبل فيما يختص بتوحيد مصطلحات كتابة السيناريو ، وهذا الأمر أكثر أهمية وأرجو أن نستقر على رأى موحد فيه . وهو أن السيناريو ينقسم إلى عدة مشاهد ، يدور كل منها في عدة مناظر ، ويتم التصوير داخل كل منظر في عدة لقطات . ويذكر « معجم الفن السينمائي » تأليف أحمد كامل مرسى ود. مجدى وهبه ، كأحد المراجع ، أن المشهد « يتفيد في العادة بوحدة الزمان ووحدة الحدث ، ويتميز بالعلاقة المتتابعة بين المواقف والشخصيات والمناظر ، التى تروى جزءاً متصلاً أو متشابكاً أو متقارباً من أحداث القصة » . أى أن المشهد sequence يدور في أكثر من منظر scene مادام الحدث مستمراً والزمن متصل ينتقل خلاله الممثلون من منظر إلى آخر ، ويتم تصوير ما يدور في كل منظر (مكان) في أكثر من لقطة shot .

إلا أن السيناريو الوارد هنا يسير وفق العرف المتبع الآن في كتابة السيناريو وهو إطلاق إصطلاح « مشهد » على كل منظر (مكان) جديد بالرغم من أن الزمن مازال متصلاً بين

أكثرها . وبالتالي فكل « منظر » جديد هنا سنجده يحمل اصطلاح « مشهد » ، فهذا هو المتبع . والأمر متروك أيضا لما يستقر عليه المتظرون وما سوف يفرض نفسه من هذه المصطلحات ، مثلما استقر عليه أخيرا إصطلاح « اللقطة » بالرغم من مقاومة كثير من الممارسين لكتابة السيناريو والمتعاملين معه .

هذا وكل مشهد جديد هنا يبدأ في صفحة جديدة في السيناريو الأصلي ، ولكننا عبرنا عن ذلك في هذا الكتاب بخط أفقى بعرض الصفحة من باب الاقتصاد في المساحة .  
وأيأ كان نصيب كل من الإقتراحين من القبول ، فلنأخذ نفساً عميقاً الآن ونقبل على التمتع بقراءة سيناريو مسلسل « قاسم أمين » للكاتب محمد السيد عيد ، والاستفادة منه .

أحمد الحضرى

## قاسم أمين حكاية مسلسل

بدأت حكاية هذا المسلسل فى شهر يونيو ٢٠٠٠ تقريباً ، كان صديقى الفنان مدحت زكى هو رئيس شركة صوت القاهرة ، واتصل بى تليفونيا لأزوره فى مكتبه بالشركة ، وحين زرته قابلنى متلهلاً سائلاً

- هل تحدثت معك إنعام فى الموضوع ؟

- أى موضوع ؟

- قاسم أمين .

- لا .

- إسمع إذن ، لقد اتفقت مع إنعام محمد على أن تقدم عملها الجديد من خلال شركة صوت القاهرة ، وقد وقعت لى عقداً بذلك ، واتفقتنا أن يكون موضوع هذا العمل الجديد هو قاسم أمين ، وأن تقوم أنت بكتابته .

كانت العلاقة بينى وبين إنعام محمد على تحمل منذ لقائنا الاول مشروعاً مؤجلاً . وأذكر أن لقاءنا الاول كان فى مركز شباب الجزيرة - المجاور للنادى الأهلى - فى حفل تكريم كبير . وأنى كرمته عن « مسلسل الزينى بركات » ، بينما كرمته هى عن فيلم « الطريق إلى إيلات » . وقالت لى : « لابد أن نتعاون معاً » وقلت إن هذا يسعدنى ، وتبادلنا أرقام التليفونات ، إلا أن كلاً منا انشغل بأعمال مع قناتين آخرين ، حتى جاء هذا الاختيار ، الذى فاجأنى .

وصمت لحظة ، وفكرت فى شئ مهم ، هو : لقد انتهت إنعام لتوها من « مسلسل أم كلثوم » الذى ملأ الدنيا وشغل الناس ، فهل أستطيع أن أكتب عملاً يتجاوز أو على الأقل يتساوى مع مسلسل أم كلثوم ؟ صحيح أن « الزينى بركات » تجاوز بنجاحه مسلسلات شهيرة لكتاب اعلام ، لكن . . هل يمكن أن أكتب عملاً يدخل - رغماً عنى - فى مقارنة مع مسلسل أم كلثوم ؟

ولم تستغرق الإجابة وقتاً طويلاً ، فأنا واثق بأن الله يؤازرنى فيما أكتب ، وأنه أعطانى موهبة لم تخذلنى أبداً . وقبلت التحدى .

اتصلت بى إنعام بعد ذلك ، وبدأ العمل .

## ● قراءة استطلاعية .

كان من أهم الأسباب التي دفعتني للموافقة على كتابة مسلسل قاسم أمين فكرتي العامة عنه باعتباره محرر المرأة ، إلا أن الأفكار العامة لا تكفي لكتابة مسلسل يستغرق عشرات الحلقات ، بل لابد من تفاصيل كثيرة ودقيقة عن الرجل ، وعن حوله ، وعصره ، لذا بدأت العمل بقراءة استطلاعية حددت خلالها :

- نقطة البداية .

- الشخصيات التي سأتعامل معها .

- الفترة الزمنية التي تدور فيها الأحداث .

- الأفكار التي يمكن طرحها خلال العمل .

أى أن هذه القراءة هي التي حددت الإطار العام للعمل .

استغرقت هذه القراءة عدة أشهر ، وخلال هذه الأشهر انتقل مدحت زكى راعى مشروع المسلسل من شركة صوت القاهرة إلى قطاع الإنتاج ، ونقل مدحت المشروع معه .

وقد تبين لى خلال هذه القراءة الاستطلاعية احتياجاتى من الكتب غير المتوفرة بمكتبتى ، والشخصيات التي احتاج لمعلومات تفصيلية عنها . وقد تمكنت من حل جميع المشاكل عدا مشكلة واحدة هي عدم وجود أى كتب عن الأميرة نازلى فاضل ، وقد تمكنت من حل هذه المشكلة بمساعدة صديقى الكاتب الكبير أحمد حسين الطماوى الذى أمدنى بثلاث مقالات مصورة من دوريات قديمة ، فكانت بالنسبة لى عوناً كبيراً عند الكتابة .

## ● جمع المادة التاريخية

بعد وضع التصور العام انتقلت لمرحلة جمع المادة التفصيلية للمسلسل ، وقد جمعت المادة على صورتين مختلفتين :

**الأولى :** جمع المادة موزعة على السنين لكل شخصية من شخصيات المسلسل خلال المدة من ١٨٧٩ - ١٩٠٨ ، أى منذ بدأت أحداث المسلسل حتى وفاة قاسم أمين .

**الثانية :** تخصيص صفحة لكل شخصية لجمع أهم الجوانب عن الشخصية ، مثل : أسرته ، شكله ، زوجته ، علاقته ببطل المسلسل ، علاقته بالشخصيات الأخرى ، تاريخ الميلاد ، الوفاة ، أفكاره الأساسية : . . . . . إلخ .

وكانت المشكلة عند جمع المادة هي : تضارب التواريخ ، الاختلاف حول وقوع حدث معين إلى حد أن بعض المؤرخين يثبت أحداثاً والبعض الآخر ينفيها . وقد جعلت الفیصل فی الأخذ بالوقائع هو : الضرورة الدرامية .

### ● الكتابة

بعد جمع المادة بذات الكتابة ، وقد راعيت عند الكتابة :

١ - تحقيق التوازن بين التاريخ والدراما ، إذ إن التاريخ يقدم مادة جافة بينما الدراما لابد أن تقدم المعلومة في ثوب فني يجذب المشاهد لرؤيتها ، وقد دفعتنى الرغبة في تحقيق هذا التوازن إلى استخدام كل الحيل الفنية الممكنة التي يمكن أن تحيط التاريخ بأثواب قشبية محببة ، ولذا فعلت الآتي :

أ - الحرص على أن تكون هناك أغنيات .

ب - الحرص على قصص الحب ، مثل : قصة حب قاسم وسلافا ( مع أن سلافا لم تذكر في الكتب المتاحة لي إلا في سطر أو أقل ) وقصة حب نازلي وسعد (مع إنى وجدتها في إشارة خلال حديث صحفى مع صفية زغلول بمجلة الاثنين) وقصة حب قاسم ووسيلة ( ورد ذكرها مرة واحدة في الجزء الأول من مذكرات سعد زغلول ) قصة حب سعد لصفية قبل الزواج ، قصة حب حسن وجوليا قبل وبعد الزواج .

وقد راعيت أن تكون قصص الحب ذات طابع رومانسى ، فمرة تنتهى بموت المحبوبة ، ومرة نراها تنتهى دون أمل ، وثالثة نراها تتحدى الواقع الذى يريد لها أن تنتهى .

ج - خلق خطوط درامية كثيرة ، تاريخية وخيالية ، وخلق صراعات متعددة لضمان

استمرار التوتر والجذب الدراميين ، مثل :

- العلاقة بين قاسم وأبيه العسكرى الحازم .
- العلاقة بين الأب وزوجتيه .
- العلاقة بين خضر وجلنار .
- العلاقة بين حسن وأبيه وأمه وهما بطلان منه طلاق جوليا أو الزواج بغيرها .
- العلاقة بين حسن وأبيه بعد طلاق أمه .
- العلاقة بين حسن وأشقائه عند مرض أبيه .
- العلاقة بين محمد عبده وعرايى .



- العلاقة بين فتحى زغلول وسعد زغلول .
- العلاقة بين مصطفى كامل والخديو عباس حلمى .
- رفض مصطفى فهمى لزواج سعد الفلاح من ابنته التركية .
- علاقات لا حصر لها ، وصراعات لا تتوقف ، كان الهدف منها خلق مواقف درامية تجعل وقائع التاريخ مقبولة لدى المتفرج .
- ٢ - تحقيق التوازن بين الفكر والدrama .

لا بد أن القارئ الكريم الذى شاهد المسلسل على الشاشة الصغيرة قد لاحظ أن عدداً كبيراً من شخصيات المسلسل ينتمى إلى طائفة المفكرين ، ولا أظن أن مسلسلاً من المسلسلات قد ضمّ مثل هذا العدد من قبل ، وقد قررت منذ البداية أن أقدم أفكار هذه الكوكبة من الرواد التى أثرت فى النهضة المصرية . وقد كنت متخوفاً من عدم موافقة إتمام محمد على هذه المغامرة ، لكنها فاجأتني بأنها حريصة كل الحرص على تقديم الجانب الفكرى للأبطال ، وشجعني هذا أكثر على المغامرة ، خصوصاً وأن تجاريب الإذاعية فى مجال تقديم الأفكار كانت ناجحة للغاية ، وأذكر أن عملى الإذاعى الأول كان مسلسلاً عن « مقدمة ابن خلدون » ، قدمت فيه الأفكار الرئيسية لهذا المفكر العظيم . . . المهم أنى أعطيت أولوية لتقديم كتب قاسم أمين ، وعرضتها على النحو الآتى :

● كتاب كلمات : وزعته على المواقف المختلفة لقاسم أمين على مدار المسلسل .

● كتاب المصريون : وزعته على عدة مشاهد ، مثل :

- مشاهد قاسم وهو يؤلف .

- مشهد مناقشة الكتاب فى صالون نازلى .

- مشهد لقاء قاسم أمين بنازلى .

وهذا التكتيك استخدمته مع بقية الكتب ، لكنى أضفت أطرافاً جديدة تشارك فى قراءة النصوص الهامة ، مثل : رواد المقهى ، وأصدقاء قاسم أصحاب المواقف المختلفة ( حسن وأحمد شوقي ) ، رواد المسجد الذين يناقشون محمد عبده ، الخديوى عباس حلمى وهو يناقش قاسم أمين غاضباً ، قاسم أمين وهو يوضح لعمه مصطفى فهمى رأيه فى الأجزاء التى أغضبت الخديو .

لقد كانت مهمة صعبة ، لكنى قبلت التحدى . . .

بعد قاسم أمين كان الأمر أسير ، فمحمد عبده يقول آراءه فى مواجهة عرابى ، وجمال الدين الأفغانى ، وفى حواراه مع زوجته وصهره الجديد ، وفى دروسه التى يفسر فيها القرآن .

وقد راعيت أن تكون القراءة محايدة بحد من التحدى ، بحيث يتحول الأمر من حصنة قراءة لصراع بين طرفين ، أحدهما ضد الفكرة ، ومن خلال هذا الصراع يتم تقديم النصوص والأفكار باعتبارها رداً على الخصوم .

وفيما يتعلق بمصطفى كامل فقد حرصت دوماً على عقد جلسات المناقشة بينه وبين زميل دراسته لطفى السيد ؛ لأن هذا الرجل بالذات كان على خلاف كبير مع الزعيم المعروف . كان مصطفى كامل مثلاً يرى أن تستقل مصر من الاحتلال الانجليزى فى ظل التبعية لتركيا ، وكان لطفى السيد يرى أن مصر يجب أن تستقل عن انجلترا وتركيا معاً ، وأن مصر يجب أن تكون للمصريين . وهكذا من خلال الخلاف بينت آراء كل طرف من الطرفين .

## قضايا

أثار المسلسل أكثر من قضية هامة ، لكنى ارى أن أهم هذه القضايا هى : الفرق بين التاريخ والدراما التاريخية ، فقد كتب أحد الصحفيين سؤالاً ذات مرة يقول : كيف يقول محمد السيد عيد أنه ألف هذا المسلسل ؟ إنها وقائع تاريخية . . هل ألف محمد السيد عيد هذه الوقائع ؟

مثل هذا السؤال يضعنا أمام ضرورة بيان الحدود بين التاريخ والفن . وباختصار نقول :

إن الدراما التاريخية = التاريخ + الخيال + وجهة نظر الكاتب  
الخيال فى الدراما التاريخية يضيف لنا : شخصيات غير تاريخية ، إلا أنه يضعها فى نسج العمل الفنى بحيث تصبح جزءاً منه ، وكذلك الأمر فيما يتعلق بالأحداث حيث يتخيل الأديب مواقف وأحداث لم يذكرها التاريخ كى يوضح وجهة نظره ، وأبعاد شخصياته .

ولا يمكننا الحديث عن الدراما التاريخية دون الحديث عن وجهة نظر الكاتب ، فالتاريخ بالنسبة للكاتب ليس هدفاً ، لكنه وسيلة يستخدمها للتعبير عما يريد أن يقوله لنا ، وبناءً على هذا يختار الكاتب الشخصية التى سيكتب عنها ، أو العصر الذى سيتناوله ، ويختار بعد ذلك من حياة الشخصية أو أحداث العصر ما يراه ضرورياً للتعبير عن وجهة نظره ، ويترك ما عدا ذلك .

ولا يقف الكاتب فى تعامله مع التاريخ عند حد الأخذ والترك ، بل يحمى فى طريقه

معدلاً ومؤولاً للاحداث والأفكار . ولأن شرح هذا يطول فأنا أكتفى بإحالة من يود معرفة التفاصيل إلى كتابي « التراث في مسرح عبد الرحمن الشراقوى » ليجد حديثاً مفصلاً عن هذا الموضوع .

خلاصة القول : إذن أن الدراما التاريخية تضيف للتاريخ وتحذف منه وتعديل بعض الوقائع وتجعل هذا كله وسيلة للتعبير عن وجهة نظر الكاتب .

### • الخيال فى مسلسل قاسم أمين

الخيال فى مسلسل قاسم أمين هو المسؤول الأول عن صياغة المواقف التى شاهدها فى المسلسل ، ما لم يكن الموقف قد سجله المؤرخون حرفياً ، وهذا نادر .

الخيال هو المسؤول أيضاً عن وجود حسن ( صديق قاسم أمين ) وأسرته كلها : الأب المزواج والأم ، والزوجات والأولاد ، وجوليا التى قابلها فى باريس وأحبها وتزوجها . وقد ابتكرت هذه الأسرة لأجسد من خلالها الأشياء التى سيرفضها قاسم أمين فيما بعد ، مثل : - تعدد الزوجات .

- سوء استخدام حق الطلاق .

- خطورة عدم تعليم المرأة أو عملها ، حيث تجد نفسها بعد الطلاق لا قدرة لها على إعالة نفسها ، مما يضطرها إلى الشحادة أو الأعمال الحقةرة .

- الصراعات التى تنشأ بين الاخوة غير الأشقاء بسبب انتماء كل منهم لأمه .

- التغير الذى يمكن أن يطرأ على الإنسان المصرى بعد أن يتعلم ويرى بعينه المجتمعات الأخرى التى تعامل المرأة باحترام وتعطيها حقوقها كما رأينا فى شخصية حسن نفسه حين ذهب إلى فرنسا .

الخيال هو المسؤول أيضاً عن أسرة جلتار وخضر ، فهاتان الشخصيتان ليس لهما وجود تاريخى ، ورأيت أن أدخلهما إلى نسيج الأحداث لكى أبرز عدة قضايا منها : - سلطة الأب المطلقة فى زواج ابنته .

- الزواج المبكر .

- إرادة المرأة الراغبة فى تغيير واقعها بالتعليم ، كما علمت جلتار نفسها ، ثم رأيناها بعد هذا تثقف نفسها ، ويصل بها الأمر إلى أن تكتب المقالات فى الصحف ، وتشارك فى تعليم البنات لتغير الواقع الأليم الذى يعيشه . إن جلتار فى رأى تمثل الجسر الذى يربط بين قاسم أمين وهدى شعراوى التى جاءت بعد بقليل .

الخيال هو المسؤول أيضاً عن أشياء كثيرة مثل :

- قصة حب قاسم أمين لبنت الجيران .
  - ضياع حقوق الأم في الميراث .
  - تعاطف الاب مع الثورة العربية .
  - شكل العلاقة داخل أسرة قاسم أمين .
  - كل الشخصيات الفرنسية التي قابلها بطلنا في فرنسا عدا سلافا واستاذة لرنود .
- فكل هذه الأشياء لم ترد عنها أى تفاصيل فى كتب التاريخ ، وكان لابد للخيال أن يتدخل فى صياغتها ، وابتكار المشاهد التى تبين طبيعتها .
- دور الخيال إذن فى هذا المسلسل التاريخى ، لا يقل عن دور التاريخ ، وإن كان التاريخ هو قاعدة الانطلاق .

### ● الأخطاء التاريخية

راعت خلال كتابتى للمسلسل أن أجعل بين أهدافى : تقديم المعلومة التاريخية الصحيحة . لذا حرصت أثناء إعداد المادة التاريخية على كتابة المرجع أو المصدر الذى نقلتها منه ، وفى بعض الأحيان لم أكتف بهذا بل كتبت المرجع أو المصدر فى الاسكربت أيضاً . لكن المشكلة أن المؤرخين لا يتفقون فيما بينهم على الوقائع ، وعلى سبيل المثال ، يقول الدكتور محمد عمارة فى تقديمه للأعمال الكاملة إن قاسم أمين التحق بمكتب مصطفى باشا فهمى للمحاماه بعد تخرجه ١٨٨١ ، وقد رفض د. يونان لبيب رزق هذا الكلام تماماً باعتباره المستشار التاريخى للمسلسل ، فأيهما الصحيح ؟

مثال آخر : يقول إبراهيم الجزيرى ، سكرتير سعد زغلول ، فى كتابه عن سعد إنه خلع الزى الأزهرى حين التحق بوظيفة معاون فى الداخلية ، وقد رأى د. يونان أن سعد خلع الزى الأزهرى منذ أن التحق بالوقائع المصرية ، وعند مناقشة د. يونان عرفت أن مصدر هذه المعلومة عنده هو د. عبد الخالق لاشين ، فقلت له إن مصدرى هو الجزيرى ، فوافق على رواية الجزيرى ، واحترت المخرجة بيننا ، وحاولت أن ترضى الطرفين ، ومن حسن الحظ أن الجمهور لم يلحظ هذا .

مثال ثالث : قال الدكتور عمارة فى مقدمته للأعمال الكاملة إن والد قاسم أمين التحق بالجيش المصرى برتبة أميرالاي وشغل منصب قائد سلاح المراكبين ، وكتب د. صلاح فضل فى الأهرام مؤكداً أن والد قاسم أمين لم يعمل أبداً بالجيش المصرى متقدماً فعلته . هذه الاختلافات حسبها على بعض النقاد والمهتمين بالتاريخ واعتبروا أنها أخطاء تاريخية ، وهى فى الحقيقة مجرد اختلافات بين المؤرخين .

إلى جانب هذه الاختلافات شمر البعض عن ساعديه ووجه انتقادات للمسلسل وهي في الحقيقة تدل على عدم تثبيت الناقد ، أو عدم اطلاعه ، أو سرعة إطلاقه للأحكام ، ومن أمثلة ذلك :

- كتب أحد اساتذة التاريخ أن شخصية وسيلة غير حقيقة ، ورغم أن طبيعة الدراما التاريخية تسمح بإضافة مثل هذه الشخصية ، إلا أن الحقيقة أن هذه الشخصية حقيقية ، ورد ذكرها في « مذكرات سعد زغلول » ( ج ١ ) وكان على الأستاذ الجليل ألا يتسرع في الحكم .

- كتب أحد المهتمين بالتاريخ يؤكد أن قاسم أمين لم يقابل الأفغانى أبداً ، والحقيقة أن قاسم أمين حين كان في فرنسا عاصر مجى الأفغانى ومحمد عبده إليها ، وشد قاسم الرحال من مونيبييه إلى باريس ليقوم بدور السكرتير لمحمد عبده ، وكان من الطبعي أن يقابل الأفغانى ويعاصر صدور مجلة « العروة الوثقى » .

- كتب ثالث في الأهرام يقول إن الذى أحب نازلى ليس هو سعد الزعيم بل ابن أخيه الذى يحمل نفس الاسم ، والحقيقة أن نازلى التى ظهرت في المسلسل غير نازلى التى أحبها قريب الزعيم . نازلى التى رأيناها في المسلسل هي الأميرة نازلى فاضل ، بنت مصطفى باشا فاضل ، أخى الخديو إسماعيل ، أما نازلى التى أحبها قريب سعد فهي نازلى عبد الرحيم التى تزوجها الملك فؤاد بعد ذلك . وقريب سعد هذا ليس ابن أخيه كما قال الناقد بل ابن أخته ، واسمه ليس سعداً بل هو سعيد .  
إن الناقد هنا قد أخطأ خطأ مركباً .

- قال البعض : إن قصة الحب التى قدمتها بين نازلى فاضل وسعد زغلول غير حقيقية والحقيقة أنى وجدت حواراً للسيدة صفية زغلول في مجلة الاثنين عام ١٩٣٢ تقول فيه « إن السبب في زواج سعد بها هو قاسم أمين وليس نازلى فاضل ، لأن نازلى كانت تحب سعداً وتريد أن تزوجه هي » . . ولو أن الكاتب سأل أولاً لأخبرته بالمصدر بدلاً من أن يكتب عما لا يعرف .

على أية حال ، يجب على من يتجرأ على كتابة الدراما التاريخية أن يتوقع الهجوم والنقد ، وأن يكون مستعداً له ، لأن أسهل الأشياء هي الاتهام بالخطأ التاريخي .

### ● صورة البطل

يعتقد البعض أن كاتب الدراما التاريخية موظف عند التاريخ ، يكتبه كما هو ، ولذلك فلا بد من إظهار الشخصيات كما هي ، وفي رأى أن هذا يمكن أن يحدث في حالة الدراما

التسجيلية فقط ، أما في حالة الدراما التاريخية فأمام الكاتب مساحة متسعة للحركة ، وفي النهاية فإن وجهة نظره هي التي تحدد كيف سيقدم الشخصيات .

لقد عاب الكثير على الدراما التاريخية أنها تقدم الشخصيات بلون واحد فقط ، فهي إما أبيض وإما اسود ، وفيما يتعلق بالبطل فإنه لا يكون إلا أبيض فقط ، كأنه لا يخطئ . ونسى هؤلاء السادة أن الكاتب في الدراما التاريخية يحاول أن يقدم القدوة ، وبالتالي يحرص على أن يكون بطله على قدر كبير من المثالية . لا أدري ما الذي يستفيد شبابنا لو كتبنا عن سعد زغلول أنه مقامر ، أو عن قاسم أمين أنه مات غارقاً في الديون ، إن إظهار النقائص التي تهدم القدوة ليس بطولية ، إنما البطولة الحقيقية أن تقدم لأبنائنا الشخصيات العظيمة التي شاركت في نهضة وطنها كقدوة .

وليس معنى الحرص على القدوة أن نجعل البطل يفقد ملامحه الإنسانية ، بل لا بد أن يكون إنساناً يحب ويتألم ويفرح وينكسر ويقاوم ويمر بكل ما يمر به الإنسان من حالات ومشاعر ، لأن هذا الطابع الإنساني هو جواز المرور إلى قلب المشاهد ، ودونه لا يمكن أن نمتلك الوجدان .

### • وأخيراً ..

لقد كان من حسن حظي أن الفترة التاريخية التي تعرضت لها كانت بكرة لم يتناولها أحد من قبل ، وكان من حسن حظي أيضاً أنها مليئة بالعظماء ، وهذا أتاح لي عدة مزايا ، أهمها :

- تقديم شخصيات لم تقدم من قبل على الشاشة المصرية والعربية ، مثل : الأميرة نازلي فاضل ، وأحمد فتحى زغلول .

- الدفاع عن شخصية عباس حلمي الثاني . . إذ أن كل كتبنا المدرسية دأبت على تقديم الأسرة العلوية باعتبارها اسرة تعاونت مع الاحتلال ولم تراع مصالح البلاد . بينما يقول الواقع إن هذا الحاكم واجه الانجليز ، وشجع الحركة الوطنية ، ورعى مصطفى كامل ، وشارك في حزب سرى للمقاومة ، ووافق على إنشاء الأحزاب السياسية لأول مرة في تاريخ مصر .

- تقديم جوانب غير معروفة في حياة سعد زغلول ، فالجميع يعرفون سعداً زعيم الثورة ، لكن المسلسل قدم لأول مرة حياة سعد قبل الزعامه .

- رسم صورة عامة لعصر من عصور التنوير والنهضة في مصر ، ورصد العلاقات بين أعلامه ، إذا أننا ندرس هؤلاء الأعلام عادة كما لو كان كل منهم جزيرة منفصلة ، رغم أنهم

كانوا جماعة متفاعلة ، تربطهم الصداقات ، والمنافسات ، وعلاقات التلمذة ، وغيرها من علاقات أبناء الجيل الواحد .

- تقديم الأفكار الرئيسية لمجموعة من أعلام التنوير : الأفغانى ، النديم ، محمد عبده ، قاسم أمين ، لطفى السيد ، مصطفى كامل .

وقبل كل هذا - تقديم ومناقشة قضايا المرأة بأجلى صورة ممكنة . [ وهذا كله يكفى الكاتب كى يشعر أنه قدم شيئاً ذا قيمة .

بقيت بعد هذه الجولة بعض الكلمات عن السيناريو المطبوع والسيناريو الذى عرض على الشاشة فسوف يلاحظ القارئ أن عدد الحلقات هنا ٣١ حلقة بينما الحلقات المعروضة ٤١ حلقة ، وهذا يحدث كثيراً إذ أن الحلقات بعد التصوير تأتى أطول من الزمن المقدر لها ، وحينئذ يزداد عدد الحلقات بشكل تلقائى .

ويترتب على مثل هذه الزيادة تغييرات طفيفة ، إذ يحاول المخرج أن يقدم نهايات ساخنة ومشوقة للحلقات فيقدم ويؤخر فى المشاهد لتحقيق هدفه .

وأضيف إلى ما سبق أنى أعطيت السيدة إنعام محمد على حق حلف أى مشهد ترى أنه سيؤثر على الإيقاع ، أو ترى أنه زائد ويمكن الاستغناء عنه ، وقد فعلت هذا .

طلبت السيدة إنعام أيضاً خلال التصوير تدعيم بعض المشاهد بإضافات معينة ، وقد أضفتها بعد طبع المسلسل ، إلا أن هذه المشاهد كانت قليلة جداً بحيث لن يلاحظها القارئ .

وبعد . . . . .

ارجو أن يستمتع القارئ بهذا الكتاب كما استمتع بالمسلسل على الشاشة ، كما أرجو أن يستفيد به طلاب معهد السينما وكليات الإعلام ودارسو السيناريو .

وقبل أن أنتهى من هذا التقديم الموجز لابد أن أتوجه بالشكر والتقدير لأخى وصديقى يسرى السيد بدار التحرير ، فلولا حماسة ما ظهر هذا السيناريو بين دفتى كتاب . لكن هذا الحماس والحب ليس جديدين عليه فهكذا عهدته دائماً .

أشكر أيضاً الأستاذ أحمد الحضرى رئيس تحرير هذه السلسلة ، والأستاذ محمد عبد الفتاح مدير التحرير للجهد الكبير الذى بذله فى متابعة هذا الكتاب فى كل مراحل الطباعة حتى جاء على هذا النحو من الدقة

والله ولى التوفيق

**المؤلف**

**محمد السيد عيد**

## الحلقة الأولى

مشهد ١	منظر عام للقاهرة	نهار / خارجي
لوحة	القاهرة عام ١٨٧٩ مزج	

مشهد ١ (١)	أحد شوارع القاهرة	نهار / خارجي
	فوتومونتاج	

١ - لقطة متوسطة لرجل يغلق واجهه محله ثم يضع يافته على المحل من الخارج : المحل مغلق اليوم .

### قطع

٢ - عدة لقطات لأيدى تغلق واجهات المحلات .

### مزج

٣ - منظر عام للشارع . . وآخر . . اثنين أو ثلاثة . . . يغلقون محلاتهم . . . ويتوجهون للخروج من الكادر . . . بينما الكاميرا فى حركة شاربوه . . . تصل إلى أحد المقاهى فى مقدمة الكادر .

على المقهى يجلس عدد قليل من الناس بعضهم يلبس ملابس أفرنجية والآخر يلبس جلباب أو ملابس أزهرية . . . يتقدم نحوهم الجرسون .  
الجرسون : المعلم يقول مافيش مشاريب النهاردة إلا القهوة .

### قطع



٤ - منظر عام لنفس الشارع أو شارع آخر . . . حيث نرى المحلات كلها مغلقة ولا يمر أحد بالشارع . . . بينما تتقدم من العمق عربة حنطور يقودها عربجي بملابس عسكرية .

قطع

٥ - داخل العربة الحنطور . . . لقطة كبيرة لأمين بك . . . داخل العربة منكس الرأس . . . مستنداً على عصاه . . . صوت قائد العربة قائلاً . . .

العربجي : الكل حزين على عزل الخديو اسماعيل يا أمين بيه . . .  
حركة بان على مجموعة المحلات المغلقة . . . مع صوت العربجي . . .  
العربجي : المحلات كلها قفلت . . .

قطع

٦ - منظر عام للشارع . . . ونرى العربة بأكملها وهي تتقدم للمقدمة . . .  
العربجي : مافيش صريخ ابن يومين في الشارع . . .

قطع

٧ - داخل العربة . . . أمين بيه يرفع رأسه . . . والألم بادى على وجهه

قطع

---

مشهد ٢	شارع بالحلمية الجديدة	نهار / خارجي
--------	-----------------------	--------------

---

الشارع به مجموعة من الفيلات ، تحيط بها حدائق ، الأشجار تملأ المكان ، يدخل أمين بك على حصانه ، ووراءه المراسلة . يقف الجنديان اللذان يحرسان الباب ( انتباه ) بينما يقوم ثالث بضرب نوبة « سلام سلاح » على البروجي . يترجل أمين بك ، يدخل قصره وهو يرد التحية .

قطع

---

مشهد ٣ حديقة قصر أمين بك نهار / خارجي

عدد من الجنود يقومون بالتحية ، وكذلك الساعي جنايتي القصر ، أمين بك يرد التحية ، يسير نحو الباب الداخلى فى مشية عسكرية ، جندى يفتح له الباب الداخلى وهو يؤدى التحية . . . يرد التحية ، يدخل

قطع

---

مشهد ٤ داخل فيلا أمين بك نهار / داخلي

أمين بك يدخل من الباب إلى هول كبير يتوسطه سلم . . . يتجه أمين بك نحو السلم ويصعده والحزن بآدى على وجهه . يخرج من الكادر . . .

قطع

---

مشهد ٤ (أ) فيلا أمين - الدور العلوى نهار / داخلي

سنية زوجة أمين بك المصرية (والدة قاسم) تقف فى انتظار وصوله على مقربة من الباب . يدخل أمين بك دون أن يلتفت إليها متجها نحو الجناح الذى به حجرته . . . تتجه الأم وراءه . . . بينما تعبر أمام الكاميرا جارية حبشية تحمل صنية عليها قفل . . .

قطع

---

مشهد ٤ (ب) حجرة نوم أمين بك نهار / داخلي

يدخل أمين بك حجرته وورائه زوجته سنية . . .  
سنية : حمد الله على السلامة يا أمين بيه . . .  
أمين بك المهموم لا يرد على تحيتها . . . بينما تساعد هى فى خلع جاكته ، الأب يتكلم بعد فترة  
أمين بيه : قاسم فين ؟ . . . فى أوضته ؟

سنية : لا ... لسه مارجعش ...  
الأب : ليه ... ده المدارس النهارده خرجت تلاميذها من بدرى والشوارع  
تقريباً فاضية ... يبقى راح فين .  
سنية : زمانه راجع ... هو خلاص ما عدش صغير ... ما يتخافش  
عليه ...  
الأب : لأ يتخاف ... إذا كانوا ما عملوش حساب لأكبر راس فى البلد  
وشالوه من على عرشه ... جيعملوا ايه فى الصغيرين ؟  
الأم فى دهشة ...  
سنية (الأم) : طب واحنا ايش جابنا لولى النعم ... احنا فى حالنا  
وهو يجلس ...  
الأب : لأ ... ابنك مش فى حاله  
وتجلس هى على الأرض تساعده فى خلع حذائه فى دهشة ...  
الأم : مش فاهمة  
الأب : ولا حتفهى ... ولا احعرف افهمك  
تقف وهى تشعر بالآلم ... ولكنها لا تتكلم ... وتتجه لاحضار الجلياب من على  
الشماعة ...  
قاسم : سلامو عليكم ...  
أمين : تعالى هنا يا ولد ... كنت فين لحد دلوقت ؟  
قاسم : كنت مع الشيخ الأفغانى والشيخ محمد عبده  
أمين : أنا مش قولتلك ما تقعدش مع الناس دى ...  
قاسم : الناس دى يا والدى ... كان الخديو توفيق وهو ولى العهد  
بيسيب قصره ويجى يقعد معاها ...  
أمين : ما تردش على ...  
قاسم : مش من الأدب أن حضرتك تكلمنى وما اردش عليك ...  
أمين أمراً  
أمين : قلت ما تردش ... اتفضل من قدامى ... اتفضل ...  
قاسم يتجه إلى خارج الغرفة

قطع

---

مشهد ٤ (ج) الصلاة - خارج غرفة النوم      نهار / داخل

قاسم يخرج ويتجه نحو السلم . . . أمين به يخرج من حجرته . . . وينادى عليه . . .  
أمين به : استنى هنا يا أفندى . . .  
يتوقف قاسم أمين على السلم أو على مقربة من السلم  
الأب مستطردا . . .

الأب : تقدر تقولى خارج دلوقت ليه بتحدثانى يا ولد ؟

نرى فى الخلفية الجارية السمرء

قاسم : لا يا والدى . . أنا خارج الجنية اشم شوية هوا . . إذا سمحت لى  
يكمل قاسم نزوله ويتجه أمين نحو غرفته . .  
أمين : انتفضل يا أفندى . . روح زى ما أنت عايز . . انصرف  
قطع

---

مشهد ٤ (د) غرفة نوم أمين بك      نهار / داخل

يدخل أمين بك غرفته . . . مرة أخرى ونرى زوجته تقف فى منتصف الحجرة وهى تمسك  
بالجلباب

الأم : احضّر لك الغدا

الأب : لا . . . ما ليش نفس لاي أكل .

تتجه نحو السرير تستدير لمواجهته

الأم : بأقول ايه يا أمين به ؟

يرفع راسه نحوها . . . والحزن قد ارتسم أكثر على وجهه . . .

أمين به : سيبينى دلوقت لوحدى

قطع

---

مشهد ٤ (هـ) الصلاة . خارج الغرفة      نهار / داخلي

تخرج سنية وهي ساهمة متجهة إلى جناح الحريم في نفس الدور . . . تصطدم بالجارية السوداء ( كهرمانة ) التي تحمل صنية عليها فنجان قهوة  
كهرمانة : فيه حاجة يا ست ام قاسم ؟  
ام قاسم : لا لا ما فيش . . .  
تتجه ام قاسم نحو حجرتها بينما تتجه كهرمانة وهي تنظر خلفها نحو ام قاسم إلى حجرة مجاورة

### قطع

مشهد ٥      غرفة زوجة الأب - تفيدة      نهار / داخلي

الجارية السوداء كهرمانة تدخل على الزوجة الثانية لأمين بيه . وهي تركية . . عمرها مقارب لعمره تقريبا . . .  
كهرمانة : أكيد فيه حاجة حصلت بين أمين بيه وستى سنية .  
تفيدة في لهفة  
تفيدة : ايش عرفك . . .  
كهرمانة : خارجة من أوضته مش شايقة قصاها . . . ووشها  
مقاطعة  
تفيدة : وعرفتني ايه السبب . . .  
كهرمانة : مش عارفة - لكن شفت وسمعت أمين بيه بيزعق لسى قاسم  
ويقول . . .  
مقاطعة مرة أخرى . . . بحب  
تفيدة : زعق لقاسم ؟ ازاي كهرمانة . . أنا قلت له ألف مرة مش يزعق  
له . . . قاسم ده حبيبي أنا  
كهرمانة : ما أنتي عارفة يا تفيدة هانم سيدى لما يزعل ما بيعملش حساب  
لحد  
تفيدة : مسكين قاسم حبيبي مسكين . .

كهرمانة تمصمص شفتيها لتظهر تعاطفها مع نفيدة في حياء لقاسم . .  
 كهرمانة : يعنى ما كانش قاسم افندى ده بقى ابنك انتى ؟  
 نفيدة : حكمة ربنا كهرمانة ، أنا نفيدة هانم بنت الأثراك مش اخلف ،  
 والفلاحة دى هى اللى تجيب لأمين بك الولد . . . حكمة ربنا ،  
 لكنى أنا مش اقدر اعترض على ربنا كهرمانة ، مش اقدر .

قطع

مشهد ٦ حديقة قصر امين بك نهار / خارجى

قاسم يجلس على أحد المقاعد وعلى وجهه ضيق ، وردة تأتى من النافذة المواجهة فى  
 القصر المجاور ، ينتظر نحو النافذة ، يجد الفتاة توارب نافذتها ، يضرب يقبضته الهواء ،  
 نفيدة هانم زوجة أبيه قادمة ، تتكلم بصوت مسموع قبل أن تصل إليه  
 نفيدة : فين ولد قاسم حبيبي ؟ فين ولد قاسم ؟ قاسم حبيبي قاسم . . له  
 تزعل أبوك ولد ؟

تحتضنه

قاسم : والله ما عملت حاجة ، هو شايف انى لسه طفل ، مش عايزنى أخرج  
 ولا أقابل حد  
 نفيدة : تمام قاسم حبيبي انتى لسه صغير  
 قاسم : أنا مش صغير . أنا حترج السنة دى من مدرسة الادارة والألسن  
 العليا

بفرح

نفيدة : صحيح ولد خلبوص حبقى موظفة كبيرة ؟ امان يا ربى تعرف ولد  
 قاسم ، لما تخلص مدرسة حاعمل لك حفلة مش فيه مخلوق شاف  
 زيهأ أبدا فى مصر  
 قاسم : كتر خيرك يا أمى  
 نفيدة : لكن عشان خاطرى قاسم ، بلاش امشى فى الشارع مع العيال  
 الوحشين ، اعمل زيطات زمبيطات . . .  
 قاسم : عيال وحشين ايه بس ؟ أنا باقعد مع أكبر ناس فى البلد

تفيدة : ناس دول باشوات ؟  
 قاسم : لا  
 تفيدة : بهوات ؟  
 قاسم : لا  
 تفيدة : امال ايه ولدنا قاسم ؟  
 قاسم : الناس دول أصحاب فكر ، شعراء ، أدباء ، جرنالجية  
 تفيدة : يعنى فلاحين أفندم ولا أترك ؟  
 قاسم : هو كل اللي يهملك يا أمى فلاحين ولا أترك ؟  
 تفيدة : طبعا قاسم !  
 قاسم : أنا بقى اللي يهمنى أن الناس دول بيفكروا ازاي يصلحوا حال  
 البلد ، ازاي يتنهضوا بمصر  
 تفيدة : احنا مالنا ومال مصر قاسم ؟ مصر دول فلاحين ، احنا أترك  
 قاسم : لا بقى ، أنا مصرى ، اتولدت فى البلد دي ، وما اعرفش لنفسى بلد  
 غيرها

لقاسم

تفيدة : امان يا رى . . . ولدنا قاسم اتجنن . . . عايز تكون فلاح ولد ؟  
 امان يا رى

قطع

---

مشهد ٦ (ب) حجرة قاسم نهار / داخلي

الأم : بس أنا خايفة والدك يزعل . أو يفتكرك مش فخور انك تركى زيه  
 قاسم : بس أمى مصرية  
 الأم : برضه الأترك لهم وضعهم  
 قاسم : حضرتك والدك بيه وعمك باشا وأهلك أعيان الصعيد  
 الأم : عارف اللي أهم من ده كله ايه ؟ انى أمك يا قاسم . . ريتا يجبر  
 بخاطرك

قطع



قاسم أمين مع أمه

الاستاذة كريمة وبي رفاعه



لقطة عامة للجامع من الخارج ، باب الجامع ، قاسم أمين يخلع حذاه ويدخل  
قطع

حلقات العلم منعقدة حول الأعمدة ، الطلبة من كل الجنسيات كما يظهر من ألوانهم  
وثيابهم قاسم يستوقف واحداً

قاسم : باقول لك إيه يا مولانا . . ما شفتش سعد زغلول ؟

الطالب : شفته . تلاقية قاعد ورا المنبر بيذاكر

قاسم : متشكرين

يسير نحو المنبر . سعد بتياب الأزهر ( ٢٠ سنة ) يمسك كتاباً مغلخاً في يده ويقوم بالتسميع  
دون صوت

قاسم : السلام عليكم يا شيخ سعد

يفتح سعد عينيه ، يراه ينهض فائحاً ذراعيه

سعد : قاسم أمين ؟ وعليكم السلام ورحمه الله وبركاته الأزهر نور

قاسم : منور بأهله

سعد : أي ريح طيبة القت بك ؟

قاسم : أنت اللي قاعد لحد دلوقت ليه ؟ مش النهاردة ميعاد جلسة الشيخ  
الأفغاني ؟

سعد : مستنى الشيخ محمد عبده ، عنده جلسة صلح ، واحد بلدياته قصده

يصلح بين بنته وجوزها ، وقال لى استثناء

قاسم : طب ياللا بينا نروح له ، يمكن نتعلم منه ازاي نصلح بين الناس

يتجهان نحو محمد عبده ، قاسم يسمع من ينادى عليه

حسن : يا قاسم افندى . . يا قاسم افندى

ينظر نحو مصدر النداء ، فترى حسن وهو شاب فى مثل عمره ، افندى وليس أزهرياً

قاسم : حسن أفندى زميل الدراسة وجار السكن ؟ يا أهلاً

حسن : أهلاً بك  
قاسم يشير نحو سعد للتعريف  
قاسم : الشيخ سعد زغلول  
حسن : وهل يخفى القمر ؟ داحتنا معرفة قديمة قوى - مش كده يا شيخ  
سعد ؟  
سعد : كده يا حسن أفندى  
قاسم : لكن قل لى ، ايه اللى جابك الأزهر وأنت زى حالانى تلميذ فى  
مدرسة الإدارة  
حسن : أبويا يا سيدى الحاج يوسف متخاتق مع نساياه وجابين الأزهر  
يحكموا الشيخ محمد عبده بينهم  
سعد : هم اللى عند الشيخ دول قرايبك ؟  
حسن : باقول لك أبويا ونساياه  
قاسم : نساياه دول اللى هم خيلانك ؟  
حسن : لا يا سيدى ، نساياه أهل واحدة من زوجاته الثلاثة التانيين ، أصل  
أبويا ما يقدرش يقعد وعلى ذمته أقل من أربع سنات ، فلاح شديد  
سعد لقاسم  
سعد : طيب ياللا بينا نحضر المجلس ونتنظر مولانا لحد ما يخلص  
يواصلون السير نحو المجلس

قطع

---

مشهد ٨ (أ) الجامع الأزهر نهار / داخلى

حلقة حول الشيخ محمد عبده ، فيها الحاج يوسف والد حسن وأصهاره . . . يأتى الشباب  
الثلاثة ويجلسون على طرف الحلقة ، الشيخ محمد عبده للحاج يوسف  
محمد : يا سيد يوسف ، الصلح خير ، صالح الست بدل ما تطلقها .  
يوسف : يا مولانا أنا زهقت من الست دى ، حتغصبونى على معاشرتها ؟  
محمد : ما حدش بيغصب حد ، والإسلام دين الحرية ، لكن أنت بينك  
وبين الست ولاد والطلاق . . .

يوسف : الطلاق مالوش دعوة بالولاد ، ولادى أنا ملزوم بيهم الخير كثير  
والحمد لله

محمد : الولاد مش محتاجين فلوس ويس يا حاج يوسف الولاد محتاجين  
أسرة فيها علاقات بين الأب والأم

يوسف : سبحان الله . . يا مولانا أنا مطلق لحد دلوقت خمسة ، مخلف  
منهم كلهم ، والولاد والحمد لله عايشين كلهم مع ولاد الأربعة  
اللى على ذمتى وكل طلباتهم مجابة .

محمد عبده يهز رأسه فى أسى لأن الرجل لا يفهم ، والد الزوجة يبدو عليه الفقر  
والد الزوجة : يا حاج يوسف ، ، احنا شاربينك وإذا كانت بتنى غلظت قل  
لى وأنا . . . أريها .

يوسف : بصراحة يا حميايا بتتك ماغلطتش  
والد الزوجة : واشمعنى بتنى من دون الأربعة ؟ ولا عشان احنا يعنى على قد  
حالنا ؟

يوسف : شوف يا أبو محمد ، بتتك قسمتها معايا كده نفسى خلاص مش  
رايحه لها

محمد : يا سيدى ، رينا سبحانه وتعالى بيقول فى سورة النساء ﴿ فان  
كرهتموهن فاعسى أن تكرهوا شيئا ويجعل الله فيه خيرا كثيرا ﴾  
وكثر الطلاق والجواز غلط الطلاق هو أبغض الحلال عند الله ،

الحاج يوسف يقول وقد نفذ صبره

يوسف : قلت يا مولانا مش عاوز أعاشرها حاطلقها يعنى حاطلقها أنا حر  
هو العشرة بالعافية يا ناس ؟

محمد : ومادمت ناوى ومحكم رأيك على الطلاق جيتنى ليه ؟  
يوسف : أنا ماكتش عايز آجى . . . أهل الست هم اللى اصروا اتنا نجيلك  
قبل الطلاق

والد الزوجة : كنا عايزينك تقنعه يا شيخ محمد بان اللى بيعمله ده ظلم  
يوسف : اللى ياخذ حقه فى الزمن ده يبقى ظالم ؟

الشيخ محمد عبده ينظر له بازدراء وحزن

قطع

محمد عبده وقاسم وسعد يركبون عربة حنطور

قاسم : معقول التعسف ده ؟ الست ما عملتش حاجة ويطلقها عشان يتجوز

غيرها

سعد : الغريب أنه متجوز لحد دلوقت ٩ مرات وحيطلق عشان يتجوز

العاشرة

قاسم : فى رأى يا مولانا أن الرجالة فى زماننا بيسبتوا استخدام حق الطلاق

الى رينا شرعه ، لأنهم عايزين يرضوا غرورهم وغرايزهم وده

للأسف سوء استخدام للسلطة اللى رينا اداها لهم

محمد عبده يضحك ويقول بهدوء

محمد : شوف يا قاسم ، إذا كان الرجال فى بلدنا بيشتكوا من ظلم الحكام

فالستات فى البيوت بيشتكوا من ظلم الرجال وإذا كنا نحن أهل

الفكر ننادى برفع الظلم عن الناس من الناحية السياسية فالبلد من

الناحية الاجتماعية يحتاج لمن ينادى برفع الظلم عن المرأة زى

الحالة اللى اتتوا شفتوها وغيرها كتير

الحنطور يسير

قطع

هذه القهوة كانت أمام المسرح القومى الحالى فى المبنى الذى تم هدمه أخيرا ووراء الأوبرا

القديمة وعلى يمينها مبنى البوستة الحالى . لقطة للمقهى من الخارج ، عليه لافتة « مقهى

متاتيا » ، تدخل الكاميرا من الباب لترصد مجلس الأفغانى

قطع

يجلس الأفغانى وحوله مريديه ، التديم فى ملابس أزهرية . . اديب اسحق ملابس شامية عارف افندى ملابس أفغانية

التديم : افتكريا استاذنا الأفغانى . . أن . . ما يعزبك عن عزل الخديو  
إسماعيل هو أن اللى تولى العرش من بعده الخديو توفيق اللى كان  
تلميذ لك ومن مريدك

الأفغانى : الحقيقة الوضع ليس به اى عزاء أو اطمئنان بعد ما نجحت  
إنجلترا وفرنسا فى إقناع السلطان بعزل الخديو إسماعيل  
اديب اسحق : پس طول ما فى واحد زيك زى جمال الدين الأفغانى . .  
حفضل متفائلين

فى نهكم

الأفغانى : أنظن هذا يا اسحق . . ؟

اديب : أظن ؟ بل أنا متأكد أن التاريخ سيذكر أن آراءك وكلماتك كان لها  
الدور الأكبر فى إيقاف الناس وإحداث التغيير . . اراء وكلمات  
ستكون خالدة

يقول من الذاكرة بإعجاب واضح

اديب : إذا صح أن من الأشياء ما ليس يوهب ، فاهم هذه الأشياء الحرية  
والاستقلال ، لأن الحرية الحقيقية لا يهبها الملك أو المسيطر عن  
طيب خاطر وكذلك الاستقلال بل هاتان النعمتان انما حصلت  
عليها الأمم بالقوة والاقتدار .

افندى من الجالسين فى إعجاب

افندى ١ : يا عينى

افندى آخر

افندى ٢ : يا سيدى . . والله لانت مكمل يا اديب يا اسحق

اديب : « لاخير فى حق لا تدعمه القوى » . . مامات واحد فى حب أمه  
الا اجته »

استحسان عام

أصوات : الله . . الله . . الله احسنت يا اديب يا اسحق

يرد التحية بيديه

الأفغانى : يا سادة والله ما كانت آرائى لشمر لولا انها وجدت فيكم تربة

صالحه وفي مصر مناخاً مناسباً

يدخل محمد عبده (٣٠ سنة) يراه النديم

النديم : الشيخ محمد عبده كمان وصل ومعه خيرة الشباب سعد زغلول

وقاسم أمين

محمد / سعد / قاسم : السلام عليكم

سلامات

الجميع : وعليكم السلام ورحمة الله

الأفغانى : وعليكم السلام يا شيخ محمد ، أهلاً يا شباب . . اتفضل

بجوارى يا شيخ محمد

يفسحون مكاناً للشيخ محمد عبده بجوار الأفغانى

الأفغانى : ما رأيك يا شيخ محمد فيما حدث ؟

الشيخ محمد عبده : أنا فى تصوورى . . أن وصول النفوذ الإنجليزى

والفرنسى فى مصر للدرجة التى تؤدى لعزل الخديو . . نذير قد

يكون قيد على أى قرار يتخذه الخديو الجديد

الأفغانى : ولكن الخديو توفيق تلميذى كان يجلس هنا معكم

وسمع آرائى ويوافق عليها . . إنه أملنا فى الإصلاح

محمد : هذا رأيك يا مولانا

الأفغانى : ورأيك أنت ؟

محمد : رأى أن الناس هم الضمان الحقيقى لأى مكسب

النديم : يا سادة أجلوا الجدل ده لوقت تانى اسمعوا أنا عازمكم كلكم

على مشروب على حساب أديب اسحق

أديب بلهجة شامية

أديب : يا أخى ، اللي يفنجر يفنجر من جيبه

النديم : هو أنا جيبى فيه حاجات وما فنجرتش

النديم : ينادى على الجرسون

هات يا ابنى مشارب ساقعة للناس دى

الجرسون : وعندك دسته مشارب ساقعة للبهوات

النديم يأخذ مبادرة الكلام

النديم : مارايكم يا سادة لو ادينا الفرصة لتلاميذ الأزهر والمعاهد العليا

يقولوا لنا رأيهم فى اللى بيحصل ؟ . .

الأفغانى : احسنت والله يا نديم . هيا يا شباب اسمعونا صوتكم . ابدأ أنت يا قاسم

بهده تآم ، بينما الجاسوس يرهف السمع ويدقق النظر

قاسم : فى رأى أن الكل حيقدر يحكم على الخديو توفيق فعلا بعد ما

بيان موقفه من الدستور . ومن رجوع مجلس النواب

الأفغانى : احسنت والله يا ولدى . وأنت يا سعد ؟

سعد : أنا شايف أننا ما نسبش الأمور فى ايدين افندينا لوحده . لازم

نضغط كما علمتنا حتى تسير الأمور فى المسار اللى احنا

عايزينه . . وعشان كمان تعلم كل من اتجلترا وفرنسا أن الدستور

والحياة النيابية هى مطلب كل المصريين

الأفغانى : عظيم . . وكيف ترى الضغط يا سعد ؟

سعد : نتظاهر مثلاً . .

الأفغانى : لا بأس . . نظم مظاهرة من زملائك فى الأزهر . . ودعنا نرى

النتيجة

قطع

---

مشهد ١١	أمام قصر عابدين	نهار / خارجى
---------	-----------------	--------------

سعد ووراءه مجموعة من طلاب الأزهر ، سعد يهتف

سعد : الدستور . . الدستور بدل الظلم وبدل الجور

الجميع : الدستور الدستور . . بدل الظلم وبدل الجور

سعد : يا خديوى أنت أملنا رجع لنا مجلس نوابنا

يخرج شريف باشا رئيس النظار من شرفة القصر وإلى جواره أحد الياوران . . الياور يشير

للطلبة كى يسكتوا

ياور : سكوت يا سادة . . سكوت . . حضرة شريف باشا ناظر النظار

## حيكمكم سكوت

سعد يتوقف عن الهاتف ويشير للآخرين ليتوقفوا

شريف : يا ابنائي . سمو الخديوى توفيق شاب زيكم وصديق للشيوخ  
الأقفاى كل همه الإصلاح لكن ادوله فرصه يدرس الأمور لأن  
السياسة تحتاج لدراسة وحسابات دقيقة ، منعاً للخطأ .

سعد : نحن نثق فى سمو الخديوى ، لكن اردنا أن نوصل له صوت الأمة  
شريف : صوتكم وصل ، وأنا اشكركم باسم الخديوى

سعد لرفاقه

سعد : باللابينا يا شباب

يبدأون فى الانصراف

## قطع

نهار / داخل

قاعة العرش

مشهد ١٢

الخديوى توفيق على العرش وشريف باشا يقدم له مجلدا

شريف : انفضل يا افتدينا

توفيق : إيه ده يا شريف باشا ؟

شريف : الدستور يا ولى النعم سموك عارف إنى لما توليت رئاسة النظار

وعدت الناس بإعداد دستور تحكم البلاد طبقاً لمبادئه ، وكان

المفروض أن يعلن الدستور فى عهد والدك إسماعيل باشا حفظه

الله لكن ظروف البلاد لم تسمح بالإعلان واعتقدان أعظم ما يمكن

أن تبدأ به عهدك الميمون هو الدستور يا ولى النعم .

ينهض توفيق ، يعقد يديه وراء ظهره ويتمشى فى قاعة العرش مفكراً ، وشريف يتابعه .

يأتى توفيق لشريف

توفيق : وبعد الدستور يا شريف باشا ، إيه الخطوة الثانية

شريف : مجلس النواب ، البرلمان

توفيق : مش شايف أن الوقت بدرى على الحاجات دى يا باشا ؟

شريف : بالمعكس الدستور ومجلس النواب همه الضمان لحكم هادى



ومستقر فى عصرك يا افندينا .  
توفيق : الحقيقة . . أنا تقديرى للأمر مختلف  
شريف : معقول ؟

توفيق : شوف يا شريف باشا بالتجربة أقدر أقول لك أن المصريين أول  
شعب نمروا لما الحاكم بيديهم فرصة للمشاركة فى الحكم  
صوتهم بيعمل ، ويبعاضوا الحاكم اللى اداهم فرصة المشاركة  
وأنت فاكرازاى وصلت الأمور لدرجة التحدى أحياناً بينهم وبين  
والدى ، بسبب مجلس الشورى اللى كان عامله  
شريف : سموك عارف انى كنت معاصر لكل الأحداث اللى بتشير إليها  
لكن اللى فاكراه أن موقف عظمتك كان متعاطف مع رأى  
المعارضين

الخدوي يقهقه

شريف : كلامى فيه حاجة تضحكك يا افندينا ؟  
توفيق : شريف باشا ، عهدى بيك سياسى فى غاية الذكاء عشان كده  
أرجوك ما فيش داعى نتكلم فى موضوع معارضتى للوالد دلوقت  
ابقى فكر فيه مرة ثانية على مهلك أكيد حتلاقى فيه حاجة جديدة  
شريف : أوعدك يا افندينا بأنى أفكر فيه مرة ثانية لكن اسمح لى أرجع تانى  
للموضوع الأسمى الدستور ، ومجلس النواب . . سموك موافق  
عليهم ولا مش موافق ؟

مرواغاً

توفيق : موافق طبعا . . لكن مش دلوقت . . الدنيا ما طارتش يا شريف  
باشا

شريف : أذن ما هو الموعد الذى تراه يا صاحب السمو ؟

يحتد توفيق قليلاً

توفيق : إيه ده ؟ أنت بتحاصرني ؟  
شريف : العفو يا ولى النعم لكن أفضل تكون أمور الدولة محددة فى عهدى  
توفيق : وأنا ما عنديش مواعيد محددة  
شريف : فى هذه الحالة أضع مشروع الدستور جانباً وأقدم لك شيئاً آخر  
يخرج من جيبه ورقة

توفيق : إيه دى ؟

شريف : استقالتى من رئاسة النظار

توفيق : بتلوى دراعى ؟

شريف : العفو يا سمو الخديو

توفيق : امال إيه معنى تصرفك ده ؟

شريف : معناه احترامى لكلمتى لأنى لما اتوليت المنصب ده وعدت الناس

بوضع دستور للبلاد ورجوع الحياة البرلمانية ، ومادمت مش

حاقدرو أوفى بوعدى يبقى قعاى فى المنصب مالوش أى معنى .

توفيق : تقصد تظهرهنى قدام الناس بانى ضد . الدستور ومجلس النواب

شريف : العفو يا ولى النعم الموقف ده اختيار سموك ومش مطلوب منى

أبدأ أنى اساهم فى اخفاؤه

ينحنى

شريف : يااذنك

ينصرف شريف ، يقف الخديو وفى عينيه غيظ يثتم

توفيق : طيب يا شريف

قطع

---

نهار / خارجى

حديقة قصر أمين بك

مشهد ١٣

يبدأ المشهد بالشباك المواجه يفتح والبنت تنظر لقاسم الواقف وتبتسم ، قاسم يشير لها ،

تعض على شفتها خجلاً ، يشير لها انزلى ، تشير إليه لا أستطيع يكرر إشارته تشير له بمعنى

خائفة يلح عليها فجأة ترتبك تشعر بأن أحداً ينادى عليها تغلق الشباك بسرعة قاسم يلوح

بيده فى منتهى الضيق

قطع

---

مشهد ١٤ مبنى عسكري نهار / خارجي

يقف على بابہ ضابط یمتطی حصانا ، یتقدم جندي المراسلة لیمسك الحصان ، یتزل الضابط ، الحرس یؤدی التحية له وهو یدخل  
قطع

مشهد ١٥ مكتب الامير الای أمين بك نهار / داخلي

أمين مع الضابط  
أمين : حضرة ناظر الحربية باعت لی أنا  
الضابط : آیوه  
أمين : ما تعرفش عایزنی لیه ؟  
الضابط : کل اللی قاله لی إن سعادتک تتفضل معايا ونروح له فورا  
أمين : على کل حال سعادته يؤمر  
یضع الطربوش على رأسه ويشیر للضابط نحو الباب  
أمين : اتفضل  
یتجهان للخارج

قطع

مشهد ١٦ نظارة الحربية نهار / داخلي

الضابط یسير ووراءه أمين بك یصلان إلى باب غرفة مكتوب عليها ناظر الحربية  
الضابط : لحظة واحدة ابلغ حضرة ناظر الحربية  
أمين : تفضل  
یدخل الضابط ، أمين بك یدو علیه القلق ، یمخرج الضابط  
الضابط : اتفضل یا سيادة الامير الای  
یدخل

قطع

يدخل أمين بيه ، يقف أمام حضرة الناظر وقفة عسكرية ، يؤدي التحية ، ناظر الحربية ( تركي ) يرد التحية بلا مبالاة وينظر إلى أمين بك مدققا ثم ينهض ويسير نحوه حتى يواجهه

الوزير : إيه يا سيادة الامير الالى معقولة مش عارف تربى ابنك ؟

أمين : ماله ابني يا سعادة الباشا

الوزير : بيقعد مع الأفغانى ومحمد عبده والتديم ومش عاجبه سياسة افندينا

أمين : معقول يا حضرة الناظر ؟ ابني ده لسه ولد صغير فى مدرسة الادارة

وأكيد ما فيش فى دماغه أى حاجة تجاه سياسة افندينا غير كل خير

الوزير : لا يا سعادة الامير الالى ، للأسف ، حضرتك مش عارف حاجة

أمين : سعادة الباشا

الوزير : ما تقاطعنيش . . ابنك يا سعادة الامير الالى واحد من تلاميذ

الأفغانى ومحمد عبده المخلصين ولازم يقطع صلته بيهم فورا

والا . . .

أمين : من غير والا يا سعادة الباشا ابني وأنا من خدم الأسرة العلوية وإذا كان

حصل منه غلط يتصلح

يجلس الوزير على مكتبه

الوزير : حاشوف أمين بك أنت فى الأول وفى الآخر ضابط ، وعيب قوى

أنك تسبب الخدمة لأن ابنك مفلوت عياره

أمين : تمام يا حضرة الناظر

الوزير : عيب كمان ان ابنك وهو محسوب على الأتراك ، ويشترك مع

مصريين فلاحين فى لعب العيال ده

أمين : تمام يا حضرة الناظر . .

الوزير : دلوقت تقدر تتفضل ، المقابلة انتهت ، انصرف

يؤدي التحية ، ويدور للخلف بحركة عسكرية ، الكاميرا تتابع سيره للخروج مع مارش عسكرى

قطع

يبدأ المشهد بقاسم وحده في الكادر مدافعا عن نفسه  
 قاسم : يا والدي حضرتك عارف ان افندينا نفسه كان يقعد مع الشيخ  
 الافغانى والشيخ محمد عبده لحد وقت قريب  
 أمين : هو افندينا يقعد زى ما يعجبه ما حدش يقدر يحاسبه  
 قاسم : لكن يا والدى . .  
 أمين : ما لكنش ، أنا لا يمكن أسمح بأن حياتى الوظيفية تنتهى بالرفد  
 عشان ابنى ما عرفتش أربيه . .

آمرأ

أمين : مرواح قهوة متاتيا بعد كده ما فيش ، قعاد مع الشيخ الأفغانى  
 ومحمد عبده ما فيش ، كلام فى السياسة ما فيش مفهوم ؟  
 قاسم أمين يغلى لكنه لا يستطيع أن يفعل شيئا ، يقول رغما عنه  
 قاسم : مفهوم

قطع

قاسم وسعد يسيران ، يصلان إلى عامود يجلسان  
 سعد : أقعد  
 قاسم : دبرنى يا سعد ، أعمل إيه ؟ أنا محتار بين رغبتى فى صحة الأفغانى  
 ومحمد عبده وبين فصل والدى من وظيفته . . أعمل إيه ؟  
 سعد : تعمل الواجب  
 قاسم : وإيه هو الواجب  
 سعد : تكون بار بابويك  
 قاسم : وابعد عن الاساتذة العظماء دول ؟  
 سعد : اذا كان رينا ما بيحاسبش المضطر مين يقدر يلومك لو حافظت على  
 والدك ؟

قاسم : اختيار صعب يا صاحبي  
سعد : لكن ما فيش منه بد ، ومع ذلك سييك أنت ، أنا ناوى أنسيك الهم

ده

قاسم : ازاي ؟

سعد : فيه راجل شامى اسمه يوسف خياط بيشخص مسرحية عن هارون  
الرشيد على مسرح الأوبرا ومعا مطرب جديد من إسكندرية اسمة  
سلامة حجازى ، بيغنى بين الفصول ، يقولوا ان صوته ولا عبده  
الحامولى أنا يا سيدى عازمك عشان تشوف وتسمع معايا المطرب

ده

نسمع صوت المطرب

مزج

---

مشهد ٢٠ مسرح دار الأوبرا ليل / داخلى

الشيخ سلامة حجازى يغنى . سعد زغلول وقاسم أمين فى الصالة يسمعان ، قاسم يهز  
رأسه إعجابا

الأغنية : شكوتى فى الحب عنوان الرشاد والجوى حظى ولذاتى السهاد .

سحت بارمال الدموع محاجرى لما تزايد بالشجن هاجرى .

سلوا أحمره الخدين عن مهجة الصب ودر ثناياكم عن المدمع الصب .

تنتهى الأغنية ، تصفيق ، الشيخ يحى

قطع

---

مشهد ٢١ تحت البواكى فى شارع محمد على ليل / خارجى

يسير سعد وقاسم الذى نراه شاردا

سعد : بتفكر فى إيه يا قاسم ؟

قاسم : فى الشيخ سلامة حجازى . . يا ترى إيه احساسه وهو واقف قدام

كل الناس دول اللي بيسففوا له ؟ وإيه احساسه لو أن غناه فى يوم ما  
عجبهمش وشتموه ؟

سعد : أنت إيه رأيك ؟

قاسم : رأى أن مواجهه الناس هى أصعب حاجة فى الدنيا

سعد : أنا رأى عكس رأيك تماما تعرف أنا دايما أتخيل نفسى واقف  
أخطب فى الناس وقادر أحرك مشاهرم وأخليهم يصرخوا من  
الإعجاب ، أو يسكتوا كأن على رؤوسهم الطير .

قاسم : سبحان الله . أنت عارف أنا بأحلم بأيه أنا بأحلم يا سعد أنى بعد ما  
أخلص مدرسة الادارة والألسن أسافر فرنسا . أدرس القانون فى  
جامعة أوروبية ، وأشوف باريس ، وأعاشر أهلها وأزور متاحفها  
وأفترج على مسارحها ، وأعرف الدنيا على حقيقتها

قطع

---

ليل / خارجى

حديقة قصر أمين بك

مشهد ٢٢

قاسم يسير متجهاً للباب الداخلى يسمع صوت بسبسه ، ينظر نحو شباك الجيران ، يرى  
البت فى ضوء القمر تنتظر فى نافذتها يدفع يده ليحيها ، لترمى له وردة ، يلتقطها ، تدخل  
وتغلق الشباك

قطع

---

ليل / داخلى

غرفة قاسم

مشهد ٢٣

قاسم بثياب النوم (جلاية) يأوى إلى سريره ، ويستند بظهره إلى السرير ، يقرب الورد من  
أنفه ، يشمها بعمق ، ثم يغمض عينيه فى نشوة  
قاسم : الواحد دلوقت يقدر ينام

قطع

---

مشهد ٢٤ شارع بحلوان ليل / خارجي

الشارع شبه خال ، النديم يقترب من باب أحد القصور ينظر يمينا ويسارا لا يجد أحدا .  
البواب يقف ، النديم يقول له :

النديم : إيه أخبار الورد النهاردة ؟

البواب : مفتاح كرامة للنبي . . اتفضل . .

يدخل

قطع

---

مشهد ٢٥ أمام باب القصر الداخلي ليل / خارجي

النديم يرق دقة معينة يفتح الباب فتحة صغيرة وتطل منه رأس أحد الأتباع

النديم : أمان

التابع : أدخل

يدخل

قطع

---

مشهد ٢٦ قاعة في فيلا ليل / داخلي

النديم يبحث عن مقعد ، المجموعة تجلس الأفغاني ، محمد عبده ، أديب اسحق ،  
عارف افندي آخرون

الأفغاني : اجلس يا نديم

يجلس النديم

أديب : أنت متأكد أن هرايي جاي يا نديم ؟

النديم : هو اللي قال لي أنه جاي

أديب : ربنا يسوقه

الأفغاني : وصل هرايي

يقفون احتراماً له ، يفسحون له مقعداً



النديم : أنفضل هنا يا عرايى بك

أديب : لك وحشة والله

عارف : حلوان كلها نورت

عرايى يلاحظ أن محمد عبده ، لم يتحرك مطلقا

عرايى : إيه يا شيخ محمد ، ما بترحش بي ليه ؟ زعلان منى ولا حاجة ؟

محمد : وحازعل منك ليه . أهلا بيك يا سيادة الاميرالاي

الأفغانى : لماذا يصبر كل منكم على مناكفة صاحبه ؟ هل أنتما عدوان

عرايى : حاشا لله

محمد : كل ما فى الأمر يا مولانا أنى لا أحب أن يتدخل الجيش فى السياسة

لأن العسكريين يا شيخنا لا يعرفون غير لغة القوة ، وأنا ضد القوة

فى السياسة على طول المخطط

عرايى : على أى حال ده مش وقت الخلاف أنا جيت بس عشان أقول لكم

أن شريف باشا قدم إستقائه والخديوى قبلها

أصوات : معقول ؟ شريف باشا ؟

محمد : الخديو كشف حقيقته بدرى

الأفغانى : بهذه السرعة نسى كلامه معنا وجلسه بيتنا باعتباره واحد منا

النديم : كل وقت وله آذان يا مولانا

أديب : يظهر أن كلام الشيخ محمد عبده لما قال أن الحكام مش همه

الضمان لأى مكسب كان على حق

الأفغانى : أصمت يا أديب يا اسحق حتى تفكر ماذا نفعل ؟

عرايى : أننا لن نسكت على إهمال الحياة النيابية

محمد : حتعمل إيه يا عرايى بيه ؟

عرايى : ح أعمل كتير

محمد : للمرة الألف أكرر : أنا ضد تدخل الجيش فى السياسة

الأفغانى : لماذا تعارض دائما يا شيخ محمد ؟

محمد : يا سادة . . اسمحوالى . . أنا مصرى مثلكم . أتمنى أن يكون

لمصر برلمان ونواب ينتخبهم الناس ، ودستور يحدد العلاقة بين

الحاكم والمحكوم ، لكن هذا كله لا يأتى بالقوة ، ولا يفرضه

الجيش على الحاكم . صحيح أن الحاكم يمكن أن يخاف من قوة

الجيش ، لكن انتهوا اتجلترا وفرنسا لن يتفرجوا على هذا  
صامتين ، وربما تدخلوا إلى جانب الخديو ، وهنا تكون الكارثة  
الأفغاني : شيخ محمد ، من فضلك ، لا تثبط همتنا  
محمد : أنا عارف أن كلامي غير مرغوب فيه . عشان كده حامشي . . .  
سلام عليكم  
يتصرف محمد ، الأفغاني لعرايى والأخريين  
الأفغاني : نكمل يا سادة

قطع

مشهد ٢٧ بيت سعد زغلول ليل / داخلي

سعد يستقبل شيخه محمد عبده . يجلس وعليه علامات ضيق ، يزفر  
سعد : اتفضل يا استاذنا . . اتفضل ما لك ؟  
محمد : قلقان يا سعد ، قلقان ولقيت نفسى جنب منك قلت أجى اففض  
معاك شويه  
سعد : إيه اللي قالقك يا مولانا ؟  
محمد : عرايى  
سعد : عرايى رجل طيب ، فلاح زينا وما فيش فى قلبه غير حب الناس  
محمد : عارف . . لكن المشكلة أن عرايى عايز الجيش يكون له دور فى  
السياسة ، وأنا خايف قوى من الموضوع ده  
سعد : ليه يا مولانا ؟  
محمد : شوف يا سعد ، التغير الحقيقى بعمله الناس مش الجيش . اللي  
عايز يغير فى بلده مش هو اللي يحرك قواته ، لكن هو اللي يربى  
الشعب تربية صحيحة يعرفه حقوقه وواجباته ، يعلمه ازاي يحافظ  
على حقه وازاي يؤدي واجبه  
سعد : لكن تربية الشعب عايزة وقت طويل  
محمد : وماله ؟ إيه يعنى عشرين ثلاثين سنة فى عمر شعب ؟  
سعد : لكن الناس دايما بتفضل الشئ الأسهل والأسرع

محمد : وهنا مكنم الخطورة

سعد : والحل ؟

محمد : مش عارف ، لكن لازم يكون فيه حل . . لازم  
قطع

نهار / داخلي

غرفة قاسم

مشهد ٢٨

قاسم يسرح شعره ، تدخل أمه

الأم : ياللا يا قاسم ، ابوك قعد على السفرة ، وأنت لسه فى أوضتك ؟

قاسم : يا ناس . . هو ذنب ؟ أبويا راجل عسكرى بيقوم من بدرى عشان

عنده شغل بدرى أنا اصحا معاها ليه ؟ وأفطر بدرى ليه ؟ ماليش نفس

الأم : قاسم . . بتقول إيه ؟ طاعة أبوك لازمة يا حبيبى

قاسم : حتى الأكل فى البيت ده بتاكله غصب عتا ؟ حاضر يا أمى

يتجه للباب ، يتوقف

قاسم : قولى لى يا أمى ، أنا من يوم ما اتولدت ما شفتكيش قاعده تاكلنى

مع والدى على سفره واحدة . . ليه ؟

الأم : أكل معاها ؟ عيب يا ابنى

قاسم : عيب ليه ؟ أنتى مش مراته ؟ ما تاكليش معاها ليه ؟

الأم : اهلنا علمونا كده

قاسم : وعلموكم كده ليه

الأم : يوه . . . وأنا ايشعرفنى ؟ قالوا لنا الست ما تاكلش مع جوزها

وخلاص ، طب ده أمى الله يرحمها كانت تفضل واقفة تخدم على

أبويا لحد ما يخلص أكل ويعديه أخواتى الصبيان والآخر تقعد هيه

والبنات ياكلوا

قاسم : طب ليه ؟ احنا بندرس فى الشريعة أن الراجل والست متساويين فى

الخلق ، ربنا زى ما خلق ده خلق دى . .

الأم : باقول لك إيه يا قاسم يا ابنى ، أنا مش فاهمة حاجة من الكلام بتاعك

ده سايقه عليك النى تبطل كلام وتجرى على الفطار بدل أبوك ما

ييهدلنا احنا الاثنين

صوت الأب يأتى من بعيد

أمين : يا قاسم . . يا ولد يا قاسم

الأم : عاجبك كده ؟ اهو بينادى عليك

قاسم : أدينى رايح له

يتجه لباب الغرفة

قطع

نهار / داخل

سفرة قصر أمين بك

مشهد ٢٩

قاسم وأبوه ياكلان ، الأب يؤنب ولده

أمين : النظام لازم يحترم . أنت لو عسكرى عندى كنت اديتك جزا على

التأخير ده

قاسم : لكن أنا مانيش عسكرى يا والدى

أمين : حتى المدنيين لازم يتبعوا النظام

قاسم : حاضر يا والدى . . آسف

تأتى كهرمانة أثناء الحديث وتقف حتى ينتهى فيخاطبها إلبك

أمين : نعم ؟ واقفة كده ليه ؟

كهرمانة : نفيدة هانم بتقول لسعادتك تمر عليها فى اودتها قبل ما تخرج

أمين : طابور التمام حيستنى عشان نفيدة هانم طالبة الكلام قبل ما أخرج ؟

كهرمانة : أنا . . . أنا . . .

أمين : مش عايز كلام . اتفضلى روى قولى لها البيه مش فاضى

كهرمانة : حاضر يا سيدى

تجرى ، قاسم ووالده ياكلان ، الوالد يتكلم أثناء الطعام

أمين : لما كنت والى على بلاد الأكراد قبل ما أجى مصر كنت عامل نظام

صارم لكل شئ عشان كده ما حصلش أى تمرد طول مدة حكمى

تدخل نفيدة مندفعة تجاه أمين بك

نفيدة : أمين بك . . أنت بتهرب منى ليه اخدم

أمين يقف فى عصبية . .

أمين : تفيدة . . أنت إيه اللي نزلك من فوق ؟ . . هي بقت فوضى . . ؟

محتاج أقولك أن المكان هنا مخصص للرجال

تفيدة : بس أنت مش قاعد مع حد غريب قاعد مع ابني . . .

أمين : ولو . . . النزول هنا باذن وللضرورة . . إيه . . خلاص مش فاهمه

الأصول . . .

تفيدة : ما هو . . .

أمين مقاطعاً

أمين : يا لله يا تفيدة اطلعى على اوضتك أنا مش فاضيلك

تفيدة : امال فاضى لمين افندم ؟ للفلاحة ؟

يشند غضب أمين بيه يضرب المائدة بيده

أمين : تفيدة . . اطلعى على اوضتك

تواصل وهي تبكى

تفيدة : لا افندم . . ده مش عدل ربنا . . . ده ظلم . . . الشرع قال عندى

ليلة . . . وعند الفلاحة ليلة . . . لكن أنت مش بييجى عندى خالص

أمين : كام يوم ماجيتلكيش ؟

تفيدة : عشرة أيام

أمين : العشرة أيام حييقوا شهر . .

تفيدة : شايف أبوك ولد قاسم . . .

قاسم : يا والدى . . .

أمين : لو فتحت بقلك حييقوا شهرين . .

يتجه أمين للخروج عابراً الاثنين ، تفيدة تقول فى اعقابه . . .

تفيدة : أنت راجل ظالم افندم . . . ظالم

قاسم يأخذها فى حضنه مربتاً عليها ويخرجان من الكادر

قطع

مشهد ٢٩ (أ) الطابق العلوى - للفيلا نهار / داخلى راكور

قاسم وتفيدة يدخلان الطابق . . وهو ما زال يحيط ذراعه بها . . الجارية كهرمانة تأخذها منه وتعبر بها نحو حجرتها . . بينما ترى الأم تقف فى منتصف الصالة يتجه نحوها قاسم ويعبران الصالة نحو حجرة قاسم

### قطع

مشهد ٢٩ (ب) حجرة تفيدة بالدور العلوى نهار / داخلى

تجلس تفيدة على كنبه اسطنبولى وكهرمانة تدلك لها رجلها . . وهى لا تزال تبكى . .  
كهرمانة : ستى تفيدة . . عابزة أقولك كلمتين وخافئة أقولهم . .

تفيدة ترفع رأسها وهى تجفف دموعها . .

تفيدة : قولى كهرمانة . . ما تخافيش

كهرمانة : باقول معنى عابزة اكي تضحكى وتفرشى . . وتبطل حزن

وعياط . . وحية أحمر زواق يعنى . . وهدوم نوم شفتشى . . قوم

سيدى . .

وهى تضحك فى خبث . . تفيدة مقاطعة . . وقد تحول البكاء إلى ابتسامة ثم إلى حزن

تفيدة : فاهمة . عابزة تقولى إيه كهرمانة عارفة . . لو لبت وقلعت هدوم

بعدد أيام السنة . . برضه ما فيش فائدة . . هى أم الولد

يا كهرمانة . .

خبط على الباب . كهرمانة تقوم تفتح . نجد أم قاسم . تفيدة تقف فى عصبية . .

تفيدة : جاية لحد هنا فلاحه ؟

أم قاسم تشير لكهرمانة بالخروج

أم قاسم : أخرجى أنت يا كهرمانة . .

كهرمانة تخرج وتقف أم قاسم الباب . وتتقدم من تفيدة . .

الأم : كتر خيرك يا بنت الأصول . . أنا جاية عشان أقولك أن أمين بيه

لا يبجيك ولا يبجبنى . . ما تظلمينش

تفيدة : امال بيروح فين افندم ؟  
 الأم : فى اوضته من ساعة ما يرجع البيت ما يخرجش منها . . من يوم  
 إسماعيل باشا ما انشال وهو مش طايق حد ولا طايق نفسه . .  
 تفيدة : طب واحنا مالنا افندم . . احنا شلنا إسماعيل باشا  
 الأم : أنت ناسية يا هانم أنك ياما حكيتى لى أن الخديو إسماعيل هو الذى  
 جابكم من تركيا لمصر . . وهو الذى عين أمين بيه فى الجيش . .

تفيدة تكمل

تفيدة : وإداله ابعديه كمان . .  
 الأم : يبقى ازاي ما يزعلش عليه كل الزعل ده ؟  
 تبدل نظرتها لها إلى حب . .  
 تفيدة : عندك حق . . أم قاسم اتنى طيبة انت صحيح فلاح . . بس أنا  
 باحيك

قطع

---

مشهد ٣٠      أحد شوارع العاصمة      ليل / خارجى

يدخل حسن وقاسم من أول الشارع يحملان كتبهما عائدين من مدرستهما . .  
 حسن : أنا يا أخى مش فاهم . . الست مرات أبويا اللى اطلقت دى . .  
 قرينتك ولا من بقية عيلتك ؟  
 قاسم : لا قرينتى ولا من بقية عيلتى . . .  
 حسن : أمال زعلان عشانها كل الزعل ده ليه ؟  
 قاسم : لاحساسى انها مظلومة . . ثم انت غريب يا حسن . . مش خايف  
 ان اللى حصل فى مرات أبوك دى ممكن يحصل لوالدتك  
 حسن : أبويا يطلقها معنى ؟ ما افكرش . .  
 قاسم : وجانتلك الثقة دى منين . . ووالدك تغيير الحريم عنده حاجة  
 سهلة . . .  
 حسن : لأن أمى بنت عمه اللى رياه وصرف عليه علشان كده هو يغير  
 فى زوجاته زى ما هو عايز . . لكن ناحية أمى ما يقدرش  
 يهوب .

يتوقف قاسم عن السير وينظر له في حجرة ، يستأنفان السير ويخرجان من الكادر

قطع

---

مشهد ٣٠ (أ) شارع آخر ليل / خارجي . راكور

يدخل الاثنان الكادر ، في عمق الكادر نرى موسيقى ( حسب الله ) تعزف أمام عربات الحنطور حسن وقاسم يتوقفان . . لتبين الموقف

حسن : يظهر أن فيه حد بيتجوز في الشارع النهاردة

الموكب يتوقف أمام فيلا والد حسن

حسن : الله . . . ده الحاج يوسف وعروسته الجديدة

قطع

---

مشهد ٣٠ (ب) أحد المشريات ليل / خارجي

تقف جارية سوداء في المشرية تزغرد . . . ونسمع زغاريد أخرى . .

قطع

---

مشهد ٣٠ (ج) ركن أمام الفيلا ليل / خارجي . راكور

يقف حسن وقاسم يشاهدان ما يحدث . . يعبر أمامهما بعض الرجال . . و عربات الحنطور التي جاءت بأهل العروس ، حسن يعيل على قاسم . .

حسن : وحياة ربنا أنا معجب بالحاج يوسف

قاسم ينظر له صامتا . . . يستطرد حسن قائلا . . .

حسن : أصل أبويا من رأيه أن الستات دول نعمة ومن غير الجواز والطلاق

ما تعرفش تتمتع بالنعمة دي . . .

قطع



مشهد ٣٠ (د) أمام مدخل فيلا يوسف ليل / خارجي . راكور

تنزل من العربة الحنطور عروس صغيرة لا تتعدى ١٨ عامًا ووراءها سيدات يزغردن . .  
وتخرجن من الكادر ، عربة حنطور أخرى ينزل منها الحاج يوسف . . ووراءه عدد من  
الرجال

قطع

مشهد ٣٠ (هـ) زاوية أخرى للفيللا ليل / خارجي . راكور

الزاوية الأخرى للفيللا حيث نرى شبائبك الفيللا ووراءها بعض النسوة . . الحاج يوسف  
ينظر إلى أعلى قائلا . . .

الحاج يوسف : ما فيش خدامين فوق يردوا على الزغاريد دي . . . ؟

قطع

مشهد ٣١ غرفة قاسم ليل / داخلي

قاسم يستند على ظهر السرير ، يكلم نفسه بصوت مسموع وهو في غاية التأثر  
قاسم : الشيخ محمد عبده عنده حق في كل كلمة قالها  
يردد جملة محمد عبده

قاسم : « اذا كنا نحن أهل الفكر ، ننادى برفع الظلم عن الناس من الناحية  
السياسية فالبلد من الناحية الاجتماعية يحتاج لمن ينادى برفع  
الظلم عن المرأة »

يفتح درج مكتبه ، يقلب فيه ، يستخرج ملفا ، وريشة ، يجلس على المكتب ويكتب بخط  
كبير جميل

« البلد من الناحية الاجتماعية يحتاج لمن ينادى برفع الظلم عن المرأة »

قطع

يسير جمال الدين الأفغانى وعارف افندى قريه الذى يرتدى ثيابا أفغانية مثله ، الأفغانى يسبق ، عارف افندى يخاطبه

عارف : على مهلك يا مولانا

الأفغانى : يا عارف افندى ، أسرع أنت بدلا من أن تطلب منى أن أمشى ببطء

عارف : امرى إلى الله ، أسرع أنا لألحق بك

عربة يجرها حصانان ، من العربات المغلقة ، تخرج من شارع متقاطع وتسد عليهما الطريق تقريبا ينزل من بابى العربة عدة ضباط ، يسرعون نحو الرجلين ، نرى الضابط الذى استدعى أمين بك من قبل على رأسهم ، يخاطب الرجلين

الضابط : أنت جمال الدين الأفغانى ؟

الأفغانى : نعم

الضابط : وأنت عارف أبو تراب قريه ؟

عارف : أبوه أنا عارف أبو تراب

الضابط : فين اورا قكم ؟

يخرجان الأوراق

الأفغانى : هاهى الأوراق

عارف : ادى الأوراق سليمة ٢٤ قيراط

يأخذها ، يفحصها ، يهز رأسه ، ثم يأمرهما وهو يشير للعربة

الضابط : اركبوا

الأفغانى : إلى أين ؟

الضابط : مشوار صغير

الأفغانى متحديا

الأفغانى : لن اركب حتى أعرف إلى أين تأخذنا

الضابط يشير للآخرين فيتأبطون ذراعى كل رجل من الرجلين ، ويجرانهما إلى العربة ، ونسمع أصوات

أصوات : تعال ، عدى ، بلاش غلبه

يضعونهما فى العربة ، البعض يركب معهما ، يخلقون الباب ، البعض يتعلق على جانبي

العربة . أحد الضباط يأمر للعرجي

أحد الضباط : اطلع

تتحرك العربة مبتعدة

قطع

نهار / داخل

مقهى متاتيا

مشهد ٣٣

حلقة الشيخ الأفغانى بدون الشيخ ، ويدون محمد عبده وأديب اسحق ، التنديم فى صدر

الحلقة ، ينظر فى ساعة جيبه

التنديم : الشيخ اتأخر يا اخواتنا

صوت ١ : مش عادته يتأخر

صوت ٢ : الغايب حجته معاه . . يمكن يكون تعبان ولا حاجة

التنديم : لو تعبان كان عارف افندى بلغنا

صوت ١ : إيه رأيكم ناخذ بعضنا ونروح له بيته

الشيخ محمد عبده يصل

محمد : الشيخ مش فى بيته يا حضرات

التنديم : مش فى بيته ؟ امال فين ؟

محمد : قلبى بيقول ان فيه شئ حصل للشيخ الأفغانى

يصل أديب اسحق

أديب : الشيخ الأفغانى يا سادة اتنفى إلى الهند

محمد : جيت الكلام ده متين يا أديب يا اسحق ؟

أديب : أنت ناسى أنى صحفى يا شيخ محمد ؟

للجميع

أديب : الشيخ انتقبض عليه يا سادة ، واترحل للسويس ومن هناك ركبوه

مركب مسافرة الهند

محمد : كل ده واحنا مش درياتين ؟

التنديم : واضح أن الخديوى توفيق ناوى يصفى كل المعارضين له

أديب : ومعنى كده أن الدور علينا

محمد : هي دى بداية الأخطاء الكبيرة . المعارضين أصحاب الأقلام  
أرحم ألف مرة من المعارضين اللى بيستخدموا القوة لفرض رأيهم  
وبكرة الخديو يدفع تمن الغلطة دى غالى . .  
التديم : اسمعوا يا حضرات ، مادام المسألة وصلت للقبض على الناس  
يبقى ما فيش داعى للاجتماعات من هنا ورايح . . . ياللا . . .  
اتوكلوا على الله

ينصرفون واحداً بعد الآخر عدا محمد عبده وأديب اسحق  
أديب : مامشيتش ليه أنت كمان يا شيخ محمد ؟  
محمد : أنا بالذات سواء مشيت أو فضلت فالأمر سيان ، لأن الدور على  
أديب يمسك ذراعه مشجعاً  
أديب : الرب يرهاك يا شيخ محمد . . . الرب يرهاك  
قطع

---

مشهد ٣٤ حديقة قصر أمين بك ليل / داخلى

يبدأ المشهد بالقمر فى السماء ، قاسم فى مكانه المعتاد يتطلع نحو الشباك يشير للبيت  
لتنزل ، تهب رأسها بالإيجاب ، يروح ويحيى قلقاً ، يأتى سباعى الجنائنى ، ينظر إلى قاسم  
مستغرباً

سباعى : واقف كده ليه يا قاسم افندى ؟  
قاسم : ١١ . . . لا . . . مافيش  
سباعى : مافيش لازى ؟ حد يقف فى الضلمة كده بالليل من غير سبب ؟  
بشجاعة  
قاسم : لأ بسبب ، باشم هوا . ممنوع أشم هوا ؟ ولا لازم أخذ أذن منك ؟  
سباعى : خلاص يا سيدى أنا بأسال بس  
ينصرف ، قاسم يروح ويحيى ، يطل وجه الحبيبة شاهيناز من وراء السور . قاسم يجرى  
نحوها  
قاسم : أخيراً جيتى ؟  
شاهيناز : مساء الخير يا قاسم افندى

قاسم : مساء الخير . . لكن عرفنى أسمى ازاي ؟  
شاهيناز : سألت  
قاسم : طب انتى اسمك إيه بقى ؟  
شاهيناز : اسمى ؟ شاهيناز  
قاسم : الله . . . اسم جميل . لكن أنتى خرجتى ازاي  
شاهيناز : قلت لهم حاتمشى فى الجنية ، لكن أنا عارفة أكيد حبيعتوا الأغا  
ورايأ دلوقت  
صوت الأغا من بعيد ، خافت لكنه حاسم  
الأغا : شاهيناز هانم . . . شاهيناز هانم . . .  
شاهيناز : يا خبر ، ده جاى ناحيتنا  
تجرى نحو البيت  
قاسم : استنى بس  
الأغا يقترب ، وهو رجل ضخم الجنة أسمر  
الأغا : شاهيناز هانم  
قاسم يبطأ طيء حتى لا يظهر من السور ، الأغا يستمر فى نداءه حتى يعبر المكان  
الأغا : شاهيناز هانم . . . شاهيناز هانم  
قاسم يلتقط أنفاسه

### قطع

مشهد ٣٥ صالة بيت محمد عبده بالقاهرة ليل / داخلى

يدخل الشيخ محمد عبده صامتاً ، يجلس على أريكة عربية شاعرا بالارهاق ، تأتى زوجته من الداخل

ست الدار : أنت جيت يا شيخ محمد ؟  
محمد : جيت يا ست الدار . . البنات فين امال  
ست الدار : ناموا  
محمد : نوم العوافى . . باقول لك إيه يا ست الدار حضرى نفسك للسفر  
أنتى والبنات الصبح إن شاء الله  
ست الدار : على فين ؟

محمد : على البلد  
 ست الدار : ليه ؟ فيه حاجة فى البلد ؟  
 محمد : لا ، البلد بخير ، لكن أنا عايزكم تروحوا تنفسحوا شويه ، وتطلوا  
 على الأرض والدار  
 ست الدار : حاضر يا شيخ محمد ، ولو أنى حاسه أنك مخبي على حاجة  
 يتنفس بحرقة  
 ست الدار : مالك يا شيخ محمد . . فضفض يا أخويا  
 محمد : مالى على الله  
 دق عنيف على الباب  
 ست الدار : إيه ده ؟ مين اللى بيخبط كده ؟  
 محمد : دول اللى كنت مستنيهم  
 يفتح الباب ، يجد الضابط السابق ومعاونوه  
 الضابط : أنت الشيخ محمد عبده ؟  
 محمد : أنا الشيخ محمد عبده  
 الضابط : صدر أمر من الخديوى بتفك لك قريتك  
 محمد : أهلا بالنفى فى سبيل مصر  
 قطع

---

نهاية الحلقة الأولى

## الحلقة رقم (٢)

مشهد ١ الأهر / نهار / داخلي

قاسم أمين / سعد زغلول

قاسم : الشيخ محمد عبده ينتفى ؟ ازاي ؟

سعد : ازاي وليه دى استله منطقيه بتاعة واحد عايز يفهم ، لكن اللى بيجرى حوالينا ده كلام مالوش منطق مابتفهمش . .

قاسم : يعنى نسكت ياسعد ؟

سعد : السكوت ساعات بيكون عين العقل احنا لازم فى الفترة دى نهمد لحد مايبان لنا طريق نمشى فيه . .

قاسم : معاك حق . . فى الظروف دى أهم حاجة الواحد يتبه لمذاكرته لحد مايرتا يفرجها .

سعد : شوف مستقبلك عشان تبقى موظف قد الدنيا ونفرح بيبك يااعم قاسم

قاسم ييز رأسه فى عدم رضا

قطع

مشهد ٢ غرفة تفيده / ليل / داخلي

تدخل كهرمانه على تفيده مسرعة

كهرمانه : الحقى ياتفيده هاتم . . الحقى

تفيده : فيه أبه كهرمانه ؟

كهرمانه : سيدى أمين بيه مش حيجيلك بعد كله ابد . .

تفيده : بتقولى ايه مخبوله انتى ؟

كهرمانه : من غير زعل . . انتى عارفه مين بره ؟

تفيدة : مين ؟  
 كهرمانه : أأا من قصر عابدين . . عارفه بيعمل ايه ؟  
 تفيدة : بيعمل ايه ؟  
 كهرمانه : جايب جاريه من جوارى القصر هديه لسيدى . .  
 تفيدة : جاريه ؟  
 كهرمانه : بنت صغيره انما ايه . . قمر  
 تفيدة : امان ياربى . . مش كفايه الفلاحه ؟ كمان جارية ؟  
 كهرمانه : حظك ياستى . .  
 تندفع نحو الباب خارجة  
 كهرمانه : رايحه فين بس ياستى ؟  
 تفيدة لا ترد ، تخرج  
 قطع

---

مشهد ٣ وراء حاجز أرابيسك فى صالة قصر أمين بك ليل / داخلى

أم قاسم تقف وراء الحاجز لترى ما يجرى بين زوجها والأغا ، بينما تفيدة تندفع للخارج . . أم قاسم تمسك بها . وتقول هامسة .  
 الأم : تعالى هنا ، رايحه فين ؟  
 تفيدة : سيبنى أفندم ، أنا مش ممكن أسكت على الكلام ده . .  
 الأم : استنى الأول لما نشوف ايه اللي جايحصل . .  
 تنظر معها من وراء البارافان الأرابيسك .

قطع

---

مشهد ٤ بهو قصر أمين بك ليل / داخلى

أمين يقف مع الأغا والجارية وقاسم يجلس متابعاً





أمين بك مع جلنار ( الجارية التي أهداها الخديو )

أمين : فضل أفندينا على العين والراس أرجوك تبلغه تشكراتي يا حضرة  
الأغا . .

الأغا ١ : أشكركم بنفسك بكمه في سجل تشريفات القصر . .

أمين : ان شاء الله اسمي يكون أول اسم في سجل التشريفات بكمه . .

الأغا ١ : باذنك افتدّم . .

يتحنى الانحناء خفيفة وينصرف . أمين بك يلتفت للمجارية

أمين : هيه ياستى ، اسمك ايه ؟

جلنار : جلنار . .

أمين : عاشت الأسامي . .

تخرج تفيدة من وراء الحاجز

تفيدة : لا عاشت ولا كانت أى جارية جديدة تدخل القصر ده أمين بك ،

أنت مش تعدل مع زوجاتك الاتنين افتدّم ، ازاي تجيب عليهم

كمان جارية ؟

أمين : انتى مش عايزة تبطلى صوتك العالى وعصبيتك دى ؟

تفيدة : مش حايطلهم خالص افتدّم

أمين : كده ؟ على كل حال انتى عارفة عقابى قاسى ازاي . . اتفضللى . .

تفيدة : لا افتدّم ، . . أنا مش اتفضل أنا لازم افهم ايه حكايك ؟

تأتى الام وتجذب تفيدة للداخل

الام : تعالى يا ست تفيدة ، تعالى ما تجريش الشر . .

تفيدة : انا عايزه أجر الشر . .

الام : قلت تعالى . .

تجذبها للداخل . . . . .

جلنار : أسفة ياسيدى ، ما كتتش اعرف ان وجودى هنا جيعمل مشكلة . .

أمين : امنعنى الكلام . .

ينظر نحو الحاجز الأرابيسك ويصفق متادياً

أمين : كهرمانة . . كهرمانة . .

تأتى كهرمانة مسرعة . . .

كهرمانة : افتدّم سعادة البيه . .

أمين : خدى جلنار شوفى لها اوده تنام فيها . .

كهرمانة : امرك يا سيدى . .

لجلنار . .

كهرمانة : تعالى . .

تمشى كهرمانة ووراءها جلنار يصعدان السلم  
قطع

ليل / داخلى

غرفة تفيدة

مشهد ٥

تفيدة تبكى ، ام قاسم تواسيها

الام : خلاص بقى ياست تفيدة ، احمدى ربنا انه فوت لك معارضتك له  
المره دى

تفيدة : ده ظلم افندم . . ليه ربنا اخلق ستات غلابه كده ؟ ليه يدى الراجل  
الحق انه يتجوز عليها ، ويجيب كمان جوارى غير الزوجات  
معاها ؟ الستات دول افندم مش بنى ادمين زى الرجاله ؟

الام : ما تعترضيش على حكم ربنا ياست تفيدة . .

تفيدة : لا افندم ، ربنا قال العدل وانا سمعت من الشيخه ان النبى عليه  
الصلاة والسلام . .

الام : عليه الصلاة والسلام . .

تفيدة : كان يقعد بين الستات بتوچه يكلمهم ، يلاعبهم ، وياخد معاه  
واحد منهم كل ما يسافر ، لكن احنا مش لنا اى قيمة . . احنا زى

كرسى كتبه . . كاتنا مش بنى ادمين

تقول باحساس بالقهر . . .

الام : ارضى بحكم ربنا ياست تفيدة عشان ما نتعيش . .

تفيدة : لا افندم . . انا تعبانه . . تعبانه جدا افندم . .

قطع

يقف قاسم وحسن بينما الطلبة يروحون ويجيئون . .

حسن : يعنى ابوك كمان بقى عنده ثلاث ستات ؟

قاسم : هو لسه مش باين ان كان حيخلى الجارية دى ضمن الحريرم والا لا . . انما عنده جارية . .

يصفق حسن استحسانا . . .

حسن : احب النى . .

قاسم : لكن قل لى ، ابوك ما جريش حكاية الجوارى دى ليه ؟

حسن : لا يا عم ، الجوارى دى لزقه بغرا ما يعرفش يتخلص منها ، انما الجواز فى ثانية يروح مطلق ويربح دماغه . . وبمدين الجوارى تكلفتها عاليه ، حيشترى ويدفع ، انما الجواز ارخص . .

قاسم : الجواز ارخص ؟

حسن : ايوه ، الناس فى مصر اغلبهم فقرا ، والبنات بالتالى عيب على اهلهم . . قاعدين ياكلوا ويشربوا ويكلفوا اهلهم من غير لازمه ، عشان كده اهلهم بيحوزوهم باى طريقة عشان يخلصوا من مصاريهم

قاسم : تعرف يا حسن انى ما اعرفش اى حاجة عن الناس الفقرا اللى انت بتكلم عنهم . .

حسن : ده عيب تربية القصور . .

قاسم : بس حاعرف الناس دى وحاعرف كل شئ عنهم . .

قطع

قاسم وسعد يسيران . . . . .

سعد : حد يا ابنى يسيب شوارع الحلمية التنظيف ، وقصورها العامرة ويطلب يشوف احياء الناس الغلابة ؟

قاسم : أنا . . . .  
 سعد : والله يا اخى انت تحير . . انت ناسى انك ابوك تركى وان الاتراك فى مصر . .  
 قاسم : ما تكملش يا سعد . . انا مصرى زى زيك ، ولا زم اعرف كل حاجة عن مصر . .  
 سعد : خلاص يا سيدى ، انت حر . . .  
 يواصلان السير . .

### قطع

---

مشهد ٦ (ب) شارع فى حى شعبي نهار / خارجى

على ناصية الشارع حنفية عمومية تراحم عليها البنات بالصفائح والأوعية النحاسية  
 بنت ١ : اوعى يا اختى . . وسعى كده  
 ٢ : الدور على انا . .  
 ١ : لأعلى أنا . .  
 عامل الحنفية الذى يمسك خيرزانه ويتكلم بحزم لبنت ١  
 عامل : بس يا بنت انتى وهى ، مش عايز خناق ، املى انتى الأول . .  
 يدخل قاسم وسعد ، يقفان لحظة ، يرى البنات حافيات ، فى ثياب رخيصة بالية يحملن  
 أوانى الماء على رؤوسهن  
 سعد : ايه رأيك ؟  
 يسيران الى قهوة فقيرة فى الشارع . سعد لقاسم . .  
 سعد : أقعد . .  
 يجلسان . سعد يشير لكوم زباله عليه أولاد وبنات فى سن الطفولة يبحثون عن بقايا أكل  
 ويأكلون منه . . عينا قاسم أمين تجحظان غير مصدق  
 سعد : ايه رأيك ؟  
 قاسم يمد يده فى جيبه ويقف  
 قاسم : ممكن اديهم مساعدة . .  
 يجذبه للجلوس . . . . .

سعد : حاجة ايه ؟ هو نفر واحد ولا عشرة انفار ؟ دى أحياء كاملة الفقر  
معيش فيها ، الولاد الصبيان بيعافروا عشان يلقطوا رزقهم ، لكن  
البنات . .

قاسم : عارف . . عيب على أهاليهم عشان كده يجوزوهم بأى شكل  
ويتخلصوا منهم . .

حسن : ايه اللى جابكم هنا ؟

قاسم : ( بدعشة ) حسن ؟ انت اللى ايه جابك هنا ؟

حسن : يا ابنى انا زبون دائم فى القهوة هنا . . اسأل الشيخ سعد . . . هو  
يقعد يتأمل فى حال الغلابة

سعد : وانت تقعد تعاكس البنات . . .

حسن : ( يضحك ) وليه لأ . . يا اخوانا صدقونى الحريم دول نعمة

تسير فثاء ٢ حاملة صفيحة الماء على رأسها . . .

حسن يعاكسها

حسن : الواد ده اسمه حسن . . . يا سيدى الشعرانى . . نظره

تشيع بوجهها الى الناحية الأخرى بدلال . قاسم يشير لما حوله ويخاطب سعد . . .

قاسم : يا ترى يا شيخ سعد فى حالتنا دى نقدر نقول عايزين نحرر المرأة من

سيطرة الراجل ولا من الفقر ؟

سعد : من الاثنين يا صاحى . . المهم إنها تتحرر . .

قطع

نهار / داخلى

ديوان قطار

مشهد ٧

يجلس فى الديوان النديم وأديب اسحق

اديب : آخر المطاف أدينا راجعين إسكندرية ثانى ياسى نديم زى ما رحنا

زى ما جينا

النديم : زى ما بيقول المثل المصرى . . يادى الشيلة يادى الحظه راح على

جمل جه على قطة . .

اديب : بتجيب الامثلة دى منين يا اخى ؟

النديم باسم . .

النديم : من امي اصل امي دي كنز أمثلة شعبية . .

اديب : بتكتت كمان ؟

النديم : وما انكتش ليه ؟ تعرف يا اديب يا اسحق لولا النكت على

المصريين كانوا طقوا وبعدين حنزل ليه ؟ احنا حفظنا احسن من

الأفغاني ومحمد عبده لا اتقبض علينا ولا اتنفيتا ، انت راجع

للجريدتين بتوعك ، وانا راجع لمدارس الجمعية الخيرية الاسلامية

اللى انشأتها فى هدوء عشان اطلع لمصر شباب يكمل مسيرتنا . .

اديب : ما قلتش حاجة يا سيدى ، لكن تفكر اننا فى ظل الجوده . .

حنعرف نكتب حاجة فى الجرايد ؟

النديم : عشان ما تشيلش الهم اعمل برأى معاوية اللى بيقول . . ولو كان

يبنى وبين الناس شعرة رأس ما انقطعت اذا هو شد أرخيت واذا

أرخى شددت . .

القطار يقف . .

اديب : آدينا وصلنا ، ياللا بينا . .

يقفان ، يفتح الباب ويدخل ضابط شرطه برتبة يوزباشى

الضابط : مين فيكم اديب اسحق ؟

النديم : عايزه ليه ؟ ما دفعش ابجار الشقة ولا مراته رفعت عليه قضية نفقه ؟

الضابط : بتهزر ؟

النديم : آه صحيح ، ده مسيحى ما تنفعش معاه قضية النفقة . .

الضابط : ممنوع الكلام . . من فيكم اديب اسحق ؟

اديب : انا اديب اسحق . .

الضابط : اتفضل معايا . . حضرة الحكمدار عايزك . .

يتبادل النظرات مع النديم ، يطمئنه

النديم : حنروح سوا نشوفه عايز ايه . .

اديب : الامر يأسى نديم ، لما نشوف اخرتها معاها ايه . .

الضابط : نديم ؟ هو انت ؟ دانت مطلوب انت كمان . . اتفضلوا معايا اتم

الاثنتين .

النديم لأديب . . . .





قاسم أمين يقفطان النوم والطاقيّة ، يجلس الى المكتب للمذاكرة . . الباب مفتوح - جلنار تقف على الباب

جلنار : بتعمل ايه ؟

يشعر كمن وخز ، فيهب واقفا وقد جحظت عيناه ، يقول مرتبكاً

قاسم : انتى . . انتى . . انتى ايه اللى جابك هنا ؟

جلنار : رجلى

قاسم : طب خلى رجلىكى تاخذك من هنا زى ما جابتك اعملى

معروف . . .

لا تتحرك . . . يتبصص نحو الباب فى قلق

قاسم : طب فهمينى ، عايزة ايه بالضبط

جلنار : عايزاك تعلمنى القراءة والكتابة

قاسم : اعلمك ؟ انتى مش عايشه فى مصر ؟ فى ولد يعلم بنت ؟

جلنار : ما هو ما فيش ستات متعلمين كنت رحت لهم . .

قاسم : يابنت الحلال ، هنا فيه حاجتين حاجة اسمها حريم وحاجة اسمها

رجال واللاتين ما يصحش يكون فيه بينهم اى صله . .

جلنار : طب ليه ؟

قاسم : انا ايش عرفنى ؟ هو أنا اللى عملت كده ؟

جلنار : يعنى مش حتعلمنى ؟

قاسم : لا . . .

جلنار : طيب يا قاسم افتدى ، كتر خيرك . .

نتجه لنخرج ، يستوقفها . . . . .

قاسم : استنى ، انت قبل ما تيجى هنا كتتى فى بالضبط ؟

جلنار : كنت عند ام افندينا . . .

قاسم : ومشتك ليه ؟

جلنار : كانت بتقول على انى جرئته اكثر من اللازم . .

قاسم : هو الجراءة عيب ؟

جلنار : فى الستات عيب . . عشان كده كان نفسى ابقى راجل . الراجل

واخذ كل حاجة ، لكن الستات مش واخدين اى حاجة . . . نهايته نصيح  
على خير . . .

تنصرف ويتابعها من خلال الباب المفتوح

قطع

---

مشهد ١٠      عمر الجناح الذى يسكن قاسم احدى غرفه      ليل / داخلى

جلنار تخرج من غرفة قاسم ، ام قاسم تدخل من باب الجناح ، لحظة مواجهة صامتة ، فى  
عينى الأم غضب مكتوم ، الأم تخاطب جلنار . . .

الأم : ايه اللى جابك هنا ؟

جلنار : . . . كنت باتعرف على البيت

بحزم . . .

الأم : طب اتفضللى على اودتك

جلنار : حاضر . . .

تمسك الأم بها . . .

الأم : حسك عينك نهوى الناحية دى تانى فاهمة ؟

جلنار : حاضر . . .

تنصرف جلنار . . . الأم تتجه لغرفة ابنها

قطع

---

مشهد ١١      غرفة قاسم      ليل / داخلى

الام تتوقف على الباب ، تنظر لقاسم بحدة ، ينظر للارض ، تغلق الباب بحدة . . . يتجه  
للباب ، يغلقه بالمفتاح ، يرقد فى السرير غير مصدق مرور الأمر بخير

قاسم : معقول اللى حصل ده ؟

قطع

تفيدة وكهرمانة . . . . .

تفيدة : مش طابق كهرمانة . . كل ما افكر البنت دى جسمى يقيد نار . .

كهرمانة : الله يكون فى عونك يا ستى ، البنت حلوة وصغيرة وتتحب . .

تفيدة : والرجال لما بيكبروا بيتجننوا

كهرمانة : آه والله . . .

تفيدة : طب نعمل ايه بنت كهرمانة ؟

كهرمانة : اسحرى له . .

تلمع عينها . .

تفيدة : بتقول ايه بنت ؟

كهرمانة : اسحرى له . .

تفيدة : صح كهرمانة ، مضبوط بنت . . . . . لكن انتى اعرفى واحد

سحار ؟

كهرمانة : اعرف واحد منجم انما ايه . . . . . ما تقوليش لعدوك عليه . .

تفيدة : خلاص ، روحى له ، خليه يعمل له عمل يكره بنت جلنار ، وله

حلاوة . .

كهرمانة : حلاوة ايه يا ستى ، الدفع لازم يكون مقدم . .

تفيدة : عايز كام بنت ؟

كهرمانة : هاتى جنيه ولا اتنين جنيه لحد ما اشوف طلباته . .

تفيدة : طلبات تانى غير اتنين جنيه دهب ؟

كهرمانة : الحاجات دى مش عايزة بخل يا ستى

تفيدة : خلاص بنت خلاص . .

تفتح شكمية وتخرج جنيهين . . .

تفيدة : خد ، المهم عاوز نتيجة قوام قوام

كهرمانة : عيني يا ستى . .

قطع

سعد وقاسم يسيران . . . . .

سعد : الغمة طالت يا قاسم

قاسم : عشان كده انا متفائل

سعد : نعم . . ؟

قاسم : مش بيقولوا كلما اشتد الكرب هان

سعد : تفكر انه حيهون ؟

قاسم : حيهون . .

سعد : اه . . . وحشنى الشيخ محمد عبده وقهوة متاتيا . .

قاسم : كله كوم والشيخ محمد عبده كوم تانى لكن ما افطنش انه حيرجع

طول ما الخديو توفيق هو رئيس مجلس النظار

سعد : ربنا قادر پريحتا من قبضته ، وييعت لنا رئيس نظار غيره . .

قاسم : حسب نظريه كلما اشتد الكرب هان انا شايف انها حتفرج

قريب . .

سعد : يا رب . .

بائع جرايد ينادى . . . . .

البائع : اقرأ المحروسة . . اقرأ المحروسة . . تعيين رياض باشا رئيس

للتظار اقرأ رئيس النظار الجديد . . . . .

قاسم وسعد يتبادلان النظرات غير مصدقين . .

سعد : معقول ؟

قاسم : مش قلت لك كلما اشتد الكرب هان ؟

البائع : اقرأ المحروسة . . اقرأ المحروسة رياض باشا رئيس للتظار . .

مزج

يبدأ المشهد برياض باشا يسير نحو العرش . يتوقف قبيل العرش بقليل ، ينحنى أمام

الخدوي الذي ينهض مخاطباً

توفيق : مبروك يا دولتلو رياض باشا . .

رياض باشا . يتحنى مرة أخرى باحترام . . . . .

رياض : شكراً يا افندينا . .

توفيق : فى أول لقاء بيتنا احب ابلغك بمهمتك كرتيس للنظار . .

أولاً عايز قبضتك تكون حديدية الأمن والنظام لهم الأولوية . . .

رياض : أن شاء الله يا مولاي . .

توفيق : عايز احسن ان اختارى كان فى محله

رياض : مولاي ، احنا مش هنختلف على القبضة القوية ، لكن احب اقول

لك انا ناوى اقوم ببعض الاصلاحات يعنى مثلاً نلغى السخرة ،

نحسن مستوى المعيشة . . لازم نعمل شئ من التوازن . . .

توفيق : اعمل اللى يعجبك ، المهم عندي هو السيطرة ، على زمام الامور

الصحافة تتكلم بحساب . . . والجيش اهم شئ الجيش ، لازم

القادة يصحوا وما يدوش اى فرصه للضباط المصريين للتمرد زى

ما حصل قبل كده . .

رياض : تأكد يا مولاي ان ناظر الحربية عنده تعليمات بكل شئ . .

قطع

---

مشهد ١٥      قاعة اجتماعات بوزارة الحربية      نهار / داخلى

يبدأ المشهد بالكاميرا على ناظر الحربية عثمان باشا رفقى كالطاووس . الضابط ينادى بصوت جهورى .

الضابط : عثمان رفقى باشا . . حضرات الضباط ثابت

تنتقل الكاميرا لتقدم لنا الحاضرين وهم ضباط اترك ذوو شوارب مفتولة ووجوه حمراء ،

وبينهم أمين بك فى حالة ثبات . . يجلس عثمان رفقى

عثمان : حضرات الضباط . . المجلس ده انا عقدته النهارده للضباط الاترك

فقط ، لان التعليمات اللى عندي واضحة بخصوص السيطرة على

الجيش ، الصراع بيتنا وبين الضباط المصريين دلوقت بقى صراع حياه أو



## قطع

مشهد ١٦ مكتب مصطفى باشا في نظارة الخارجية ليل / داخلي

مصطفى باشا تركى ، فى نفس عمر أمين بك ، يرحب به  
مصطفى : انتفضل يا أمين بك . . شرفت المكتب  
أمين : الله يحفظك . . الحقيقة لقيت نفسى متضايق قلت ما فيش حد  
افضفض معاه غير مصطفى باشا فهمى  
مصطفى : اهلا بيك  
برى وجهه متغيرا مهموما  
مصطفى : ياه ، دانت باين عليك مهموم قوى  
أمين : حاطق يا باشا  
مصطفى : ليه يا راجل ده ما فيش حاجة تستاهل .  
أمين : بابنه عثمان باشا وفقى لخطورة التفريق فى المعاملة بين المصريين  
والا تراك ، عاملنى بمنتهى القسوة ، وهددنى بالطرد من الجيش  
مصطفى : بس كده ؟ اذا كان على عثمان باشا فأنا حاعاتبه على شدته  
معاك ، وما تقلقش من ناحيته ، لكن اذا كنت عايز نصحيتى  
مالكش دعوة خالص بالمصريين  
نرى فى عينى أمين بيه تساؤلا

ما تستغريش . البلد دى يا أمين بيه احنا بنورث الحكم فيها من  
مئات السنين من ساعة شجرة الدر ما قتلنا توران شاه والأتراك  
بيحكموا مصر ، مرة تحت اسم المماليك ومرة تحت اسم الدولة  
العثمانية ازاى بقى بعد العمر ده كله نسمح للفلاحين دول تبقوا  
راسهم براسنا

أمين : دول اصحاب البلد يا مصطفى باشا  
مصطفى : ولو ، المكان الوحيد المسموح لهم بيه هو اتهم يكونوا فلاحين  
عندنا ، لكن الحكم لازم يكون فى ايدينا احنا ، وای محاولة للتمرد

لازم نضربها فوراً ويعتف ، والا . . . مش بعيد نتطرد من البلد  
دى . . فاهمنى ؟

يهز أمين رأسه

أمين : فاهم

قطع

---

مشهد ١٧      بهو قصر أمين بك      ليل / داخلى

قاسم ينظر حوله ، يتأكد من عدم وجود احد ، يسير نحو الباب يفتحه ببطء ، يخرج ، يغلق الباب بهدوء شديد

قطع

---

مشهد ١٨      عمر فى حديقة قصر أمين بك      ليل / داخلى

قاسم يسير وهو ينظر حوله ، يتجه الى السور ، ينظر الى حديقة الجيران شاهيناز تخرج متلصصة هى الأخرى ، تسرع نحو السور

شاهيناز : مساء الخير يا سى قاسم .

قاسم : مساء الخير يا شاهيناز .

شاهيناز : الخروج الليلة كان صعب قوى العيلة كلها سهراته .

قاسم : لو ما كتش جيتى حازعل قوى .

شاهيناز : صحيح .

قاسم : طبعا .

شاهيناز : قل لى يا سى قاسم : أنت تلميذ فىن ؟

قاسم : فى مدرسة الالسن وحتخرج السنة دى . . لكن انتى ما قلتيليش :

أنت متعلمة ؟

شاهيناز : لأ

قاسم : يعنى ما بتعرفيش تقرى وتكتبى ؟



شاهيناز : لا ، والدى يقول أن البنات لما يتعلموا الكتابة يكتبوا جوابات

للشبان ، عشان كده ما رضاش يعلمنى

قاسم : يعنى التعليم ما فيهوش غير كتابة الجواب ؟

ينفتح باب قصر شاهيناز ويظهر الأغا

الأغا : حتكون راحت فين ؟

ينادى وهو يسير فى الحديقة

الأغا : شاهيناز هاتم . . شاهيناز هاتم

قاسم : اجرى

شاهيناز : اتندارى انت كمان

ينزل متواريا . . تنزل هى وتتمشى

الأغا : شاهيناز هاتم . . شاهيناز هاتم

شاهيناز : أنا هنا

يسير إليها ، بعنفها

الأغا : ايه ده هاتم ؟ ازاي تخرجى بالليل لوحدةك ؟

شاهيناز : ودى فيها ايه ؟ زهقت من الحبسة طول النهار

الأغا : اتفضلى افندم جو . . اتفضلى

شاهيناز : حاضر

وهى تسير نحو القصر

الواحدة كأنها فى سجن ، حاجة تزهدق

قطع

---

ليل / داخلى

يهو قصر أمين بك

مشهد ١٩

قاسم يصعد السلم دون صوت . . يصل لأعلى

قطع

الصلاة على يمينها جناح أم قاسم وعلى يسارها جناح نفيدة هانم وفي الواجهة جناح قاسم والزوار . يصل قاسم صاعداً من أسفل يجد أمامه الجارية جلنار واقفة وفي عينيها جراحة .  
قاسم : ايه اللي موقفك كده .

جلنار : انت

كهرمانة تطل من باب جناح نفيدة هانم

قاسم : عايزة إيه تاني ؟

جلنار : أنا محوشة الفلوس دي ، عشرة جنيه ، إيه رأيك لو تاخدكم وتعلمني ؟

قاسم : يا بنت الناس ابعدي عني ، أنا ما باعلمش حد

جلنار : خسارة كنت فاكدة أنك حضهمني عشان متعلم ، لكن يظهر اني كنت غلطانة . . تصيح على خير .

الأم تظهر على باب جناحها

الأم : إيه اللي بيحجرى في البيت ده ؟

قاسم : . . عاجبك كده ؟

الأم تأتي وتخطب جلنار

الأم : إيه اللي مخرجك من اودتك دلوقت ؟

جلنار : باسمال قاسم افندي سؤال

الأم : اتفضل على اودتك

بعدم رضا

جلنار : حاضر

تتجه الى جناح الأم . كهرمانة تطل برأسها لترى ما يحدث . . الأم لقاسم

الأم : دي تاني مرة يا قاسم . عارف لو أبوك اللي شافكم حيحصل ايه ؟

قاسم : والله العظيم مالي دعوة

تشير نحو جناحها

الأم : أنا مش حاقول لأبوك المرة دي كمان لكن بعد كده أنت حر اتفضل

يسير الى غرفته وهي تتابعه بعينيها

قطع

عرايى يرحب بنديم وأديب إسحق

عرايى : أهلا وسهلا بالمجاهدين الكبار

التنديم : أهلا بيك يا عرايى بيه

أديب : أهلا بيك يا حضرة الاميرالاي

عرايى : هيه ، إيه أخباركم وأخبار إسكندرية ؟

التنديم : أنا شخصيا عال العال ، وما اخبيش عليك جاى اطلب زيارة

الخدو لمدارس الجمعية الخيرية الإسلامية .

اديب : وأنا جاى اقدم طلب لرياض باشا باعادة الجرنالين اللى باطلعهم

لانه قفلهم

عرايى : قفل الجرنالين دول خسارة كبيرة أنا كنت باعتبرهم لسان حالنا

اديب : الغريب أن التنديم عامل فى إسكندرية قد اللى أنا عامله بالجرنالين

دول ميت مرة ، ومع ذلك ما حدثش جه ناحيته

التنديم يداعبه وكأنه يغيطه

التنديم : مش كده ويس ، ده اكابر إسكندرية من أول المحافظ لحد آخر

واحد فيها بيحضروا حفلاتى اللى باعملها فى المدرسة

ويشجعونى .

اديب : نفسى اعرف ، أنت بتعمل لهم إيه ؟

التنديم : أولا كل ولادهم تلاميذ عندى ، وأنا باشجع ولادهم على الخطابة

وكشف العيوب بدون أنا ما أفتح بقى

عرايى يضحك

عرايى : التنديم ده استاذ فى كل حاجة . . . المهم سييكم من الكلام ده

واسمعوا لى أنا دلوقت نجحت فى توحيد صفوف الطلاب

المصريين فى الجيش وبدأت فى تجميع المدنيين من الأعيان

والكبراء الناقمين على الحكم ، وعايذك معايا .

اديب : أنا معاك يا حضرة الاميرالاي

التنديم : أنا بقى معتذر المرة دى

عرايى : معتذر

النديم : ما تستفريش . أنا دلوقت باحاول أكسب الخديوى لفكرة نشر المدارس ، ومش عايز أى حاجة تخلىنى موضع شك عنده .  
 عرايى : طيب يا نديم . أنت موضع ثقتى فى كل تصرفاتك ، وأنا متأكد أنك لا يمكن تعمل غير الاصلاح  
 اديب : والمدنيين اللى بتجمعهم دول حيكون إيه دورهم ؟  
 عرايى : ما تستعجلش ، حتمرف كل شئ لما نجتمع بعد أسبوع من النهاردة .

### قطع

مشهد ٢٢ فيلا المعادى ليل / داخلى

عرايى بك وحوله مجموعة من خمسة عشر فردا تقريبا من الباشوات وبعض القباط والاعيان ، ومعهم اديب اسحق  
 عرايى : الاخوة الاعزاء . . اسمحوالى فى البداية أنى أرحب بكم  
 مهممات لرد التحية

عرايى : وأشكركم على موافقتكم على حضور هذه الجلسة ، لكن الاكيد أنكم جميعا بتسألوا نفسكم إيه الهدف من اجتماعنا ده ؟ هدفنا يا سادة الوقوف ضد الحزب اللى عايز يخلى المصريين غرباء فى بلادهم . ضد الناس اللى ببصوا للمصريين من فوق ، ويعاملوهم على أنهم أقل منهم ، وييسموهم « الفلاحين » احتقارا لهم مع أن الفلاحين دول هم اللى بيوكلوهم ويلبسوهم وهم أساس غناهم وثروتهم . إحنا هنا النهاردة يا سادة عشان نعمل لنفسنا حزب إحنا كمان نواجه بيه حزبهم

شاهين : لكن البلد لا تتبع سياسة الاحزاب ، ومن المؤكد أن الخديو حيرفض إعلان الحزب

عرايى : حزينا يا سادة حيكون سرى فى المرحلة الأولى  
 اديب : طب وحنسمى الحزب ده إيه ؟

عرايى : حنسميه الحزب الوطنى ، أو حزب المصريين ، أو حزب

الفلاحين زى ما يعجبكم

البارودى : تسميه الحزب الوطنى ، تسميه معقولة . . لكن الشئ المهم إيه برنامج الحزب ده ؟ أى حزب فى أوروبا بيكون له برنامج ، إحنا إيه برنامجنا ؟

عرايى : شكرا يا بارودى باشا على ملاحظاتك لكن اظن أن وضع البرنامج ده مهمتكم أنتم ، عشان ما حدش يفرض رأيه على الآخرين

البارودى : احبيك يا عرايى بيه على هذه الروح  
عرايى : اتفضلوا يا حضرات . . قولوا مقترحاتكم  
قطع

ليل / داخلى

قاعة العرش

مشهد ٢٣

الخديو توفيق ناثرا وأمامه رياض باشا . الخديو يمسك فى يده ورقة مطبوعة يقدمها لرياض باشا

توفيق : اتفضل يا دولتلو رياض باشا . . اتفضل . . بيان الحزب الوطنى . . البلد بتكون فيها أحزاب من غير إحنا ما نعرف رياض : أوكد لك يا افندينا أنى حاعرف مين اللى ورا الكلام ده ، وساعتها مش حارحمه ، اوعدك أنى اتفيه للسودان فورا .  
توفيق : إيه أهمية الثفى دلوقت ؟ البيان انتشر فى الصحف الأجنبية ، وبقي فى أيدين كل الناس ، والمهم أنه بيتعرض لى شخصيا ، شايف .

يقرأ . .

أولا : تُعاد الى الحكومة المصرية جميع الاملاك المسماة بالخديوية . يعنى هايزين يجردونى من املاكى رياض : صدقنى يا مولاي أنهم حيدفعوا تمن الكلام ده غالى توفيق : بعد إيه ؟ الوزيرين الأجانب قلقانين جدا ، الكلام كله متصب على الديون . . اتفضل : - يلغى النص القاضى بتخصيص السكة الحديدية للقرض الممتاز . - تكون الديون الممتازة والسائرة والمتنظمة دينا واحد مضمونا بمال الأمة والبلاد بفاصلة مقدارها ٤٪

رياض : عموما اذا كان سموك تحب انى أستعفى ممكن أقدم لك الاستعفاء  
حالا

توفيق : ما فيش استعفا ، لكن أرجو انى أشوف أعضاء الحزب الوطنى  
دول قدامى فى أقرب فرصة

رياض : أوعدك يا افندينا لكن أرجو أنك تسمح لى برأى متواضع  
توفيق : انفضل

رياض : أنا شايف أننا تمد بعض الجسور مع المعارضين المعتدلين ،  
بحيث تبقى فيه فرصة للتنفيس تحت سيطرتنا ، بدل ما نسيب  
الساحة للمتشددين بتوع الحزب الوطنى دول

توفيق : تقصد مين بالمعتدلين ؟

رياض : الشيخ محمد عبده

توفيق : محمد عبده ؟

رياض : صدقنى يا افندينا الراجل ده اعقل واحد فيهم ده راجل بيكره العتف  
وضد القوة ، ورايه أن البلد لازم تعتمد على التربية والتعليم عشان  
ترتقى ، احنا مش ضد الكلام ده

توفيق : محمد عبده يا باشا هو الوحيد اللى يقدر يجمع الناس حواليه بعد  
نفى الأفغانى

رياض : أنا حاتمهد قدام سموك أنه ما يرجعش لتجميع الناس مرة ثانية  
توفيق : للدرجة دى واثق فيه ؟

رياض : لا يا افندينا أنا واثق فيه اكتر من كده . والثقة دى هى اللى  
حتخلينى أطلب من سموك الموافقة على تعيينه فى صحيفة الوقائع  
كمان

توفيق : كمان ؟

رياض : صدقنى يا مولاي ، التعاون مع المعتدلين ممكن يكون بديل  
معقول عن المتشددين

توفيق : ادبنى فرصة للتفكير

قطع

يبدأ المشهد بكلوز على يد تمسك حجابا مع صوت كهرومانه

كهرومانه : اتفضللى يا ستى

تبتعد الكاميرا لترى كهرومانه وتقيدة

كهرومانه : حجاب سره بائع ، تحطيه تحت مخدة سيدى ، حبيلى مش

طايق يشوف شكل أى جارية

تقيدة : عفارم كهرومانه

تخرج كهرومانه من جيبها زجاجة

كهرومانه : القزاة دى كمان تكبى اللى فيها على عتبه مقصوفة الرقبة ، عمر

سيدى ما يخطبها

تقيدة : روى كبيه لها حالا

كهرومانه : لأ ، أنتى اللى لازم تعملى الحكاية دى بنفسك يا ستى

تقيدة : هاتى . . أنا اكبها بنفسى

تسير خارجة ووراءها كهرومانه

قطع

تقيدة ووراءها كهرومانه تتجهان الى غرفة جلنار ، تفتان ، تقيدة تفتح الزجاجة ، تسكب ما

فيها على العتبه . كهرومانه تهمس

كهرومانه : ما تخليش فيها ولا نقطة يا ستى

تنظر الزجاجة

تقيدة : خلاص كهرومانه ، مش فيها ولا نقطة

الأم تخرج من غرفتها ، ترى ما يحدث

الأم : بتعملوا إيه ؟

تقيدة تشير لها بالصمت

تقيدة : شش عملت لها عمل

تسرع الأم إليها

الأم : بتصدقنى الكلام ده ؟

تفيلة : ليه لا ؟ يمكن الأسياذ يعموا عينه عنها

الأم متعجبة لما يحدث وغير راضية عنه

الأم : يمكن

قطع

نهار / داخلى

يهو قصر أمين بك

مشهد ٢٦

أمين وأم قاسم

أمين : إيه رأيك فى جلنار

الأم فى توجس

الأم : فى أية معنى ؟

أمين : فى الجواز

الأم فى فرع

الأم : جواز . . جواز مين

أمين : ابنك قاسم

الأم تلتقط أنفاسها وتبتسم

الأم : الراى رأيك

يلتفت إليها وقد لمعت فى عينيه فكرة

أمين : اطرحى على قاسم فكرة الجواز بجلنار ، مين عارف ، جايز تكون

دى جوازة السعد عليه وعلينا .

الأم : عليه وعلينا ؟

أمين : طبعاً ، دى كانت جارية فى القصر معنى تعرف الأميرات ، وتعرف

أم الخديو ، ودول ممكن يساعدوه كتير قوى ويفتحوا قدامه

الأبواب المقفولة ، وقدامنا إحنا كمان

الأم : على كل حال ابلغه

قطع



يبدأ المشهد بكلوز على قاسم وهو يقول

قاسم : آسف يا أمي . . مش عايز أتجوز دلوقت

الأم : ليه يا قاسم ؟

قاسم : لأنى لسه باتعلم ، ولسه عاوز اروح باريس ادرس هناك ، ومش عاوز حاجة تعطلنى

الأم : هي مش عاجباك ، وشفتك معاها اكتر من مرة ؟

قاسم : بصى يا أمي ، هي بنت كويسة وكل حاجة ، لكن ازاي يعنى أتجوز وأنتم بتصرفوا على أنا وهي ؟

الأم : وأنت لا أول واحد ولا آخر واحد أتجوز وأبوه صرف عليه هو ومراته ؟

قاسم : أنا ماليش دعوة بغيري . . أنا مش حاتجوز غير لما أخلص تعليم ، واشتغل وأكسب

الأم : يا ابني أبوك حيز هل

قاسم : عارف ، لكن كل حاجة ممكن تكون بالغصب إلا الجواز

تنتهد بعمق

الأم : طب فكر تاني

قاسم : لا تاني ولا ثالث ، ارجوكي يا أمي ساعديني

الأم : مش عارفة أعمل إيه ، حيرتني أنت وأبوك .

قطع

أمين غاضب وأم قاسم أمامه

أمين : هو الولد ده عنيد على طول كده ؟

الأم : معلش يا أمين بيه ، هاوده ، المثل بيقول لو كبير ابنك خاويه

تطل كهربانة برأسها من وراء الحاجز الاراييسك

أمين : اخاوى ايه ؟ حد يرفض جارية من جوارى الخديوى ؟  
الأم : كل واحد له دماغه  
أمين : خلاص ، سيبى الموضوع ده دلوقت انتهينا  
قطع

---

مشهد / ٢٩      غرفة قاسم أمين      ليل / داخلى

تفيدة تدخل على قاسم مسرعة  
قاسم : أهلا يا أمى  
تفيدة : لا أهلا ولا سهلا ولد قاسم . . ازاي ولد ترفض زواج جارية  
افندينا ؟  
قاسم : تانى ؟  
تفيدة : اسمع ولد ، أنت لازم تتجوز جارية ولك عندى هدية مش تخطر  
لك على بال  
ضاحكا بغير جدية  
قاسم : حتدبنى إيه ؟  
تفيدة : حاديلك عشرين فدان أفندم من املاكنا  
قاسم : وليه كل ده ؟  
بضعف ورجاء  
تفيدة : ولدنا قاسم ، لو أنت مش تتجوز جارية خديوى ممكن أبوك  
يتجوزها برضيك قاسم تبقى فيه ضرة لى ولا مك  
قاسم : لا ما يرضينيش  
تفيدة : خلاص قاسم افندى ، يبقى لازم اتجوزها  
قاسم : لا يا أمى أنا مش حاتجوز جوارى . وأبويا لو كان ناوى يتجوز  
الجارية ما كاتش طلب منى اتجوزها  
تفيدة : أنت عنيد ولد قاسم  
قاسم : عارف  
تفيدة : لكن أنا مش يسامحك لو ما سمعتش الكلام

قاسم : إلا دى ، لا يمكن اسمع الكلام فيها  
تفيدة : خلاص ولد . . من دلوقت أنت مش لك أم اسمها تفيدة  
تخرج مندفعه قاسم يتابعها باسى

قطع

---

مشهد ٣٠      غرفة تفيدة هانم      نهار / داخلى

تدخل تفيدة غرفتها ثائرة ووراءها كهربانة  
تفيدة : ولد خلصوص ، ملمون ، قاسم افتدى ظظ مش يسمع كلام أمه  
تفيدة ، خرسيس  
كهربانة : ولا يهملك ياستى ، أنا عندى الحل اللي يخلي قاسم افتدى يحب  
جلنار ويتمرغ فى غرامها  
تفيدة : صحيح كهربانة ؟  
كهربانة : هو عمل واحد ، أنت مش جربتى وشفتى ؟  
تفيدة : أبوه كهربانة ، أنا جريت  
كهربانة : شخسكى جيبك بقى ياستى ، الا الراجل المرة اللي فاتت كان  
مستشوى المبلغ وما رضاش يعمل العمل إلا بالمحايله وطلوع  
الروح

تحضر الشكومية التى تضع فيها النقود  
تفيدة : خلاص بنت ، أنا أديكى اللي أنت عاوزه  
تفيدة تنهمك فى العد ، كهربانة تبسم إبتسامة المتصر  
قطع

---

مشهد ٣١      غرفة قاسم      نهار / داخلى

قاسم ينظر من بلكونته نحو نافذه الجيران . . الباب يدق  
قاسم : ادخل

ينفتح الباب وتدخل جلنار

قاسم : إيه ده ؟ جايه لحد هنا فى عز النهار ؟ عايزه إيه ؟

جلنار : عايزة اعرف رفضتنى ليه ؟

قاسم : فيه بنت تسأل سؤال زى ده ؟

جلنار : ليه لا ؟

قاسم فى شدة الحيرة

قاسم : أنا . . أنا أول مرة أشوف الجراءة دى . . لكن لعلمك أنا

مارفضتش الجواز منك لعيب فيكى ، كل الحكاية انه مش معقول

اتجوز وأنا لسه تلميذ أبويا بيصرف على

جلنار : مع أنك لو كنت وافقت كنت حاعيش خدامه تحت رجلك ، لأننى

طول عمرى يا حلم اتجوز راجل متعلم ، ولما اخلف ولاد اعلمهم

كلهم ، ولاد وبنات ، لكن . . الجواز قسمة ونصيب

قاسم : جلنار . . صدقيني ، أنتى تستاهلى كل خير ، لكن أنا لسه قدامى

شوط طويل ، عايز اخلص مدرسة الادارة المصرية وأسافر فرنسا ،

ومش ناوى اخلى حاجه تعطلنى

بانكسار

جلنار : معلش . . كل شئ نصيب

تخرج منكسرة ، يتابعها وعلى وجهه علامات الآسى

قطع

نهار / داخلى

غرفة تقيدة هانم

مشهد ٣٢

كهرمانة تقدم لها حجابا آخر

كهرمانة : اتفضللى يا ستى . . حجاب المحبة

تقيدة تأخذه

تقيدة : يعنى ولدنا قاسم يحب بنت جلنار بعد الحجاب ده ؟

كهرمانة : ويدوب فى هواها

تقيدة : وده حنحطه فين بنت كهرمانة ؟ تحت المخدّه ؟

كهرمانة : لا ياسسى ، ده حنعلقه على شجره فى الجينية ، عشان كل الهواما  
 يضره ويمرجحه الحب يشعلل فى قلب قاسم افندى  
 نفيدة : جوزال كهرمانة . . جوزال . . ياللا روحى علقه فى أى فرع .  
 تاخذه منها  
 كهرمانة : من عيى يا هانم  
 قطع

---

شهد ٣٣ حديقة قصر أمين بك نهار / داخل

يبدأ المشهد بالحجاب يتارجح معلقا فى فرع شجرة ثم نرى كهرمانة تقف تحت الفرع وهى  
 تقول

كهرمانة : رينا يستر وما تنكشفش المرة دى كمان  
 تسمع صوتا من خلفها

قاسم : إيه الحجاب اللى علقته ده ؟

تنظر خلفها ، ترى قاسم ، تضطرب

كهرمانة : هه ؟ ده ده . . . . .

قاسم : ده إيه ؟

كهرمانة : ده ست نفيدة هانم قالت لى اعلقه هنا

قاسم : حاقول إيه ؟

كهرمانة : عن اذنك يا قاسم افندى

تجرى للداخل وهو يراقبها

قاسم : احنا مش محتاجين نحرر المرأة من ظلم الراجل بس زى ما بيقول

الشيخ محمد عبده ، احنا محتاجين نحررها كمان من المعتقدات

الخاطئة

قطع

سعد في الحلقة وحوله الطلبة ، سعد يفرح  
 سعد : استاذنا ، الشيخ محمد عبده ، راجع النهاردة من المفتي يا مشايخ ،  
 ومش أصول الراجل يوصل ما يلقاش حد في انتظاره  
 طالب ١ : يا عم سعد مالنا وما للمشاكل ؟ ابعدنا عنها فتح الله عليك  
 طالب ٢ : نستقبل رجلا نفاء الخديوى ؟ انتظن أن هذا فى صالحه ؟  
 سعد : ليه لأ مادام الخديوى نفسه عفا عنه .  
 طالب ٢ : أنت يظهر ما تعرفش الخديوى  
 طالب ٣ من الوجوه التى كانت فى مجلس الأفغانى .  
 طالب ٣ : إيه يا رجال الأزهر ؟ منذ متى تخافون أو تصانعون صاحب  
 السلطان ؟ يا سعد ، امض لاستقبال الشيخ ، وأنا معك ، من يحب  
 أن يأتى معنا فليات ومن يقعد به خوفه فلا حاجة لنا به  
 سعد : ياللا بينا يا مولانا  
 يتحركان نحو الباب ، المشايخ فى حالة حيرة ، وراءهما أحد الطلاب .  
 طالب ٤ : أنا قادم معكم  
 أصوات : وأنا . . وأنا . . وأنا لن نخذل الشيخ  
 يصل سعد إلى الباب فيجد قاسم قادما  
 سعد : جيت فى وقتك يا قاسم  
 قاسم : معقول ما جيش أقابل الشيخ ؟  
 يخرجون جميعا معا

قطع

يبدأ المشهد بفرقة حسب الله ، ووراءها عربة حنطور يجلس فيها الشيخ محمد عبده وإلى  
 جواره سعد زغلول ، وقاسم أمين . ووراء عربة محمد عبده عدة عربات يجلس فيها  
 طلاب الأزهر ، وفى أحدها يجلس الضابط أياه ورجاله . على اليمين واليسار بعض

الطلاب يمشون . فى آخر عرية حنطور زوجة محمد عبده ومعها يتنان : الأولى ١٣ سنة ،  
والثانية ٩ سنوات تتوقف العربات أمام البيت ، ينزل الشيخ محمد عبده يحيى الجميع  
بالتلويح بيديه ، بينما يقف قاسم وسعد وراءه .

قطع

---

مشهد ٣٦ مكتب رياض باشا نهار / داخلى

رياض : شوف يا شيخ محمد ، أنا عايز الوقائع المصرية تتحول على  
ايدك لصلاح لإصلاح البلد . . عايز المعارضة الهادية الرصينة  
اللى تليق بشيخ جليل زيك ، عايز مقالات تليق باسمك وتعبر عن  
افكارك الاصلاحية

محمد : تأكد يا رياض باشا أنى حاكون عند حسن ظنك

رياض : أنا واثق

محمد : لكن لى طلبين صغيرين

رياض : اطلب

محمد : أول طلب تسمح لى بانشاء جمعية المقاصد الخيرية لفتح بعض  
المدارس لتعليم ابنائنا

رياض : موافق . . والطلب الثانى ؟

محمد : عايز يكون من حق اختيار الناس اللى حيتعاونوا معايا فى تحرير  
المجلة

رياض : موافق . . عين اللى أنت عايزه

قطع

---

مشهد ٣٧ الأزهر نهار / داخلى

محمد عبده وسعد زغلول

سعد : ابقى كاتب فى الوقائع المصرية ؟

محمد : أبوه

سعد : اשמعنى أنا ؟

محمد : لأن فيك جرأة وأنا عاوز ناس ما يخافوش عشان أفهم الناس أن الصحافة مش وظيفتها التهليل والتطليل ، لكن وظيفتها كشف الأخطاء والقاء الضوء على الجوانب المضيئة ، بصرف النظر عن شخصية المخطئ أو المصيب

سعد : عملى معاك ده شرف لى يا مولاي

يربت عليه

محمد : بالمناسبة ، هات لى كمان قاسم أمين ، الواد الهادى ده فيه ذكاء

نادر ، وممكن يكون باحث من طراز فريد

سعد : حابلقه النهارده عشان يجيلك ان شاء الله

قطع

ليل / داخلى

هو قصر أمين بك

مشهد ٣٨

أمين ، قاسم . . نلاحظ أن الأب غاضب

أمين : عايز تبقى جرنالجي يا افندى ؟

قاسم : وليه لا يا والدى ؟ الصحافة دلوقت مهنة مشايخ لهم قيمتهم ،

وافنديه درسوا فى أوروبا ، ولو كانت عيب ما كانوا يشتغلوا فيها

أمين : اسمع يا ولد ، أنا عارف اللف والدوران بتوعك دول . أنت عايز

تبقى جرنالجي مع محمد عبده عشان تكملوا الحكاية القديمة بتاعة

الهجوم على افندينا وتحريض الناس على الشغب

قاسم : يا والدى دى جريدة الحكومة

أمين : ولو . . أنا أهه وأنت أهه أن كان استاذك ده حيممر فى الشغلاته دى .

بكره تشوف ازاي افندينا حيطرده منها ويرجعه بلده تانى

قاسم : لكن يا والدى . . . .

أمين : مالكنش ، بدل الكلام الفارغ ده اجتهد فى مذاكرتك ، وخلص

مدرسة الادارة عشان تحافظ على اسم العيلة . . . اتفضل يا افندى



### قطع

مشهد ٣٩ مكتب محمد عبده بالوقائع المصرية نهار / داخلي

محمد عبده يمسك بورقة بينما سعد زغلول يسمع

محمد : أسمع يا سعد

يقرأ «انما تسعد البلاد ويستقيم حالها اذا ارتفع فيها شأن القانون

وعلا قدره واحترمه الحاكمون قبل المحكومين ، واستعملوا غاية

الدقة في فهم فصوله وحدوده . . . . » .

سعد : كلام هادي يا مولانا لكن معناه واضح

محمد : اصبر يا سعد ، هذا مدخل فقط ، وأنا اتدرج منه الى بيت القصيد

سعد : وإيه هو بيت القصيد يا استاذنا ؟

محمد : نقد مدير مديرية الشرقية لأنه جمع الفلاحين وشغلهم سخرة في

إصلاح السكة الحديد وكأنهم يعيشون عنده . . .

سعد : قول يا مولانا قول . . أنا سامع

### قطع

مشهد ٤٠ قاعة العرش نهار / داخلي

يبدأ المشهد بصحيفة الوقائع تلقى بقوة على منضدة ثم نرى الخديوي توفيق هو الذي قذفها

ونرى أمامه رياض باشا - الخديوي يشير للصحيفة في ثورة

توفيق : إيه اللي بيجرى ده يا رياض باشا ؟ صحيفة الحكومة بتنقد

الحكومة ؟

رياض ببرود

رياض : وإيه المشكلة يا افتدينا ؟

توفيق : المشكلة أن مدير الشرقية زعلان ، وعنده حق لاننا لو سكتنا على

الكلام ده ما فيش حد حيقي بعيد عن الانتقاد  
رياض : لرجوك يا ولي النعم إهدا ، الجرايد فى أوروبا كلها بتكتب عن  
عيوب البلاد ومع ذلك ما حدش بيزعل منها ولا بيقلها  
توفيق : واحنا مالنا ومال أوروبا ؟  
رياض : الجرايد فى الأصل اختراع أوروباوى يا مولانا  
توفيق : أوروباوى ولا أسبوى أنا مش مقتنع بالكلام ، وما تحاولش تفهمنى  
يا رياض باشا أنك مؤمن بالمبدأ ده اللى بيسموه . بيسموه إيه ؟  
رياض : الديمقراطية يا افندينا  
توفيق : الديمقراطية يا سيدى  
رياض : لا يا ولي النعم ، ما أقدرش أكذب عليك أنت بالذات ، أنا مش من  
أنصار الديمقراطية ، أنا راجل دقه قديمة ، وكل اللى باحاول اصمله  
أنى أطبق نظرية الدكتاتور العادل  
توفيق : رياض باشا . . للمرة الألف بأقول لك محمد عبده مش هو الراجل  
اللى تدافع عنه  
رياض : وأنا يا مولاي من واقع اخلاصى للعرش باكرر رجائى فى ضرورة  
مد ايدينا للمعتدلين وعلى رأسهم الشيخ محمد عبده  
توفيق : رياض باشا ، المناقشة معاك مستحيلة - خلاص ، اتصرف زى  
ما يعجبك ، لكن للعلم ما حدش حيتحمل النتائج غيرك  
رياض ينحنى  
رياض : وأنا متحمل لجميع النتائج يا مولاي  
قطع

قاسم ينظر عبر السور فى قلق ، يفرك يديه فى بعضها ، يروح ، يجرى . تأتى شاهيناز من  
الناحية الخلفية مسرعة وهى تنظر خلفها بخوف ، تصل  
قاسم : تاخرت ليه يا شاهيناز ؟  
شاهيناز : اصلهم بيقلوا الباب الكبير بالليل دلوقت عشان ما خرجش .

وخرجت من باب الخدامين بالعافية

قاسم : حد خد باله من حاجة ؟

شاهيناز : يظهر كده

قاسم : يا خير

صوت من قريب

الأب : بسم الله ما شاء الله

تنظر للمخلف ، ترى والدها

شاهيناز : والدى ؟

قاسم يغتر فاه

الأب : وأنت يا افتدى أبوك ما علمكش أن الجيران لهم حرمة ؟

قاسم : أنا . . أنا . . أنا . .

الأب : أنت تروح من وشى حالا لحد ما أشوف والدك

للبنات وهو يسحبها من يدها

الأب : اتفضلى قدامى

قطع

---

نهاية الحلقة الثانية

## الحلقة رقم (٣)

مشهد ١ فيللا والد شاهيناز ( البهو ) ليل / داخلي

الوالد يصفع ابنته صفعات متتالية ، النساء يحاولن منعه وضمنهن امها التي تقف بينهما وتمسك بزوجها بعد ان تقع البنت على الارض من العنف  
ام شاهيناز : كفاية افندم بتتنا حتموت فى ايدك افندم  
ابو شاهيناز : خليها تموت قبل ماتجيبلى العار  
يزغدها بقدمه . احدى الخادومات تأخذ بيد البنت لتنهض . الام للخادمة  
ام شاهيناز : خديها اوضتها  
بمجرد ان تنهض البنت الاب يصدر فرماناته  
ابو شاهيناز : شبابيك البيت من النهاردة ماتفتحش . شبابيك اودتها  
تسمر  
يشير للبنت  
ابو شاهيناز : الباب ماتخطيهوش  
للام  
ابو شاهيناز : وتكلمى الخاطبة تشوقلها عريس  
ام شاهيناز : مفهوم افندم  
قطع

مشهد ٢ مدخل بيت سعد ليل / داخلي

قاسم يروح ويحيى فى غاية الانفعال والتأثر . سعد يراقبه  
سعد : يا ابني ارحم نفسك  
قاسم : ارحم نفسى ازاي يا سعد ، انا باموت من جوايا انت متخيل البنت  
المسكينة دى أهلها حيمعملوا فيها ايه ؟؟

سعد : الله يكون في عونها لكن انت بتفكر في البنت وناسي نفسك ، خليك في نفسك الأول حتعمل ايه مع ابوك وحتعمل ايه معاك ؟؟ ابوك راجل شديد

قاسم : انا عارف انه شديد وعارف انه هيكون في منتهى العنف معايا لكن انا عارف اني حاقددر استحمل انما شاهيناز

سعد : تاني شاهيناز ؟؟ نرجع تاني لحضرتك مش مفروض والدك يعرف انت فين ؟؟

قاسم : انا بافكر ابات هنا النهاردة ما فيش داعي اروح واعمل مواجهة والموضوع سخن

سعد : بس كدة والدتك حتطلق

قاسم : والدتي ؟ انا مش عارف حايبص في وشها ازاي بعد كده والغريب اني لسه رافض الجواز من جلتار

سعد : عموما اذا حببت ابعت الخدام عشان يظمنها ما فيش مشكلة والبيت هنا بيتك

قاسم : بصراحة انا مش عارف اعمل ايه انا متلخبط آخر لخبطة قطع

ليل / داخل

يهو قصر أمين بك

مشهد ٣

أمين بك ووالد شاهيناز ، امين يعتذر

أمين : اللي عمله ابني ده غلط جسيم لا يمكن يعدى بسهولة كهرمانه تنصنت من وراء الاراييسك خلف المتحدثين دون ان يروها

ابو شاهيناز : اللي حصل ده عار في تاريخ الأسرة

امين : ليه يا باشا

ابو شاهيناز : لان بناتنا مايتجوزوش راجل شاف خيالهم

امين : طب ليه ؟؟

ابو شاهيناز : تعاشره ازاي بعد كده ؟ ولو اختلف معاها يقولها ايه ؟ يا اللي اهلك ماعرفوش يربوكي

امين : سعادة الباشا

بحسب

ابو شاهيناز : من فضلك انا مش جاى اكلمك عشان تخلى ابنك يتجاوز بتنى

انا اكلمك عشان تعرف الجريمة اللى ابنك عملها . . لكن بتنى انا

حاضر اتصرف معاها ازاي

امين : اوعذك يا باشا انى اتصرف فى الموضوع بحزم

يقف أبو شاهيناز

ابو شاهيناز : أنا تكفينى كلمتك ، عن اذنك

ينصرف بعصبية بينما الاب واقف يغلى

قطع

---

مشهد ٤      الشارع الذى يسكنه امين بك      ليل / خارجى

قاسم وسعد يقفان عند الناصية

سعد : يا ابنى ادخل معاك احسن

قاسم : لا مافيش داعى تحضر لحظة المواجهة بينى وبين والدى

سعد : بالعكس ده وجودى يمكن يخفف الموقف شويه

قاسم : انا عارف والدى لما بيزعل ماييعلش حساب لحد

والد شاهيناز يخرج مندفعاً من بيت امين بك الى بيته

سعد : مين ده اللى خارج من بيتكم ؟؟

قاسم ينظر اليه

قاسم : ده ابوها كده تبقى كملت

سعد : اجى معاك يا بنى بدل ما تدخل لوحذك

قاسم : لا الاحسن انى اواجه الموقف لوحدى واللى يحصل يحصل

سعد : انا حاستنى فى البيت لو فيه اى حاجة تعالى

قاسم : ربنا يعمل ما فيه الخير

يمشى نحو البيت تنعكس على وجهه الاضواء من حين لحين لتظهر ملامح وجهه

قطع

قاسم يقع على كتفه ويده على خده علامة على ان والده صفعه بعنف مع ارتفاع صوت والده  
امين : انا ماعرفتش اوى

نرى الاب فى قمة غضبه بينما ام قاسم وتفيدة تقفان كالسد بين زوجهما وقاسم  
الام : كفاية بقى

تفيدة : قاسم ماعدش عيل عشان يتضرب بالشكل ده

امين : لو كان راجل صحيح ماكانش يعتدى على اعراض حد

قاسم وسط الدموع

قاسم : انا ماعتديتش على اعراض حد ماعملتش اى حاجة غلط

كهرمانه وجلنار تنظران من وراء الاراييسك

امين : ومقابلة بنات الناس فى الضلمه بالليلالى صح يا عديم التربية انت

الضرب شوية عليك عقابك لازم يكون الطرد

الام : لا يا امين بيه

تفيدة : لا يمكن ايتنا قاسم يسبب البيت افندم

امين : ولا كلمة

مشيرا للباب

امين : بره . . بره . . ماشوفش وشك تانى يا عديم

قاسم يتدفع للباب . الام وتفيدة تصرخان

تفيدة : قاسم حبيبى

الام : ابنى

امين بيه يغلق الباب وراءه

امين : ولاد اخر زمن ماعندهمش نخوه

قطع

سعد مواسيا قاسم الذى يبدو عليه التأثر

سعد : يا عم قاسم صلى على النبي لا اول واحد زعل مع ابوه ولا حتكون  
اخر واحد

قاسم : سيني في حالي اعمل معروف يا سعد أنا مش طابق نفسى  
سعد : سيك ات من الكلام ده وقوم تعالى معايا مشوار مش حتندم عليه  
قاسم : لا عايز اروح ولا اجى

سعد : مش تعرف الاول رايح فين ؟

قاسم : يعنى حتكون رايح فين ؟

سعد : رايح اقبال الاميرة نازلى فاضل مع الشيخ عبده

قاسم : مين نازلى فاضل ؟

سعد : بنت عم الخديو ذات نفسه ابوها الامير مصطفى فاضل اللى كان  
مفروض يبقى خديو مصر بعد اخوه اسماعيل لولا ان اسماعيل  
استصدر فرمان بان وراثة العرش تكون في اكبر الابناء

قاسم : آه ودى حتقابلها ليه

سعد : دى يا حضرة الفاضل سيدة على الطراز الاوربى تلبس الثياب

الاوروبية وتتكلم الاوروبية وتقابل الرجال على الطريقة الاوروبية

باختصار هي سيدة لا مثيل لها في مصر المحروسة الان

قاسم : معقول الكلام ده ؟

سعد : مش معقول ليه ؟ الست دى كانت متجوزة اخو السلطان العثمانى

واخو السلطان ده كان سفير تركيا في باريس وهي عاشت معاه هناك

ويتصرف زى اهل باريس ما بيتصرفوا

قاسم : لولا ان البال مش خالى كنت جيت معاك شفت الست المعجبية دى

لكن ما علش الجايات اكثر من الرايحات

سعد : انت مالكلش في الطيب نصيب عن اذنك البيت بيتك خد راحتك

سلام

يخرج سعد ويجلس قاسم على احد المقاعد ويزفر بعقم

قطع



يبدأ المشهد بنازلى (٣٥ سنة) تتحدث واثناء الحديث تستعرض الكاميرا الحاضرين

نازلى : صحيح اسماعيل باشا بنى دار الاوبرا وبنى بعض المسارح لكن

مش معنى كده ان مصر فيها حركة مسرحية

احد البهوات : وفى رأيك يا سمو الاميرة كيف تكون فى مصر حركة

مسرحية ؟؟

نازلى : البداية لازم تكون بالعلم نبعث ناس تدرس فى اوروبا نفتح مدرسة

للممثل وفنون المسرح فى مصر ونعلم الشباب والبنيات بعد

خمستاشر عشرين سنة ممكن تبقى فى حركة مسرحية عندنا

يدخل الحاجب معلنا للاميرة

حاجب : الشيخ محمد عبده يا افندم ومعه ضيف

نازلى تشير بيدها ان ادخله . الحاجب يشير للشيخ . يدخل الشيخ محمد وراه سعد هاتبا

رغم تماسكه

محمد/ سعد : السلام عليكم

الجميع : عليكم السلام ورحمة الله . اهلا يا فضيلة الشيخ . اهلا يا مولانا

محمد يتوجه للاميرة مباشرة ويسلم عليها وراه سعد

محمد : ازاي حال اميرتنا ؟؟

تعلق عيني نازلى بسعد

نازلى : الحمد لله يا شيخ محمد ، ايه يا شيخ محمد مش تعرفنى بصاحبك

محمد : طبعا سعد زغلول محرر فى الوقائع المصرية

نازلى : اهلا يا شيخ سعد

سعد : اهلا يا سمو الاميرة

نازلى : انت اكيد مصرى

سعد : وفلاح كمان يا سمو الاميرة

لسعد ومحمد عبده

نازلى : ملامح صريحة جدا

محمد : الشيخ سعد والده من اعيان برنبال

للاخرين

نازلى : اهلا وسهلا اتفضلوا البيت بيتكم نكمل كلامنا كنا بتكلم عن  
الحركة المسرحية ايه رأيك يا شيخ محمد فى المسرح ؟؟  
محمد : المسرح فن لم يعرفه العرب ، لأنه يحتاج إلى استقرار ، وبناء دور  
للمعرض والعرب كانوا قوما رحل . . وكان الشعر هو احب الفنون  
اليهم . .

نازلى : تعرف ان الشيخ رفاة الطهطاوى لما سافر باريس اتفرج على  
المسرح ، وكتب عنه فى كتابه الرائع « تخلص الابريز »  
محمد : الطهطاوى سيدنا

نازلى : وانت يا شيخ سعد ؟  
سعد : الحقيقة انا ماهتمش بتاريخ المسرح لكن باروح اتفرج على يوسف  
خياط وسلامة حجازى ، ورأى انه فن لطيف ويمكن ان يتعلم منه  
الناس الكثير من المواعظ والدروس . .

نازلى : انا يعجبني الشباب الشجاع اللى يقدم على فعل الشئ ويعدين يفكر  
فيه . . الخبرة شئ مهم جدا يا جماعة فى تكوين الراى . .  
احد الانراك يتدخل . .

تركى : يا سمو الاميرة ، الكلام حياخدنا ومش حنسمع حاجة ، وانا  
عرفت انك جايبة لنا النهاردة الاستاذ عبده الحامولى يمتعنا بألحانه  
الرائعة . . عايزين نسمع الاستاذ

نازلى مداعبة . .

نازلى : زهقتم من كلامى ؟

تركى : العفو يا ست الكل . .

نازلى : حاضر يا سيدى ، نسمع الاستاذ الحامولى . .

اصوات : الله . . اهو كده الكلام . هو فيه احسن من الحامولى ؟ نسمع

الحامولى طبعاً . .

تشير للحاجب ، فيومئ برأسه يدخل الحامولى وتخته وبينما يجلس التخت . . يسلم  
الحامولى على نازلى . .

الحامولى : سعيد برؤياك يا اميرة الامراء

نازلى : سعيدة بتشريفك يا زعيم الغنا والمغنين

يحى الاخرين بالاشارة ، يردون التحية . . يجلس على مقعده ، تعزف الموسيقى ،

يغنى . اثناء الغناء يلاحظ سعد ان الاميرة تنظر اليه ، يهرب بعينه ، تبسم له يتشاغل بالنظر للحامولى . تنتهى الاغنية ، يصفقون ، يهللون . .

اصوات : الله يا استاذ رينا يزيدك فن . رينا يكرمك اهو كده الغنا

ولا بلاش

محمد عبده يهمس لسعد

محمد : ياللا بينا احنا ، كفاية كده

سعد : ياللا يا مولانا

يذهبان للاميرة

محمد : نستأذن احنا يا اميرة

نازلى : ايه ده ؟ معقولة ؟ انتم لحقتم تقعدوا ؟

محمد : اتنى عارفى شغل الصحافة ، المواعيد فيه مايرحمش . .

نازلى : او كى . . لكن اوعدنى بتكرار الزيارة . .

محمد : اكيد طبعا . .

نازلى : وانت يا شيخ سعد ، عايزه اشوفك طول مانا فى مصر ، ماتربطش

نفسك بالشيخ عبده . .

سعد : ان شاء الله . .

يصافحها . . يخرج هو ومحمد عبده . .

قطع

ليل / داخل

غرفة نوم سعد

مشهد ٨

سعد وقاسم على سرير واحد يقظان . . قاسم ينهض ثائرا . . .

قاسم : ارحمنى بقى يا سعد ، الفجر قرب يطلع وانت مابطلتش كلام عن

الاميرة بتاعتك دى . . عايز انام يا اخى . .

سعد : اصلك ماشفتهاش يا قاسم يا اخويا ست الافرانكا صحيح ، دى

بتفهم فى كل شئ ، الادب ، والمسرح والغنا والسياسة . . والله

ولا الرجال . . كل ستات البلد ده كوم ودى لوحدها كوم تانى . .

قاسم : قلت الجملة خمستاشر مرة لحد دلوقت . .

سعد : خليفهم ستاشر يا اخى ..  
 قاسم : يا الطاف الليلة .. اسمع يا جدد انت يا تنام ساكت يا اسيب لك  
 الاودة واطلع انام بره ..  
 سعد : خلاص يا اخى خلاص .. دانت خلقتك بقى اضيق من خرم  
 الايرة ..  
 قاسم ينظر لسعد بغيط ثم ينام ويسحب الغطاء على رأسه ..  
 قطع

---

مشهد ٩ شارع بالقاهرة      نهار/ خارجى

حسن وقاسم يسيران .. يتوقفان أمام أحد المباني عليه لافتة .. دائرة الحاج يوسف ..  
 قاسم : اطلع انت انا حاستاك هنا  
 حسن : لازم تيجى تشوف الدائرة بتاعة الحاج يوسف ..  
 قاسم : لا ماعلش هاستاك ..  
 حسن : والله لانت طالع ، انا حاخذ منه مصروفى واتزل على طول ..  
 يجذبه من يده ..  
 حسن : تعالى بقى ..  
 يدخلان المبنى ..

قطع

---

مشهد ١٠ صالة الكتاب بدائرة الحاج يوسف      نهار/ داخل

الموظفون التقليديون على مكاتبهم .. يدخل قاسم وحسن ..  
 حسن : سلام عليكم ..  
 الجميع يقفون  
 الجميع : عليكم السلام ورحمة الله اهلا يا بيه ..  
 يرد عليهم بيديه

الجميع : اتفضل .. اتفضلوا .. الدائرة نورت يا حسن افندى ..

الباشكاتب يسير اليه

الباشكاتب : اى خدمة يا حسن افندى

حسن : امال والدى فين ؟

الباشكاتب : فى الجنية اللى ورا .. تحب تستناه ..

يسحب قاسم ..

حسن : لأ حنروح له .. شكرا .. ياللا يا عم قاسم .. تعالى شوف

مملكة الحاج يوسف الخاصة ..

قطع

---

شهد ١١ حديقة خلفية بدائرة الحاج يوسف نهار/ خارجى

الحاج يوسف حوله اهل زوجته الذين رأيتهم من قبل ، ومعهم شيخ وقور يجلس كحكيم ، يقول مهدئا ..

الشيخ : صلوا على النبی يا جماعة .. اهدوا امال عشان نسمع بعض ..

يدخل قاسم وحسن ، يلاحظان انهماك يوسف فى المناقشة

قاسم : يظهر ائنا جينا فى وقت مش مناسب ..

حسن : مش مناسب ليه ؟ دول اهل مرات ابويا اللى اطلقت وامور الجواز

والطلاق دى حاجات بتحصل يوماتى عندنا ..

حسن يجذب قاسم من يده ..

حسن : تعالى نقعد فى المكتب لحد ما يخلصوا خناق ، ولا اقول لك

تعالى نقعد على الدكة اللى هناك دى ..

يشير لدكة فى خيميله ..

قاسم : مايصحش يا عم ..

حسن : يا سيدى قولتلك الامور الخاصة بالجواز والطلاق عندنا مافيهاش

اسرار ، دى قضايا شرعية ..

يجذبه من يده ..

حسن : ياللا .. ياللا ..

يتجهان لمكان الجلوس ..

يوسف : انا لأمأخذة عندى كلمة ونص .. الست الى طلقتهادى تبقى  
ام عيالى ، وام عيالى مايصحش تطلع تشتغل فى السوق ..

قريب : ومايصحش ليه يا حاج يوسف ؟

يوسف : من امتى الستات يشتغل فى البلد ؟ الناس كلها عارفه انه عيب  
قوى ان الست تشتغل ..

والد الزوجه : وابه الى عيبه يا حاج ؟ مادام الست بتحافظ على شرفها  
ماحدث له عندها حاجه ..

يوسف : لأبقى دانا لى ونص .. الولاد يقولوا لابنى ايه .. ؟

والد الزوجه : يا حاج ، بتتنا ماعدتش على ذمتك ، واطن مش من حقك  
تتحكم فيها ..

للشيخ ..

والد الزوجه : ولا ايه رأيك يا مولانا .. ؟

الشيخ : والله .. المسألة قولان .. نسمع رأى الحاج يوسف ..  
يوسف : رأى قلته ..

والد الزوجه : ورأيك مايمشيش علينا ، احنا يا اخواننا ناس على قدنا ،  
وهى عايضة تصرف على نفسها من كدها واذا كان مش عاجبك  
اصرف عليها ..

يوسف : اصرف على واحدة مش فى عصمتى ؟ ما تتكلم يا سيدنا  
الشيخ ..

لأهل العروس ..

الشيخ : يا اخواننا بتتكم بعد طلاقها ملزومة منكم ..  
والد الزوجه : واحنا مانقدرش نصرف عليها ..

يوسف : ده يبقى عند كده .. خلاص .. نمشى فى سكة العند ..  
يقف يوسف ، الشيخ يمسك به

الشيخ : استنى يا حاج يوسف ..

يوسف : لا مؤأخذة يا سيدنا الشيخ .. اصل الكلام خالص ..

يتجه للخارج ، يشير لولده أثناء خروجه ..

يوسف : تعال ورايا ..

ينهض حسن مسرعا . .  
حسن : حاضر . .  
ينهض قاسم وراءه . .

### قطع

---

مشهد ١٢ شارع بالقاهرة نهار/ خارجى

يمشى حسن وقاسم  
حسن : مالك سرحان ومسهم كده من ساعة ما خرجنا من الدايرو ؟  
قاسم : بافكر فى اللى شفته . . ليه مايكونش من حق الست انها تشتغل اذا  
كانت هناك ضرورة لشغلها ؟  
حسن : جرى ايه يا قاسم عايز الست تشتغل تاجر . .  
قاسم : لكن السيده خديجة رضى الله عنها كانت بتاجر . .  
حسن : الحاج يوسف مالوش دعوه بالسيدة خديجة . . الحاج يوسف  
بيتكلم عن الست اللى طلقها . .  
قاسم : الغريب ان كل رجاله البلد هم الحاج يوسف فى موضوع عمل  
المرأه . . والمشكلة ان الدين فى ناحية فى الموضوع ده والعادات  
فى ناحية تانيه . .

حسن يضحك

حسن : والله يا شيخ انت صعبان على  
قطع

---

مشهد ١٣ غرفة سعد زغلول نهار/ داخل

يبدأ المشهد بكراصة قاسم التى كتب عليها « كلمات » ويد قاسم تفتحها وهى على  
المكتب . . قاسم يكتب . .  
قاسم : « من احتقار المرأة ان يحال بينها وبين الحياة العامة والعمل فى أى

شيء يتعلق بها .. فليس لها رأى فى الأعمال ولا قدم فى  
المنافع العامة»

قطع

---

مشهد ١٤ بهو قصر امين بك نهار/ داخل

امين بك يدخل من الباب بالنزى العسكرى مشدودا يرى الام جالسة صامته ثم تقف مرجه  
به فى وجوم

الام : اهلا يا امين بيه

ينظر الى وجهها

امين : مالك يا هاتم ؟

الام : ما فيش

يتركها وينصرف ، إلا ان تفيدة تخرج له من وراء الحاجز الارابيسك ..

تفيدة : امين بيه

ينظر اليها ..

امين بيه ، ولدنا قاسم لازم يرجع افندم امين بيه ، ولدنا قاسم لازم

يرجع يعنى لازم يرجع ..

يتركها ويصعد السلم ، ام قاسم تمسح دموعها فى صمت .. تفيدة تصعد خلفه ..

قطع

---

مشهد ١٥ غرفة ام قاسم نهار/ داخل

امين بك يقف بمنتصف الحجرة فى صلاة .. تفيدة تمسك يده باكيه راجيه ..

تفيدة : امين بك ، عشان خاطرى امين بك قاسم ده روى افندم .. البيت

من غير قاسم مش بيت افندم ..

امين : لما يتأدب يبقى يرجع

تفيدة : لرجوك افندم ، خاصمه ، احبسه فى اودته ، اعمل اى شيء ، لكن



بلاش تخليه يبعد عن البيت  
 امين : غريبه . . دى امه ماعملتش كده  
 وكأنه لسعها بالنار  
 نفيدة : انا امه افندم ، قاسم ابني انا كمان ، قاسم حته من قلبى امين بيه . .  
 تدخل كهرمانه مسرعه . .  
 كهرمانه : الحق يا سيدى ، الحقى يا ستى  
 امين : فيه ايه ؟  
 كهرمانه : الست ام قاسم مغى عليها تحت  
 نفيدة تجرى  
 نفيدة : امان يا رى . . امان يا رى  
 امين بك يقاوم قليلا ، لكنه لا يلبث ان يتجه الى حيث توجد زوجته . .  
 قطع

---

مشهد ١٦      بهو قصر امين بك      نهار/ داخلى

الام ممددة على كنبه ، نفيدة تشممها زجاجة عطر  
 نفيدة : سلامتك ام قاسم . . سلامتك حبيبى  
 كهرمانه تهوى لها ، جلنار تقف عند قدمى السيدة تتابع ما يحدث وعلى وجهها علامات  
 التأثر . امين بك يأتى  
 نفيدة : ام قاسم . . فوقى حبيبى . . فوقى افندم  
 ام قاسم تبدأ فى الافاقة ، تفتح عينيها ، يتقدم منها امين بيه يقول متماسكا  
 امين : سلامتك يا هانم  
 ام قاسم توجه وجهها الناحية الاخرى . نفيدة تنظر اليه نظرة ادانة . يقول ولا زال يحتفظ  
 بتماسكه موجهها كلامه لكهرمانه  
 امين : ابعثوا سباعى ينادى على سيدك قاسم افندى من عند صاحبه سعد  
 زغلول  
 نفيدة : حالا كهرمانه ، ابعثى سباعى ينادى ولدنا قاسم ، حالا كهرمانه  
 قطع

سباعى يصل امام البيت ( بيت دور واحد ، له باب مغلق )

سباعى : هو البيت ده انا عارفه

يدق الباب ، يفتح خادم ريفى

خادم : نعم

سباعى : الشيخ سعد هنا

خادم : لا

سباعى : ولا قاسم افندى

خادم : الشيخ سعد وقاسم افندى راحوا مشوار مهم لكن ماقالوش هوايه

سباعى : طيب لما يجوا قول لقاسم افندى والدك يقولك ترجع البيت

ضرورى

خادم : ان شاء الله . . ما تفضل تشرب حاجه

سباعى : تشكر . . سلام عليكم

قطع

سعد وقاسم يعبران الباب يستوقفهما البواب

البواب : على فين يا افنديه

سعد : داخلين نحضر الصالون بتاع الاميرة نازلى

البواب : الاميرة مش جوه ، جالها تلفراف مستعجل من باريس ومافرت

النهاردة الصبح

سعد لقاسم

سعد : سافرت مالکش نصيب تشوف حاجه عمرك ماشفتها قبل كده

للربواب

متشكرين يا سيدى . . سلام عليكم

البواب : وعليكم السلام ورحمة الله

يسير قاسم وسعد بحذاء سور القصر

قاسم : تعرف يا سعد انا جيت معاك ليه لاني كنت مشتاق جدا اشوف  
النموذج الاوروي للمرأة اصل ماخييش عليك المرأة المصرية اللي  
الواحد بيشفها كل يوم حالها عدم لا تعليم ولا خروج للعمل  
وتعدد زوجات وجواري بينافسوا الزوجات  
سعد : ايه ده ، ابن البيه التركي ناوي يبقى نائر على الهيئة الاجتماعية في

مصر

قاسم يتوقف ويتكلم بحدة وغضب  
قاسم : سعد ، اياك اسمع منك الكلام ده ثاني ، انا مصري زيك واكثر منك  
كمان

سعد : خلاص يا عم باهزر معاك  
يسيران وعلى وجه قاسم آثار الغضب

قطع

---

مشهد ١٩ صالة سعد زغلول من الباب ليل / داخلي

يدخل سعد وقاسم من الباب يصحوا الخادم من على اريكة ارايسك ويخاطبهما  
الخادم : في واحد جه من قصر سعادة البيه والدك يا قاسم افندي ، ويقول  
لازم ترجع البيت ضروري

قاسم : جه امتي

الخادم : بعد ما طلعتم على طول

يقف قاسم مفكرا ، سعد يخاطبه

سعد : بتفكر في ايه ، ادخل نام والصباح رياح

قاسم : انا عارف ان امي مش حتنام غير لما ارجع

قاسم يتردد

سعد : ماتعملش فيها مهم وادخل نام ماتترددش ياللا على النوم

يسحبه في اتجاه غرفة النوم

قطع

مشهد ٢٠ غرفة ام قاسم ليل/ داخلي

تنام هي وزوجها على السرير . الكاميرا ناحية الأم التي نرى عينيها مفتوحتين ، تنقلب على ظهرها . الاب لا يتحرك الا أننا نرى عينيها مفتوحتين كلوز على اللبة المعلقة في السقف ( لمبة غير كهربية ) او على شمعة كبيرة تشبه الكرة بجوار كل منهما أو شمعدان قطع

مشهد ٢١ غرفة تفيدة هانم ليل/ داخلي

تفيدة هانم جالسة في سريرها تحرك يديها بما معناه انها تكلم نفسها بمعنى « ايه اللي يحصل ده » قطع

مشهد ٢٢ امام قصر امين بك نهار/ خارجي

البروجي والحرس سلاح وامين بك يخرج من القصر على الجواد بينما قاسم امين قادم يتوقفان . . قاسم يخجل وهو يخفض عينيه نحو الارض قاسم : صباح الخير امين يتحرك دون كلمه . . قاسم يتابعه بعينه حتى ينحرف في التقاطع ، ثم يسير الى الباب قطع

مشهد ٢٣ بهو قصر امين بك نهار/ داخلي

تفيدة والام تجلسان صامتتين بينما كهروانه تجلس على الارض يفتح الباب فتتجه الا بصار إلى القادم يرين قاسما الأم تقف هاتفه

الأم : قاسم  
 تفيدة تجرى نحوه وتحضنه  
 تفيدة : حبيبي قاسم . . وحشتي ولد وحشتي خلوص  
 قاسم : وانتى كمان يا امى  
 تحضنه بحب وهى تيكى  
 تفيدة : حبيبي قاسم ابني حبيبي حبيبي خلوص  
 يتخلص منها يرفق ، يتجه لاهه يرمى فى حضنها ، تربت عليه وهى تيكى دون كلام وهو  
 يكرر  
 قاسم : امى . . امى . . امى  
 قطع

---

مشهد ٢٤      غرفة قاسم امين      نهار/ داخل

قاسم يفتح باب غرفته ويدخل يقول يشوق  
 قاسم : ياه . . قد ايه اودتى وحشتى المدة اللى فاتت دى  
 يتحسس الاشياء القفطان المعلق ، الستائر ، السرير تدخل الجارية جلنار  
 قاسم : انتى هو انا ناقص  
 جلنار : انا جاية عشان اقول لك : هى البنت دى اللى سيبتى عشانها  
 ينظر للخارج بقلق  
 قاسم : هو ده وقته  
 جلنار : ايه الفرق بينى وبينها عشان هى لها اهل وانا جارية  
 قاسم : ياستى اعملى معروف كفاية اللى حصل  
 جلنار : على كل حال حمد الله على السلامة  
 تتجه للخروج ، يتنفس بعمق  
 قطع

النديم ، اديب اسحق

اديب : قلت اجى اودعك قبل ماسافر يا نديم

النديم : تسافر على فين يا اديب يا اسحاق

اديب : باريس

النديم : اوعى يكون رياض باشا نفاك انت كمان

اديب : لو كان فيها نفى كنت رجعت لمطرح ما جيت فى بلاد الشام

النديم : امال حتمعل ايه فى باريس

اديب : حافتح جرنان بدل الجرانين اللى قفلها لى رياض باشا ، عرايى بيه

وأقظاب الحزب الوطنى كلفونى بالمهمة دى

النديم : واسكندريه من غيرك حيقى ليها طعم ازاي

اديب : انت حبايبك كثير يا نديم واكيد مش حيخلوك تحس بأى شئ . .

المهم . . مش عايز اعطلك . . اشوف وشك بخير

وهما يتصافحان ، النديم يضحك متعجبا

النديم : مش غريبة يا اديب انك تتحمل السفر لباريس ، والمغامرة عشان

مصر رغم انك شامى

اديب : مصر يا نديم هى ام العرب لو انصلح حالها ينصلح حالنا كلنا ، ولو

اتلخبطت امورها يتوهوا . سلام يا صاحبى

النديم : سلام يا اديب

يحتضن كل منهما الاخر بحرارة

قطع

سعد زغلول يدخل ، يسأل سباعى الذى يقابله فى طريقه

سعد : قاسم افندى فين يا عم سباعى

سباعى : فى المدرسة يا شيخ سعد لسة مارجعش

سعد : معقول مارجعش لدلوقت ،

يتجه للباب الخارجى يقف ، ينظر يمنة ويسارا يرى قاسما قادما ، يسرع اليه

سعد : معنى لازم تتأخر النهاردة بالذات يا قاسم كنت فىن لحد دلوقت

الدنيا مقلوبة وانا بادور عليك مش لاقبك

قاسم : ايه جرى ايه

سعد : الضباط المصريين اللى فى القاهرة بيتجمعوا كلهم قدام بيت عرابى

من المصرية ، اكيد فيه حاجة خطيرة

قاسم : اكيد ، ياللا بينا طيب عشان نلحق نشوف ايه الحكاية

قطع

---

ليل / خارجى

امام بيت عرابى

مشهد ٢٧

ضباط كثيرين يتجمعون امام البيت ، يهتفون

الضباط : لا زعيم الا عرابى . . عرابى عرابى عاش عرابى

يوزباشى : يا عرابى انت قائدنا لما تجيلنا كل حقوقنا

الاهالى واقفون للمشاهدة فى الخلفية يدخل قاسم وسعد ، بينما الاهالى يهتفون مع الضباط

الجميع : يا عرابى انت قائدنا لما تجيلنا كل حقوقنا

قاسم : لكن ايه السبب فى ده كله

سعد : ده اللى مش فاهمه ، لكن حاصر فى كل حاجه تعالى

يتجه للضباط ، يخاطب اليوزباشى

سعد : سلام عليكم

يوزباشى : وعليكم السلام

سعد يقدم له بطاقة

سعد : انا سعد زغلول محرر من جريدة الوقائع

يوزباشى : اهلا بيك

سعد : ايه الحكاية ، متجمعين كده ليه ؟

يوزباشى : عثمان باشا رفيق شال عبد العال حلمى بيه من قيادة آلاى طره  
ونقله لوظيفة اقل فى ديوان الجهادية وعزل احمد بيه عبد الغفار  
قائم مقام آلاى الفرسان من وظيفته وعين بدل الاثنين ضباط شراكسة  
وعشان كده الضباط المصريين هايجين ، وجاين للأميرالاي  
احمد بك عرايى عشان يتكلم باسمنا ويرجع للضباط المظلومين  
حقوقهم

يسير هو وقاسم . تفتح الشرفه ويظهر عرايى بيه تتعالى الهتافات بمجرد ظهوره  
يوزباشى : عرايى عرايى عاش عرايى  
الجميع : عرايى عرايى عاش عرايى  
يوزباشى : لا زعيم الا عرايى  
الجميع : لا زعيم الا عرايى  
عرايى يشير لهم ، يصمتون

عرايى : أرجو الهدوء حتى نتمكن من التفكير انا والقادة اللي يمثلكم على  
الخطوات اللي حتمشى فيها  
يوزباشى : انت تؤمرنا يا عرايى بك بس احنا غرضنا نوصل لك صوتنا  
ومبايعتنا

عرايى : المبايعه وصلت . . حتلونا فرصة نفكر ؟  
يوزباشى : فكروا على مهلكم ، احنا صوتنا مش حيطلع الا لما حد يقولنا  
ان الاجتماع انتهى

عرايى : شكرا  
بحيهم بيديه ، يدخل . سعد وقاسم يتبادلان النظر  
قطع

---

مشهد ٢٨      مكتب عمادة مصطفى فهمى باشا      نهار/ خارجى

امين بك يجلس شاعرا بالقلق بينما مصطفى فهمى فى طريقه للجلوس . .  
مصطفى : مش عوايدك تجيلي بالنهار يا أمين بك . . خير . . فيه ايه ؟  
أمين : حاسس ان البلد داخلة على قلق مايعلمش بيه الا الله يا مصطفى



باشا . .

مصطفى : ليه كده ؟

أمين : عثمان رفيق ورجاله حاكموا عرايى واتنين من اميرالايات من  
اخلص رجاله . . واصدروا الحكم بسجنهم وماظنش الحكاية دى  
حتمدى على خير . .

مصطفى : ايه اللى ممكن يعملوه شوية الفلاحين دول ؟

أمين : الفلاحين دول هم عصب الجيش ويقدرُوا يعملُوا كثير . .

مصطفى : امين بيك . . مائزعلش منى . . انت ضعيف قوى ، وبكرة  
تشوف ازاي عثمان باشا حيدوس الضباط دول ويقمصهم برجله ،  
وحتقول مصطفى فهمى قال

أمين : بكرة تعرف ان الامر اخطر من كده بكتير يا باشا . .

يسمع فى الخارج صوت ترومبيت وخيول وتحرك عسكرى ، ينصت لحظة يقفز ليفتح  
الشرقة ، ويخرج وراءه مصطفى باشا . .

أمين : ايه ده ؟ ده صوت قوات بتتحرك . .

قطع

---

نهار/ خارجى

عمارة مظلة على ميدان عابدين

مشهد ٢٩

امين بك ومصطفى باشا فهمى ينظران من الشرقة ، يريان قوة عسكرية تتحرك نحو قصر  
عابدين ، وعلى رأس القوة أحمد عرايى ، ثم على فهمى وعبد العال حلمى ، ثم محمد  
عبيد ، امين ومصطفى فى الشرقة . .

امين : مستحيل ، انا متأكد انهم كانوا فى السجن . .

مصطفى : امال طلعلوا من السجن ازاي ؟

امين : اكيد البكباشى محمد عبيد استخدم القوة . .

مصطفى : معقول ؟

امين : مش قلت لك يا مصطفى باشا الامر فى غاية الخطورة . .

قطع

حسن وقاسم يسيران يحملان كتبهما بينما بائع جرائد ينادى . .  
 بائع جرائد : اقرا مظاهرة الجيش اقرا استقالة عثمان رقى . اقرا مظاهرة  
 عرابى  
 قاسم يسير اليه ويشتري منه صحيفة . حسن يقول لقاسم . .  
 حسن : والله العظيم عرابى ده ولد ماجتوش ولاده ، الدنيا عايزة القوة . .  
 قاسم : وايه رأيك لو الخديو لقي نفسه ضعيف قدام عرابى والجيش  
 واستعان بالاجانب . .  
 حسن : تفتكر انه ممكن يعملها . .  
 قاسم : ليه لا . .  
 حسن : دى كانت تبقى مصيبة . . بس سيبك انت ، عرابى ده برضه  
 ولد . .  
 تمر بجوارهما امرأة تلبس ملاءة لف وتتقصع بشكل لافت ، يتابعها حسن معاكسا .  
 حسن : احب الننى . . ايه ده يا ناس ؟ قشطة على عسل نحل ؟  
 قاسم : انت فى ايه ولا فى ايه ؟  
 المرأة تدخل بيتها . . حسن لقاسم  
 حسن : انا فى عرض الننى . . ماتخدش الدنيا جد قوى كده ساعة لقلبك  
 وساعة لربك . .  
 قاسم : مافيش فائدة فيك . . مش حتتغير ابدا . .  
 قطع

كهرومانه تدخل مسرعة على تفيدة  
 كهرومانه : الحقى يا سنى الحقى . .  
 تفيدة : فيه ايه كهرومانه . .  
 كهرومانه : الحرس والمراسلات وكل العساكر اللى كانوا هنا للخدمة ،

لموا حاجاتهم وماشييين . .

تفيدة : ماشيين ازاي بنت

كهرمانه : ماشيين زى كل الناس مايمشوا بصى بعينك وانتي تشوفيهم . .

تنظر تفيدة من المشربية . .

قطع

---

مشهد ٣١ امام قصر امين بك نهار/ خارجى

الجنود يسيرون فى طابور يحملون المخمل ( حوالى ١٢ فردا ) والى جوارهم صف ضابط برتبة رقيب ، ينادى عليهم . .

رقيب : شمال . . يمين . . شمال . . يمين وحد الخطوة شمال . .

يمين . . شمال . . يمين . .

قطع

---

مشهد ٣٢ الممر المؤدى لغرفة ام قاسم نهار/ داخل

تفيدة تجرى حتى تصل الى باب الغرفة المفتوح وترى امين بك يخلع ثيابه العسكرية . .

قطع

---

مشهد ٣٣ غرفة ام قاسم نهار/ داخل

تفيدة تدخل على امين بك منفعله . .

تفيدة : ايه اللى جرى امين بك ؟ العساكر والحرس يمشوا ليه امين بك ؟

امين بيه يلقى بالسترة على السرير تصل ام قاسم . .

تفيدة : اتكلم امين بيه ، فيه ايه ؟

للمرأتين

امين : انا استعفيت من الجهادية ..

تفيدة : استعفيت ؟

الام : حد يسبب الوظيفة الميرى يا امين بك ؟

امين : انا يا بلفكم بالخير بس ، لكن مافيش مناقشة ..

الام : ليه يا امين بيه ، دى حاجة تخصصنا كلنا ..

تفيدة مؤكدة على كلام ام قاسم لامين بك

تفيدة : معلوم افندم كان لازم تأخذ رأينا امين بيه ..

امين : ايه .. هم الستات بيمشوا الرجالة دلوقت ؟ شغلى او عدم شغلى

مايخصكمش ، اللي يخصكم انكم تاكلوا وتشربوا وتلاقوا

احتياجاتكم .. غير كده لا ..

تفيدة : طول عمرك رأيك من دماغك امين بيه ..

بحدة

امين : تفيده .. روى اودتك ..

تحرك يدها علامة على عدم الرضا وهى تنصرف .. الام تنظر الى زوجها بأسى ..

قطع

---

ليل / خارجى

فيللا شاهيناز

مشهد ٣٤

الفيللا محاطة بالاضواء ، الرايات الموسيقى تعزف امامها .. المعازيم يدخلون ..  
نسمع من الداخل صوت الزغاريد .. يخرج قاسم ليقف فى بلكوته وعلى وجهه علامات  
الحزن والصدمة ..

قاسم : شاهيناز ؟ معقولة ؟

امام الموسيقى رجل يلعب بالدبوس بمهارة .. قاسم يدخل ويغلق الحجرة متهاكاً

قطع

---

قاسم فى غاية الحزن ، يضرب باب البلكونة بقبضته . . تدخل الام . .

قاسم : امى ؟

الام : مالك ؟ زعلان ؟

قاسم : سيبنى لوحدى يا امى . .

الام : الجواز قسمة ونصيب يا قاسم خدامتهم قالت لكهرمانه ان العريس

عمره قريب من عمر ابوها . .

قاسم : وهى وافقت . .

الام : البنات مافيش فى ايديهم حاجة عشان يوافقوا البنت مادام ابوها يوافق

على العريس مالهاش كلمة بعد موافقة ابوها . .

قاسم : ارجوكى يا امى سيبنى دلوقت . .

الام : على راحتك يا ابنى . .

تخرج وتغلق عليه الباب يدق الحيط بقبضته عدة مرات يخرج كراسته التى يكتب فيها  
يفتحها ويكتب . .

قاسم : كل ذى رأى سليم يرى من الصواب ان يكون للمرأة فى اختيار

زوجها ما للرجل فى اختيار زوجته فانه امر يهمها مثلما يهم ذوى

قرباتها اما حرمانها من النظر فى كل ما يختص بزوجها وقصر الراى

فى ذلك على اوليائها

قطع

يدخل قاسم وسعد يضع يده على كتفه مواسيا . .

سعد : يا عم قاسم اهدا بالله . . فيه حد بيتجوز البنت اللى بيعجبها . .

ويعلمين كنت حتجوزها ازاي وانت ناوى تسافر باريس ،

وحتقعدلك فيها اربع سنين على الأقل ؟

قاسم يجلس على الكنبه متعبا

سعد : قل لى بقى تشرب ايه ؟ عندى بن يمنى عجيب ، اعمل لك  
قهوة . . . لأ بلاش قهوة ، حشورك اكر . . . حشرب ينسون انا  
وانت

ينادى على الخادم بالمطبخ

سعد : اعمل لنا ينسون

الباب يدق ، لقاسم

مين اللى حيجيلى دلوقت . .

يفتح فيجد الشيخ محمد عبده . .

استاذنا اهلا وسهلا يا صاحب الفضيلة

محمد عبده واجم . .

محمد : اهلا يا شيخ سعد

يرى قاسما

محمد : ازيك يا مولانا . .

قاسم : اهلا يا مولانا

يلاحظ وجومه

محمد : مالك ؟

قاسم : مافيش . .

محمد : بتدارى عن شيخك . .

سعد : قاسم يا مولانا يعانى من مشكلة عاطفية ماتبصليش ، احكى

لمولانا . .

قاسم ينظر لسعد لاثما . .

محمد : اتكلم يا ابنى ، قول اللى مضايقتك . .

قاسم : مافتكرش يا مولانا ان عندى مشكلة هى عدم الزواج بالبنت اللى

كنت اتمنى اتجوزها ، لكن صدقتى ان ده جزء من مشكلة أكبر شاغلانى

طول الوقت . .

محمد : مشكلة ايه ؟ اتكلم يا قاسم . .

قاسم : مشكلة النساء فى مصر . المرأة المصرية مالهش حق تختار

الراجل اللى حيشاركها حياتها ، لا تملك شيئا يحميها من الطلاق

التعسفى بدون أسباب ، المرأة المصرية مالهش كلمة فى البيت ،

مالهاش رأى ، مالهاش حق التعليم حق العمل مالهاش اى حق  
فعلا زى ماقلت لى قبل كده تمام ..

يكرر جملة محمد عبده

قاسم : اذا كان الرجال حقوقهم ضايعة بسبب الاستبداد السياسى ، فالمرأة  
حقوقها ضايعة بسبب استبداد الرجل ..

محمد : عظيم .. وعيك بهذه المشكلة شئ عظيم ..

سعد : وايه وجه العظمة يا مولانا ؟

محمد : بداية اصلاح اى مشكلة هى الوعى بها ومادام قاسم ادرك مشكلة  
المرأة فهذه هى البداية التى يجب ان يبدأ منها ..

سعد : وبعد البداية ؟

محمد : يدرس .. يدرس تاريخ المرأة .. وضع المرأة فى الإسلام ،  
وضع المرأة فى المجتمعات الاخرى .. يدرس ويقارن ويستنتج  
ويكتب ..

محمد عبده لقاسم

شوف يا قاسم ، سعد له اهتمامات اكبر منك بالسياسة ،  
ومحتمل لما يكبر شوية يبقى زعيم سياسى .. إنما انت فيك  
طبيعة الباحث ومشكلة المرأة ، أو المشكلة الاجتماعية تحتاج  
الى باحث يحدد المشكلة ويشخص الداء ثم يطرح وجهة نظر  
جديده تزلزل الافكار القديمة ، وتدعو للتغيير .. وعشان كده انا  
شايف ان انت وسعد بتكملوا بعض ، الزعيم والمفكر . المهم  
تكملوا الطريق ومين عارف جايز تصدق النبوءة ويكون تغيير  
وجه مصر على ايديكم ..

قاسم وسعد يتبادلان نظرات بعيون لأمعه ، محمد عبده يضع يمينه على كتف قاسم ويسراه  
على كتف سعد ويضمهما اليه ويتسم ..

قطع

امين يستقبل النقيب الذى رأيناه يهتف أمام بيت عرايى . . الضابط يسلم بمرارة ويقدم نفسه  
خضر : يوزياشى خضر محمد عبد المجيد من الاى العباسية . .  
امين : اهلا وسهلا . . اتفضل . .

يجلس خضر

امين : انت من رجالة احمد بك عرايى بقى  
خضر : واحد من اقرب الضباط اليه ولا فخر  
امين : اهلا وسهلا . .

خضر : الحقيقة انا كنت ناوى اجي لسعادتك من غير اى سبب رسمى ،  
عشان اكلمك فى موضوع شخصى ، لكن لما سعادة الامير الاى  
عرايى كلفنى بتوصيل الرسالة لجنتابك قلت يبقى زيادة الخير  
خيرين . .

امين : فى كل الاحوال اهلا بيك . .

خضر : نبدأ أولا بالمهمة الرسمية سعادة الامير الاى عرايى يقول  
لسعادتك انه زعل جدا لما بلغته استقالتك واذا كنت استقلت تحسبا  
لاى تصرفات ممكن يعملها عرايى او العرايين ضد الضباط  
الاثراك تبقى سعادتك اتسمرت ، لان سعادته مش ناوى ياخذ اى  
اجراء ضد اى ضابط مادام عارف حدوده . .

امين : شوف يا حضرة اليوزياشى . .

خضر : خضر محمد عبد المجيد . .

امين : ابوه ، بلغ الامير الاى عرايى انه مافيش اى علاقة بين انتصاره على  
عشان باشارفقى وبين الاستعفاء بتاعى ، كل مافى الامر انى تعبت  
وعايز ارتاح . .

خضر : تأكد يا فندم انى حابله كلام سعادتك بمتتهى الدقة .

امين : نيجى بقى للسبب الشخصى للزيارة . . يا ترى هو ايه ؟

خضر : انا يا سعادة البيه عرفت ان عندك جارية من جواري القصر الخديوى  
وبعد اذنك انا يشرفنى الارتباط بجارية حضرتك . .

امين : اولانا ماعنديش جواري ، لاني عتقت الجارية دى وبقت حرة زيك



وذى . .

خضر : احبيك يا سعادة البية ، المجتمع الدولى كله النى العبودية ،  
ومصر كمان الغتها باعتبارها دولة صاحبة حضارة . .

امين : بناء عليه وانت حتتقدم لجلنار باعتبارها بنتى وحتجيب اهلك  
وتيجوا تطلبوها للجواز . .

خضر : اتفقنا يا سعادة الامير الاى . .

امين : لكن اسمح لى بسؤال ، ازاي تكون راجل من رجالة عرابى ،  
وبتخوضوا معركة عشان تتخلصوا من سيطرة الاتراك على  
الجيش ، وفي نفس الوقت جاي تتجوز واحدة تركية ؟

خضر : سعادة البية احب اوضح اتنا ضد ان الاتراك يبقوا اصحاب النفوذ  
علينا فى بلدنا ، ياخدوا وظايفنا ، يترقوا واحنا لاة والدليل على  
كده اتنا ماطر دناش ضابط تركى واحد ، والتعليمات اللى عندنا اتنا  
نعاملهم زى مابنعامل الضباط المصريين . . ومن هنا ببقى مافيش  
اى غرابة لما اتقدم لسعادتك واطلب ايد بنتك جلنار . .

امين : عموما يا خضر افندى اتنا ماعنديش مانع مبدئيا ، لكن ادينى فرصة  
اسأل عنك . .

خضر : اتفقنا ، وانا فى انتظار رد سعادتك . .

قطع

ليل / داخلى

صالون بيت عرابى

مشهد ٣٨

عرابى مستقبلا النديم ، بينما الصالون ملئ بالضباط العرابيين منهم على فهمى ،  
عبد العال حلمى ، احمد عيد الغفار ، محمد عبيد ، وغيرهم . . .

عرابى : اخيرا جيت يا نديم ، هل هلالك يا سيدنا

النديم : الله يكرمك يا عرابى به . . .

عرابى للجالسين . . .

عرابى : الاستاذ عبد الله النديم واحد منا يا حضرات

النديم : تقدروا تعتبرونى عسكرى لايس عمه وكاكولا

على : اهلا وسهلا بيبك على كل حال . . .

اصوات : اهلا وسهلا . .

النديم يهمس لعرايى . . .

النديم : انا جاى لك مخصوص عشان اكلمك فى موضوع لا يحتمل

التأجيل . . .

عرايى : تقدر تتكلم قدام الجميع يا نديم . . . . . الكل هنا مجموعة

واحدة ، مافيش اسرار تستخى عليهم . . .

يفاجأ لحظة ، ثم يتجاوز المفاجأة

النديم : لا بأس . . .

النديم للجميع . . .

النديم : اتم لحد دلوقت - بحمد الله - نجحتم فى مواجهة الحكومة برئاسة

رياض باشا ، ومواجهة الخديو نفسه . . لكن الهيئة الاجتماعية

مش عسكر بس انما مدنيين كمان . . . . . وعشان كده انا شايف انه

لازم الجيش والشعب يقوا كتلة واحدة وبدل ما تتكلموا باسم

الجيش لوحده تتكلموا باسم الامة كلها وبدل ما تتفقوا الواحدكم فى

المواجهة يبقى وراكم اهل مصر كلهم

عرايى يصمت مفكرا . محمد عبيد يقول بكلمات قاطعة

محمد : مدنيين يدخلوا الحركة ، ازاي ثم ان المدنيين مش منظمين لكن

الجيش اهم حاجة

النديم : احنا مش بتتكلم عسكرة دلوقت يا حضرة البكباشى احنا بتتكلم

سياسة والسياسة بتقول ان الفلاحين والصعايدة وبياعين المخلل

والحمارين والعربية قوتهم ماتقلش عن قوة الجيش ، ان ماكتش

تزيد . .

محمد محتداً

محمد : تقصد انى جاهل بالسياسة . .

عرايى بلهجة عسكرية

عرايى : محمد يا عبيد بلاش الغشمية بتاعتك دى انت ضابط بطل كلنا

عارفين ده لكن فى السياسة انت واحنا بتتعلم فعلا . . . . . انا شايف

يا اخواتنا ان عبد الله النديم بيقول كلام عظيم ، احنا جيش مصر

والمفروض اننا نتكلم باسم مصر وعشان نقوم بالدور ده لازم تكون  
البلد كلها معانا . . .

محمد يسكت مقهوراً . . .

النديم : لازم يكون فيه توكيل ، مبايعة لازم رياض والخديو يحسوا  
بالكلام ده عشان ييقوا عارفين انهم بيكلموا زعيم الامة مش قائد  
الجيش . .

عرايى : ناخذ رأى المجموعة فى الاقتراح ده . . مين موافق على كلام  
النديم يا حضرات

الضباط بيدون رأيهم واحدا بعد الآخر

الضابط : موافق . .

موافق . . .

موافق . . .

يصل الدور الى محمد عبيد الذى ينتظر للنديم متجهما فيقول له النديم

النديم : فكها بقى يا اخى . . الله . . ما انت بتعرف تضحك ايه . .

محمد : موافق . . .

عرايى : طيب بعد الاجماع ده السؤال دلوقت ازاي الشعب حيعمل المبايعة  
او التوكيل

النديم : سيبوا لى المهمة دى باعتبارى ممثل الجناح المدنى انا حاخلى  
مجلتى التنكيت لسان حالكم ومن النهاردة حألف مصر بالطول  
وبالعرض وحابعت لكل رجالتنا فى البلاد يجيوا اعاليتهم وييجوا  
للمبايعة . .

عرايى : اعمل اللى تشوفه يا نديم . .

قطع

افندى : عرابى عرابى زعيم الامة لاجل نزول عنها الغمة . .

عرايى يحيى الجماهير بيديه . . .

الجميع : عرابى عرابى زعيم الامة لاجل نزول عنها الغمة . .

افندى : لا استغلال ولا عبودية . . . ولا خضوع لازمة مالية . . .

الجميع : لا استغلال ولا عبودية . . . ولا خضوع لازمة مالية . . .

افندى : يا عرابى احنا وراك وبزعامتنا وكلناك . .

قطع

---

مشهد ٤٠	قاعة العرش	نهار / داخل
---------	------------	-------------

يتم تركيب المشهد السابق على مشهد للخديوى فى قاعة العرش وهو يصيح . . . . .

توفيق : مش ممكن . . مستحيل . . اللى بييجرى ده كثير . . كثير

قوى . . . مين اللى بيعحكم البلد دلوقت اتا ولا عرابى

تختفى الصورة الأخرى ويدخل من باب قاعة العرش السير اوكلن كالفرن المراقب  
المالى . . .

توفيق : نعم يا سير كالفرن يلغنى انك طالب المقابلة

كالفرن : انا طلبت مقابلة لان عندى كلام مهم كثير افندينا . . .

توفيق : كلام ايه . .

كالفرن : رسالة من حكومة بريطانيا العظمى . . مستر جلاستون يقول

لجلالتك ان انجلترا جاهزة للتدخل لمساندتك ضد القوضى اللى

عاملها عرابى . . والضباط بتوچه . . .

الخديو يوارى وجهه عن السير كالفرن ويبدو انه يعانى من القرار . كالفرن يقول بعد لحظة

كالفرن : اتا فى انتظار الرد

الخديو يستدير يقول وهو يحاول التماسك

توفيق : بلغ تشكراتى لمستر جلاستون وقل له اتى لو قررت الاستعانة بحد

للقوف امام عرابى فمن المؤكد ان انجلترا حتكون هى

وجهتى . . . . .

قطع

امين بك يقرأ احدى الصحف وهو ممدد على الشيزلونج . . تدخل الام وتقف بجوار الشيزلونج . . قاسم يذاكر في ركن دون صوت . الاب يلتفت للام . .  
امين : نعم يا هاتم . . واقفه كده ليه . .

الام : عايزة اكلمك في موضوع مهم . . انت عارف ان المرحوم والدى احمد خطاب بيه ساب لنا ارض كثير في المنيا ومن ساعة ما مات لاحد قسم الارض ولا اعرف حاجة عن نصيبى

امين : والمطلوب . .

الام : تجيب لى حقى . .

امين : اسف يا هاتم . .

الام : يعنى ايه ، امال مين حي جيب لى حقى اذا كنت انت حتقول لى آسف . . .

امين : اتنى . . .

الام : انا واحدة ست حتقف قدام اخواتها الرجالة عايزين راجل زيهم . . .

امين : اتنى عارفة ان اخواتك حيعتبروني طمعان في ميراثك لو كلمتهم عنه . .

الام : يا امين بيه الورث ده حق ابنا قاسم ازاي نسيه . .

امين : يبقى تاخدى قاسم وتروحي لاختاتك وتطلبوا حقكم . . .

الام : وقاسم حيعمل ايه قصاد خيلاته دول يحطوه تحت ضرهم . . .

امين : المناقشة انتهت يا هاتم انا قلت اللى عندي

قطع

القطار يقف ، تنزل أم قاسم في ثياب عصرها التي تلفها ومعها قاسم . . . يتقدم منها اخوها الكبير ووراءه بقية الاخوة  
الكبير : ازيك يا ام قاسم . .

الام تتكلم باللهجة الصعيدية خلال مشاهد الصعيد . .  
 الام : ازيك يا خويا . . .  
 الكبير : ازيك يا قاسم افندى يا ابن الغاليين . .  
 قاسم : ازيك يا خال . .  
 يشير الخال الكبير لبقية الاخوة  
 الكبير : العربيات جاهزة . . .  
 الصغير : جاهزة يا محمد بيه . .  
 يتقدم دون كلام تتبعه ام قاسم وقاسم والباقون . .  
 قطع

---

مشهد ٤٣ حقول مؤدية لقصر آل خطاب نهار/ خارجي

العربات تجرى بركابها نحو القصر وسط المزارع تصل العربات امام القصر تتوقف . . .  
 ينزل من العربة الاولى الاخ الكبير محمد بك ويأخذ يد أخته . . .  
 الكبير : يدك يا ام الغالى  
 تنزل ووراءها قاسم . . يصعدون السلم لباب القصر  
 قطع

---

مشهد ٤٤ صالة قصر آل خطاب نهار/ داخلي

القصر يدل على الثراء ، النساء يخرجن من كل ناحية للسلام على ام قاسم وولدها ، يسلمن  
 على قاسم بعد لف ايديهن بالطرحة ، الخال الكبير يقول لأخوته الذين يدخلون  
 الكبير : قبل ما تتجالسوا الدبايح للغالية وابن الغالية الواجب الاول . .  
 قطع

الاخت تأكل مع اخوتها وولدها قاسم والطعام واضح فيه البذخ . . . الاخ الكبير يوجه كلامه للصغير

الكبير : تنبه على الزواهد السمن والطيور والعسل الابيض والعيش والقطير كله يبدأ تجهيزه لاجل اختك تتشرف قدام جوزها . . .

الخال الكبير لقاسم

الكبير : خيلانك يا ولدى اكابر المنيا . .

قاسم : طبعاً يا خالي طبعاً . .

ينهمكون في الاكل . . . الاخت تميل على اخيها الكبير

الام : كنت عايزة اكلمك في موضوع كده . .

الكبير : بعدين يا غالية . . بعدين . .

يعودون للاكل . .

قطع

قاسم وامه يجلسان

قاسم : انا حاسس يا امي ان خالي بيتهرّب متنا عشان مانتكلمش معاه في

الموضوع اللي جايبين عشانه

الام : امي كل مرة اجي بعمل كده ومش عارفة اوصل معاه لحق ولا باطل

الخال الكبير يكح خارج الحجرة قائلاً

الكبير : يا ساتر

يقفان

الام : اتفضل يا محمد

الخال الكبير يدخل

الكبير : ازاي الحال ؟ على الله تكونوا مرتاحين ؟

الام : الحمد لله

الكبير : الزواده سبتك على مصر عشان ماتلبخكيش فى السفر

الام : كتر خيرك يا خويا

الكبير : سلام

الكبير يستدير ليخرج

الام : استنى يا خويا

الخال الكبير يقف

الام : اتامن ساعة ماجيت مش عارفة اكلمك فى الموضوع اللى جاية عشانه

الكبير : بعدين يا ام قاسم . . بعدين

الام : بعدين ليه ؟ دلوقت . . انا عايزة حقى يا محمد

الكبير : حق ايه ؟

الام : ورئى اللى فاتهولى ابويا

الكبير : يظهر انك مصممه تسافرى زعلانة

الام : الحق مايزعلش

الكبير : شوفى يا اختى ، البنات فى الارياف كلها مايبورثوش . الارض

مابتتشمش ، ومايتروحش للغرب

الام : مين هم الغرب دول ؟

الكبير : اجواز البنات وولاد البنات

الام : جوزى وابنى مش غرب

الكبير : لأ غرب

قاسم : لكن يا خالى الشرع بيقول ان الست من حقها . . .

الكبير : لما الكبار يتكلموا الصغيرين يسكتوا خالص يا ابن اختى

قاسم : اتا مش صغير يا خالى ، اتا بعد كام شهر حايقى معامى

الكبير : عال ، عشان ترفع لامك قضية على اخوانها تطلب لها الارض

يخرج ، الام منكسرة لولدها

الام : برضه ماخذناش منه لا حق ولا باطل

قاسم وكأنه يخاطب نفسه

قاسم : اول مرة أعرف ان الناس مابتطبقش الشريعة الاسلامية فى ميراث

البنات

قطع



الام تدخل ووراءها قاسم ، الاب يقف في المواجهة عملاقا

امين : عملتى ايه يا هانم

منكسرة

الام : العمل عمل ربنا

امين : مش قلت لك من الاول ؟

الام : قلت لى ايه بس ؟ ما هو حقى ضايع بسبب ...

امين : بسبب مين ؟

الام : نهايته ، الكلام مش حييجب فايده . عن اذنك الا انا مهدودة من

السفر

امين : اتفضللى

وهى تصعد السلم ووراءها قاسم

امين : عشان تبقوا تسمعوا كلامى بعد كده

قطع

قاسم يستند بظهره الى سريره وفى يده كتاب بعنوان : « الشريعة الاسلامية » ،

يسرح

قاسم : لازم اعترف ان فيه حاجات كثير مش قادر افهمها : البنت

ماتتعلمش ، البنت ماتورثش ، البنت ماتشتغلش ، مع ان الدين

الاسلامى يقول كلام تانى خالص . ايه سر التناقض بين الشرع

والواقع ؟ عايز افهم ؟

قطع

## الحلقة رقم (٤)

مشهد ١ صالة بيت سعد زغلول نهار/ داخلي

الباب يدق سعد زغلول يسير ليفتح لابسا جلبابا وطاقيـة بأجناب ، وعلى ملامحه انفعال  
سعد : مافيش حد يفتح ؟ مين ؟  
يفتح الباب يرى الحاجب الذى رأيناه فى قصر الاميرة نازلى  
نعم ؟

الحاجب : الاميرة نازلى بتقول لسعادتك انها رجعت مصر ، وصالونها  
بيرحب بيبك فى اى وقت  
سعد : الاميرة نازلى نفسها هى اللى بعتك ؟  
الحاجب : ابوة يا افندم  
سعد : طيب اشكرها على دعوتها الكريمة وقل لها انى حاشرف بمقابلتها  
فى اقرب فرصة

قطع

مشهد ٢ حديقة قصر امين بك ( خيلة فى الخلفية ) نهار/ خارجى

سعد وقاسم الذى يمسك فى يده كتابا جامعيا  
قاسم : يا عم سعد مانتعيش نفسك ، انا ما اقدرش اتلفت اليومين دول  
باقول لك بامتحن  
سعد : يعنى الساعتين اللى حنروح فيهم للست هم اللى حيوظوا الدنيا ؟  
قاسم : ولا ساعة واحدة ، ولا حتى دقيقة  
سعد : انت بقيت حنبلى قوى اليومين دول . .  
قاسم : وحافظل حنبلى لحد الامتحانات ما تخلص روح انت يا عم  
واحضر وابقى احكى لى بعدين

بنغيط

سعد : احكى لك ؟ ابقى قابلنى . . سلام  
ينصرف ، قاسم يتسلم ويشيعه ضاحكا  
قاسم : سلام يا ابو السعود  
قطع

---

مشهد ٣ قاعة الاميرة نازلى ليل / داخل

الاميرة تسلم على سعد بشكل حميم  
نازلى : اهلا يا شيخ سعد . . نورت الصالون  
سعد : الصالون متور بصاحبه  
تشير لمقعد بجوارها  
نازلى : اتفضل هنا يا شيخ سعد عايزاك فى حاجة  
يجلس  
نازلى : قل لى يا شيخ سعد انت تعرف لغات اوروبية  
بشئ من الخجل  
سعد : الحقيقة لا  
نازلى : ده كلام ؟ المفروض الشباب المصرى يعرف لغة اوروبية واحدة  
على الاقل  
سعد : اصلهم مايدرسولناش فى الازهر غير اللغة العربية  
نازلى : ادرسها فى اى مدرسة ليلية  
سعد : ان شاء الله لكن سموك ليه مهتمه بالموضوع ده  
نازلى : انا اقدر اعرف اللى قدامى من اول مقابلة وانا من خلال رؤيتى لك  
المرة اللى فاتت حسيت انك ممكن يبقى لك شأن فى يوم من  
الأيام .  
سعد : الله يحفظك يا ست  
نازلى للجميع  
نازلى : هيه يا جماعة ، حتتكلم فى ايه النهاردة ؟

متعلم : نتكلم فى موضوع الساعة ، احمد عرابى  
 نازلى : انا شخصيا معجبه بعرابى ، لكن المشكله ان معانا الشيخ محمد  
 عبده ، وده ضد عرابى على طول الخط  
 محمد : انا لا يمكن اكون ضد انسان بيدور على رفعة وطنه ، لكنى اؤكد  
 لكم ان اللى بيحدث بين عرابى والخديوى لن ينتهى على خير . أنا  
 جالى جواب من مستر بلنت بيؤكد فيه ان انجلترا بتحشد قواتها  
 لغزو مصر ، وانا بانبه ايه بأعلى صوتى الجيش لازم يرجع لثكناته  
 ويلزم حده والا حتحصل كارثة  
 نازلى : او يستعد لمواجهة الانجليز يا شيخ محمد  
 محمد : هل الجيش المصرى بحالته الراهنه يمكنه مواجهة قوات  
 الانجليز ؟  
 نازلى : أوعدك انى اوجه السؤال ده لعرابى  
 قطع

---

مشهد ٤ صالون فى بيت عرابى نهار/ داخلى

يبدأ المشهد بعرابى كما لو كان يجيب على سؤال المشهد السابق  
 عرابى : بالتأكيد الجيش المصرى يقدر يصد هجوم الانجليز لو هاجموا  
 مصر  
 نازلى : متأكد يا عرابى بيه ؟  
 عرابى : متأكد ، لكن فيه شرطين ، الأول . . استعداد الجيش المصرى ،  
 ودى مسؤوليتنا  
 نازلى : والثانى ؟  
 عرابى : عدم الخيانة  
 نازلى : وتفكر مين اللى ممكن يخونك  
 عرابى : الخيانة دايمًا بتيجى ممن لا يتوقع القائد ، على بك الكبير  
 ماخانوش غير اقرب الناس اليه محمد بك ابو الذهب  
 نازلى : عموما انت ركز فى اللى تقدر تعمله والباقي . .

عرايى : الباقي على الله

### قطع

---

مشهد ٥      بهو أمين بك      نهار/ داخلى

تجلس نفيدة وأمامها كهرمانه تفتح لها الكوتشيته ، الام تقوم بالتطريز يفتح الباب ويدخل قاسم متهللا

قاسم : يا أهل البيت .. يا أسرة قاسم أمين افندى .. افرحوا ..

هللوا .. زيطوا .. ابنكم نجح وخذ الشهادة الكبيرة ..

نفيدة بفرح للأم ..

نفيدة : صحيح ولد ؟

كهرمانه تزغرد ، الاب يخرج من غرفته

الام : نجحت ؟ حد يزغرد ياولاد

امين : فيه ايه ؟

قاسم : نجحت يا والدى وطلعت الأول على التلاميذ كلهم

امين : شئ طبيعى ابن امين بك لازم يكون الاول

للأسرة

امين : استعدوا للفرحة يوم الخميس بمناسبة نجاح قاسم وجواز جلنار

لليوزباشى خضر

### قطع

---

مشهد ٦      على باب حديقة قصر امين بك      ليل/ خارجى

المكان مضاء ، معلقة فى ارجائه الزينات على الباب العمومى تاج مضاء ، الاب أمين بك ويجواره خضر افندى ثم قاسم أمين يقفون للترحيب بالضيوف ، تصل عربة مصطفى باشا

فهى فى حنطوره الاب يتهلل ويذهب لاستقباله ووراءه خضر وقاسم

امين : مصطفى باشا فهمى ؟ ايه الشرف العظيم ده ؟

مصطفى : ماتقولش كده يا راجل ؟ دا انت اخ عزيز

خضر يسلم بحرارة

خضر : اهلا وسهلا سعادة الباشا

امين يعرف به

امين : العريس خضر افتدى ، يوزباشى فى الجيش

مصطفى فهمى بدون نفس

مصطفى : اهلا يا خضر افتدى

قاسم يسلم

قاسم : ازيك يا عمى

مصطفى : ازيك يا بطل هيه خدت شهادة مدرسة الادارة والالسن ؟

قاسم : وطلعت الاول كمان

مصطفى لأمين ييه

مصطفى : عظيم من بكرة تيجى لى مكتبى حشغلك فى نظارة الخارجية

أمين لقاسم

امين : من بكره تروح مكتب عمك يا قاسم

يسير امين مع مصطفى باشا للإشراف على جلوسه ويدخل معه ، ويسير وراهما خضر

سعيدا بتعرفة على الباشا ، قاسم يرى سعد وقاسم قادمين

قاسم : انتم وصلتم ؟ اهلا وسهلا

سعد : عقبالك يا قاسم

قاسم : انت الاول يا شيخ سعد

حسن : انتم بتمزموا على بعض وانا موجود أنا اللى لازم اتجوز قبلكم انتم

الاثنين

سعد : هو انت نافع فى حاجة غير التفكير فى الستات ؟

يضحكون .. قاسم يقودهم للدخل

قاسم : اتفضلوا يا جماعة .. اتفضلوا

قطع

قاسم يقود سعد زغلول وحسن للجلوس الى منضده خالية ، نلاحظ ان الاتراك يجلسون في ناحية والضباط المصريين يجلسون في ناحية ، يجلس سعد وحسن ، قاسم ينادى . . للرجل الذى يقوم بتوزيع الشربات

قاسم : هات شربات هنا يا عم عثمان

السفرجى : عيني يا قاسم افندى

قاسم يتناول الاكواب ويقدمها لصاحبيه ، وبينما هو يستدير يصطدم بصينية الشربات فيقع الشربات عليه

حسن السفرجى : غصب عنى والله يا قاسم افندى

قاسم لعثمان

قاسم : خلاص خلاص

قاسم لصاحبيه

دقيقة واحدة اغير البدة . . عن اذنكم . .

يتجه لباب القصر الداخلى ، يجده مغلقا يدق الباب ، تفتح كهرمانه يسير بالبدة المبلولة

كهرمانه : عايز ايه يا قاسم افندى

قاسم : عايز اغير البدة

كهرمانه : عيب يا قاسم افندى اللى هنا دلوقت كلهم حريم وما يصحش

راجل يدخل عليهم

قاسم : يعنى اقعد بهدومى مبلولة ؟

كهرمانه : روح اوضة سباعى الجنائى وانا حاجيلك بدلة تانية تغيرها

هناك . .

قاسم بضيق

قاسم : بس انا لازم اختارها بنفسى

كهرمانه : مش حتقدر توصل لأوضتك يا سى قاسم الحريم فى كل

مكان . .

قطع

مشهد ٨ بهو قصر امين بك ليل / داخل

فى الصدر تجلس جلنار تيكى ، بينما المكان مزدحم بالنساء ، بينهن الام وتقيدة يحييان الضيوف . . . . . فتاة ترقص ، أخرى تغنى أغنية فرح شعبية اغنية

امراة تزغرد . . والام تهمس لجلنار  
الام : فيه واحدة تميط فى ليلة دخلتها  
جلنار : الدموع بتنزول غصب عنى  
تمسحها لكنها تنزل  
الام : طب كفاية ، الناس بيبصوا لك  
كهرماته تزغرد ، مع استمرار الاغنية  
قطع

مشهد ٩ غرفة سباعى الجنائنى ليل / داخل

قاسم لبس البنطلون وسباعى يساعده فى لبس الجاكته  
قاسم : شكرا يا عم سباعى  
سباعى : لا شكر على واجب يا قاسم افتدى  
قاسم ينظر فى مرآة مكسورة ، يطمئن على شكله يخرج  
قاسم : كده كويس . . سلام عليكم  
سباعى : سلام ورحمة الله وبركاته  
قطع

مشهد ١٠ حديقة القصر ليل / خارجى

خضر يحدث امين بك



خضر : مش تخلى المطرب يبدأ بعدين الناس تزهد ؟

ينادى على المطرب

امين : الاستاذ محمد عثمان

يظهر المطرب (٢٧ سنة)

امين : سمعنا ايات فتك يا استاذ

يبدأ الغناء

اغنية

خلال وصلات الاغنية ترى النساء يقفن فوق السطح ، فى النوافذ غير المضاء بعض الرجال يتفعلون

اصوات : الله . . يا سيدى . . سمعنا واشجيتنا يا عم الشباب . . صوت

كأنه سلاسل من الذهب

نلاحظ تبادل نظرات نارية بين مصطفى والاثراك من ناحية والضباط المصريين من ناحية اخرى ، مصطفى فهمى يعطيهم ظهروه ، قاسم يجلس مع سعد وحسن يصفقون تنتهى الاغنية ، تهليل هيصه

اصوات : رينا يفتح عليك يا فنان اسعدتنا . . يا عم رينا يديم الافراح

ونسמעك يا بو الفن كله

امين بك يخاطب خضر بصوت مسموع

امين : الزفه يا خضر افندى

خضر : تحت امرك يا امين بك

يسير نحو الباب الداخلى للقصر يصيح امين

امين : العروسة تجهز

ينفتح الباب وتخرج العروس مع الزغاريد يتقدم خضر ليتأبط ذراع عروسه ، الفرقة تقوم بالزفة ويمكن أن ترى مجموعة راقصات أمامها . تتقدم عربات كثيرة امام البيت فى شكل طابور ، يركب العريس والعروس العربى الأولى ، بينما من فوق السطح تقوم النساء برمي القطع الذهبية والملح ، قاسم وسعد وحسن يتفرجون فى سعادة

قاسم : عقبالك يا شيخ سعد . . عقبالك يا حسن

سعد : عقبالنا كلنا يا سيدى

حسن : يا رب

امين يتادى قاسما

امين : يا قاسم  
قاسم : نعم يا والدى

قاسم يسرع

امين : خذ العربية وروح على باب الحرملك خذ والدتك وتفيدة هانم  
وكهرمانه واسبقوا على بيت العريس وانا جاي وراكم

قاسم : حاضر . .

سعد يسلم على قاسم

سعد : اميبك بقى عشان تقوم بالمهام العائلية عقبالك . . سلام

سعد يبتعد ، قاسم يركب الحنطور ، بينما الاب يودع الضيوف

قطع

---

ليل / خارجى

امام بيت خضر افندى

مشهد ١١

فرقة حسب الله تعزف ، قاسم يقف بجانب والده كالاطرش فى الزفة

قاسم : احنا واقفين ليه ؟

والده ينظر اليه نظره حاده . يسكت . تدوى من البيت زغرودة ثم تمتد يد بمحرمة قماش  
بيضاء بها بقعة حمراء فى المنتصف يأخذها أحد الخدم ويرقص بها . . امام الفرقة . الاب

يهمس

امين : الحمد لله . . الحمد لله

قاسم يشير للمحرمة مستكرا

قاسم : ايه دى يا والدى ؟ مايصحش كده ابدا هى ديبحة ؟

ينظر أمين اليه بحدة مرة ثانية

امين : اسكت يا ولد العادات والتقاليد لها احترامها

قاسم يسكت غير راضى عن الامر كله

قطع

الام وتفيدة يشرفان على اعداد فطور العروس بينما كهروانه ترتب الصواني والخدم والطباخون ينفذون ما يطلب منهم تفيدة هانم للطباخ

تفيدة : حط فراخ دى ولد

الام : حطوا العسل ده والفطير دول . . . ماييخسروش

تفيدة : كهروانه . . فين العيش ؟

الام : خلدوا عيش مررحر عشان يعيش

تفيدة : وعيش طرى افتدم افرضى عريس اهتم

الام : وعيش طرى كمان

تشير لسبتين كبار

الام : كهروانه حطيتم الكعك هنا ؟

كهروانه : رصيناه يا ستى من بالليل

الام لتفيدة

الام : حيفكوا السبتين دول المفروض يهادوا اهل العريس يهادوا

الجيران . . .

تفيدة للطباخين

تفيدة : طباخين شحاتين جرابيع ، بيت امين بيه بطلع منه سبتين كعك

مافيش غيرهم الضهر يروح كمان ثلاثة سبت

يحاول أحد الطباخين الرد الآخر يغمزه

الطباخ : حاضر يا هانم

تفيدة لكهروانه

تفيدة : بنت كهروانه . . ياللا نادى ولد سباعى يوصلكم بالعربية عشان

عرسان يفطروا . . ياللا

كهروانه : حالا يا ستى

الام تسرح ، بينما تخرج كهروانه . تفيدة تقترب منها بحنو

تفيدة : مالك حبيبي ؟

الام : ربنا مارضاش انه يلينا بنت كان نفسى قاسم يكون له اخت

تفيدة : ماتزعلش حبيبتي احسن اننا مش خلفنا بنات ، بنات حظهم تعمس

فى الدنيا دى

تدخل كهرمانه

كهرمانه : تعالى يا سباعى . . شيل

يدخل

سباعى : توكلنا على الله

للخدم

كهرمانه : شيلوا معاه

يشيلون ، يتجهون للخروج ، الام وتنفيدة تراقبان

قطع

نهار/ داخل

غرفة نوم جلنار

مشهد ١٣

خضر يزيح الستار ، يفتح الشباك فيدخل الضوء تدخل جلنار من الباب وعلى رأسها فوطة الحمام ، خضر يتجه اليها يمسك يدها . . .

خضر : سعيده يا جلنار ؟

جلنار : الحمد لله

خضر : ان شاء الله تبقى حياتك كلها سعادة معانا احنا جيل جديد جيل

عرايى غير الناس الدقة القديمة بتوع زمان

جلنار : خضر افتدى عايزه اطلب منك طلب

خضر : اطلبى

جلنار : عايذاك تعلمنى القراية والكتابة بالعربى معنى

خضر : قراة وكتابة ، ليه حتعلمى بيهم ايه دا احنا عندنا ضباط اترك برتب

قد الدنيا مايعرفوش يكتبوا كلمة باللغة العربية

جلنار : لكن انا عايذة اتعلم عربى عايذة اقرا القرآن والجرنان واعرف الدنيا

فيها ايه ، عايذه لما اخلف اولاد ويروحوا المدرسة ابقى اذاكر لهم

خضر : ولو ان مافيش ستات فى مصر بيتعلموا لكن حاضر يا سنى اعلمك

دق على باب الشقة

ايه ده ؟

جلنار : اكيد باعنين لنا الفطار من القصر  
خضر : طب خليكى انتى انا حاروح افنح لا يكون فيه رجاله

يخرج

جلنار : لو صحيح يعلمنى

قطع

---

مشهد ١٤ حديقة قصر امين بك نهار/ خارجى

الخدم ينظفون المكان من الاثار الباقية للحفل ، الشجر الاخضر ، وصوت العصافير  
يملاون الكادر ، قاسم يفتح البلكونة وهو يتشاءب

قطع

---

مشهد ١٥ غرفة قاسم نهار/ داخل

يأتى من باب البلكونة ليجلس على السرير عليه اثار الاجهاد ، تدخل الام

الام : ايه يا قاسم انت لسه بهدوم النوم

قاسم : ايه المشكلة ؟ احنا مش سهراتين ؟

الام : طب اتحرك الا ابوك بيسأل عليك تحت

قاسم : هو ابويا مش ساب الجيش ؟ ايه اللى مصحيه بدرى كده ؟

الام : اتعود على كده

قاسم : حاضر يا امى نازل

قطع

---

مشهد ١٦ بهو قصر امين بك نهار/ داخل

الاب ثائر امامه كهرماته

امين : البيت بقى فوضى ، البيه عشان سهر امبارح شوية عايز يفضل نايم  
لحد الظهر

الاب لكهرمانه

امين : اطلعي قولى للافندى ده ينزل حالا

كهرمانه : حاضر يا سيدى

قاسم ينزل على السلم يهدوء يصل اليه

قاسم : صباح الخير

امين : انت يا افندى مش ادبت كلمة لمصطفى باشا فهمى عشان تروح له

فى مكتبه

قاسم : انا ماديتوش كلمة ، ولا فتحت بقى فى موضوع انى اتوظف

حضرتك اللى اتكلمت معاه

امين : وتفرق ايه انا ولا انت

قاسم : ارجوك يا والدى حضرتك عارف انى مش ناوى اشتغل بالشهادة

الى خدتها وانى عاوز اروح ادرس القانون فى فرنسا

امين : يعنى ايه ؟ عند ؟

قاسم : ولا عند ولا حاجة ، لكن انا من حقى ارسوم مستقبلى بالطريقة اللى

انا شايفها

امين : بسم الله ما شاء الله ، العيال كمان بقى لهم راي

قاسم : ارجوك يا والدى ، انا مش عيل

امين : يترد على يا ولد ؟

قاسم : يا والدى مش معقول حضرتك عاوز تتكلم لوحذك واحنا نقف

قدامك خرس . . . .

امين : قسما بالله العظيم ثلاثة لو رديت على بكلمة واحدة لسانى ما يخاطب

لسانك طول مانا عايش

قاسم يسكت مقهورا

امين : اتفضل يا افندى روح لمصطفى باشا فهمى عشان تبدأ الشغل . .

اتفضل

قاسم بمنتهى الغيظ يتصرف

قطع

حسن يجلس مع امه

حسن : باقول لك يا ست ام حسن انتى عارفة انى خلاص اخدت الشهادة  
الكبيرة

تنظر له

ام حسن : وعايز ايه؟

حسن : عايز اتجوز الجواز نص الدين وانا مش حاقد افاتح والدى فى  
الموضوع ده البركة فيكى انت

تهز رأسها

ام حسن : ربنا يسهل

حسن : اهو كده ، عشان تفرحى بابنك وولاد ابنك

قطع

يبدأ المشهد بأبى حسن يقول بصوت قاطع

الحاج يوسف : لأ .. جواز ايه اللى عاوز يتجوزه ؟ مافيش جواز

ام حسن : ليه بس يا حاج ؟

الحاج يوسف : لانى حابته بلاد بره يتعلم زى ولاد الاتراك ولما يرجع من

بره ومعاها شهادة كبيرة حيتعين فى وظيفة كبيرة وساعتها نقدر

نجوزه بنت اكبر عيلة ، لازم يبقى زى ولاد الاكابر واحسن ..

قطع

سعد وقاسم وامامهما فنجانا قهوة

حسن : يا ناس ، انا مش عايز اسافر ، هو السفر بالعافية ؟  
قاسم : يدى الحلق للى بلا ودان  
حسن : انا لو منك ابوس ايد والدى ، . . واخليهم يشوفوا بنت تركية تمام  
وطظ فى اى حاجة  
سعد : خليك انت مركب دماغك على الستات وخلاص  
حسن : قلت لكم الف مرة : الستات دول نعمه ، واللى يكرهها . . .  
سعد : واللى يكرهها يعمى ، حفظنا المثل ده  
قاسم : لكن تعرفوا ، انا مش حاسكت ، حسيب الشغل  
حسن : حد يسبب شغل فى نظارة الخارجية  
سعد : سيبوا بقى الرغى ده واتفرجوا على المفاجأة اللى حاوريها لكم  
يفتح الدولاب ويخرج بدله افرنجى جديده بصفين  
سعد : ايه رأيكم ؟  
قاسم : بدله ؟ لمين ؟  
سعد : لى  
حسن : انت ناوى تقلب ؟  
قاسم : ناوى تخلع العمه والكاكولا ؟  
سعد : بصراحة ناوى ، لكن الحكاية دى صعب قوى  
قاسم : والتغيير ده ايه سببه ؟  
سعد : اولاً انا سببت طلب العلم فى الازهر من ساعة ما شتغلت فى الوقائع  
المصرية ثانياً : لا بد ان نجارى الاوروبيين فى ملابسهم باعتبارها  
السمة الغالبة للعصر ، ثالثاً . . . . .  
حسن : شيخ سعد ، قول بالحق ، مين ورا الحكاية دى ؟  
سعد : حيكون مين يعنى ؟  
حسن : مافيش حد كده ولا كده ؟  
قاسم : يا أخى ، بطل سوء الظن ده  
سعد يمسك البدلة وينظر اليها معجباً  
سعد : حلوة . . مش كده ؟

قطع



قاسم يدخل من الباب ، لا احد في البهو ، ينادى  
قاسم : ايه ده ؟ ما فيش حد هنا ؟ يا اهل الدار  
تأتى كهرمانه

كهرمانه : حمد الله على السلامة يا قاسم افندى

قاسم : امال فين الناس الى هنا

كهرمانه : فى الصالون بتاع الحرير

قاسم : ليه ؟ فى حد غريب ؟

كهرمانه : الست جلنار ، العروسة

قاسم : وجلنار غريبة ؟

كهرمانه : طبعا ، مش اتجوزت خلاص ؟ مفروض ماحدش يشوفها من

الرجالة غير جوزها

قاسم : طيب ، الحمد لله ان الواحد بيشف امه ومرات ابوه ، كويس ان

مافيش حاجة تمنع رؤيتهم هم كمان . . المهم ، روى حتى لى

اكل لان انا هلكان

كهرمانه : حالا ، على يال ماتغير هدومك

قطع

قاسم يخلع الجاكتة والطربوش وظهره للباب يسمع من خلفه صوت جلنار

جلنار : اخيرا وصلت ؟

يستدير ، يراها ، لا يتكلم

قاسم : . . . .

جلنار : تفتكر اتى ممكن اجى هنا وماسلمش عليك ؟

قاسم : انتى يظهر ناوية ماتجيش هنا تانى ابدى بعد كده

تضحك

جلنار : اسمع يا قاسم افندى ، انت رفضت انى اكون مراتك  
 قاسم : تانى ؟  
 جلنار : لكن اظن انك مش حترفض اننا نكون اخوات . . انا ماليش اخ  
 وانت مالكش اخت ، ايه رأيك لو نتفق على حكاية الاخوة دى  
 قاسم : بالتاكيد ماعدش مانع  
 جلنار : مادام كده يبقى لازم نكسر الحواجز  
 قاسم : حواجز ايه ؟ ماتش خايفه ؟  
 جلنار : انا ما بخافش . . لحظة واحدة  
 تنجه للخارج  
 قاسم : حتعملى ايه ؟  
 جلنار : اصبر بس  
 نخرج

قطع

نهار / داخلى

صالون الحریم

مشهد ٢٢

ام قاسم ، تفیده ، تدخل عليهما جلنار  
 جلنار : تفیده هانم . . الست ام قاسم . ، أنا مش قعدت معاكم هنا زى  
 بتكم ؟  
 تفیده : معلوم افندم  
 الام : ربنا يعلم غلاوتك  
 جلنار : يبقى اتفقنا ، مادام انا زى بتكم يبقى قاسم افندى زى اخويا وانا زى  
 اخته . . عندكم مانع ؟  
 تفیده والام يتبادلان النظرات  
 الام : صحيح يا جلنار اتنى زى بتنا ، لكن جوزك يا بتى ، وعملك امين  
 مش ممكن يوافقوا  
 جلنار : انا كفيله بجوزى  
 تفیده : لكن امين بك ما فیش حد يقدر عليه

جلنار : خلاص ماتقولولوش ، لكن ماتحرمونيش يكون لى اخ  
ولا تحرموا قاسم افندى اته يكون له اخت  
تفيدة : كلامك جلنار عين العقل  
الام متحفظه ،

جلنار : ماتخافيش منى ، والله مافيه حاجة فى نفسى ناحية قاسم افندى غير  
الاخوة

تفيدة : انا مصدقك افندم

الام : وانا يا بتى ماقلتش حاجه

جلنار : مادام اتفقنا بيقى قاسم افندى يحى يقعد معنا

جلنار تجرى خارجه . الام وتفيدة يتبادلان النظرات

تفيدة : ماتعارضيش يا ام قاسم . ابتنا محتاج اخت ، مش لازم نسييه فى  
الدنيا وحيد

تجربى جلنار نحو الصلاة وهى تنادى على قاسم

جلنار : اتفضل يا قاسم افندى . . اهم وافقوا

قاسم يخرج من حجرته وهو فى قمة الخجل ويتجه معها الى صالون الحريم تدخل جلنار  
ووراءها قاسم وهو متردد فى ان يجلس

تفيدة : اقعد يا ولد

الام : اقعد يا قاسم

قطع

---

مشهد ٢٣ صالون بيت عرابى ليل / داخلى

عرايى فى صدر المجلس ، على يمينه النديم ، حوله احمد عبد الغفار ، على فهمى ،  
محمد عبيد ، عبد العال حلمى

عرايى : حضرات الضباط . . انتم عارفين ان فيه فرمان سلطانى بأن  
الجيش المصرى يكون تمتاثر الف عسكرى ، وانا شايف اتنا  
لازم نطلب من الخديو رفع عدد الجيش طبقا للفرمان  
السلطانى .

عبد العال : لكن رياض باشا حيعترض ، انت عارف انه ضدنا على طول  
الخط

عرايى : نطلب اقالة رياض باشا كمان

التنديم : اسمحو الى يا سادة

عرايى : عايز نقول ايه يا نديم ؟

التنديم : عايز اقول انكم لسه بتفكروا باعتباركم ضباط ، وده شئ لا يتغير ،  
لان عرايى بيه دلوقت بقى زعيم الامه مش مجرد اميرالاي فى  
الجيش

عرايى : وضح يا نديم

التنديم : مطالبكم المرة دى لازم تكون مطالب الامه كلها ، معنى لازم  
تطالبوا بالدستور وبمجلس النواب ، ويكده تبقوا خدمتم بلادكم

عرايى : كلام معقول

التنديم : بس الكلام ده مرتبط بشرط

عرايى : ايه هو ؟

التنديم : بعد الدستور ومجلس النواب مايقوا حقيقه لازم ترجعوا  
ثكناتكم ، وتسيبوا الحياه المدنية العادية تاخذ مسارها

احمد : معنى ايه ترجع ثكناتنا ؟ انت عارف لو رجعنا ثكناتنا حيحصل لنا  
ايه ؟ حنعدم جميعا

على : الشئ المهم كمان ازاي نضمن استمرار الحياه النيابية لو رجعنا  
ثكناتنا بدون ما الخديوى يوقفها ؟

التنديم : شوفوا يا سادة ، انا عارف انه صعب عليكم بعد السلطة والهيبة  
اللى انتم فيها ترجعوا وحدانكم تانى وتبقوا ظباط عاديين ، عشان  
كده حاقترح عليكم اقتراح ، انتم تستعفوا من الجيش ، وترشحوا  
نفسكم فى مجلس النواب ، وتفضلوا زعماء زى ما انتم

محمد عبيد : ايه اللى بتقوله ده يا نديم ؟ كلامك غريب جدا النهاردة

عرايى حاسما

عرايى : انا شايف اننا نسيب الجزء اللى اختلفنا عليه ده دلوقت ونخلينا فى  
الجزء المتفق عليه ، اللى هو المطالبة بالدستور والحياه النيابية .

موافقين ؟

الجميع : موافقين موافقين موافقين  
قطع

ليل / داخل

قاعة العرش

مشهد ٢٤

توفيق وكوكسن فنصل انجلترا ، وكالفن المندوب العالي . . الخديو بينهما وكأنه بين  
شقى الرحى

كوكسن : جناب الخديو ، انا بانقل لفخامتك رسالة رسمية باعتباري

فنصل انجلترا . . الجيش يستعد لحاجة

كولفن : الحاجة دي شور اجينست يو

كوكسن : you may be a lion , or they will eat you

كولفن : England is ready انجلترا جاهزة فى خدمة سعادتك

كوكسن : Only you must order us اوامرنا

كولفن : باشارة من جلالتك الاسطول حيثحرك فورا

يشير اليهم ان كفى ، يتوقفان

توفيق : بلغوا مستر جلادستون اتنى شاكر جدا له ، لكنى لحد دلوقت

مافيش ما يستدعى طلب مساعدات من حد

كوكسن : Your highness مش لازم . . تستنى لآخر دقيقة

كولفن : مثل مصرى بيقول اتغدى بيه قبل ما يتعشى بيك

كوكسن : we arranged everything

صدقنى ، مش حسب لك اى حرج ، انت عارف ترتيبات انجلترا

توفيق : من فضللكم ، كملوا ترتيباتكم ، واعدكم اتنى اما احتاجكم

حابلغكم قبلها with enough time

كوكسن : اوريت يور هائنس

كولفن : we are waiting

قطع

يوسف يقدم ورقة لحسن

الحاج يوسف : اتفضل يا افتدى

حسن : ايه دى يا والدى ؟

الحاج يوسف : الوصل بتاع ورقك اللى بعته فرنسا عشان تدخل الجامعة هناك

حسن : يعنى انت مصمم يا والدى على الموضوع ده ؟

يوسف : وماقش فيه رجوع . انا عايزك ترجع من هناك بالشهادة الكبيرة ،

واجوزك واحدة من بنات الاتراك وتبقى من الاكابر

حسن : بس يا والدى . .

يوسف : خالصنا

يدخل خادم

الخادم : سيدى الحاج ، واحد من السراية بيقول انه عايزك ضرورى

بشئ من البهجة

يوسف : السراية ؟ يبقى حصل . .

يزيحههم

يوسف : وسعوا كده

يفتح الباب ويستقبل مندوب السراى

يوسف : اهلا وسهلا . . اتفضل

يدخل المندوب يجلس ، حسن لا يفهم . يوسف يجلس بجوار المندوب

يوسف : خير ان شاء الله

المندوب : كل خير يا يوسف بيه

يوسف : بيه ؟ يبقى حصل . . اخدت البهوية ؟

المندوب : وجاى مخصوص ابشر

يخرج محفظته ويأخذ كل ما فيها

يوسف : دى حلاوة البشارة

حسن : الف مبروك يا والدى ، اخدت البهاوية ؟ الف مبروك

يقبله ، يوسف ينادى من بالداخل

يوسف : زغردوا يا اولاد . . اخذت البهوية زغردوا  
 المندوب يتسم ويخرج بينما الزغاريد تدوى . يوسف لولده  
 يوسف : كده بقينا من الاكابر بجد ، ولسه لما ترجع من بره انت كمان  
 حنقى راسنا براس التراكوّة غصب عنهم  
 قطع

---

مشهد ٢٦ حجرة نوم ام قاسم بهار/ داخلي

الام تضع الملابس التي تم تطبيقها في الدولاب . . يدخل قاسم ويتوجه الى والدته يقبل  
 يدها

قاسم : صباح الخير يا امي  
 ام قاسم : صباح الخير يا حبيبي  
 قاسم يأخذ والدته من يدها ويجلس معها على كنبه موجوده بالغرفة  
 قاسم : امي انا عارف انت بتحبيني قد ايه . . وعشان كده انا عايزك  
 تساعدني  
 ام قاسم : انا روحى لك . . بس اساعدك في ايه  
 بعد تردد قليل  
 قاسم : تخلي بابا يوافق اسافر أدرس بره في فرنسا  
 الام : مش فاهمه . . يعني لمدة قد ايه ؟  
 قاسم : ثلاث اربع سنين وارجع  
 الام في فزع

الام : ثلاث اربع سنين تنغرب عني  
 قاسم : ما انا حقضي اجازة كل صيف معاكم هنا  
 الام : يعني حقعد بالشهور ماشفشكش لا لا يا ابني ماقدرش . . . . . اللي  
 بتطلبه مني مستحيل انا اوافق عليه ده انت ابني الحيلة

قطع

على السفرة يجلس قاسم ووالده . . قاسم ينظر الى والده فى تردد ثم يتكلم  
قاسم : يا والدى . . ميعاد التقديم لجامعات فرنسا بدأ . . وبعد اذنك  
يعت اوراقى

الاب ينظر له فى غضب

الاب : وايه فايده اذن . . بعد ما خلاص يعت اوراقت  
قاسم : لانى محتاج موافقتك . . ارجوك يا والدى تدبني الفرصة إني  
اسافر . . عايز اتعلم علم جديد . . اشوف الدنيا . . الناس . .  
مش معقول تبقى نهاية المطاف بالنسبة لى هى الوظيفة . . حتى لو  
كانت فى نظارة الخارجية

الاب : قاسم انا ماحبش الكلام الكثير . . انت راجل البيت الوحيد  
بعدى . . لو جرى لى حاجة مين حيبقى المسئول عن البيت ده مين  
حيراعى مصالحنا وارضنا واحوالنا ؟

قاسم : ارجوك يا والدى . . دى امنية لى باحلم بتحقيقها من اول ما دخلت  
مدرسة الادارة والالسن  
امين : وان قلت ما فيش سفر

يصمت قاسم ثم يتكلم

قاسم : بعد اذنك يا والدى . . انا مصمم على السفر  
امين : سافر زى مانت عايز بس مش حصرى عليك صاغ  
قاسم : انا موافق . . حشتغل هناك واصرف على دراستى

الاب يقوم متنفضاً

امين : يبقى اتفضل . . روح اعمل اللى انت عايزه ومن النهاردة لا انت ابني  
ولا اعرفك

قاسم ينكس رأسه ثم يندفع خارجا

قطع



سعد وقاسم ( مع ملاحظة ان بذلة سعد معلقة على الدولاب )  
 سعد : يا عم قاسم ماتعصاش والدك . يا ريت انا ابويا كان عايش وانا كنت  
 قعدت جنبه فى برنال طول العمر  
 قاسم : لا يا سعد ، التحكم كده اكثر من اللازم  
 سعد : انت اللي عتيد اكثر من اللازم  
 قاسم يحتد  
 قاسم : اذا كنت مش عايزنى اقعد عندك يا سعد قول ، وانا حامشى دلوقت  
 سعد يمسك به  
 سعد : ده كلام برضه ؟ ده بيتك ، خلاص يا عم مش حاكلمك مادام بتزعل  
 يجلس قاسم ، الخادم يقف على الباب  
 الخادم : الشيخ محمد عبده موجود بره  
 سعد : طب اعمل له قهوة  
 سعد لقاسم  
 سعد : تعال يا قاسم نقعد مع مولانا  
 يخرج جان

قطع

سعد وقاسم على يمين ويسار الشيخ محمد عبده  
 سعد : بارك لقاسم امين يا مولانا حيسافر يدرس فى فرنسا  
 يريت على كتفه  
 محمد : عظيم ، العلم يا ولدى هو ما تحتاج اليه هذه البلاد  
 قاسم مشيراً لسعد  
 قاسم : قل له يا مولانا  
 سعد يلاحظ ان وجه الشيخ متغير

سعد : مالك يا استاذنا ؟ شكلك متغير

محمد : فرنسا احتلت تونس

قاسم : تونس ؟

سعد : ايه ؟ كده ببساطة ؟

محمد : لم يكن الامر بسيطا ابدا ، لكن المهم ان فرنسا انتصرت فى

النهاية . . شئ محزن

قاسم : واى حزن

سعد لقاسم

سعد : وعازب تروح تدرس فى فرنسا ؟ يا راجل ، بتاقص التعليم اللي

بيجى من ناحية الناس دى

محمد : بالعكس ، نحن اولى الناس بدراسة علوم هؤلاء الاوروبيين

لنعرف كيف نواجههم حين يأتى الوقت المناسب . . لكن لندع

هذه الامور الشخصية ونتقل الى شئ خطير

سعد : ايه هو يا مولانا ؟

محمد : احتلال فرنسا لتونس اليوم ، واحتلالها للجزائر بالأمس يجب ان

يكون نذيرا لنا بأن اوروبا جاده فى احتلال الشرق

سعد : تسمح لى يا مولانا ازور عرابى وابلقه وجهة نظرك ؟

محمد : عرابى عارف وجهة نظرى ، لكن السلطة تجعله فى نشوء . .

اللهم سلم

قطع

---

شاهد ٢٩ شارع من شوارع القاهرة تهار/ خارجى

يبدأ المشهد بلافتة مكتوب عليها « شركة البوستة الخديوية رحلات منتظمة لأوروبا » قاسم أمين يدخل الشركة

قطع

---

قاسم يقف امام موظف ويقدم له بعض النقود  
 قاسم : عايز تذكرة لفرنسا ، شهر سبتمبر  
 موظف : مافيش غير فى آخره  
 قاسم : كويس  
 موظف : رايح تدرس ؟  
 قاسم : ان شاء الله  
 موظف : بالتوفيق ، تروح وترجع بالسلامة  
 يعطيه التذكرة ، ينظر للتذكرة بفرح وشعور بالانتصار  
 قطع

الام تبكى وهى تخاطب امين بك  
 الام : خلاص يا امين بيه ، خليه يسافر  
 امين : لوى دراهى لما ساب البيت ؟  
 الام : يا امين بيه ، ده ابنتا الوحيد ، ليه نزعله ونقف قصاد مستقبله ؟  
 ويسافر واحنا غضبانين عليه ؟  
 امين : ابنتا الوحيد يسينا ويسافر ، هو مش عارف هو ايه بالنسبة لى . .  
 قصدى بالنسبة للبيت كله ؟ سببى الموضوع ده  
 الام : لا يا امين بيه ، تعالى على نفسك المرة دى  
 امين : انا اترجع قدام ولد زى ده  
 الام : قدام ابنك ؟ الوحيد  
 امين : آسف  
 الام : يعنى لو سافر غضب عنا حتىبقى مبسوط ؟  
 امين ناثر  
 الاب : وانت لو سافر حتىبقى مبسوطه

الام : مش حقول ابوه . . لكن الام . . دايمما تيجي على نفسها عشان  
مصلحة ابنها  
الاب وكان الكلام له  
امين : برضه آسف يا هانم . . آسف  
قطع

مشهد ٣٢      غرفة تفيده هانم      نهار/ داخل

تفيده تخاطب كهرمانه وفي عينها عزم  
تفيده : بنت كهرمانه انتي تعرفي بيت سعد صاحب قاسم افندي  
كهرمانه : لا يا ستى ، سباعى الجنائنى هو اللى يعرفه  
تفيده : طيب هاتى الحبرة كهرمانه  
كهرمانه : رايحة فين يا ستى ؟  
تفيده : رايحه اجيب ولد قاسم  
كهرمانه : من غير اذن سيدى امين بيه ؟  
تفيده : امين بيه راجل ظالم وانا مش اسكت تانى عليه . . هاتى الحبرة بنت  
كهرمانه : حاضر يا ستى  
تناولها الحبرة ، تفيده تأمرها  
تفيده : روحى قولى لهم يحضروا العربية ، وخلي ولد سباعى جنائنى  
يستنانى فيها  
كهرمانه : امرك يا ستى

قطع

مشهد ٣٣      امام بيت سعد زغلول      نهار/ خارجى

تتوقف العربية ، ينزل سباعى الذى يقودها ، يذق الباب ، يفتح الخادم  
الخادم : اهلا يا سى سباعى . . نعم ؟

سباى : قاسم افندى جوه ؟

الخدام : موجود

يسير للعرية ، يخاطب تفيدة

سباى : موجود يا ست هانم جوه

تفيدة : خد ابدى ولد . .

ياخذ يدها ، تنزل ، تدخل من الباب

قطع

---

نهار / داخلى

صالاة بيت سعد

مشهد ٣٤

تفيدة هانم وقاسم وسعد . تخاطب قاسمًا بحدة

تفيدة : اسمع ولد قاسم افندى ، انت لازم ارجع معايا حالا . . .

قاسم : لا مش راجع

تفيدة : لأحترجع

قاسم : ارجع ازاي وابويا طردنى قدامك ؟

تفيدة : مش مهم ، ابوك بطردك انت مش اسمع كلامه . البيت مش بيته  
لوحده

قاسم : اسف ، انا عندى كرامة

تفيدة : اسمع ولد واحدة من اتنين ، انت ارجع معايا او انا اقعد هنا معاك

سعد : خلاص بقى يا قاسم ارجع مع امك ، الا بعدين ابوك لو عرف انها

جات لك من غير اذنه حيعمل عماليل

تفيدة : هيه . . انت ارجع معايا ولا انا اقعد معاك ؟

قطع

---

امين بك غاضب ، كهرمانه ترتجف امامه ، الام تجلس على احد المقاعد باكية تمسح دموعها

امين : اللى بيحصل ده فوضى . البيت ماعادش فيه نظام ، مش كفاية ان

الولد بيعصى اوامرى ، كمان الهانم بتخرج من غير اذننى . انا لازم

احط حد للكلام ده . لازم اعاقبه عقاب صارم

ينفتح الباب وتدخل نفيدة ووراءها قاسم

امين : كتنى فين يا هانم ؟ مش قادرة على بعد البيه وطلعتى من غير اذننى

عشان تجيبه

الام تتنفض

الام : قاسم ابنى

تحتضن الام ابنها ، نفيدة تواجه زوجها

نفيدة : امين بيه ، انت ظالم

يصدم

امين : ايه ؟

نفيدة : انت مش لك قلب

امين : بتقولى ايه ؟ . .

نفيدة : بأقول افندم أنا زهقت من ظلمك ، وانا رحت جيت ولدنا قاسم

عشان هو لازم ييجى ، ولازم يسافر من بيته ، واذا كنت انت مش

تصرف عليه أنا ابيع ارضى واصرف عليه . واذا كنت انت مش

عاجبك نفيدة طلقها . . طلقنى افندم وأنا اسافر مع ابنى أحسن من

قعاد معاك

امين : طيب يا نفيدة ، ادخلى دلوقت من قدامى ، حسابك معايا بعدين

تدخل وهى تشوح بيديها

نفيدة : حساب يوم حساب افندم

ينظر لقاسم الذى تحتضنه امه

امين : عاجبك اللى عملته فى العيلة ده ؟

قاسم : اسف اذا كنت اتسببت فى المشاكل ، وعلى كل حال انا ممكن

امشى تانى ، انا بس حبيت اقول لحضرتك انى حجرت تذكرة  
السفر

قاسم يخرجها من جيبه ، الاب يكظم غيظه  
امين : دخل التذكرة دى ، وادخل انت كمان  
ينقض على يد والده يقبلها ، يسحبها منه ، تأخذها امه وتصعد  
قطع

---

مشهد ٣٦ صالة بيت محمد عبده نهار/ داخلي

محمد عبده يستقبل النديم

محمد : اهلا وسهلا بالثائر الاسكندراني فى القاهرة . . اتفضل يا نديم  
النديم : انا جاي لك فى طلب عزيز يا شيخ محمد وعشمى انك  
ماتكسفنيش

محمد : انت عارف يا نديم ان طلبك لو عندى يبقى مقضى  
النديم : ان شاء الله عندك

محمد : عال . . وما هو هذا الطلب ؟

النديم : الصلح مع احمد عرابى

محمد : هو احنا متخاصمين ؟

النديم : طبعا ، متخاصمين واكثر شوية

محمد : وازاى نتصالح ؟

النديم : اقعدوا مع بعض واتصافوا .

محمد : لن نتفق ابدا يا نديم انا وعرابى

النديم : ليه بس يا مولانا ؟ ماتقاطعش . الراجل عايز يقعد معاك ومستعد

للتفاهم ، والوصول لحل يرضيكم انتم الاثنين

محمد : صعب

النديم : ماتصادرس ، انا عشان فيك ، وبعد اذنك حاربت لكم مجلس

فى مكان هادى عشان تاخذوا وتدوا مع بعض لحد ماتوصلوا لحل

محمد : يا نديم .

التدبير : خلاص بقى ماتكسفنيش  
قطع

ليل / داخل

يهو فيللا حلوان

مشهد ٣٧

عرايى ورجاله : احمد عبد الغفار ، على فهمى . عبد العال حلمى ، محمد عبيد ،  
التدبير . . ومحمد عبده . عرايى بهدوء

عرايى : يا شيخ محمد ، احنا الاثنين هدفنا واحد . اصلاح البلد ،  
والخلاف بيننا اختلاف الطريقة ماتيجى تتفق بدل ما احنا مختلفين  
محمد : ازاي ؟ انت مصر على حشد الجيش وراك ومواجهة الخديوى ،  
وانا عندي اخبار بان انجلترا بتحضر نفسها لغزو مصر ، ومتأكد ان  
الخديوى بيقابل مستر كوكسن قنصل الانجليز ومستر كالفن  
المراقب المالى ويبرتبوا مع بعض ، وانك اذا لم تعدل عما تفعل  
فالاحتلال قادم قادم

عرايى : واذا قلت لك اننا بنجهز الجيش ، وحنطلب من الخديو زيادة  
عده ؟

محمد : اقول : افضل من تجهيز الجيش وخوض الحروب ان نهدا ،  
ونعيد العسكر لوحدهم

عرايى : يرضيك ان عساكر مصر يحكمهم الخوف ؟

محمد : ما يرضينى هو الحفاظ على استقلال البلاد

عرايى : احنا بندافع عن استقلالها باروا احنا

محمد : يا عرايى ، انت ازهرى قديم ، وعارف ان الحديث النبوى  
الشريف بيقول لا تتمنوا لقاء العدو

عرايى : انت كده بتكسر مقاديفنا يا شيخ محمد

محمد : انا باتكلم بصوت العقل

عرايى : يا شيخ محمد ، احنا مش حنطلب من الخديوى مطالب

شخصية ، احنا حنطلب منه الدستور والمجلس النيابى

محمد : الدستور والمجلس النيابى لا يتفقان مع وجود الجيش وفى يده



سلاحه .

يقف محمد عبيد محتدا

محمد عبيد : ايه يا عرابى بك ، انت حتحايل عليه ؟ هو حر

عرابى لمحمد بحزم

عرابى : اقعد يا محمد يا عبيد

محمد عبيد : مش معقول اللى بيحصل ده

عرابى : قلت اقعد

يجلس مضطرا - عرابى لمحمد عبيد

عرابى : واضح اننا مش حتفق ، على كل حال انا كان بودى لم الشمل

محمد : وانا عمرى ما سعت لتفرقة الشمل

عرابى : عموما لى طلب واحد عندك قبل ما تنتهى الجلسة ، مافيش داعى

تهاجمنا فى الفترة الجاية ، احنا حنقوم بحركة شديدة لمواجهة

الخدويوى ، ومش عايز نساندنا ، لكن من فضلك مافيش داعى

تهاجمنا

محمد : يفعل الله ما يريد

قطع

نهار / داخلى

يهو فيللا امين بك

مشهد ٣٨

امين يخاطب كهرمانه

امين : استعجلي الهوانم يا كهرمانه ، مش عايزين نتأخر على القطر

كهرمانه : حالا يا سيدى

امين : وشوفى قاسم ، قولى له يخلص

قاسم هابطا السلم حاملا الحقائق

قاسم : انا جيت ايه

امين : عقارم ، انا دايمما معجبينى الالتزام

امين لكهرمانه

امين : اتنى لسه واقفة يا كهرمانه ؟ روحى استعجليهم وقولى لهم يجيوا

هدوم زيادة معاهم عشان حتقعد كام يوم فى اسكندرية

تصل نفيدة بشباب الخروج

نفيدة : انا جاهز افندم

يدخل سباعى ، يخاطب قاسم

سباعى : قاسم افندى ، الشيخ سعد عايزك برة

قاسم : سعد ؟

يخرج فوراً

قطع

نهار/ خارجى

حديقة قصر امين بك

مشهد ٣٩

قاسم وسعد

سعد : يعنى انت مسافر النهاردة النهاردة ؟

قاسم : دلوقت ايه

سعد : خساره

قاسم : خساره ليه ؟

سعد : الجيش المصرى اللى فى القاهرة كله بيتجمع قدام قصر عابدين

بقيادة عرابى ، واكيد حتحصل مواجهة بين عرابى والخدوي . .

القاهرة كلها دلوقت فى ميدان عابدين اصل الجيش النهاردة حيقدم

للخدوي مطالب الامة

قاسم : خساره ، كان نفسى احضر المشهد ده رغم اى شئ لكن القطر

حاكم حركتى انا والعيلة والدى

سعد : عموما انا حابعت لك اللى حيحصل فى جواب ، المهم اول

ما توصل تبعت لى العنوان

قاسم : اكيد

سعد يحضن قاسم

سعد : اشوف وشك بخير

لا يستطيع الرد بأكثر من هز رقبته . سعد يخرج مسرعاً وكأنه يهرب . يخرج الاب من باب

الفيللا الرئيسى مناديا

امين : ياللا يا سباى ، هات العربية  
قطع

---

مشهد ٤٠ ديوان فى قطار اسكندرية      تهار/ داخلى

تجلس الاسرة : امين ، قاسم ، الام ، نفيدة . نلاحظ ان الاب واجم  
الام : خلى بالك من نفسك يا قاسم  
قاسم : ان شاء الله يا امى  
نفيدة : سهر يوك ، بنات حلوين يوك ، خمرة يوك فاهم ولد ؟  
قاسم : فاهم يا امى  
الام : تصلى يا قاسم ، اوعى الصلاة يا ابنى  
قاسم : حاضر  
نفيدة : البس ثقيل .. كل كويس .. ابعت جوابات كل يوم  
قاسم : حاضر  
الاب يتسحب ، قاسم يلاحظ ذلك

قطع

---

مشهد ٤١ امام ديوان القطار      تهار/ داخلى

الاب يمسح دموعه  
امين : الولد الوحيد اللى طلعت بيه من الدنيا حسيينى وسافر ؟ هو  
مايعرفش هو ايه بالنسبة لى ؟ حاقعد ازاي من غيره ؟  
يخرج قاسم ، يراه دامعا  
قاسم : مالك يا والدى ؟  
يمسح دموعه  
امين : لا مافيش ، اصل حاجة دخلت فى عينى

شاعرا بالذنب

قاسم : ارجوك يا والدى ، ماتزعش منى لانى صممت على السفر ،  
ماكانش قصدى اضايكك

يربت عليه مغاليا نفسه

امين : المهم يا ولد تجيب لنا الليسانس بدرجة مشرفة  
قاسم : ان شاء الله

قطع

نهار/ خارجى

امام قصر عابدين

مشهد ٤٢

الجيش المصرى على هيئة مربع ناقص ضلع ، على رأس القوات الضباط على خيولهم .  
امام القوات المدافع موجهه للقصر . حول الجيش ، وعلى اسطح العمارات مدنيون  
لا حصر لهم ، وبينهم سعد زغلول . الخديوى يخرج من باب القصر ووراء المستر  
كوكسن فتصل انجلترا ، والسير اوكلن كالفن المراقب المالى والحرس الخاص . يقف  
الخديوى . يأمر الحراس

توفيق : نادى الامير الاى عرابى

رئيس الحرس : الامير الاى عرابى يحضر بأمر الخديوى

عرابى يتحرك على حصانه شاهرا سيفه ، ووراءه : احمد عبد الغفار ، على فهمى ،  
عبد العال حلمى ، محمد عبيد ، ومجموعة من حوالى ثلاثين ضابطا . الكل شاهرين  
سيوفهم ، الجماهير الغفيرة تتابع باهتمام . كوكسن يهمس للخديوى

كوكسن : اضرب عرابى بالنار جناب الخديوى

ينظر اليه معاتبا

توفيق : مش شايف العساكر حوالينا عاملين ازاي ؟

يصل عرابى وأصحابه ، توفيق يأمرهم بحزم

توفيق : اغمدوا سيوفكم وعودوا لبلوكاتكم

عرابى ورجاله لا يهتمون . . توفيق لعرابى

توفيق : احمد سيفك وانزل من على الحصان وانت بتكلم الخديوى

عرابى ينظر للسيف لحظة كأنه يفكر ثم يغمده ، وينزل

توفيق : ايه اسباب حضورك بالجيش هنا ؟  
عرايى : جيتا يا مولاي نمرض عليك طلبات الجيش والامة ، وكلها  
طلبات عادية

توفيق : وما هي هذه الطلبات ؟  
عايى : عزل رياض باشا . . تشكيل مجلس النواب . . ابلاغ عدد الجيش  
الى العدد المعين فى القرارات السلطانية  
توفيق : كل هذه الطلبات لاحق لكم فيها ، وانا خديوى البلد واعمل زى ما  
انا عاوز ، وما اتم الا عبدا احساناتنا  
عرايى : لقد خلقنا الله احرارا ولم يخلقنا ترانا أو عقارا ، والله الذى لا اله  
الا هو اننا لن نستعبد او نورث بعد اليوم

كوكسن يهمس للخديوى  
كوكسن : مافيش داعى جناب خديو لاستمرار مناقشة عشان هبة فخامتك  
يهز توفيق رأسه موافقا . . ينظر لعرايى نظرة تحد ، ويستدير متجها للقصر وخلفه كوكسن  
وكالفن . سعد زغلول يفاجأ بمن يزاحم ليشاهد ما يحدث ينظر خلفه ليرى من هذا ، فيرى  
الشيخ محمد عبده

سعد : مولانا ؟ جيت ليه ؟  
محمد : كان لازم اشوف الى بييجرى  
كوكسن عاد مرة أخرى لمواجهة عرايى

كوكسن : مستر عرايى ، عزل وزارة من اختصاص جناب خديوى ،  
وطلب تشكيل مجلس نواب مش من حقوق جهادية ، وزيادة  
جيش مش لها لازمة ، انت عارف عرايى بيه فلوس مافيش  
عرايى : اعلم يا حضرة القنصل ان طلباتى المتعلقة بالاهاالى لم اعمد اليها  
الا لأنهم اقاموني نائباً عنهم فى تنفيذها بواسطة هؤلاء العساكر  
الذين هم عبارة عن اخوانهم واولادهم ، فهم الاهاالى الذين اتابونا  
عنهم فى طلب حقوقهم ، واعلم علم اليقين اننا لن نتنازل عن  
طلباتنا ولا نبرح هذا المكان ما لم تنفذ

كوكسن : اذن انت عايز تنفذ طلباتك بالقوة .  
عرايى يهز رأسه بالايجاب . . كوكسن مهددا  
كوكسن : ده امر ينشأ عنه ضياع بلادكم وتلاشيها

محمد عبده ينظر لسعد وفي عينيه استغراب من التهديد  
عرايى : كيف يكون ذلك ؟ ومن ذا الذى يعارضنا فى احوال داخلينا ؟  
اعلم اننا سنقاوم من يتصدى لمعارضتنا اشد المقاومة ، الى ان نفنى  
عن آخرنا

كوكسن : واين هى قوتكم التى ستدافع بها ؟  
عرايى : عند الاقتضاء يمكن ان نحشد مليوناً من العساكر يدافعون عن  
بلادهم ويسمعون قولى ويلبون اشارتى .  
كوكسن يصمت لحظة مفكراً ، ثم يقول  
كوكسن : عرايى بيه ، واذا قلت لك ان جناب خديوى مش ينفذ اى طلب  
من طلباتك . حتم عمل ايه ؟

عرايى : اقول كلمة اخرى  
كوكسن : ايه هى ؟  
عرايى : لا اقولها الا عند اليأس والقنوط  
كوكسن : Excuse me .  
وينصرف ناحية القصر

قطع

---

مشهد ٤٣      مكتب محمد عبده بجريدة الوقائع      نهار / داخلى

محمد عبده ، سعد زغلول  
سعد : تفكر يا مولانا ان موافقة الخديوى على مطالب عرايى دى مش  
مكسب ؟  
محمد : لا انكر انها مكسب  
سعد : امال متشائم ليه ؟  
محمد : ارجو ان اكون متشائماً ، وان يكون تشاؤمى فى غير محله . .  
قطع

الخديو توفيق ، كوكسن ، كالفن  
 كوكسن : لسه شايف انك مش محتاج مساعدة جناب خديو ؟  
 كولفن : اظن جناب خديو . . .  
 الخديو يقاطعه

توفيق : ابعثوا لندن قولوا لهم انى موافق على التدخل  
 قطع

جلنار تجلس فى ثيابها الفاخرة كمروس وتقوم بحل الواجب فى الكوريس  
 جلنار : الالف عليها همزه ، والباء تحتها نقطة ، والتاء فوقها نقطتين  
 خضر يفتح الباب ويدخل  
 جلنار : ايه ده يا خضر افندى ؟ كنت فىن الوقت ده كله ؟ من اول امبارح  
 ماجتش  
 خضر : كانت احداث حثروها الكتب يا جلنار تصدقى ان عراىي شال  
 رئيس النظار ؟  
 جلنار : يا سلام ؟  
 خضر : المهم ، شريف باشا مسك بداله ، الامير الاى عراىي فضل مقعدنا  
 جنبه لحد شريف باشا ما وصل من اسكندرية وراح زاره فى قصره  
 وافق معاه على النظار الجداد  
 جلنار : يعنى عراىي بيه هو اللى بيعين النظار ؟  
 خضر : تصدقى ؟ يعنى مش بعيد بعد شويه يعينى انا كمان ناظر من النظار  
 جلنار : يسمع منك ريتا يا خضر افندى  
 خضر : تعرفى يا جلنار ، دلوقت وانا ماشى فى الشارع يا حسن بالفخر لانى  
 ضابط ، وحاسس اننا مع الوقت حيبقى لنا قيمة كبيرة قوى .  
 صدقيني يا جلنار ، انا فرحان . . فرحان صحيح

جلنار : طب ايه وأيك بقى لو اخلى فرحتك فرحتين اصل انا النهاردة زارتنى  
الداية ، وقالت لى . . .

ينظر اليها متسائلا بلهفة

خضر : قالت لك ايه ؟

جلنار : لسه ما عرفتش ؟

خضر : حامل ؟

تهز رأسها بالايجاب ، يصرخ مهللا

خضر : حابقى اب ؟ حاجيب البيوزياشى خضر الصغير ؟ الله اكبر

جلنار تضحك فى سعادة

### قطع

---

مشهد ٤٦      على ظهر السفينة ( فى عرض البحر )      نهار / داخل

قاسم يستند على السور الحديدى ، يستنشق الهواء بعمق ، يد توضع على كتفه من الخلف  
يستدير ليرى صاحبها يرى حسن

قاسم : مين ؟

حسن : حيكون مين غيرى ؟

قاسم : ابو على ؟

حسن : اجدع ابو على فى الوجود

قاسم : قبلت فى جامعة ايه ؟

حسن : مونبيليه

قاسم : معقول ؟

حسن : وراك وراك يا حبيبي . . المهم بقى ان الحريم فى فرنسا دى يقولوا

لك زى الفاكهة الطازجة

قاسم : من أولها حششتل لى فى الحريم ؟

حسن : دانا مافيش حاجة خلتنى سكت على تحكم ابويا غير الحريم

الخواجاتى . . جاى لكم يا بنات فرنسا . . . . جاى لكم

### قطع



الام تجلس وخدها على يدها ، تفيدة تمسك بمطحنة البن وتطحن بشكل آلى ، تتوقف سارحة ، امين بك يقرأ فى احدى الصحف واضح انه لا يستطيع الاستيعاب ، يضع الصحيفة بعصية

تفيدة : البيت مش له طعم فى غياب قاسم حبيبى  
الام تنفجر بالبكاء ، الاب ينهض تاركاً المكان صاعدا السلم يقف اعلى السلم متكئا على السور

امين : يقولوا ان اليتيم هو ان الواحد يفقد امه وابوه . . ما يعرفوش ان بعد

الاولاد عن ابياتهم هو كمان يتم ؟

قطع

فى مواجهة الشاطئ الفرنسى حيث تبدو معالم المدينة ، قاسم وحسن على ظهر المركب  
حسن : فرنسا يا قاسم . . وصلنا . . وصلنا يا قاسم

قاسم يغمض عينيه ويجذب نفسا عميقا وهو يفتح ذراعيه ، ويقول بعد ان يفتح عينيه  
قاسم : فرنسا ، حلم عمرى . . اخيرا جيت لك يا بلد النور . . يا حلم  
العمر

قطع

## الحلقة رقم (٥)

---

مشهد ١      لقطة خارجية لجامعة مونبلييه      نهار / خارجي

قاسم وحسن يدخلان ومعهما أوراقهما  
قطع

---

مشهد ٢      قاعة شؤون الطلاب      نهار / داخلي

يدخل قاسم وحسن ، قاسم لديه إحساس بالغربة وحسن زائغ العينين . قاسم يتجه لأول  
سيدة تجلس على مكتبها ويقدم لها الملف ووراءه حسن الذي ينهر بجمال السيدة فيقف  
ناظرا اليها دون حركة

قاسم : بونجور

الموظفة : بونجور

تفحص الملف ، تجده كاملا تعطيه ورقة

الموظفة : ممكن تدفع المصروفات في الخزنة

يتحرك قاسم من مكانه الا ان حسن لا يتقدم بل يقف مبهورا بجمال الموظفة يزغده قاسم  
يفيق

قاسم : اصحى

حسن : مانا صاحي اهه

الموظفة تلاحظ ماحدث تضحك ، يقدم لها حسن الملف للمراجعة

قطع

---

قاسم وحسن يسيران ، حسن مذهول

حسن : مش ممكن يا قاسم ، الستات اللي زى لهطة القشطة دول حيفضلوا  
قدامنا طول الوقت كده ؟

قاسم : ايوه يا سيدى

حسن : دانا كده اتجن

قاسم : يا ابني اعقل

حسن : اعقل ازاي ؟ ده شعرهم اللي زى سلوك الذهب . . ودرعتهم

المريانة اللي زى المرمز تطير النافوخ . . استحمل ده كله ازاي . .

دى امي اللي اسمها امي كنت باشوف وشها بالعافية

قاسم : بكرة تاخذ على الكلام ده ويبقى شئ عادى المهم اسكت دلوقت

خلينا نشوف السمسار . . اللي حيحب لنا السكن

حسن : قفلت بقى ايه

يتوقف عند دكان يعلق لافتة بالفرنسية مكتوبيا عليها « سمسار مساكن »

قاسم : آدى كورتبيه ايه

حسن : يا سلام لو يطلع واحده هو كمان

قاسم يزغده

قاسم : اهد شوية

يدخلان

قطع

حسن وقاسم ومعهما السمسار وصاحبة الشقة ماريا : ٤٥ سنة

السمسار : ارجو ان الشقة تكون عجبتكم

قاسم يخاطب حسن

قاسم : ايه رأيك يا ابو على ؟

حسن يهمس

حسن : حتميش مع الست اللي زى القمر دى فى شقة واحدة ؟

قاسم : ايوه

يرفع الطربوش ويهوى به على رأسه

حسن : يا الطاف الله

تدخل من الباب فتاة فى مثل عمرهم هى جوليا

جوليا : اوه ماما ، ازاي حالك النهاردة

ماريا : بخير ، هل جئت يا جوليا ؟ حاضرك الغدا حالا

حسن : الله اكبر . . جاء الحق وزهق الباطل ان الباطل كان زهوقا

قاسم : بتقول ايه ؟

حسن : يا عم مابقولش ، ماتاخدش على كلامى دلوقت

قاسم : طب خلصنى عجبك الشقة ؟

حسن : شقة تبقى فيها القمرات دى وماتعجبنيش ؟ ازاي معنى ؟

قاسم : والسعر مناسب ؟

حسن : مناسب

قاسم للسمسار

قاسم : موافقين حناخد الاوضتين

قطع

---

نهار / داخلى

على باب المدرج

مشهد ٥

الطالبة والطالبات يدخلون المدرج بينهم قاسم وحسن ، قاسم يصطدم بفتاة فرنسية جميلة

قاسم : باردون

تقول له وهى تبسم

سلافا : بسيطة

يدخلون

قطع

---

الاستاذ لرنود يشرح والطلبة ينصتون ويبتهم قاسم وحسن وسلافا  
لرنود : القانون الدولي اذن ينظم العلاقات بين الدول . . لقد كان القانون  
فى العالم القديم هو قانون القوة . . الدولة القوية تستعمر الدولة  
الضعيفة ، لكن الدنيا اختلفت الآن

قاسم يرفع يده

لرنود : تفضل

قاسم : اعتقد انه لم يتغير ، بدليل ان فرنسا القوية . . قامت باحتلال  
الجزائر وتونس . . الضعيفتين

ضجة فى القاعة من بعض الفرنسيين

اصوات : اسكت . . اقعد

يقف شاب فرنسى تبدو عليه العصبية والتعصب

اوجست : من المؤكد انك عربى لازم تعرف اننا حنقوم باحتلال المزيد من  
ارضكم

لرنود بشكل حاسم للطلاب المتعصب

لرنود : اجلس . . ممنوع الكلام دون اذن انت على حق يا ولدى لكن لا بد  
من أن أوضح شيئا نحن نعيش الان بداية عصر جديد ، يمكن أن  
نسميه العصر الاستعماري اى العصر الذى تقوم فيه الدول  
الاوروبية باحتلال الدول الأفريقية والاسيوية وفى رأى ان مجال  
القانون الدولي بمعنى تنظيم العلاقة بين الدول باعتبارها متساوية  
فى السيادة سينحصر فى المستقبل بين الدول الاوروبية فقط

قاسم : شكرا يا دكتور

يهم بالجلوس ، يستوقفه

لرنود : انتظر اسمك ايه ؟

قاسم : قاسم أمين من مصر

لرنود يرفع القبعة اجلالا ويخاطب الجميع

لرنود : مصر يا ابنائى بلد الحضارة

ثم لقاسم

## شكرا مسيو قاسم .. تفضل قطع

مشهد ٧      حدائق جامعة مونييليه      نهار / خارجي

قاسم يسير وحده ، سلافا تجرى وراءه تناديه  
سلافا : قاسم .. قاسم  
ينظر خلفه يجدها ، ينتظرها ، تصل اليه نخاطبه بالعربية  
انت مصرى ؟  
قاسم : ايوه  
تلاحظ انه يشعر بالخجل لوقوفه معها  
سلافا : انا كمان مولوده فى مصر  
قاسم : معقول ؟  
سلافا : ومتربيه فى الفجالة  
قاسم : نعم ؟  
سلافا : مستغرب ليه ؟ بابا كان يشتغل فى السكة الحديد المصرية ايام  
خديوى اسماعيل ، وانا عشت فى مصر ، واتعلمت فى مدرسة  
الفرير هناك  
قاسم : اهلا وسهلا بيك واسمك ايه  
سلافا : سلافا ، على فكرة ، انت لازم تيجى تزورنا وتعرف على والدى  
والدى عنده جنون بمصر  
الشاب الفرنسى اوجست يأتى ينظر لقاسم بنفس الحدة ويواصل سيره ، قاسم يتعجب  
قاسم : ارجوك بلغيه تحياتى اكسكيوزموا  
يحيتها برأسه ينصرف تصيح باعجاب  
سلافا : يا الهى شاب عنده شعور بالحياء .. دى مش حاجة مستحيلة فى  
الزمان ده ؟

قطع

مشهد ٨ بيت اسرة سلافا « الصالة » تؤدي للسفرة ، بينهما آرش نهار/ داخل

الصالة مؤتة اثنا متميزا فيه لمسات من الفن الشرقى ، ويوجد تمثال فرعوني في احد الاركان . سوزى ام سلافا ووالدها جورج يفرشان مفرش المائدة معا ، ساعة الحائط تدق

جورج : اتاخرت سلافا يا سوزى

سوزى : ماتقلقش يا جورج زمانها فى الطريق

دق على الباب

سوزى : اهي جات

تفتح تظهر سلافا وقاسم الذى يحمل . . علبه جاتوه واكياس فاكهة . . سلافا تقول

سلافا : اتاخرنا ؟ اسفة جدا كان مصر على شرا بعض الحاجات

الاب يضحك . .

جورج : اهلا يا قاسم انت كده بتفكرنى بمصر ، . . يقولوا مابخشش بايد

فاضية

قاسم : اهلا يا اونكل

جورج : اسمى جورج

قاسم : عارف طبعا

الام تسلم

سوزى : ازيك مون شيرى

قاسم : اهلا يا طنط

جورج : قل لها يا خالتى زى المصريين مايقولوا

قاسم : اهلا يا خالتى

يضحكون

جورج : حطى الاكل بقى يا سوزى انا حاساعدك ، زمانهم جعائين

يدخلان الى المطبخ

قطع

الأسرة على المائدة ومعها قاسم يأكلون . الاب يتكلم أثناء الاكل  
جورج : من سنة ١٨٥٢ لحد ١٨٧٧ انا عشت في مصر ٢٥ سنة ، شاركت  
في مشروع سكة حديد من ايام عباس باشا  
قاسم : ده حضرتك تبقى من مؤسسى السكة الحديد في مصر  
جورج : السكة الحديد وقناة السويس انا اشتغلت كمان في قناة السويس  
من سنة ١٨٥٩ من اول يوم بدأ الحفر فيها  
سوزى : جورج كان عضو في جمعية سان سيمون وأعضاء الجمعية  
مؤمنين بأن الناس لازم يتصلوا سوا سوا عشان كده كلهم اشتغلوا  
في انشاء طرق مواصلات سكك حديد

قاسم : مفهوم مفهوم

جورج لسلافا

جورج : ساكنه ليه سلافا ؟ على فكرة سلافا مش تسكت دى زعيمة  
قاسم : صحيح ؟

سلافا : انا عضوه في جمعية تنادى بحقوق المرأة في . . فرنسا وبابا مش  
مقتنع بالموضوع ده وكل ما اكلمه يقول لى انتى زعيمة

قاسم : تحرير المرأة الفرنسية ؟

تهز رأسها بالايجاب

قاسم : تحريرها من ايه ؟ المرأة الفرنسية عندها حق التعليم ، وحق  
العمل ، ويتخلط بالرجال في العمل والتعليم ، وتلبس كما نشاء  
عايزة ايه تانى ؟

سلافا : أوه ، عايزين كثير ، عايزين مثلاً مساواتها بالرجال في المراتب  
لحد دلوقت مرتب الرجل في فرنسا اكبر من مرتب الست

يضحك قاسم

سلافا : بتضحك ليه ؟

قاسم : لان الستات في مصر بيعلموا يحققوا مكسب واحد من المكاسب  
بتاعتكم دى

سوزى : وبعدين ؟ قاسم انتم حتقعدوا تتكلموا ومش تاكلوا . . كل



قاسم . . كل  
قاسم : حاضِر

يأكل

قطع

---

مشهد ١٠ شارع من شوارع باريس      نهار / خارجي

سلافا تسحب قاسم من يده

قاسم : افهم بس انتى موديانا على فين ؟ جبتينى من مونبيليه لحد  
باريس . . ليه ؟

سلافا : قاسم فرنسا مش هى الجامعة بس ، فرنسا حضارة كاملة ولازم  
تتفرج عليها

قاسم : هو انا جابنى هنا غير الرغبة فى معرفة الحضارة دى ؟

سلافا : يبقى تعمل حسابك من هنا ورايح ايام الاجازات مخصصة للفرجة  
فى فرنسا

تسحبه من يده وتسير بخطوات سريعة

قطع

---

مشهد ١١ امام متحف اللوفر      نهار / خارجي

الناس يدخلون وبينهم قاسم امين وسلافا

قطع

قاسم وسلافا يشاهدان آيات الفن في القاعات المختلفة يصلان للجناح المصري ، يقف مبهورا يلاحظ اهتمام الاجانب

قاسم : ياه عدد كبير قوى من الزوار ؟

سلافا : هنا فيه حاجة اسمها الجنون بمصر . نابليون راح مصر يحتلها ،

لكن مصر احتلت قلوب الفرنسيين

لقطات لبعض معروضات القسم الفرعوني وعلى وجه قاسم آيات الانهار

قاسم : معقول مصر ترجع تاني أم الدنيا زي ما كانت في عهد الفراعنة ؟

معقول ؟

قطع

قاسم وسلافا يصعدان من الواضح ان قاسم يصعد لأول مرة

سلافا : عايزة افهم بس ، مين اديب اسحق اللي مصر انك ماتمشيش من

باريس قبل ما تزوره ؟

قاسم : ده واحد من اتصار الفكر الحر ، اصله شامي ، لكن هو مرتبط

بالقضية المصرية ، ودلوقت بيطلع جرنال في باريس للدفاع عن

مبادئ الحزب الوطني بتاع هراي

سلافا : كده فهمت ، داكور ، نطلع نزور مسيو اديب

يواصلان الصعود

قطع

اديب يرحب بقاسم وسلافا

اديب : اهلا يا قاسم افندى . . اهلا يا مدموازيل

قاسم : سلافا  
اديب : اهلا يا مدموازيل سلافا  
سلافا : اهلا  
قاسم : انا اخدت عنوانك من الشيخ محمد عبده قبل ماجى من مصر ،  
وقلت لا يمكن آجى باريس ومافوتش عليك  
اديب : فيك الخير  
قاسم : المهم . . ايه اخبار مصر ؟  
اديب : شوف ياسيدى بعد مظاهرة عابدين تم تشكيل مجلس نيابى واعلن  
عن قرب اعلان الدستور ، والجيش ابتعد عن السياسة ، وبدأت  
الامور تمشى بشكل معقول  
قاسم : انا متابع ده كله فى الجرايد . . أيه اللى جد بعد كده ؟  
اديب : فرنسا واتجلترا انضموا لبعض وبدأوا يعملوا مشاكل  
سلافا : فرنسا ؟  
اديب : للأسف يا انسه ، ده اللى حصل  
قاسم : ازاي ؟  
اديب : قدموا مذكرة فى ٧ يناير بانهم قرروا حماية الخديوى ، وانهم  
مصممين على فرض الرقابة والوصاية على مصر  
قاسم : معقول ؟  
اديب : ياريت الامر وقف عند كده ، دول قدموا مذكرة ثانية يوم ٢٦ يناير  
طلبوا فيها من الخديوى انه مايدش مجلس النواب حق تقرير  
الميزانية  
قاسم : ده تدخل فى شؤون البلد  
اديب : مش تدخل وبس دى بلطجة  
سلافا : الكلام ده ضد فرنسا ، ضد مبادئ الثورة الفرنسية وكلامها عن  
الحرية والاخاء  
اديب : قولى الكلام ده للمسؤولين فى بلدكم  
سلافا : ايوه هاقوله ، وحاخلى الطلبة كلهم فى مونيبييه يقولوه بأعلى  
صوت .

مزج

عدد من الطلبة والطالبات يقفون رافعين لافتات بالعربية والفرنسية بينهم قاسم وحسن وسالفا وعدد من الفرنسيين والفرنسيات . مضمون اللافتات :

ارفعوا ايديكم عن مصر . نحن احرار في بلادنا . نحن ندين اى تدخل فى شؤون مصر لن يتكرر احتلالكم لتونس على ارض مصر . يأتى اوجست يقف امام قاسم امين متحديا .

اوجست : رافع لى يافطة ؟ دى حيلة المعجزة

قاسم : شكرا

اوجست : لازم تعرف ان الأقوى يفعل ما يريد والضعيف لا يملك إلا

الاحتجاج ، احتجاجوا زاي مانتو عايزين ، لكن بلادكم حتبقى

مستعمرة

يهجم عليه حسن

حسن : بلدنا حتفضل حرة يا ابن الابالسة غصب عنكم كلکم

خناقة بين الطرفين . . قاسم يترك لافتته ويتدخل لفض الخناقة

قطع

حسن وقاسم واوجست يقفون امام العميد لرنود

لرنود : ما حدث هذا همجية

لا احد يرد ، فيقول لرنود لاوجست

لرنود : لازم تعرف ان من حقهم ابداء رأيهم نسبت ان فولتير قال : انتنى

على استعداد لان ادفع عمرى ثمنا لان تقول رايك ؟ انت كده بتتهين

مبادئ فرنسا

اوجست : انا لم اعترض . انا كنت باتناقشهم

قاسم : كان بيهينا

اوجست : كنت باوضح لهم ان الاقوى اللى بيتتصر

حسن : كان بيهين بلدنا ، بيقول انها حتكون مستعمرة

لرنود : اسمعوا كلکم . . باستطاعتی انی اعاقبکم بشدة

لاوجست

لرنود : خصوصاً انت ، لانى عارف مشاكلك وعنصرتك

أوجست يطأطئ رأسه

لرنود : لكنى حرصاً على مستقبلکم حانحکم فرصة اخيرة . . . ياللا . .

سلموا على بعضکم

أوجست يمد يده مضطراً حسن يسلم عليه وهو يبادلہ نظرات التحدى قاسم يسلم عليه ،

يضغط على يد قاسم برذالة قاسم يفاجأ . العميد يتتبه

لرنود : أوجست

يتركه

قطع

---

نهار / داخلى

امام مكتب العميد

مشهد ١٧

يخرج حسن وقاسم وأوجست من مكتب العميد ، سلافا تنتظر تجرى بلهفة نحو قاسم

سلافا : قاسم . . عملتم ايه ؟

قاسم : الحمد لله . . الموضوع خلص

أوجست يوجه كلامه لسلافا بالفرنسية

أوجست : سلافا ، احسنك ماتعرفيش الاولاد دول مايصحش بنت

فرنسية راقية تعرف ولاد متخلفين زيهم

سلافا : لا شأن لك بى أوجست

أوجست : طيب ، استمرى فى عنادك

ينصرف ، بينما يشيعونه بنظرات نارية

قطع

---

قاسم يذاكر ، يدخل عليه صاحبه حسن ممسكا بكتاب

حسن : الحقنى يا قاسم

قاسم : مالك يا سى حسن ؟

حسن : محتاس ، مش عارف اعمل حاجة فى البحث بتاع الدكتور لرنود

قاسم : ليه ان شاء الله ؟

حسن : من الاصل مش عارف اقرا ، ولما باقرا مش قادر افهم ، ولما بافهم

مش باقدر اكتب حاكتب البحث ازاي ؟

قاسم : ما تخلى البنات اللى داير تجرى وراهم يكتبوه لك

حسن : مش وقت هزار اعمل معروف

قاسم : حاضر يا سيدى ، استنى لما اخلص البحث بتاعى وبعدين اساعدك

حسن : لسه حاستنى ؟

قاسم : مش عاجبك بلاش

حسن : لا يا سيدى ، عاجبنى ، عاجبنى

قطع

لرنود يضع البحوث امامه على المنضدة يفر البحوث ، يخرج عددا محدودا وحده ،

العيون تتعلق به ، لرنود يمسك اول بحث ينادى

لرنود : حسن يوسف

يقف حسن

لرنود : بحث ممتاز

حسن : نعم ؟

لرنود : اشرح لنا كيف كتبت

حسن : انا . . انا . .

يسقط من طوله ، تحدث جلبة ، سلافا تشممه بارفان ، لرنود يقول له

لرنود : مالك ؟

حسن : ارجوك . بلاش انا دلوقت

لرنود : داكور ، ننتقل لقاسم امين

قاسم يقف

قاسم : نعم يا دكتور

لرنود : أنا اديت بحثك درجة ممتاز احبيك يا ابني ، وارجوانك تكون على

صلة دايماً بي

قاسم : ان شاء الله يا دكتور لرنود

قطع

---

نهار / داخلي

مكتب العميد

مشهد ٢٠

د . لرنود يجلس على اريكة ويجواره قاسم . لرنود يقدم كتابا لقاسم

لرنود : خديا قاسم ، ده كتاب في فن البحث العلمي اقرأ واكتب لي تقرير

عنه

قاسم : مش حتأخر عليك

لرنود : انا حاتولي تدريبك يا قاسم على كتابة الابحاث لاني شايف فيك

موهبة البحث واظن انك ستكون باحث ممتاز تفيد بلادك

قاسم : شكرا دكتور لرنود

قطع

---

نهار / داخلي

غرفة قاسم بمونيبييه

مشهد ٢١

قاسم يذاكر بالقفطان والطاقي . دق على الباب

قاسم : ادخل

ينفتح الباب وتدخل سلافا

سلافا : بونجور

قاسم : سلافا ؟  
 سلافا : مالك ؟ اتخضيت ليه ؟  
 قاسم : جاية الشقة هنا . . لوحدك ؟  
 سلافا : ايه المشكلة ؟ مش فيه سكان تانيين هنا ؟  
 قاسم : افرضى انهم مش موجودين ؟  
 سلافا : قاسم ، فوق بقى ، مافيش واحد يقدر يجبر واحدة على حاجة هي  
 مش عايزاها حتى لو كاتوا لوحدهم  
 قاسم : الموضوع ده بالنسبة لنا فيه نظر  
 سلافا : المهم . . اتفضل قوم  
 قاسم : على فين ؟  
 سلافا : على باريس حجزت لك تذكرة معايا بكرة فى الكوميدي فرانسيز  
 على حسابك طبعا ، عشان تشوف اعظم مسارح فرنسا . قوم  
 عشان نلحق قطر باريس ، ياللا  
 قاسم : مسرح ؟ والله فرصة نعرف الفرق بين مسرح يوسف خياط وسلامة  
 حجازي واهل فرنسا  
 يخلع الطاقية من على رأسه ويلقبها على السرير  
 قطع

---

مشهد ٢٢ الصالة نهار/ داخلي

حسن وجوليا ( بنت السيدة التي يسكن عندها ) وقد حاصرها  
 حسن : اسمعى كلامى يا جوليا ، تعالى نروح معاهم  
 جوليا : حسن ، انت رزل . ابعد  
 تدفعه وتمضى لحجرتها ، يخلع طاقيته هو الآخر ويرميها على الارض احتجاجا  
 قطع



مشهد ٢٣ لقطة خارجية للكوميدي فرانسيز ليل / خارجي

قاسم وسلافا يدخلان

قطع

مشهد ٢٤ مسرح الكوميدي فرانسيز ليل / داخلي

لقطة من مسرحية فرنسية . ينتهى الفصل . ستار

سلافا : ايه رأيك ؟

قاسم : رائع

سلافا : تعرف ان فيه ناس يقولوا ان بداية المسرح كانت فى مصر ؟

قاسم : تعرفى . . انا باتعرف على تاريخ مصر هنا ، فى فرنسا

قطع

مشهد ٢٥ امام مدرج الامتحانات نهار / داخلي

الاولاد يذاكرون ومن بينهم قاسم . حسن يناديه

حسن : قاسم

قاسم : ايوه يا حسن

حسن يبحث فى كته

حسن : جالك جواب من مصر ، صاحبك يا سيدى سعد زغلول

بلهفة

قاسم : سعد ؟

يجده ، يقدمه له

حسن : ااه

قاسم يتبعد عن الباب ، يجلس على سور السلم أو اى شئ ، ويفض الجواب بلهفة . وجه

سعد فى الخطاب يخاطب قاسم

سعد : ازيك يا قاسم . . اعلم انى تأخرت عليك فى الكتابة ، لكن ماذا افعل يا صاحبى ؟ الاحداث هنا لا تعطينا فرصة لالتقاط الانفاس تغيرت وزارة شريف بوزارة البارودى ، وعرايى تمت ترقية من امير الاى لوكيل نظارة الجهادية واخيرا اصبح ناظرا . . اول ناظر حرية مصرى يا صاحبى . . اليس هذا نصرا رغم كل شئ ؟ المهم . . عرايى نال رتبة اللواء ، وحصل على الباشوية ، واصبح زعيم الامة بحق وكنا نظن انه بعد ان صار للبلاد دستور ومجلس للتواب سيهدأ الصراع بين عرايى والخديوى ، لكن بعض الظن اثم ، وقد انتهى الصراع بانذار مشترك من اتجلترا وفرنسا تؤيده السفن الحربية لاقالة الحكومة كلها فأقالها الخديوى واصبح عرايى بلاى سلطة رسمية . . ولا زال الصراع دائرا . اما عنى فقد عينت فى وظيفة معاون بالداخلية فى الجيزة ، وخلعت الزى الازهرى وصرت افندى مثلك تحياتى . . اكتب لى . . اخوك : سعد  
زغلول

قاسم يمسك الخطاب بحب

قاسم : واحشنى والله يا سعد ، واحشانى مصر كلها

الساعى الواقف على باب اللجنة ينادى

الساعى : قاسم أمين

قاسم : نعم

قاسم يدخل

قطع

نهار/ داخل

لجنة الامتحان الشفوى

مشهد ٢٦

يدخل قاسم على لجنة من ثلاثة اعضاء برئاسة لرنود

قاسم : بنجور

الجميع : بنجور

استاذ : تفضل

لرنود : قاسم ، لن يكون لك امتحان شفوي ستحصل على درجة ممتاز  
دون متحان لمجهودك في البحوث التي قدمتها خلال العام

قاسم : هذا كثير يا استاذ

لرنود : ليس كثيرا لقد قلت لك من قبل انك ستكون باحثا ممتازا . .

لرنود يشير الى الباب

لرنود : تفضل . . تفضل

قطع

---

مشهد ٢٧ امام لجنة امتحان التحرير نهار/ داخل

الطلبة يدخلون لجان الامتحان بعض الطلبة يذكرون ، قاسم وسلافا وحسن يقفون  
للمراجعة في منطقة قريبة ، اوجست يأتي لقاسم متحديا

اوجست : ايه يا قاسم . . حتعرف تجاوب في الامتحان ؟

قاسم : وليه لا ؟

اوجست : اصل اللي ببيجوا من بلاد متخلفة زيك لا يمكن يلاحقوا ابناء

البلاد المتقدمة

حسن يتدخل

حسن : يا عم انت ماتروح لحالك . . انت مالك ومالنا ؟

اوجست ينظر له باحتقار

لا اله الا الله . . يا عم حل عتنا الله لا يسيئك عايزين ندخل الامتحان

من غير عصبية

اوجست : انا مصر اضايكم

سلافا : سبيك منه يا حسن

قاسم : مافيش داعي انك تضيع على نفسك الامتحان بسبب استفزازة

اوجست : جبناء

يدخل اوجست اللجنة

قاسم : يا ساتر . . . . ولد سمج الى حد لا يطاق

سلافا : سييك منه وياللا ندخل اللجنة  
قطع

مشهد ٢٨ لجنة امتحان التحريري نهار/ داخل

قاسم وحسن وسلافا ، اوجست واخرون يؤدون الامتحان . اوجست ينظر لقاسم بغيظ ،  
قاسم يتجاهله ويعطيه ظهره ويواصل الكتابة  
قطع

مشهد ٢٩ حدائق جامعة مونبيلييه نهار/ خارجي

اوجست يسير ، سلافا تجري وراءه ، تناديه

سلافا : اوجست . . اوجست

اوجست : عايزه ايه ؟

سلافا : عاوزه اسالك . ليه بتعامل قاسم وحش بالطريقة دي ؟

اوجست : لاني باكرهم

سلافا : ليه ؟

اوجست : لاني مؤمن بأن الجنس اللي ينتمي اليه هو الجنس الارقي ، وهو

اللي لازم يحكم الاجناس الثانية الاضعف منه عشان كده

مبابطيش اشوف الولاد المصريين دول جنبي ابداء

سلافا : لكنك قريت بالتاكيد ان الحضارة المصرية القديمة كانت صاحبة

الفضل على الدنيا

اوجست : ده كلام فارغ بيروجه الجهلة ، وانا بانذكرك يا سلافا لو استمرت

علاقتك بالولدين دول مش حيحصل لك طبيب

سلافا : بتهددني يا اوجست ؟

اوجست : افهى اللي تفهميه

## تقطع

مشهد ٣٠ مکتب ادیب اسحق بیاریس نهار/ داخلی

یدخل قاسم علی ادیب اسحق متهللاً  
 قاسم : بونسوار مسیو ادیب اسحق  
 ادیب : اهلاً یا قاسم ، فینک یا ابنی ؟  
 قاسم : کنت مشغولاً فی الامتحانات ، لم انتہ منها الا منذ ایام .  
 ادیب : امتحانات ؟ نہایتہ . . . عرفت الاخبار ؟  
 قاسم : لا ، انا بقالی مدۃ مابقراش جراید ، فیہ ایہ ؟  
 ادیب : الانجلیز بیحاربوا عرابی ، حصلت بینہم مواقع کثیرۃ وکان النصر  
 فیہا لصالح الانجلیز ، واخر اخبار وصلت ان عرابی بیستعد  
 لمعركة فاصلة فی التل الکبیر  
 قاسم : الکلام الی قالہ الشیخ محمد عبده زمان  
 ادیب : الشیخ محمد عبده دلوقت مع عرابی  
 قاسم : ایہ ؟  
 ادیب : امال حسیبہ یواجه الانجلیز لوحده . نزل معاه معركة رغم  
 الاختلاف الی بینہم ، ویبمحس الناس للوقوف جنب عرابی  
 مزج

مشهد ٣١ مسجد نهار/ داخلی

الاهالی یجتمعون ، محمد عبده یخطب فیہم  
 محمد : یا اهل مصر . . . . ان الله وعد المؤمنین بالنصر ، قال تعالی  
 « وکان حقاً علینا نصر المؤمنین » لکنہ اشترط علینا ان ننصرہ « ان  
 ننصروا الله ینصرکم ویثبت اقدامکم » اتعرفون کیف ننصر الله ؟ بأن

يقدم كل منا ما فى وسعه لقتال العدو . . . المقاتل يصبر  
ويصابر . . . وغير المقاتل يتبرع بما يملك لطعام الجند ومساعدتهم  
فى القتال . . . الكل يجب ان يكون وحدة واحدة  
قطع

مشهد ٣٢ امام مبنى كلية الحقوق مونبيليه نهار/ داخل

قاسم وحسن يدخلان على الاولاد الذين ينظرون فى النتيجة المعلقة على لوحات  
اعلانات

حسن : يا ابنى تسافر ايه ؟ مش بتقول البلد فيها حرب ؟  
قاسم : عشان فيها حرب لازم اسافر . . . هم اهلنا مش عايشين هناك ؟  
حسن : ماقلتش حاجة ، ولكن . . . . .  
قاسم : مالكنتش ، خليك انت ، انا حاشوف النتيجة واشوف اى وسيلة  
للسفر ، ان شاء الله اروح فى قارب بمجداف  
حسن يقف مكانه ويمسك بقاسم فى خوف  
قاسم : مالك اتخشيت كده ليه ؟  
حسن : خايف اشوف النتيجة  
قاسم : وماكتتش خايف طول السنة وانت بتجرى ورا البنات ؟  
حسن : باقول لك ايه ، روح انت شوف النتيجة وتعالى قل لى  
سلافا تراهما ، تقبل عليهما  
سلافا : قاسم ، حسن ، شفتم النتيجة ؟  
حسن : انا خايف  
قاسم : تعالى يا سلافا احنا نشوفها  
يذهبان للوحة النتائج ، يجدان اوجست يبحث عن نتيجة يتبادل اوجست النظرات الحادة  
مع قاسم . سلافا تصيح بالعربية  
سلافا : انا نجحت يا قاسم  
تقبله ، يصدى ، تضحك  
سلافا : بتكسف ؟ طب ياللا ، شوف نتيجتك

قاسم يبحث ، يخرج اوجست ، سلافا تسأله

عملت ايه يا اوجست ؟

قاسم يأتي صائحا لسلافا وحسن

قاسم : سلافا . . انا الأول يا سلافا . . انا الاول يا حسن

حسن : الله اكبر

ينظر اوجست اليه ، يخاطبه بالفرنسية

اوجست : تفكر انك انتصرت علينا بالطريقة دي ؟ لا ، الجنس اللي تنتمى

اليه لن يتنصر ابدا . . . الجنس اللي احنا منه اللي لايد يتنصر

قاسم : اوجست ماتفسدش على فرحتي

اوجست : بل لايد ان افسدها . . . . لعلمك انجلترا اعلنت النهاردة

احتلال بلدكم ، وبقيتم مستعمرة . الأخبار وصلت حالا

بالتلغراف

حسن يهجم عليه ليضربه

حسن : مالكش دعوة بيلدنا يا ابن الابالسة

قاسم يمنعه

قاسم : بلاش يا حسن . ده مايستاهلش

قاسم يأخذه وينصرف . سلافا تتبادل النظرات الحادة وتجري لتلحق بحسن وقاسم

سلافا : قاسم ، حسن ، استنوا

قطع

نهار / داخلي

صاله شقة قاسم بمونبيليه

مشهد ٣٣

قاسم يأتي يشتطة مستعدا للسفر . حسن وسلافا يقفان . . يسلم عليهما يبدأ بسلافا

قاسم : اشوف وشك بخير

سلافا : لازم تكتب لى من مصر

قاسم : اكيد

يسلم على حسن

قاسم : سلام يا بو على

حسن : سلم لى على ابويا ، وقل له يوصل سلامى للعيله كلها  
 قاسم : ان شاء الله  
 حسن : وضرورى تظمنى على اللى بيحصل فى مصر  
 قاسم : ان شاء الله  
 قاسم يحمل حقائبه  
 حسن : يا ابنى نيجى نوصلك  
 قاسم : مافيش داعى ، ماتتعبوش نفسكم مابحيش لحظات الوداع  
 ينزل

### قطع

مشهد ٣٤ مدخل بيت سعد زغلول نهار/ داخل

سعد يتجه لفتح الباب وهو يرتدى القميص والبنتلون  
 سعد : طيب . . . . طيب ، استنى ياللى ع الباب  
 يفتح ، يجد قاسما يحمل حقيبة السفر ، يصبح فرحا  
 قاسم ؟ حمد لله على السلامة  
 يحتضنه ، قاسم يحتضنه ايضا  
 قاسم : ازيك يا سعد جيت من القطر عليك . ماقدرتش اروح قبل ما تنظم  
 عليك وعلى كل الاصدقاء والاساتذ  
 سعد : تعال يا راجل . . . ادخل . . . ادخل  
 يدخل ، يغلق سعد الباب ويحاول المداعبة  
 سعد : ايه اخبار بلاد الفرنجة ؟  
 قاسم : قل لى انت الاول ايه اخبار مصر ؟  
 سعد يكسو وجهه الحزن  
 سعد : مصر ؟ اخبارها لا تسر عدو ولا حبيب  
 قاسم : اكيد ، هو فيه اكثر من الاحتلال ؟  
 سعد : فيه  
 قاسم : ازاي ؟



سعد : انجلترا الحد دلوقت اعتقلت تسعة وعشرين الف مصرى بحجة اتهم  
كانوا ضد الخديو أو اشتركوا فى الحرب مع عرابى  
قاسم : للدرجة دى ؟  
سعد : احسن حاجة تروح بيتك وتقفل عليك بابك بدل ما يصيبك جنون  
الانجليز انت كمان  
قاسم : معاك حق . . . . لكن ماقتلش ، الشيخ محمد عبده اخباره ايه ؟  
سعد : الشيخ محمد عبده فى السجن  
قطع

---

مشهد ٣٥ حديقة قصر امين بك ليل / خارجى

قاسم يحمل حقيبه ويدخل يجر قدميه متهالكا ، سباعى يراه ، يجرى نحوه  
سباعى : حمد لله على السلامة يا قاسم افندى ، مصر نورت يا قاسم افندى  
يحمل عنه الحقية يجرى نحو باب الفيلا الداخلى يدق الباب يفرح  
سباعى : افتحوا يا جماعة . . . . . قاسم افندى وصل . . . . قاسم  
افندى وصل  
كهرمانه تفتح الباب ، قاسم يدخل وهو يحييها  
قاسم : ازيك يا ست كهرمانه  
كهرمانه : تسلم وتعيش يا قاسم افندى  
قطع

---

مشهد ٣٦ بهو قصر امين بك ليل / داخلى

قاسم يدخل على امه وتفيدة هانم ، يقول باقتضاب  
قاسم : مساء الخير  
الام تجرى على ولدها ، تحتضنه بقوة

الام : قاسم . . . ابني . . . حبيبي  
قاسم : ازيك يا امي  
الام : وحشتي . . . وحشتي كثير . . . كثير قوى  
قاسم : انتي اكثر يا ست الحبايب

نفيدة تبعدها عنه تحتضنه

نفيدة : كفاية افندم ، سيه حبه لامه نفيدة ازيك ولد ازيك خلبوص ، حمدا

لله على السلامة

كهرمانة : كفاية يا جماعة ، الراجل ماخذش نفسه

نفيدة : بس ينت كهرمانة . . . ياللا اعملى عشا عظيم لقاسم افندى . . .

كهرمانة : حاضر

يجلس منهمكا ، تاتي من احدى الغرف جلنار حاملا حزينة

جلنار : ازيك قاسم افندى

قاسم : مالك يا جلنار . . . . .

جلنار : سجنوا خضر افندى ، سجنوه من غير ما يشوف ابنته اللي جاي

قاسم : سجنوا مصر كلها ، لكن معلنش بكرة تفرج

جلنار : اديني مستنية الفرج

قاسم لامه

قاسم : امال والدي فين ؟

الام : ابوك من يوم الانجليز مادخلوا البلد وهو قافل على نفسه ، ومش عايز

يكلم حد

يجرى على السلم

قاسم : والدي

قطع

ليل / داخلي

غرفة ام قاسم

مشهد ٣٧

الاب ممدد على السرير ويتكلم كمن كان ينتظر من يسمع له لينفجر . قاسم بجواره  
امين بك : عرابي مش ظابط صغير ، عرابي كان عارف انهم ممكن يلقوا

من وراء ويهاجموه من ضهره ، عشان كده كان عايز يقفل القناة ،  
لكن ديليسيس وعده انه مش هيسمح للانجليز باستخدامها ،  
وبعدين خانه . الخيانة هزمت عرابي

قاسم : شئ مؤسف

امين : المصريين دافعوا عن بلادهم دفاع عظيم ماتوا رجال ، ومحمد عبید  
كان بطل باعتراف الجميع ، حتى العدو اعترفوا انه كان بطل ، لكن  
تعمل ايه البطولة قدام الخيانة ؟

قاسم : اول مرة اشوفك بتدافع عن الضباط المصريين يا والدى  
امين : انت فاهمنى ايه يا ولد ؟ انا صحيح تركى لكنى عشت هنا سنين ،  
اتجوزت من مصر وبقي لى ابن اتولد فيها وعاش على ارضها ،  
مصر رغم كل شئ بقت وطنى ، وربنا وحده يعلم هى عزيزة على  
قد ايه

قاسم : طب اهدا يا بابا . . اهدا

امين : من المؤكد اتى غلطت . كان المفروض اروح لعرابي واحط نفسى  
تحت امره واموت شهيد مع اللى ماتوا . ايه قيمة العيشة والبلد كلها  
عايشة تحت ظل الاحتلال ؟

قاسم : يظهر اتى قلبت عليك المواجه . . حسيك تترتاح شوية

قاسم يخرج ، الاب يردد

امين : الولس هزم عرابي . الولس هزم عرابي  
قطع

---

مشهد ٣٨ شارع من شوارع القاهرة ليل / داخل

اولاد وأطفال يشكلون حلقة فى الشارع تغنى ، بينما قاسم يمشى سارحا

الاطفال : يا عزيز يا عزيز . . كيه تاخذ الانجليز

يا توفيق يا وش القملة . . مين قال لك تعمل دى العملة

يا عزيز يا عزيز . . كيه تاخذ الانجليز

المجنود الانجليز يدخلون الشارع ، الاولاد كانهم يتحدثون الانجليز ، يوجهون لهم

اغانيهم  
 الضابط الانجليزى للمصريين  
 انجليزى : كانش ذم . . كانش ذم  
 يقبضون على الاطفال . قاسم يتحرك وراءهم  
 اصوات : حرام عليكم دول عيال صغيرين . . هم يعرفوا حاجة  
 قطع

مشهد ٣٩ حكمدارية القاهرة نهار/ خارجى

مينى له باب حديدى عال واسواره عالية ، على بابہ حرس مدججون بالسلاح  
 قاسم يقترب من الحرس ، يخاطب احدهم  
 قاسم : لو سمحت عايز اسأل على الشيخ محمد عبده  
 ضابط : ممنوع  
 قاسم : انا محامى ، ومن حقى . . . . .  
 الضابط بعد ان يلتفت حوله ليتأكد انه لا احد يراه  
 ضابط : يا ابنى حقك ايه ؟ هى البلد فيها قانون ؟ الانجليز دلوقت هما  
 القانون اتوكل على الله الا لواحد منهم عرف انك بتسأل على  
 مساجين حيقبض عليك انت كمان  
 قاسم : طب ايه فائدة القانون اللى بدرسه فى اورويا اذا كان البلد مافيهاش  
 قانون ؟  
 قاسم ينظر للرجل مذهولا ، ينصرف

قطع

مشهد ٤٠ بهو قصر امين بك نهار/ داخلى

امين يدخل من الباب على الام التى تجلس هى وتفيدة تتعاونان فى لف بكرة خيط  
 للبلورات

امين : فين قاسم ؟  
الام : جوه فى المكتب

ينادى

امين : قاسم . . يا قاسم

يأتى

قاسم : نعم يا بابا  
امين : ماتقوليش بابا دى تانى ، اسمها والدى بالعربى ولا خلاص بقيت  
خواجا ؟

قاسم : لا خواجا ولا حاجة  
امين : انا ماعدتش طايق حاجة فيها ريحة الخواجات من ساعة ما خدو البلد  
قاسم : معاك حق . . المهم ، حضرتك كنت بتتاديلى ليه ؟

يخرج تذكرة سفر

امين : دة تذكرة السفر بتاعتك ، استعد للسفر بعد يومين  
قاسم : على طول كده ؟

الام : معقول يا امين بك ؟ انت اللى حاجز له ؟

تفيدة : احنا مش شبعنا منه افندم  
امين : السفر احسن اليومين دول . الانجليز بيقبضوا على الناس بالشبه .  
عايزينهم يسجنوه ؟

تفيدة : لا افندم لا . . خليه يسافر

الام : مش ممكن اجى معاك يا قاسم ؟

قاسم يربت عليها

امين : باللا ، روح جهز شتطتك

قاسم يخرج متجه لفرقة

قطع

قاسم يفتح دولابه يجمع ملاپسه بينما تدخل الام وهى فى حالة انكسار

الام : ممكن اجى معاك يا قاسم ؟

قاسم : ما فتكرش والدى يستغنى عنك

الام : والدك عنده غيرى تفيدة هانم لكن انا ما عنديش غيرك

قاسم : امى وانا بعيد وانا قريب عمرك ما بتفارقينى

الام : انت مش عارف غيابك عنى عامل فيه ايه . انا بازق فى الساعات

عشان الوقت يعدى

قاسم : مسيرى اخلص وارجعلك على طول

الام : يعنى مش عاوزنى معاك ؟

قاسم : أنا وحسن ساكتين مع بعض فى مكان على القدر

الام : يبقى ربنا يصبرنى بقى

كهرماته تطرق الباب

كهرماته : سعد افندى منتظر حضرتك فى الصالون

قاسم : يتصرف بسرعة وامه تتبعه بعيون محبة

قطع

قاسم يدخل على سعد ويتقابلان بالاحضان

قاسم : عارف يا سعد . . انا كنت رايتك . . دلوقت عشان اسلم عليك

قبل ما اسافر . .

سعد : يبقى القلوب عند بعضها . . المهم عايزك ما تبخلش على

بالجوابات . . واى جرنال تلاقىه كاتب حاجة عن مصر

ابعتهولى . . وطمنى دايمًا عليك وعلى اخبارك . .

قاسم : المهم طمنى انت . . تفكر ممكن فى اى حاجة تتعمل دلوقت فى

ظل ظروف الحصار اللى فرضها الانجليز على اى تحركات

للمصريين

سعد : اطمئن . . ما فيش ظروف حتمتنا ما هو مش ممكن نكتف ايدنا ونقف ساكتين . . ونحسهم ان خلاص الامور استتبت لهم في مصر

قاسم : . . ناوين على ايه يعني ؟

سعد : باعمل اتصالات سرية دلوقت مع مجموعة من الوطنيين . . عشان نكون جمعية سرية تقوم بأعمال انتقامية ضد الانجليز

قاسم : حوادث اغتيال معنى

سعد : مش في البداية . . انما حنصعد نشاطنا بالتدريج . . وحنطلق على الجمعية دي عدة أسماء

قاسم : عشان محدش يقدر يوصل للاسم الحقيقي .

سعد : بالظبط . . وكمان عشان نرعبهم نخليهم يحسوا انها مش جمعية واحدة انما عدة جمعيات .

قطع

نهار/ خارجي

على ظهر السفينة

مشهد ٤٢

قاسم يجلس على مقعد على ظهر السفينة سارحا

قاسم : في الوقت اللي انا مسافر بعيد عن مصر عشان اعيش في مونيبييه سعد قاعد في مصر وييفكر في انشاء جمعية سرية . . انا مكسوف من نفسى . انا كان مفروض افضل معاه في مصر واشاركه في المقاومة .

يجلس بجواره رجل ينظر الى جواره فيجد اديب اسحق

قاسم : استاذ اديب ؟

اديب : ماقدرتش اصبر زيك جيت على مصر في المركب الى وراك

قاسم : حاسس بالعار يا استاذ اديب لاني سافرت وسييت البلاد في اللي

هي فيه

اديب : لا . . ماتحملش نفسك فوق طاقتها . البلد مش هتطلع من اللي

ہی فیہ قریب ، التحرر من الاحتلال ده مشوار طويل ، والبلد  
لا يمكن تحكم نفسها غير لما يبقى فيها ناس متعلمين يقدرؤا  
يحكمؤها

قاسم : بس انا شاعر بجرح كبير  
اديب : كلنا شاعرين بنفس الجرح . اسمع احنا محتاجين نغلى بنفسنا  
ونفكر فى اللى جاي

قاسم : ايوه . . فى الحاضر وفى اللى جاي وفى كل شئ  
قطع

مشهد ٤٣ فناء جامعة مونيبيليه نهار/ خارجى

قاسم مقبل على سلافا وحسن وهما يتحدثان . حسن ظهروه لقاسم ، سلافا تراه ، سلافا  
تجرى نحوه مهله

سلافا : اوه . . قاسم . . ازيك

قاسم : ازيك يا سلافا

حسن : ازيك يا عمنا ، والله العظيم عرفت قيمتك لما غبت . . اخبارك  
ايه ، واخبار مصر ايه ؟

قاسم : حاحكى لك على مهلنا

سلافا : على فكرة يا قاسم ، دكتور لرنود بيسأل عنك . عاوزك ضرورى

قاسم : حاروح له ان شاء الله

مزج

مشهد ٤٤ مكتب د . لرنود بالجامعة نهار/ داخل

لرنودو وقاسم يتحاوران بالفرنسية

لرنود : قاسم ماذا تعرف عن الحركة الفكرية فى اورؤيا ؟

قاسم : بصراحة يا دكتور لرنود ماعرفش اى شئ ، انا قضيت العام





قاسم أمين وسلاف وحسن أثناء الدراسة في مونبلييه

الماضى كله فى الدراسة والمشاهدة ، لكنى ماعرفش أى حاجة هن  
الحركة الفكرية

لرنود : خطأ كبير . انت لن تكون مفكرا او باحثا لمجرد انك تعرف طريقة  
البحث العلمى ، يجب ان تكون لك خلفية ثقافية واسعة ، وان  
يكون لك رأى ايضا

قاسم : اذن دلنى على الطريق

لرنود يحضر له كتاب

لرنود : هو ده اللى انا ناديت لك عشانه خذ الكتاب ، اقراه كويس وأناقتك  
فيه كتاب عن نظرية التطور اللى بتشير ضجة فى الدنيا كلها . لازم  
تعرف العالم بي فكر فى ايه دلوقت

قاسم يعيد اليه الكتاب

قاسم : اسمح لى يا استاذ انى ارد لك كتابك

لرنود : ليه ؟

قاسم : مش كفاية انى اقرأ ، لايد انى اكون مكتبة كمان ، انا حاشترى  
الكتاب واحتفظ به بعد قرابته

لرنود يمسكه من كتفه باعجاب

لرنود : مؤكدا انى كنت على صواب لما أوليتك اهتمامى  
قطع

نهار/ داخلى

بهو قصر امين بك

مشهد ٤٥

كهرومانه تفتح

كهرومانه : مش قادر تفتح يا سيدى . . .

ترى سيدها امين بك مستندا على سباعى فتكف عن الكلام

سيدى ؟

يدخل سباعى سائدا سيده حتى الكنبه وهو يتأوه

امين : اه . . اه

سباعى : ارتاح هنا يا امين بيه

كهرمانه تجرى على السلم صائحة  
 كهرمانه : يا ستى . . يا ستى . . الحقونا يا ناس . .  
 تطل تفيدة والام قادمين كل من غرفتها  
 الام : فيه ايه يا كهرمانه ؟  
 تفيدة : فيه ايه يا بنت ؟  
 كهرمانه : سيدى امين بك تعبان قوى  
 الام : امين بيه ؟  
 تفيدة : امين بيه ؟ امان يا ربي امان  
 تنزلان مسرعين  
 الام : سلامتك يا امين بيه  
 تفيدة : الف سلامة عليك حبيبى  
 الام : مالك ؟  
 امين : الالام فى كتفى الشمال حيموتنى . . الله  
 الام : حالا حنجيب لك الحكيم  
 قطع

---

مشهد ٤٦      غرفة نوم الام      نهار/ داخل

امين نائم ممدد ، الطيب يكشف عليه ، ينتهى من الكشف  
 الطيب : لا لا لا . . انت صحتك عال يا امين بك المهم بس ماتجهدش  
 نفسك  
 يحمل حقينه ويخرج ، وراءه خادم  
 قطع

---

مشهد ٤٦أ      الصلاة امام حجرة امين بك      نهار/ داخل

الطيب يوجه كلامه للخادم

الطبيب : فى حد هنا ممكن اكلم معاه  
 الخادم : حاضر . . حقول للهانم  
 الخادم يخرج - والطبيب يقف منتظرا ثم يعود الخادم  
 الخادم : اتفضل

قطع

---

مشهد ٤٧                      الصالة العلوية                      نهار/ داخلى

فى المكان الفاصل بين جناح الحريم والرجال ، الام تقف خلف فاصل ارايسك  
 الام : عنده ايه يا باشحكيم ؟  
 الطبيب : للأسف ، القلب حالته سيئة جدا  
 الام : والحل ؟  
 الطبيب : مايعملش اى مجهود ، حتى الكلام لازم يكون بحساب ،  
 والاكل مسلووق ومن غير ملح ، واتنا افوت عليه يوميا  
 الام : ابعت اجيب ابنه من بره ؟  
 الطبيب : لا مافيش داعى . . هاتوا له الدواء ده  
 يعطى الروشة لكهرمانه

قطع

---

مشهد ٤٨                      غرفة قاسم                      نهار/ داخلى

قاسم يقرأ ، يدخل عليه حسن ممسكا لتلغرافا  
 حسن : التلغراف ده جالك دلوقت يا قاسم  
 قاسم : من مين ؟  
 حسن : من اديب اسحق ، بيقول لك لازم تروح له باريس حالا  
 قاسم : يا ترى ايه اللى حصل فى مصر ؟ استر يا رب

قطع

نهاية الحلقة الخامسة

## الحلقة رقم (٦)

نهار/ داخلي

مكتب أديب إسحق بياريس

مشهد/ ١

قاسم أمين يدخل على أديب عليه آثار السفر  
أديب : أخيراً وصلت يا قاسم أفندي  
قاسم : خير يا أستاذ أديب ، تلغرافك قلقتني حصلت حاجة في مصر .  
أديب : حاجات كثير ، لكن مش هو ده اللي باعت لك عشائه  
قاسم : آمال باعت لي ليه ؟  
أديب : الشيخ جمال الدين الأفغاني بعث لي من حيدرآباد يقول . . أنه  
عايز يآلف جمعية سرية للجهاد ضد الإنجليز في مصر وعايز حد  
يبقى مسؤول عنها ، أنا ما فكرتش في حد غيرك  
قاسم : أنا ؟  
أديب : أبوه أنت ، ما أنت عارف إن كل الشيوخ والناس اللي شاركوا في  
الثورة محطوطيين تحت المراقبة يعني لازم اللي يقوم بالمهمة دي  
يكون غير مشكوك فيه وأنت سجلك عند الحكومة ناصع البياض  
قاسم : أنا . . أنا ما عنديش مانع . . هي مهمة صعبة قوى بالنسبة لي ،  
لكن ما أقدرش أناآخر  
أديب : خلاص ، حضر نفسك للسفر على أول مركب  
قاسم : اسمح لي بس أسافر أجيب كتبي وحاجاتي وبعد كده تحت  
أمرك . .

قطع



قاسم أمين مع أديب اسحق في باريس

قاسم يرتب حقائب السفر ، حسن بجواره  
 حسن : طب فهمنى فيه إيه ؟ إيه سبب السفر المفاجئ ده ؟  
 قاسم : قلت لك ما فيش حاجة  
 حسن : مش ممكن . . هو أديب إسحق اللى رحت له باريس ده قال لك  
 إيه ؟  
 قاسم : حيقول لى إيه يعنى ؟  
 حسن : واضح إنك مخبى حاجة  
 قاسم : حاخبى إيه بس ؟  
 يغلق الشنط . حسن يمسك بذراعه  
 حسن : مش حتسلم على سلافا قبل ما تمشى بيتهالى مش أصول تمشى  
 من غير إحم ولا دستور  
 قاسم : طبعا

قطع

سلافا وقاسم يسيران  
 سلافا : حترجع بلدك تانى ؟ أنت مش لسه راجع من هناك  
 قاسم : فيه حاجات مهمة كثير لازم أعملها يا سلافا  
 سلافا : حتنضم للمقاومة ؟  
 قاسم : إيه ؟ ؟  
 سلافا : ما تستغريش ، أنا عارفة إن بلدك بقت تحت الاستعمار  
 البريطانى ، وأكيد الشباب هناك بيحاول يقاوم  
 قاسم : أرجوك يا سلافا ، بلاش نتكلم فى الموضوع ده . . ابقى اكتبى لى  
 سلافا : أكيد  
 قاسم : أنا . . أنا عمرى ما حانسى الأيام الجميلة اللى قضتها معاكم ،

ولا معامله والدك والدتك لى . . من فضلك بلغهم تحياتي  
 سلافا : حابلفهم  
 قاسم : أنا خدت الكتب معايا ، ولو قدرت أجى على الامتحان أكيد  
 حاجى .  
 سلام سلافا  
 يسلم عليها ممسكاً يدها بيديه الاثنين  
 سلافا : سلام  
 يتركها وينصرف . نرى فى عينها دمة تسيل  
 قطع

---

مشهد / ٤                      أحد شوارع موبيليه                      نهار / داخل

قاسم يسير حاملاً حقيبتين ، مع أغنية فى الخلفية توضح ألمه لفراق فرنسا حلم عمره  
 أغنية  
 يأتى صوت حسن من الخلف منادياً  
 حسن : قاسم . . يا قاسم . . استنى يا قاسم  
 يقف ، ينظر للخلف ،  
 قاسم : فيه إيه يا حسن  
 حسن يصل ، وفى يده تلغراف يمد إليه يده بالتلغراف  
 حسن : اتفضل يا سيدى ، التلغراف ده وصل حالاً من أديب إسحاق فى  
 بارس  
 يمد يده لياخذه منه  
 قاسم : فيه إيه التلغراف ده ؟  
 يقرأ  
 حسن : الراجل بيقول لك ما عايش فيه داعى لسفرك ، الحكاية قضيت من  
 غيرك . ما تفهمنى يا ابنى إيه الحكاية  
 قاسم يتنفس الصعداء  
 قاسم : ما فيش حكايات . . لسه فيه نصيب أكمل دراسة الحقوق فى فرنسا



حسن مستغرباً

حسن : هو أديب إسحق ده يعمل إليه بالظبط فى باريس ؟  
قطع

---

مشهد/ ٥      غرفة أم قاسم      نهار/ داخلى

أمين بك يستند على ظهر السرير بثياب البيت وقد تحسنت صحته بجواره تفيدة وأم قاسم  
تفيدة : سلامتك أمين بيه

أمين : الله يسلمك

الأم : الحمد لله . . أنت دلوقت بقيت عال . الحكيم بيقول إنك لازم

تسيب السرير وتمشى

أمين : فعلاً أنا زهقت من الرقدة على فكرة أوعوا تكونوا بعتم لقاسم تقولوا  
له إنى تعبان ما فيش داعى تقلقوه

الأم : لا ما بعتنالوش

ينزل من على السرير

أمين : هاتوا لى البدة

تفيدة : حالاً أفندم

تنهض لتحضر له البدة

قطع

---

مشهد/ ٦      بهو قصر أمين بك      نهار/ داخلى

أمين فى طريقه للخروج الأم تقول له

الأم : تحب سباعى يجى معاك

أمين ينظر لها ليشعرها بأنه ما زال قوياً

أمين : مش للدرجة دى يا هاتم . . أنا برضه لسه شديد

يفتح الباب ويخرج

قطع

سباعي يجلس منخرطاً في البكاء بينما أمين في طريقه للخروج أمين يراه ، يقف عنده  
 أمين : مالك يا سباعي . بتعيط ليه ؟  
 سباعي : أصلهم . . أصلهم  
 أمين : فيه إيه يا سباعي ؟ اتكلم  
 سباعي : حكموا على الشيخ محمد عبده بالنفى للشام ، وحيسافر النهاردة  
 من محطة مصر  
 أمين يتأثر  
 أمين : النهارده ؟

قطع

محمد عبده في شباك القطار ، الناس أمام القطار والعسكر يملأون المكان سعد بجوار  
 القطار أمين يزاحم ليرى محمد عبده ، الناس تبكي  
 أصوات : مع السلامة يا شيخ محمد رينا معاك يا مولانا  
 طالب : عمرنا ما حننساك يا أستاذنا  
 سعد لمحمد عبده

سعد : شايف يا مولانا ، المصريين ما ينسوش رجالتهم المخلصين أبداً  
 جرس المحطة يدق رجل من رجال السكة الحديد . القطار يتحرك ، سعد يتحرك مع  
 القطار أمين بك يلوح للقطار . القطار يبتعد . أمين بك يعود مطأطئ الرأس  
 قطع

جوليا وأمها ماريا الأم تنظر إليها مستفسرة دون كلام - تواصل جوليا

جوليا : تعرفى يا ماما ، الولد حسن ده صعبان على قوى . . رغم إنه كان  
ولد مستهتر ولعى كبير لكن من ساعة الإنجليز ما احتلوا مصر وهو

حزين بجد

ماريا : الحرية غالية يا جوليا

جوليا : تصورى أنه معظم الوقت قاعد فى أوضته ما بيخرجش يدوب

يروح الجامعة ويرجع يقعد فى أوضته لثانى يوم

ماريا : وأنتى مهتمة بيه ليه ؟

جوليا : مش جارنا ؟

ماريا : كان رأيك فيه قبل كده أنه جار رذل

جوليا : ما قلت لك أنه صعبان علي

ماريا : طب قومى روحى له ، حاولى تساعداه على الخروج من حالته . .

قومى

بين الرغبة فى القيام والخجل من أمها تنهض ، وتتجه لغرفته

قطع

---

ليل / داخل

غرفة حسن بمونبلييه

مشهد / ١٠

حسن و جوليا

حسن : بتواسينى يا جوليا ؟

جوليا : رغم كل شيء احنا جيران

حسن : تعرفى أن بلدك كان لها دور فى اللى حصل لبلدى .

جوليا : معقول ؟ اللى احتلت بلدكم انجلترا

حسن : لأن فرنسا سابتها لها ، أكيد اتفقوا سوا

جوليا : السياسة مالهاش قلب ، كل شيء ممكن لكن مش معقول أنت

كمان هتقعد قافل على نفسك طول الوقت .

حسن : مش هايز أشوف حد ولا أكلم حد

بلهجة ذات معنى

جوليا : ولا حتى جوليا

بنظر إليها متعجبًا من التحول  
جوليا : إيه رأيك لو نخرج سوا ؟ أنا عازمك على فسحة فى الغابة يوم الحد  
يهز رأسه كأنما يريد أن يفيق  
حسن : أنا ؟ وأنتى ؟ الغابة

### قطع

---

مشهد / ١١ غابة بفرنسا نهار / خارجى

حسن وجوليا يسيران معًا  
جوليا : بصراحة كنت حاسة إنك واحد ما شافش أكل طول عمره ، وفجأة  
لفى الأكل قدامه فأتسرع  
حسن : اهدئىنى يا جوليا ، أنتى ما تعرفيش بلادنا إحنا فى مصر الحريم  
حاجة والرجالة حاجة ثانية خالص ما حدش يشوف حد . فيه  
ستات عندنا ، وأولهم أمى من ساعة ما تدخل بيت جوزها ما  
تخرجش منه غير لما تموت  
جوليا : معقول  
حسن : شوفى أنتى مستغربة إزاي ؟  
جوليا : مع أن فكرتنا عن الرجالة فى الشرق أنهم عاملين زى هارون  
الرشيده ، حوالهم الجوارى والحريم من غير عدد  
حسن : الجوارى موجودين ، والحريم كمان ، لكن المجتمع مقفول كل  
راجل له حريمه والحريم هناك غلاية قوى ، لا تعليم ولا خروج  
ولا حاجة أبداً عشان كده لما الواحد مننا بيبجى أوروبا جديد موازينه  
بتلخبط خصوصًا لو كان ابن الحاج يوسف  
جوليا : ماله الحاج يوسف  
حسن : لا ، ده حكاية لوحده ، حاككيها لك بعدين  
جوليا : نعرف أنا النهاردة اكتشفت فيك حاجات ماكتشش أعرفها قبل كده  
إيه رأيك لو نبقى صحاب ؟  
يشير بيديه بمعنى أنا وأنتى ؟

جوليا : آه . . بس بشرط  
حسن : شرط إيه ؟  
جوليا : تغير طريقة الجعان اللي ما شافش أكل فى حياته ، بتاعة زمان دى  
حسن : أغبرها

قطع

---

مشهد/ ١٢      بهو قصر أمين بك      نهار/ داخلى

تدخل كهرمانة على الأم ونفيدة اللتين تشتغلان بالإبرة  
كهرمانة : سنى . . سنى . . الحقوا  
الأم : فيه إيه يا كهرمانة  
نفيدة : اتكلمى بنت . . فيه إيه ؟  
كهرمانة : الست جلتار بتولد  
الأم : صحيح يا كهرمانة  
نفيدة : أمان يا ربى ، نفيدة هاتم حييلى لها حفيد ، أمان يا ربى  
يجرون جميعاً لأعلى الأم تتوقف عند أول السلم ، تخاطب كهرمانة  
الأم : كهرمانة . . روى نادى الداية حالاً  
كهرمانة : حالاً يا ست هاتم  
الأم : وخدى معاكى سباعى عشان يشيل كرسى الولادة  
كهرمانة : حاضر يا هاتم  
كهرمانة تنجه للباب ، وتكمل الأم صعودها  
قطع

---

مشهد/ ١٣      غرفة جلتار بقصر أمين بك      نهار/ داخلى

جلتار ترقد على السرير فى حالة ولادة تتألم . حولها الأم ونفيدة  
نفيدة : شدى حيلك جلتار

الأم : زمان كهرماته جايه ومعاها الداية

جلنار تصرخ

جلنار : آآه

تفيدة : البنث تعبانه أفندم

الأم : ما تخافيش يا تفيدة ، البكرية بتأخر شوية فى الولادة

جلنار تصرخ

جلنار : آآه

تفيدة : قللى مش جاينى أشوف البنث بتصرخ أفندم تفيدة هانم حستنى

بره . .

دق على الباب ، بينما تفيدة تتجه للخروج

الأم : طيب يا تفيدة ، اطلعى انتى أهى كهرماته جات ، ومعاها الداية

تفيدة تفتح الباب ، ونرى كهرماته والداية

الداية : صلاة النبى أحسن . . بسم الله ما شاء الله . . قايمه بالسلامة إن شاء

الله

كهرماته تدخل الكرسي . تغلق الباب ، بعد أن تخرج تفيدة

قطع

---

مشهد/ ١٤ صالة الدور العلوى بقصر أمين بك نهار/ داخلى

أمين بك يقرأ القرآن . تفيدة فى حالة سيئة لا تملك إلا أن ترفع يديها للسماء وتدعو

تفيدة : يا رب خليها تقوم بالسلامة يا رب عشان خاطر تفيدة هانم أفندم

تقول لأمين بك

تفيدة : أمين . . أنا مش أعرف قرآن كثير اقرأ بصوت عالى عشان أنا عايزة

أتونس بالقرآن معاك

أمين : حاضر يا هانم . بسم الله الرحمن الرحيم يا أيها الإنسان ما غرك

بريك الكريم ، الذى خلقك فسواك فعدلك ، فى أى صورة ما شاء

ركبك صدق الله العظيم

صوت بكاء الطفل ، تفيدة تتهلل

أمين يحزم

أمين : بدل الرغى ده قومي اطمنى عليها

تفيدة : تمام أفندم . . تمام

قطع

نهار/ داخلي

غرفة جلنار بقصر أمين بك

مشهد/ ١٥

جلنار على سريرها ويجوارها الأم تمسح لها العرق . الداية تقدم المولودة لتفيدة

الداية : سمي

تفيدة : لأ . . أنا مش تحب بنات

الداية : يعنى إيه مش حتجيبى البشارة

تفيدة : ما فيش بشارة داية خرسيس أدب سيس ، ما دام بنت يبقى بشارة

يوك

الأم للداية

الأم : هاتيا . . يا ست أم عباس ، بنت ولا ولد كله نعمة من ربنا

تتناول البنت وتضعها بجوار أمها بعد أن تقبلها . تفيدة وهى غاضبة تتجه لتخرج

تفيدة : بنات بنات . . طظ فيهم افندم البنات حفظهم قليل فى الدنيا . الدنيا

مخلوقه للرجال . . الستات فيها كماله عدد .

الأم : ليه كده ما تكسريش بخاطرها

جلنار تلتفت لبنتها ، وتربت عليها ،

جلنار : يا ما كان نفسى خضر أفندى يبقى موجود معانا دلوقت يا رب فك

سجته ورجعه لنا بالسلامة يا رب

قطع

ليل/ داخلي

بجوار أحد المعسكرات الإنجليزية (فى الصحراء)

مشهد/ ١٦

سور المعسكر السلك عليه جندي إنجليزى يحرسه . رؤوس مجموعة من الشباب وبينهم

سعد الذى يعطى إشارة لأحد الرجال فيتسلل فى الظلام ويهاجم الرجل من الخلف

ويقتله . اثنان يتحركان نحو الأسلاك معهما مقصات لقص السلك . اثنان يدخلان في  
الظلام ، يتجهان نحو مخزن الذخيرة الذى نعلوه قبة وله فتحة تشبه المدخنة ، يلقيان  
قنبلتين محليتى الصنع ، وينسحبان بسرعة ، الطلقات تنهال عليهما من حارس الذخيرة  
أحدهما يسقط ، الآخر يهرب . الانفجارات تنوالى

قطع

مشهد/ ١٧ مكتب المعتمد البريطانى نهار/ داخلى

ضابط إنجليزى يقف أمام اللورد  
ضابط : ماى لورد ، المصريين بيتقموا منا إحنا مش نعرف مين اللى  
بيهاجم . . . مش نعرف أمتى حتتهاجم . . . خسائر كبيرة جناب  
فنصل جنرال  
السير : اقبضو على أى حد تشبهوا فيه ، وخصوصًا الشباب . . اقبضوا  
عليهم بدون رحمة .

قطع

مشهد/ ١٩ غرفة حسن بمونبلييه نهار/ داخلى

يدخل قاسم ممسكًا بصحيفة فرنسية وعليه علامات الانسباط  
قاسم : قريت جرايد النهاردة بأبو على ؟ شفت آخر خبر ؟  
حسن : ما أنت عارف ، أنا ما ليش فى السياسة  
قاسم : أمال حتعرف أخبار الدنيا إزاي ؟  
حسن : المهم . . إيه اللى حصل .  
قاسم : الشيخ جمال الدين الأفغانى حسيب حيدرآباد فى الهند وحيجى  
باريس  
حسن : والخبر ده يهمننا فى إيه ؟  
قاسم : يهمننا جدًا يا بنى آدم . . إحنا دلوقت محتاجين حد زى جمال الدين



الأفغانى يقود الجهاد ضد الإنجليز

حسن : حيڤود الجهاد من باريس ؟ لا يا عم . . ما ينفعش . . الجهاد ده  
عايز ناس قاعدة فى مصر وتعرف إيه اللى يوجع الإنجليز  
قاسم : بالعكس . . فى المرحلة الحالية مش مطلوب القيادة تبقى جوه ،  
لأنها ممكن تقع فى إيد العدو بسهولة  
حسن : خلاص يا عم ، انت أدري ، ييجى جمال الدين باريس ويقود  
الكفاح المهم يبقى فيه حد بيقول للإنجليز لا  
قطع

---

مشهد/ ٢٠ مكتب أديب إسحق بباريس نهار/ داخلى

أديب يدخل ووراء جمال الدين الأفغانى

أديب : نورت باريس يا شيخ جمال الدين  
الأفغانى : شكرًا يا أستاذ أديب قبل أى شىء لى عندك بعض المطالب  
أديب : أوامر يا مولانا  
الأفغانى : أولا تؤجر لى مكانًا يصلح مكتبًا لإصدار جريدة وقاعة  
للإجتماعات  
أديب : مكتبى تحت أمرك  
الأفغانى : أنا أحب الاستقلال  
أديب : حاضر يا شيخ أفغانى  
الأفغانى : وتكتب للشيخ محمد عبده فى الشام تدعوه للحضور إلى  
باريس ، كى يكون سندی فى الجهاد  
قطع

---

مشهد/ ٢١ فناء كلية حقوق مونبلييه نهار/ خارجى

سلافا تقف على باب الكلية ، تنظر فى ساعتها ومن الواضح أنها تنتظر فى ضيق . يأتى  
أوجست

أوجست : مستنية حبيب القلب ؟

محذرة

سلافا : أوجست

أوجست : بالذمة مش مكسوفة

سلافا : ما أظنش أنى بأعمل حاجة تكسف

أوجست : بقى لما تنزلى عن وضعك كبتت فرنساوية وتعرفى ولد زى

قاسم ده ، اللى جاى من الشرق المتخلف ، ما تيقيش عملتى حاجة

تكسف ؟

سلافا : قلت لك قاسم ده مصرى ، من البلد اللى علمت الدنيا كلها

الحضارة

أوجست : للأسف ، ما فيش فايدة فيكى ، انتى وصمة فى جبين فرنسا

سلافا : أوجست ، أنت اتجاوزت حدك ، وأنا مش حاسكت على كلامك

ده

تتصرف فى عصبية إلى داخل الكلية . يقول بعد انصرافها

أوجست : الشكوى ، حيلة الضعفاء ، مش مهم خيلها تشنكي

قطع

نهار/ داخل

مكتب لرنود

مشهد/ ٢٢

لرنود وأمامه سلافا وأوجست الذى يقف متحدياً

لرنود : أوجست . . المرة ده لايد من عقابك

أوجست : المفروض تعاقبها هي

لرنود : هي ما اعتدتش على حرية حد أنت اللى اعتديت على حريتها إزاي

أنت بتدرس القانون ؟

أوجست : القانون فى نظرى وسيلة يحمى الضعفاء أنفسهم بيها الإنسان

القوى هو الإنسان اللى يكسر القانون

لرنود : لولا إني بأعامل معاك كأب كنت رفدتك من الكلية تماماً . . إنما

أنا حاكتفى بفصلك لمدة أسبوعين

مشيرًا للباب

اتفضل

أوجست ينظر لسلافا متحدثًا ويخرج رافعًا رأسه . لرنود لسلافا  
لرنود : للأسف يا سلافا ، الأنواع التي زى أوجست كثرت في أوروبا من  
يوم داروين ما قال البقاء للأصلح والبعض قال البقاء للأقوى لكن  
تأكدى أنه لو الولد ده رجع لمضايقتك تانى حيكون عقابه شديد .  
قطع

نهار/ داخلي

هو قصر أمين بك

مشهد/ ٢٣

تدخل كهرمانة مسرعة من الباب الرئيسى

بينما أمين يبه يشرب القهوة

كهرمانة : يا سعادة البيه . . يا سعادة البيه . . ألف مبروك يا بيه

أمين : فيه إيه يا كهرمانة ؟

كهرمانة : خضر أفندى ، افرجوا عنه وجاى ورايا أه

بفرح

أمين : طب اطلعى حالاً بلغى جلنار

تزغرد وتجرى لأعلى بينما يأتى خضر من الباب ، يسرع إليه أمين بيه ليحضنه

أمين : خضر أفندى

خضر : أمين بيه

أمين : حمد الله على السلامة يا ابنى

خضر : الله يسلمك

أمين : اطلع الأول اطمئن على مراتك وبنتك وبعمدين نتكلم

يأتى صوت كهرمانة من أعلى

كهرمانة : أهو يا ستى واقف قدامك أه . . هو أنا حاضحك عليكى ؟

نرى جلنار غير مصدقة بينما كهرمانة بجوارها . تصيح جلنار

جلنار : خضر أفندى

تسقط جلنار مكانها وتسندها كهرمانة التى تصيح

كهرماتة : ألحقونا يا ناس ، البنية وقعت من طولها  
يسرعان إليها

### قطع

مشهد/ ٢٤      غرفة جلنار بقصر أمين بك      نهار/ داخل

خضر أفندي بجواز زوجته ، يحمل الطفلة ويقبلها بحب  
خضر : سميتها إيه ؟  
جلنار : إفراج . . كنت حاسة ان وشها حيكون حلو يفرجوا عنك  
يتغير وجهه

جلنار : مالك يا خضر أفندي ؟ اتغيرت ليه ؟

خضر : يا ريتهم ما افرجوا

جلنار : ليه كده ؟ بعد الشر

بتأثر

خضر : أنا أترفدت من الجيش يا جلنار

تتجاوز التأثير

جلنار : أترفدت ؟

خضر : ما هو ما أكتافوش بسجن كل اللي اشتركوا مع عرايى بيه - ده

رفدونا كلنا من الجيش

جلنار : ولا يهكم . . والدى أمين بيه . . ممكن يتوسط لك عند صحابه

من كبارات البلد يشوفولك وظيفة ثانية

خضر : يا ريت يا جلنار

### قطع

مشهد/ ٢٥      مكتب مصطفى فهمى فى الوزارة      نهار/ داخل

يبدأ المشهد بلقطة لمصطفى فهمى يقول

مصطفى : مستحيل . . أنا لا يمكن أساعد حد من العربيين . . دول  
بيكرهوا الأتراك عمى . . عايزين يبقوا هم أسياد البلد واحنا  
مالناش قيمة

أمين : يا مصطفى باشا ده جوز بتتي  
مصطفى : يا أمين بيه غلط من الأول إنك تجوز بتتك لواحد فلاح  
أمين : يا مصطفى يا خويا ما أنت عارف الخلاف اللي بينا وبين المصريين  
إلا أن عدد كبير من المصريين دلوقت متجوزين بنات أترك  
مصطفى : غلط ، بعد شوية حندوب فيهم ، مصر حتبلعنا وما حدش  
حيمرف التركي من الفلاح

أمين : يا مصطفى باشا اوعى تنسى إن عندك بتتين ، وجايز أنت نفسك  
تجوزهم لمصريين

مصطفى : مستحيل . أنا أجوز بناتي للفلاحين ؟  
أمين : على كل حال أنا قصدتك ، إذا حبيت تخدمنى يبقى كتر خيرك ،  
وإذا ما حبيتش على كيفك سلام عليكم

ينهض ويخرج

مصطفى : حد يجوز بتة لفلاح ؟ معقول الكلام ده ؟  
قطع

---

مشهد/ ٢٦ بيت سعد (المدخل) نهار/ داخل

سعد فى بيته يقرأ كتاباً . دق شديد على الباب ، سعد بيدو عليه التساؤل . الخادم يفتح ،  
يدخل البوليس ، يزيح الخادم

ضابط : وسع كده

الجنود يهاجمون الغرف ، يقومون بالتفتيش . الضابط لسعد

ضابط : أنت سعد زغلول ؟

سعد : أبوه أنا . . أى خدمة ؟

ضابط : أنت مقبوض عليك

سعد : تقبض على رئيس قلم قضايا الجيزة ؟ إزاي ؟

ضابط : من غير مناقشة . . اتفضل معايا

سعد : طب أعرف إيه تهمني

ضابط : حترعرف فى التحقيق

الخادم لسعد

الخادم : إيه الحكاية يا سعد أفندي

سعد : الحكاية واضحة . . بلغ العيلة فى البلد ، خصوصاً أخويا الشناوى

أفندى . . ابعت له تلفراف

الخادم : حاضر . . حابله

جنديان يتأبطان سعدًا يسير معهما باعتزاز

قطع

نهار/ خارجى

مدرج بكلية الحقوق بمونبلييه

مشهد/ ٢٧

الأولاد ينصرفون ، سلافا تقف مع حسن

سلافا : مش ممكن يا حسن ، الامتحان فاضل له يومين وقاسم لسه فى

باريس

حسن : مش عارف أعمل إيه ، لو فيه وقت كنت رحت له .

سلافا : أحسن حل نبعت له تلفراف

حسن : فعلاً ، ده الحل الوحيد

يتجهان للباب يدخل قاسم

قاسم : رابحين فين ؟

سلافا : قاسم ؟

حسن : نشفت دمتا يا أخى . . معقول الغياب ده ؟

سلافا : نسيت إن وراك امتحان ؟

قاسم : على مهلكم على شوية . .

حسن : تقدر تقول لى حتدخل الامتحان إزاي ؟

قاسم : ما تخافوش على أنا ذاكرت الكتب المقررة تمام ، وحانجع إن

شاء الله وأجيب تقدير كويس كمان

حسن : طيب يا عم ربنا يقويك  
قطع

مشهد ٢٨ قاعة بقصر الأميرة نازلى نهار/ داخلى

نازلى تجلس وفى يدها كتاب إنجليزى . يدخل الخادم وينحنى ، تنظر إليه متسائلة عما يريد يقدم لها بطاقة

الخادم : اتفضللى يا سمو الأميرة

تقرأ البطاقة ، تندesh

نازلى : معقول ؟ السير ايفلين المعتمد البريطانى بنفسه ؟

الخادم : بنفسه يا أفندم

ترك الكتاب ، تسير للباب مرحة

نازلى : أهلاً أهلاً جناب اللورد القصر نور اتفضل

يقبل يدها . يدخل

السير : أولاً : - اكسيكيوزمى أنا باعتذر عن الحضور بدون موعد ، لكن

أنا مش كنت عايز حد يعرف بالزيارة ده

نازلى : أهلاً بيبك على كل حال

السير : ثانيا : - أنا عارف كويس ، عارف إنك عشت فترة طويلة فى

لندن ، قابلتى جلالة ملكة بريطانيا العظمى ، وإنك بتتمنى بعقلية

أوروبية

نازلى : من فضلك جناب اللورد ، ما فيش داعى للمقدمات الطويلة ، أنا

عارفة الإنجليز كويس ، وعارفة انهم عمليين

السير : Exactly ده كلام صحيح ، عشان كده أنا حادخل فى الموضوع

Directly ، بصراحة شديدة أنا عاوزك تتعاونى معايا

نازلى : فى إيه ؟

السير : فى تعريفنا بناس معتدلين ممكن تتعاون معايم لتحسين حال مصر

نازلى : جناب السير

بمعنى لا تضحك على

السيرايڤلين : أرجوك .. صدقيني Please trust me أنا عايز أفتح  
مدارس ، أعلم الناس ، أنقل حضارة أوروبية ، لكن ده مش ممكن  
أبدأ من غير تعاون مصريين  
نازلى : أنتم خليتم حد عشان تتعاونوا معاه ؟ أنت لميتوا كل الناس اللى  
بيفهموا فى البلد وحطيتوهم فى السجون أو نفيتوهم  
السير : أنا موافق تمامًا على كلامك ، لكن دى كانت اجراءات لحماية  
دخولنا مصر دلوقت الأمر مختلف .. وأرجو كى .. اعتبرى  
نفسك من دلوقت مستشارتى  
نازلى : مقابل إيه ؟  
السير : مقابل إنك تبقى رأسك برأس خديوى توفيق ، اللى اغتصب  
العرش من والدك  
نازلى : أدبى فرصة أفكر  
السير : اول رايه .. فكرى على مهلك all right I am waiting  
قطع

مشهد ٢٩ صالة شقة خضر وجلنار نهار/ داخلى

خضر يجلس فى حالة نفسية سيئة بينما جلنار تحمل ابنتها  
جلنار : وآخر الزعل يا خضر ؟  
خضر : آمال عايزانى أفرح يا جلنار ؟ بعد ما كنت من رجالة عرايى ألقى  
نفس عاطل وقاعد فى البيت زى الستات ؟  
جلنار : اسمع يا خضر ، أنت ليه مصر تبقى موظف فى الحكومة ؟  
خضر : دى الحاجة الوحيدة اللى اعرفها ، قيمة ، ومرتب ثابت ،  
وترقيات .. المثل بيقول إذا فاتك الميرى اتعمرغ فى ترابه  
جلنار : أنا مش موافقة على المثل ده  
خضر : يعنى إيه ؟  
جلنار : بص يا خضر ، بصراحة أنا أقدر أروح لأم الخديوى وأطلب منها  
تنوسط لك وتشوف لك وظيفة ، لكن تفتكر ان هو ده الحل ؟



خضر : أكيد

جلنار : لا ، الحل مش فى وظائف الحكومة ، الحل فى العمل الحر ، ليه  
ما تشوفش شغلانة لنفسك بعيد عن الحكومة . احنا معانا قرشين  
من قبل ما تسيب الخدمة ، وأنا عندي شوية ذهب مش بطالين ،  
يعنى تقدر تبدأ

خضر : أبداً بإيه ؟ أنا ما أفهمش غير فى العسكرية ؟

جلنار : العسكرية دى فيها إيه ؟

خضر : فيها أكل ولبس وسلاح وخيل

جلنار : ما تشتغل فى حاجة من دول ، وأنا أكلمك لك حد من سكان القصر  
يوصوا عليك . . مش تبقى موظف ؟

خضر : طيب اسمعى ، إيه رأيك لو تكلمهم إني أورد خيل للجيش أنا  
أفهم فى الحكاية دى كويس

جلنار : من بكرة حازور القصر وحتشوف أنا حاسم إيه

قطع

---

مشهد ٣٠ مكتب السيرايڤلين بيرنج المعتمد البريطانى ليل / داخل

نازلى تجلس على أحد المقاعد فى صالون المكتب والمعتمد البريطانى يقدم لها بومبونيرة  
لتأخذ شيئاً من الحلوى

السير : Please فكرتى ؟ ووصلنى لإيه ؟

تهز رأسها

نازلى : وافقت

السير : كنت واثق إنك ست عاقلة

نازلى : على فكرة ، أنا ما وافقتش عشان تبقى رأسى برأس الخديوى توفيق  
ابن عمى . . أنا وافقت عشان مصلحة بلدى العقل بيقول أنه من  
مصلحة البلد أنه يكون فيها جناح معتدل يتضاهم معاكم ويحاول  
يحقق مصالح الناس . أنا عارفة ان التاريخ بعد كده مش  
حيرحمنى ، وحيقول على إني اتعاملت مع الناس اللى احتلوا

بلدى لكنى رغم هذا حاتعاون معاكم . . لأن مصلحة البلد أهم من  
مصلحتى الشخصية

السير : ده موقف ما ياخدوش غير ست مثقفة وجريئة زيك  
يحنى لها رأسه

السير : تحيانى لشجاعتك برنيس نازلى ولحبك لبلدك  
نازلى : بالمناسبة فيه واحد أرجو الإفراج عنه  
السير : اعتبريه أفرج عنه مهما كانت تهمته اسمه إيه برنيس ؟  
نازلى : سعد . . سعد زغلول

قطع

---

مشهد ٣٠ مكرر      أمام باب سجن مصر      نهار/ خارجى

يبدأ المشهد بالشمس تسطع فى السماء ، ثم تنزل الكاميرا لترى بوابة السجن وهى تفتح  
وسعد زغلول يخرج . ينظر نحو الشمس التى تتألق فى السماء ويسير مشدوداً  
قطع

---

مشهد ٣١      فناء كلية الحقوق بمونبلييه      نهار/ خارجى

الطالبة يشاهدون نتائجهم . قاسم قادم هو وسلافا ، يعترض أوجست طريقه  
أوجست : جاي تشوف النتيجة ؟ للأسف ، الأول زى السنة اللى فاتت .  
أنا متأكد أن الأستاذ لرنود يساعدك

قاسم : شكراً

يتركه وينصرف ، يتبادل أوجست النظرات الحادة مع سلافا التى تنظر إليه بازدراء ثم  
تنصرف وراء قاسم

سلافا : قاسم ، شوف لى أنت النتيجة . أنا باتفاائل بيك

قاسم : حاضر

يبحث عن اسمها

قاسم : مبروك يا آنسة سلافا ، نجحت بتقدير Bien ( بيان )

تقفز بفرحة

سلافا : هيه شوف كمان نتيجة حسن

يا ترى صوت حسن من الخلف

حسن : ما حدش يشوف لى حاجة . . أنا حاشوف نتيجتى بنفسى

يبحث عن اسمه

حسن : نجحت أنا كمان . . والله ده زمن المعجزات

يضحكون يقول لقاسم

حسن : على فكرة ، فيه واحد فات عليك بيقول لك أن الشيخ محمد عبده

بيجهز نفسه للحضور إلى باريس . وغالبًا حيوصل فى يناير

قاسم : يا الله . ده الراجل ده واحسنى بشكل . أنا حاعد الأيام والليالى لحد

يناير

قطع

نهار / خارجى

مقهى فى باريس

المشهد ٣٢

يجلس الأفغانى ، محمد عبده ، أديب إسحق ، قاسم أمين وآخرون على المقهى . محمد

عبده يربت على قاسم أمين بحب

محمد : وحشتنى يا قاسم أفندى والله . .

قاسم : إنت أكثر والله يا مولانا

محمد : يا مين يجيب لنا سعد زغلول دلوقت عشان تكتمل الصحبة

قاسم : إن شاء الله تكمل فى مصر

محمد عبده يتنهّد بحرقة

محمد : آه . . يا مين يرجعنى مصر ثانى . . لكن معلش ، كل شىء بأوان

الأفغانى : اتركوا السلامات يا شيخ محمد وتعالوا نتكلم فى المفيد

محمد : اتفضل يا مولانا الشيخ الأفغانى

الأفغانى : بل أريد أن اسمع منك كيف ترى خطتنا للجهاد

محمد : فى رأى أن المشكلة فى مصر وفى كل الدول الإسلامية تكمن فى

أن ملوكنا لا يعرفون كيف يحكمون بلادهم حكماً صالحاً . لذلك  
فأنا أرى أن تكون لنا خطتان ، الأولى طويلة المدى تتعلق بتربية  
حكام المستقبل ، والثانية عاجلة .

الأفغانى : أبوه يا شيخ محمد . . العدو الآن فى مصر . . نحن نريد شيئاً  
عاجلاً نواجهه به . . نريد تحريك الناس ضده حتى لا يظن أن  
الأمور استقرت له

محمد : واضح أنك فكرت يا مولانا فى الموضوع وعندك اللي تقوله .  
اتفضل قول

الأفغانى : لقد أنشأت بالفعل حركة سرية لمقاومة الإنجليز فى مصر . .  
وأرى أن نركز فى هذه الفترة على مقاومة الإنجليز حتى يدركوا  
استحالة استمرارهم فى البلاد

أديب : كلام معقول ، لكن إزاي حنمد جسور الصلة مع المجاهدين فى  
مصر

الأفغانى : مستصدر مجلة نشترك فى تحريرها أنا والشيخ محمد عبده ، أنا  
أقدم له المعانى وهو يكتبها بقلمه العربى الرصين  
قاسم : والمجلة دى حتموها إيه يا مولانا ؟

الأفغانى : العروة الوثقى ، تيمنا بالآية الكريمة التى تقول «ومن يسلم وجهه  
إلى الله وهو محسن فقد استمسك بالعروة الوثقى وإلى الله عاقبة  
الأمور»

محمد : « صدق الله العظيم » أنا موافق

الأفغانى : على بركة الله ، يبقى نبدأ العمل  
أديب : بالمناسبة يا شيخ محمد ، أنت ما تعرفش اللغة الفرنساوية ،  
ولذلك اقترح أن قاسم أفندى أمين يلازمك كسكرتير لحد ما تتعلم  
هذه اللغة

محمد : هنعطله عن دراسته

قاسم : ما فيش عطله ولا حاجة . أنا فعلاً ناوى الازمك طول فترة وجودك  
فى باريس

محمد : يا قاسم أفندى

قاسم : ما تحاولش يا مولانا . . ادبنى فرصة اشترك فى الجهاد ولو بأقل

محمد : ما دمت شايك أنك مش هتعتل نفسك خلاص ، أنا موافق  
قطع

ليل/ داخلي

قاعة بمقر العروة الوثقى بباريس

مشهد ٣٣

يبدأ المشهد بلافتة على الحائط عليها الآية الكريمة : - « بسم الله الرحمن الرحيم » . ومن  
يسلم وجهه إلى الله وهو محسن فقد استمسك بالعروة الوثقى وإلى الله عاقبة الأمور .  
صدق الله العظيم » . تتحرك الكاميرا لثرى الأفغانى ومحمد عبده وقاسم وآخرين (ليس  
منهم أديب إسحق) . الأفغانى يقول

الأفغانى : العروة الوثقى كما قلت من قبل جمعية سرية ، ولذلك فكل

عضو لابد أن يقسم على قسم محدد . . هل أنتم جاهزون للقسم ؟

محمد عبده : تتفضل يا استاذ اتفضل يا مولانا

صوت : قول وإحنا نقول وراك

يقرأ ويرددون وراءه

الأفغانى : أقسم بهيبة الله وجبروته الأعلى ، أن لا أقدم إلا ما قدمه الدين ،

ولا أؤخر إلا ما أخره الدين ، ولا أسعى قدماً واحداً أنوهم فيها

ضرراً يعود على الدين ، جزئياً أو كلياً ، وأن لا أخالف أهل العقد

الذين ارتبطت معهم بهذا اليمين فى شىء يتفق رأى أكثرهم

عليه ، وعلى عهد الله وميثاقه أن أطلب الوسائل لتقوية الإسلام

والمسلمين ، عقلاً وقدرة ، بكل وجه أعرفه . آمين .

قطع

ليل/ داخلي

سفرة شقة سلافا

مشهد/ ٣٤

سلافا تضع أمامها الكتاب وتسرح . أمها تلاحظ ذلك وهى تجلس لتقرأ الصحيفة  
سوزى : سلافا . . مالك ؟

سلافا : ما فيش  
سوزى : لا ، دانتي من ساعة ما قعدتي وانتى مش هنا . . سرحانة فى إيه ؟  
سلافا : قلت لك ما فيش حاجة ماما  
سوزى : طب قولى لى ، قاسم لسه مسافر ؟  
سلافا : أيوه  
سوزى : ما اتصلش بيكى ؟  
سلافا : لا

سوزى : واضح أن قضية بلده شاغلاء  
سلافا : أنا مقدرة موقفه ، لكن يسيب كل حاجة كده ؟ مش معقول .  
ماما . . أنا بأفكر أسافر له ، حتى أوصل له المحاضرات التى فاتته  
بالمرة

سوزى : سافرى له  
دق على الباب  
سوزى : ده لازم بابا  
وهى تنجى للباب  
سوزى : طيب يا جورج  
تفتح لتجد قاسم ، تفاجأ  
سوزى : قاسم . . أهلا بـيك  
سلافا تجرى نحوه  
سلافا : قاسم . . إيه اللي أخرك كده فى باريس انت ناسى انك مرتبط  
ولا إيه ؟

قاسم : لا طبعا مش ناسى . . انتى اللي ناسية انى واقف على الباب  
يدخلان ، تغلق الباب ، يجلسان  
سوزى : حاسم لکم حاجة تشربوها  
تدخل نحو المطبخ ، سلافا لقاسم  
سلافا : قاسم ، وحشتنى . . وحشتنى قوى  
قاسم يرتبك  
قاسم : هه . . ا . . ا . . ا . .  
يسحب يديه بخجل

سلافا : إيه ده ؟ أنت لسه بتتكشف زى الولاد الشرقيين ؟  
قاسم : الحياء شعبة من شعب الإيمان  
سلافا : لكن البنات تحب الولد الجري  
قاسم : معلش يا سلافا ، انتى عارفة ان القيم مختلفة  
سوزى تأتى بصينية عليها فنجنانان

سوزى : عملت لكم حاجة سخنة أهه عشان تدفيكم

قاسم : Merci

سلافا تنهض

سلافا : لحظة واحدة أجيب لك المحاضرات اللي فانتك

تدخل غرفتها . . قاسم يخاطب نفسه

قاسم : يا سلام لو البنات فى مصر يتعلموا زى سلافا ، يبقى عندهم ثقة فى

نفسهم زيتها ، ما تبقاش حاسة أنها جسد وبس . . لكن حاقول

إيه . . إحنا فىن وفرنسا فىن

تأنى سلافا حاملة الكشاكيل

سلافا : اتفضل يا سيدى ، كل دى كراريس كتبت لك فيها

قاسم : أنا شاكر جدًا يا سلافا . .

قاسم : مش عارف أشكرك إزاي

تضع أصبعها على فمه ، وتقول وهى تداعبه

سلافا : ما تتكلمش كثير ، خد يا للاكراريسك وروح ذاكر ، ولا عايزنى

كمان أشرح لك

بيتسم وهو ينهض

قاسم : لا ما تخافيش على . . أنا شاطر فى المذاكرة

سلافا : حنساقر تانى ؟

قاسم : ضرورى . . ما أقدرش أسيب الشيخ محمد عبده لوحده

سلافا : حنيجى تانى امتى ؟

قاسم : علمى علمك . . أورفوار

سلافا : أورفوار

لسوزى وهو يتجه للباب مسلماً عليها

قاسم : أورفوار يا طنط

سوزى : مع السلامة  
 يخرج ويغلق الباب . سلافا تجلس مكانها ، أمها تسألها برفق  
 سوزى : بتجيبه ؟  
 تهز رأسها بالإيجاب  
 سوزى : اللى تحب واحد لازم تقدر ظروفه ، وتساعد  
 سلافا : عارفة يا ماما . . عارفة  
 قطع

نهار / خارجى

قهوة بياريس

مشهد / ٣٥

قاسم ومحمد عبده . . قاسم يغلق الكراس  
 قاسم : كده خلصنا درس اللغة الفرنسية  
 محمد عبده غير مبتهج  
 محمد : الحمد لله  
 قاسم : مالك يا مولانا ؟ شكلك متضايق  
 محمد : الإنجليز مزنقين قوى على مجلة العروة الوثقى . مش عارفين  
 تدخلها مصر ولا نوزعها كما ينبغي  
 قاسم : غريبة . . الأوروبيين فى بلادهم بيدوا الحرية لكل الآراء ، حتى  
 لو كانت ضد نظام الحكم بتاعهم ، بينما فى المستعمرات بيمنعوا  
 أى معارضة  
 محمد : شىء طبيعى أنهم يكيلوا بمكيالين .  
 قاسم : تعرف يا مولانا رغم كل شىء أنا معجب بالمجتمعات الأوروبية  
 وما فيها من حرية . . يا ترى حبيجي يوم تكون فيه بلدنا بتتمتع  
 بالحرية دى ؟ كل واحد يؤمن بما يشاء ، ويعبر عن رأيه بدون  
 خوف ، ويختلف مع النظام القائم بدون ما يتهموه بالخيانة .  
 ممكن نوصل لده ؟  
 محمد : أكيد حنوصل له ، لكن مش وإحنا شعب جاهل ، ضعيف ،  
 مستعمر



يأتى صوت الأميرة نازلى من بعيد دون أن نراها

نازلى : أوه ، أمبوسيل ، شيخ محمد عبده فى باريس ؟

يلفتان نحوها ، يريانهما ، محمد عبده يتהלل

محمد : أهلاً بالأميرة بنت الأمرا

قاسم يبقى مكانه ، محمد عبده يسير إليها تسلم عليه

نازلى : إزيك شيخ محمد ، زعلت جدًا لما عرفت خبر النفى

محمد : رب ضارة نافعة ، الحضور إلى باريس أفادنى إفادة كبيرة

نازلى : أنا من الأول رأيى فى الخديوى توفيق أنه لا يصلح للعرش .

صدقتونى

يهز رأسه

نازلى : على فكرة ، الإنجليز بعنوا راجل مندوب لهم فى مصر من

أصدقائى ، أنا حاقنعه يجيب لك عفو

بشئ من السخريه

محمد : من الإنجليز ؟

نازلى : شيخ محمد ، الإنجليز دلوقت هم أصحاب السلطة ، خلينا

منطقيين

يطاطع رأسه

محمد : قد إيه المنطق ده مر

نازلى : لكننه حقيقى

محمد : للأسف . . المهم ، تعالى لما أعرفك على شاب من الجيل

الجديد

يسيران لقاسم ، يقدمه لها

قاسم أمين بيدرس قانون فى مونبلييه

نازلى : Enchanté

ينحنى انحناؤه خفيفة وهو يسلم عليها

محمد : الأميرة نازلى هانم أفندى ، بنت عم الخديو

قاسم : أهلاً وسهلاً سمو الأميرة

نازلى : أوه ، نو ، شيخ محمد ، مش حيتفع السلام ده ، انت لازم تجيب

قاسم الصالون بتاعى ، أنا حاقعد فى باريس شوية ومن دلوقتى

بأدعيتكم للمصالون أنت عارف انى مهمة جدًا بالشباب

محمد : إن شاء الله

نازلى لقاسم

Excusez - moi monsieur Kassem : نازلى

لمحمد عبده

نازلى : تحياتى يا شيخ محمد . . انتظروا منى رسالة

تتصرف

قاسم : هى دى الأميرة نازلى فاضل ؟

محمد : سيدة لكن أفضل من رجال كثير الواحد بيقابلهم

قاسم فى صمت لنفسه

قاسم : أتاى سعد زغلول لبس بدلة وراح يتعلم فرنساوى

محمد : سرحت فى إيه ؟

قاسم : ولا حاجة

محمد : المؤسف أن ما فيش فى مصر غير نازلى فاضل واحدة . لو كان

كثير من الستات فى مصر زيها وضع البلد بقى غير الوضع

قاسم : أنت اللى بتقول كده يا شيخ محمد ؟

محمد : أبوه

قاسم : رغم سفورها ؟

محمد : سفور المرأة الأوروبية ليس دليلاً على عدم عفتها . ومع هذا ، ليه

نخلى نظرتنا للخارج فقط ، ليه ما نبصش للدخل ، العقل ،

الإطلاع ، حب الوطن ، الجرأة فى الحق ، الثقة فى النفس . . ليه

نسب ده كله ونبص للمظهر فقط ؟

قاسم : كأنك بتقرا اللى جوائى

محمد : ومع هذا ، لماذا لا نحاول أن نفكر فى نهضة المرأة المصرية دون

أن تخلع الحجاب . . المهم أن تنهض المرأة

قاسم : أحسنت يا مولانا والله . . أحسنت

قطع

حسن يسير مع سلافا وجوليا ممسكاً في يده بورقة فيها العنوان . . يقول لها  
 حسن : أحسن حاجة نسأل حد .  
 سلافا : ثاني ؟ سألنا طوب الأرض لحد دلوقت  
 جوليا : تسأل عن إيه ؟ من المؤكد أن هو ده الشارع يبقى مش فاضل غير  
 ندور على نمرة البيت  
 حسن : معلش يا جماعة ، أنا أصل جاي من مدينة ما حدثش بيتوه فيها من  
 صغرها ، وباريس ده أصابتنى بالهلع  
 تأخذه منه  
 جوليا : وريني العنوان ده تعالوا ورايا  
 تبحت عن رقم المنزل ، تصل لبيت معين  
 جوليا : أهو . . هو ده البيت  
 يدخلون

### قطع

قاسم أمين يجلس في الصالة على مكتب ، يقرأ في أحد كتب القانون ، يدخل عليه حسن  
 وسلافا وجوليا  
 حسن : صباح الخير  
 سلافا/ جوليا : بونجور  
 قاسم يقفز فرحاً  
 قاسم : العصابة كلها ؟  
 يحتضن حسن ، يسلم على البنيتين  
 قاسم : إزيك يا جوليا . . إزيك يا سلافا  
 جوليا : بخير  
 سلافا : أنت اللي إزيك . . ، نسيت أن لك ناس تعرفهم في مونتيليه



حسن وسلاف في فترة الدراسة بمونبلييه

قاسم : أنا أقدر ؟  
حسن : إحتنا يا سيدى جيتنا نجيب لك المذكرات دى أولاً  
يشير لمذكرات تحملها سلافا ، فنقوم بتقديمها لقاسم  
سلافا : أفضّل يا سيدى  
قاسم : شكراً يا سلافا . . واضح إنى بأتمبك أكثر من اللازم  
سلافا : وبعدين ؟  
حسن : ثانياً وده الأهم .  
جوليا : ثانياً جايين نأخذك معنا فى زيارة لقصر فرساي  
سلافا : عندك مانع ؟  
قاسم : لأطبعا ، بس اسمحوالى استأذن من الشيخ محمد لأننى سكرتيره  
ومت ترجمه وصعب قوى أسببه من غير ما أقول له  
سلافا : طبعاً  
جوليا : أفضّل استأذنه  
حسن : وخدنى معاك عشان أسلم عليه  
قطع

---

مشهد/ ٣٨ قصر فرساي نهار/ خارجى

لقطة عامة ، مع صوت سلافا  
سلافا : ده قصر ملوك فرنسا قبل العصر الجمهورى . . القصر دلوقت  
اتحول لمتحف


مزج

---

مشهد/ ٣٩ داخل قصر فرساي نهار/ داخل

الكاميرا تستعرض بعض الآيات الفنية . من تماثيل ولوحات ونقوش خلال جولة قاسم  
وسلافا وحسن وجوليا

قطع



قاسم أمين وحييته سلافا في فترة الدراسة بمونبلييه

قاسم وسلافا وحسن وجوليا على منضدة وأمامهم الطعام . . الكل يأكلون عدا قاسم الذى يكتب فى نوتة

سلافا : يتكتب إيه ؟

قاسم : تسمى ؟

تهز رأسها بالإيجاب ، يقرأ

قاسم : لعل أكبر الأسباب فى انحطاط الأمة المصرية تأخرها فى الفنون الجميلة كالتمثيل والتصوير والموسيقى . هذه الفنون ترمى جميعها على اختلاف موضوعها إلى غاية واحدة ، هى تربية النفس على حب الجمال والكمال ، فإهمالها هو نقص فى تهذيب الحواس والشعور

قطع

الصالون فيه مصريون ، أتراك ، أجنب ، شباب ، شيوخ ، الخ نازلى لمحمد عبده

نازلى : فى صاحبك اللى كان معاك فى القهوة يا شيخ عبده . . مش قلت لك إنى مهتمة بالشباب ؟

محمد : قاسم ؟ اعتذر فضل أنه يقعد يذاكر لأن امتحاناته قربت

نازلى : خسارة ، كنت أحبه يكون معنا

أديب : المهم ياسمو الأميرة ، إيه الموضوع اللى تحبى تناقشه النهاردة فى صالونك العامر ؟

نازلى : موضوع جريئ لكنه مهم

أديب : اللى هو إيه ؟

نازلى : العلاقة مع الإنجليز فى مصر

الأفغانى : ليس بيننا وبين الاحتلال سوى كراهيته والثورة ضده والتحرير

عليه

نازلى : ربما يكون هذا الرأى رأيك وحدك يا شيخ جمال الدين . .  
أديب : الشيخ جمال الدين الأفغانى هو لسان حال الثورة ضد المستعمر  
نازلى : وأنت . . إيه رأيك يا شيخ محمد  
محمد : أنا أكره الاحتلال ، لكن لا أخفى عليكم أنى أرى الكراهية وحدها  
مجرد موقف سلبى . . الشئ الوحيد الذى يشغلنى الآن هو : هل  
يمكن لأصحاب البرنامج الإصلاحى الهادى أن يواصلوا عملهم  
رغم وجود الإنجليز ؟

الأفغانى : أهذا كلام يا شيخ محمد ؟

محمد : مصر بلدى يا شيخ جمال الدين ، ويستحيل أن حد يحبها أكثر  
منى . . لكن خليتنا نتعامل مع الواقع وليس مع المثال . . مصر الآن  
محتملة ، السبيل للتحرر والنهضة ليس هو الثورة فقط ، لكنه  
التعليم أيضاً والتربية والأخذ بأسباب التقدم . ماذا لدينا مما لدى  
الدول الأوروبية ؟ صناعة حديثة ؟ لا . نظام للتعليم المصرى ؟  
لا . جامعة ؟ لا . صحافة حرة ؟ لا . نظام اجتماعى يساير  
العصر ، وتحصل فيه المرأة على حقوقها ؟ لا . ديمقراطية ؟ لا .  
أفيقوا أيها السادة . . الثورة وحدها لا تصنع كل هذا . . ما يصنع  
هذا هو العزم والسعى والجهد من أجل النهضة .

الأفغانى : الكلام انتهى يا شيخ محمد

ينهض مستأذناً

السلام عليكم

أديب : خدنى معاك

يخرجان . . محمد عبده مطرقاً

محمد : يبدو أن التعامل مع الواقع أقسى مما أظن

قطع



الأفغانى : بصراحة يا أديب ، لست مرتاحاً فى التعاون مع الشيخ محمد ؟  
أديب : ليه يا شيخ أفغانى ؟  
الأفغانى : محمد عبده ليس ثائراً  
أديب : إزاي بقى ؟  
الأفغانى : محمد عبده رجل إصلاحى ، لا يطمح للتغيير العاجل عن  
طريق الثورة ، ما زال مصرّاً على أن التغيير يجب أن يتم عن طريق  
تربية الشعب وتعليمه ليكون أهلاً لحكم نفسه  
أديب : لكن رغم خلافكم كنتم دائماً بتلاقوا نقطة تفقوا عندها .  
الأفغانى : هذه المرة من الواضح أننا مش حنلتقى ، ولذلك فانا أفكر فى  
مغادرة باريس

قطع

---

نهاية الحلقة السادسة

## الحلقة رقم (٧)

مشهد/ ١ شارع في باريس نهار/ خارجي

الشارع الذى فيه عمارة مجلة العروة الوثقى . عربة أمام العمارة وينزل منها شاب مصرى بطربوشه ، وعليه سيماء الاعتداد بالنفس يعطى السائق . . أجره . يدخل العمارة بثقة .  
قطع

مشهد/ ٢ أمام شقة العروة الوثقى نهار/ داخلي

الشاب الذى رأيناه فى المشهد السابق . انتهى من صعود السلم ، ينظر للشقق ، يتجه للشقة التى عليها لافتة «العروة الوثقى» . يدق الباب . يفتح قاسم أمين الباب  
الشاب : صباح الخير  
قاسم : صباح النور  
الشاب : أنت قاسم أمين ؟  
قاسم : أبوه . . حضرتك تعرفنى ؟  
الشاب : آمال دانا جاى من مصر عليك عدل  
قاسم : مين حضرتك ؟  
الشاب : أنا فتحى . . فتحى زغلول . . أخو سعد زغلول  
تغير لهجة قاسم المحايدة إلى الترحيب والدفء يسلم عليه بحرارة  
قاسم : ريحة الحبايب أهلاً بيك  
يشير للداخل - يدخلان  
قاسم : أنفضل . . أنفضل  
قطع

قاسم وفتحى

قاسم : أنت اللى كنت بتتعلم فى إسكندرية

فتحى : تمام أنا تلميذ عبد الله النديم كنت عنده فى مدرسته ، و اتعلمت

على إيديه ، و أترفتت من التعليم بسبب نشاطى السياسى

قاسم : أترفتت

فتحى : أيوه ياسيدى ، و غيرت اسمى عشان أقدر أرجع التعليم تانى ، و ده

اللى أخرنى شوية لكن الحمد لله عوضت اللى فاتنى ، أهو . .

أدينى بقيت عضو فى البعثة المصرية بفرنسا

قاسم : كويس قوى . . وحتدرس إيه فى فرنسا

فتحى : الحقوق ودراسة النظار والحكام

قاسم مداعبًا

قاسم : ليه ناوى تبقى ناظر ولا حاجة ؟

فتحى : ناظر بس ؟ قول رئيس نظار ، قول . .

قاسم : ما فيش حاجة بعد رئيس النظار إلا الخديوى . . كفاية كده

فتحى يضحك

فتحى : عشان خاطر ك بس

قاسم : إنما قل لى . . سعد أخباره إيه ؟

فتحى : انفصل من الحكومة بعد ما دخل السجن بتهمة الانضمام لجماعة

سرية . .

قاسم : سعد اتسجن ؟ ما قاليش فى الجوابات

فتحى : ما حبش يضايقك

قاسم : طب وبعدين ؟ عامل إيه دلوقت

مزج

يبدأ المشهد بلافتة تملأ معظم الشاشة «سعد زغلول وحسين صفر المحاميان» تبتعد الكاميرا قليلاً فنرى أن رجلاً يقوم بتعليق اللافتة بيلكونة إحدى العمارات فى الدور الأول بينما سعد يقف على الرصيف يتابع الأمر ويجواره خادمه  
 سعد : ولا الجرى ورا الحكومة ولا المحايلة عليها  
 الخادم : ربنا يجعله مكتب السعد عليك يا سعد أفندى يا بركة ويوعذك  
 بميت قضية

سعد يضحك

سعد : أترافع فيهم ما اكونش متهم  
 قطع

قاسم وفتحى

قاسم : الأوضة دى من دلوقت بتاعتك أنا أصل أجرت الشقة لما لقيتها  
 أوضتين بس عشان ما يكونش معايا حد غريب  
 فتحى : واضح أن كلام سعد عنك كان فى محله  
 قاسم : المهم بقى إنك تأخذ الحكاية جد لأنك جاى متأخر قوى من مصر  
 إحنا قربنا على نص السنة  
 فتحى : ما تخافش على دانا فتحى زغلول الجبار أنا مش حاذكر ويس أنا  
 كمان حاقرأ كل ما تخرجه المطابع الأوروبية أصل أنا أعرف  
 إنجليزى وفرنساوى وحاترجم اللى اقراه كمان لو عجبنى  
 قاسم : كده ؟ عال عموماً حتلقى عندى كل ما أخرجه المطابع خلال  
 السنوات الأخيرة  
 فتحى : يبقى لازم أدعى لسعد اللى دلنى عليك  
 قطع

أديب ومحمد عبده

أديب : يا شيخ محمد . . الوقت الحالي مش وقت الإصلاح ده وقت الثورة وأنت كده بتخسر الشيخ الأفغاني  
محمد : أخسره ؟ ليه ؟ الناس فى البلاد الفرنسية بيختلفوا مع بعض فى الآراء لحد التناقض من غير ما واحد يخسر الثاني  
أديب : خلافاك أنت والشيخ الأفغاني مش مجرد خلاف آراء ، ده هو بيشجع الحركات السرية ومقاومة الإنجليز وأنت شايف أنه ممكن تتعاون معاهم  
محمد : ورغم هذا أنا باتعاون مع الشيخ الأفغاني فى إصدار العروة الوثقى لسان حال الجهاد والمقاومة فى مصر  
أديب : ما هو ده اللى محيرنا . . أنت إيه بالضبط إصلاحى ولا ثورى ؟  
محمد : إصلاحى فى المحل الأول ، وثورى مؤقتا  
أديب : إزاي بقى ؟  
محمد : الأعمال الثورية لاتبنى المجتمعات . الذى بينى ويطور هو العمل الإصلاحى . وأنا راجل بانظر لمستقبل بلدى وارى كلما بدأنا الإصلاح مبكرا كلما وصلنا إلى النتائج مبكرا  
أديب : على أى حال سأنقل هذه الأفكار للشيخ جمال الدين الأفغاني  
محمد : أنا أقدر على التعبير عن نفسي  
قطع

جمال الدين الأفغاني ومحمد عبده

الأفغاني : على أى حال يا شيخ محمد أنا أشكرك على صراحتك . . لكن لى عندك طلب  
محمد : بل أمر يا مولانا

الأفغاني : أن تبقى معي ما دامت «العروة الوثقى» مستمرة في الصدور  
محمد : لك هذا يا أستاذي

قطع

---

مشهد/ ٨                      عمر أمام مكتب لرنود                      نهار/ داخلي

لرنود يسير نحو مكتبه ، يقابل حسن يستوقفه  
لرونود : حسن ، فين صاحبك ؟  
حسن : قاسم ، موجود يا مسيو لرنود يشتغل مترجم في باريس  
لرنود : قل له إني عايز أشوفه ، ما يطولش مدة بعده عن الكلية كده  
حسن : النهاردة حابعت له تلفراف يبجي لحضرتك  
قطع

---

مشهد/ ٩                      صالة شقة جلنار                      نهار/ داخلي

جلنار تدخل على خضر مرتدية الثياب التركية قادمة من الخارج يسألها بلهفة  
خضر : إيه يا جلنار . . عملتي إيه  
تقدم له ورقة  
جلنار : أتفضل ، موافقة أفندينا على أنك تورد خيول للجيش  
المصري . . مش قلت لك ما يجيبها إلا ستاتها  
يضحكان  
جلنار : الشرط الوحيد للخديوي إنك ما ترجعش ثاني للأفكار بتاعة  
العرايين  
بطاطي خضر رأسه بحزن  
خضر : العرايين ده كان حلم وانطفأ  
قطع

لرنود وقاسم

لرنود : يا قاسم يا ابني ، الغياب الطويل ده عن الكلية مش صح

قاسم : عارف يا أستاذ

لرنود : أنا يا ابني على ضغوط بسبك البعض طلب مني أن أفصلك

قاسم : لحد الفصل ؟

لرنود : فيه شكاوى ضدك مالهاش أول من آخر

قاسم : وما بيغفرليش إني متفوق في الدراسة

لرنود : ده الشيء اللي أنا دافعت بيه عنك

قاسم : على كل حال أنا حأحاول أوازن في الفترة الجاية بين وجودي هنا

ووجودي في باريس

لرنود : داکور لكن بالمناسبة إيه أخبار القراية

قاسم : أنا يا أستاذ لا أترك الكتاب لحظة . . قرئت لكل أدباء فرنسا ،

ولكل المفكرين المهمين في أوروبا سينسر ، ماركس ، بنتام ،

شوينهور ، آدم سميث

لرنود : عظيم . . المهم بتقرا التسأل نفسك إيه اللي يناسب بلدي في كل ده

قاسم : هو ده فعلاً اللي أنا بأعمله

لرنود : ووصلت لنتيجة ؟

قاسم : وصلت

لرنود : إذن أحب أسمع

قاسم : أنسب حاجة لمصر في اللحظة ده هي التجربة الليبرالية ، بمعنى

حرية الاقتصاد ، حرية الفكر ، حرية الصحافة ، حرية المرأة ،

المنافسة من أجل الأفضل لأن استمرار الحال في مصر على ما هو

عليه هو المستحيل نفسه

لرنود : لكن خد بالك ، مذهب الحرية الاقتصادية له عيوبه ، لأنه بيخلي

الاغنيا يزدودوا غنى والفقرا يزدودوا فقر

قاسم : الإسلام كفيل بسد الفجوة بين الطرفين عن طريق التكافل

الاجتماعي

لرونود : براقو . . واضح إنتك ماشى فى الطريق الصح  
قطع

---

مشهد/ ١١      أمام المدرج فى حقوق مونبلييه      نهار/ داخلى

تقف سلافا مع زملائها . قاسم يأتى ، تراه تجرى نحوه صائحة  
سلافا : أوه . . قاسم  
قاسم : سلافا  
سلافا : جيت إمتى ؟  
قاسم : دلوقت حالاً يا دوب عديت على بروفيسير لرونود  
سلافا : وحشتنى جداً  
قاسم : إنتى أكثر  
سلافا : لو كنت وحشتك ما كنتش غبت كل الغياب ده  
قاسم : غصب عنى يا سلافا أرجوك سامحينى . .  
سلافا : اسمع انت النهاردة وراك إيه بعد الظهر  
قاسم : ما فيش حاجة  
سلافا : إذن استعد للخروج معايا . . عابزة أقضى معاك أطول وقت ممكن  
قاسم : أنا رهن إشارتك

قطع

---

مشهد/ ١٢      حديقة      نهار/ خارجى

سلافا تجرى ووراءها قاسم يلحق بها ، يضحكان  
قطع



مشهد/ ١٣ مقهى مونبلييه نهار/ خاجى

قاسم وسلافا يلعبان الشطرنج

قطع

مشهد/ ١٤ مسرح ليل/ داخلى

فرقة موسيقية تعزف ، قاسم وسلافا بين الجالسين . يداهما على المستند ترحفان . .  
تلتقيان مع تعالى وسرعة الموسيقى

قطع

مشهد/ ١٥ غرفة قاسم بمونبلييه ليل/ داخلى

قاسم يكتب فى النوتة التى يكتب بها ويكتب ونحن نسمع صوته  
قاسم : لا شيء يشبه العشق فى عتفوان نشأته . . إذا هجم هذا المستبد  
القاهر . . حصر اللسان واختبل العقل وخلا الطريق أمامه فوصل  
إلى القلب بوثة واحدة . . فإذا تمكن منها على هذه الحال وقبض  
على زمامها رضيت بمعجزها وشكرته على أسرها واغتنبت برقها  
ووجدت باتصالها بنفس أخرى قوة وفرحا وسعادة لم تر مثلها

قطع

مشهد/ ١٦ غرفة استقبال أمين بك نهار/ داخلى

أمين يسير مع مصطفى فهمى مرحبًا  
أمين : داحتنا زارنا النى النهاردة  
مصطفى : عليه الصلاة والسلام

يجلسان

مصطفى : شوف يا أمين يا أخويا ، أنت من ساعة ما خرجت من الجيش  
قاعد في البيت ، وأنا بصراحة ما أحبش الرجالة تقعد في البيت ،  
عشان كده بحثت لك لحد ما لقيت لك وظيفة معتبرة تليق بيك  
أمين : وظايف إيه بقي يا مصطفى باشا ما أنت عارف إن الصحة في النازل  
مصطفى : صحة إيه يا راجل ؟ دانت زى الحديد ، وبعدين الوظيفة اللي  
جاييها لك حترد لك صحتك تاني ، عارف وظيفة إيه ؟ وكيل نظارة

الأشغال العمومية

أمين : برضة ما تنفعش أنا عارف نفسي ، مرض القلوب بعبد عنك هزمنى  
مصطفى : ما تقولش كده يا راجل

أمين : أنا شاكر لك اهتمامك بي ، لكن معلى ، اقبل عذرى

يبدو على وجه مصطفى باشا عدم الاقتناع والتسليم مضطرا

أمين : قل لى أنت أخبارك إيه ؟

مصطفى : عارضين على أكون ناظر المالية لكن متردد

أمين : ليه ؟

مصطفى : أنا ما باطيقش الفلاحين ، وللأسف رغم كل شيء الفلاحين

وصلوا لكل مكان في البلد

أمين : دى بلدهم يا مصطفى باشا

يقف محتثا

مصطفى : تاني حتقول لى بلدهم ؟

يجذبده ليجلس

أمين : خلاص خلاص أقعد ، نقفل الموضوع ده أحسن قل لى بقي ،

أخبار بناتك إيه

يجلس

مصطفى : أقول لك يا سيدى

قطع

يدخل قاسم وحسن ، يعترضهما أوجست ومعه صحيفة  
أوجست : أنت رجعت يا قاسم ؟ كنا مرتاحين في غيابك  
قاسم لحسن

قاسم : أقول له إيه ده على الصبح ؟

حسن : ما ترش عليه

يجذبه ليدخل

حسن : يا للابتنا

أوجست يعترض طريقهما مرة أخرى

أوجست : لا استنوا رايحين فين ، دانا جايب لكم جرنان مهم قوى كنت

جاييه لحسن لوحده لكن دلوقت المنفعة بقت مزدوجه

يفتح الصحيفة على مقال معين ويقدمها لهم

أوجست : بصوا . . ده مقال لمفكر فرنسي اسمه رينان Renane . . في

جريدة ديبا Debats الشهيرة . عارفين كاتب إيه فيه ؟ تقروا ولا أقرأ لكم

أنا ؟ حاصر الكم أنا وإن إنتاج الأمم غير العربية أكثر من إنتاج الأمم العربية .

والتعدين الإسلامي أكثره من إنتاج الفرس وغيرهم دون العرب . لأن

الإسلام . لا يشجع على العلم والفلسفة والبحث الحر . ومن اشتغل

بالفلسفة من المسلمين اضطهد ، أو أحرقت كتبه ، أو كان في رعاية خليفة

أو أمير

حسن : هات ده

حسن يشد الجريدة منه يمزقها

أوجست : مش مهم إنك تقطعها ، لأنها مطبوع منها آلاف النسخ ، ولأن

الأفكار اللي فيها مش حتنضيع بتقطعها

قاسم : كل فكرة قابلة للمناقشة ، ما فيش فكرة نهائية ، ورينان ما بيقولش

كلام مقدس

أوجست : لا مقدس

قاسم : بكرة نشوف الردود اللي حتنكتب على مقال البروفيسير رينان

يجذب حسن

قاسم : يا لالا يا حسن

حسن أثناء السير

حسن : يا ما نفسى ألب الواد ده علقه من بتوع فتوات مصر

قاسم : إعقل يا بو على . بلاش تهور الفكر ما يواجوش غير الفكر  
قطع

ليل / داخل

مكتب العروة الوثقى

مشهد / ١٨

صحيفة مطوية تلقى على مكتب ، ثم نرى أن الذى يلقيها هو الأفغانى وحوله محمد عبده  
وفتحى زغلول

الأفغانى : أنا أعرف رينان كويس بيكره العرب والإسلام

محمد : وهذا التطاول تكرر من قبل

فتحى : لا بد من الرد عليه

الأفغانى : بالفعل ، سأرد عليه

محمد : وأنا أيضًا ، لكن لا بد من ترجمة المقال ترجمة دقيقة

الأفغانى : ألم تتعلم الفرنسية

محمد : أتعلمتها لكنها لا تسمح لى حتى الآن بفهم الموضوعات الدقيقة

فتحى : أنا حاترجم الموضوع

قاسم يقف على الباب ومعه الصحيفة وأوراق مكتوبة

قاسم : الموضوع اتترجم اهه

فتحى : قاسم ؟

قاسم : مش بتشكلموا عن موضوع رينان اللى بيهاجم فيه المسلمين

والعرب ؟

محمد : أبوه

قاسم : أنا ترجمته وأنا جاى فى القطر لأنه لازم يترد عليه . ده ما فيش حاجة

خليتنى أسيب دراستى وأرجع غيره

الأفغانى : هات الترجمة دى يا ابنى

محمد : هات يا قاسم

يقدمها لمحمد عبده الذى يعطيها للأفغانى  
قاسم : الى حكتك بوه بالمربى هاتوه نترجمه فرنساوى  
الأفغانى : إن شاء الله

قطع

---

مشهد/ ١٩ حديقة قصر مصطفى باشا فهمى نهار/ خارجى

أمين بيه ينزل من عربته أمام الباب الداخلى ويسير مشدودا ، الخدم يفتحون له الباب يدخل  
قطع

---

مشهد/ ٢٠ بهو قصر مصطفى باشا فهمى نهار/ داخلى

مصطفى فهمى يستقبل أمين بك  
مصطفى : تعبت نفسك ليه يا أمين يا أخويا ؟  
أمين : تعبك راحة يا مصطفى باشا ، بقى يختاروك للمالية وما أجيش  
أهنى ؟  
مصطفى : والله يا أمين بيه ما كنت عايزها أنت عارف  
أمين : ده كلام يا مصطفى باشا ؟ لما أهل الفضل اللى زيك يبعدوا عن  
الوظائف العامة ، آمال مين اللى يمسكها ؟  
مصطفى : ولو أنها بالخسارة ، لكن زى بعضه فين الشريات يا أولاد ؟  
ينظر لبااب الخدم

قطع

---

مشهد/ ٢١ غرفة نوم أم قاسم نهار/ داخلى

أمين بك يخلع الجاكتة ويستعد للبس الجلباب والطاقيه بإحضار الأم لهما من على الشماعة

ووقوفها بهما

أمين : إيه رأيك يا هاتم لو نخطب بنت مصطفى باشا فهمى الكبير لأبتنا

قاسم

الأم : مصطفى باشا ما يتميش ، لكن بنته ده لسه عيلة . .

أمين : يعنى إيه عيلة ، كل البنات فى مصر بيتجوزا صغيرين بنات الناس

الأكابر زى ما أنتى عارفة بيتخطفوا على طول

الأم : على كل حال نكتب لقاسم جواب نأخذ رأيه

أمين : نأخذ رأيه فى إيه ؟ مش كفاية رفض جلتار قبل كده ، واديكى شايقة

زيارة واحدة منها لأم الخديوى فتحت قدام جوزها أبواب السعد

إزاي

الأم : يا أمين بيه ابنتا دلوقت اتعلم وراح أوروبا وما يتغشش نتعامل معاه

بالطريقة دى

أمين : خلاص . . مش عايز كلام . . يظهر إن أوامرى فى البيت بقت

محل أخذ ورد . . هو حر . . إن شالله ما عنه التجوز . ثم إن كل

أصحابى هم اللى خطبوا لأولادهم والابن كان عليه الطاعة

يعيد لبس الجاكette والخروج تقف الأم شاعرة بالذنب

قطع

نهار/ خارجى

أمام المدرج بمونبلييه

مشهد/ ٢٢

حسن يستوقف أوجست ، ونلاحظ أن حسن يحمل صحيفة ، ويخاطب أوجست شاعراً بالزهو والنصر

حسن : قرئت جورنال «ديبا» النهاردة يا أوجست ؟

أوجست يزيحه

أوجست : وسع من طريقى

حسن يمسكه من يده

حسن : ده كلام ؟

تأتى سلافا وبعض الزملاء . . يقرأ

حسن : وحياتك لأقرأ لك الرد أما القول بأن الإسلام لا يشجع عليه فإنه مردود عليه ، لأن الكل يعلم أن العرب خرجوا من حال البداوة التي كانوا عليها قبل الإسلام وساروا في طريق التقدم العلمي والفكري بسرعة لا تعادلها سوى سرعة فتوحاتهم السياسية أى أن العلوم تقدمت تقدماً مذهماً بين العرب في كل البلاد التي انضمت لسيادتهم .

أوجست : كفاية

أوجست يهجم عليه ويجذب الصحيفة منه يمزقها . حسن يتسم حسن : قد كده متفاظ ؟ طيب خليك متفاظ زى ما أنت . . عن إذنتك يتركه ويمشى . أوجست لسلافا أوجست : شايقة المصريين اللي أنتى مصاحباهم ؟ شايقة ؟ سلافا : ما حدش قال لك تجر شرهم تتركه وتنصرف ، ينظر إليها بغیظ

قطع

نهار/ داخل

مكتب العروة الوثقى

مشهد/ ٢٣

قاسم وفتحى يجلسان ، وفى يد قاسم خطاب يلوح به لفتحى

قاسم : إيه رأيك بقى فى الجوازة دى يا عم فتحى ؟

فتحى : ما تتسايش . . واضح أن أبوك بيعرف ينقى

قاسم : يا سلام

فتحى : من غير تريقة ، مصطفى باشا فهمى ده يا ابنى واصل مع الإنجليز

ويتنقل بين النظارات من الأشغال للخارجية للحقانية ودلوقت

العالية - باختصار ما فيش نظارة بتخلى منه معنى اللي يناسبه

يا هناء . . كل البلد حتبقى مفتوحة قدامه ومش بعيد جوز بته يبقى

ناظر ولا صاحب وظيفة مهمة فى القصر الخديوي

قاسم : افرض بقى أن جوز بته بقى ناظر . لكن ما ارتاحش معاها . . يعمل

إيه ؟

فتحي : يستحملها عشان خاطر أبوها  
 قاسم : طب ما تتجوزها أنت وتريحني  
 فتحي : يا ريت . . مصطفى فهمي ده بيكره المصريين عمى . . لا يمكن  
 يجوز بناته غير لأترك زيه  
 ضاحكًا ملوحًا بالخطاب  
 قاسم : عمومًا أنا حاحتفظ بالجواب ده عشان أعاكس بيه سلافا  
 قطع

---

شهد/ ٢٤ حديقة في مونبلييه نهار/ خارجي

سلافا تضرب قاسمًا بيديها في صدره ضربًا خفيفًا بينما الخطاب على الترابيزة ، وهو  
 يضحك

سلافا : يا رب تموت لو اتجوزت غيرى  
 قاسم بشكل حاد  
 قاسم : معنى عرفنى إن العرايس كثير ؟  
 سلافا : قاسم . . صحيح ممكن تسبيني ؟  
 قاسم : أنا أسيبك ؟ دانا أسيب الدنيا كلها وإنتى لأ . .  
 سلافا : بتتكلم جد ؟  
 قاسم : سلافا ، إنتى بنشكى فى عواطفى ناحيتك ؟  
 سلافا : معنى والدك مش ممكن يضغط عليك ؟  
 قاسم : لو الدنيا كلها ضغطت على لا يمكن أتجوز غيرك  
 سلافا : يا حبيبى يا قاسم  
 يضع يديه على رأسه ويصيح من التشوة  
 قاسم : يا للاله . . فيه حاجة فى الدنيا أحسن من الكلمة دى ؟  
 قطع



باب الغرفة يفتح على سعد ، الخادم يقف وهو يؤدي تعظيم سلام قائلاً

الخادم : اتفضللى يا أفندم اتفضللى يا سمو الأميرة

بينما سعد مندهش . . تدخل نازلى ، يقف سعد وعليه آثار المفاجأة

. نازلى : بونجور

يتعلق بالفرنسية السليمة

سعد : بونجور برنيسيس اتفضللى إيه الشرف العظيم ده ؟

تجلس

نازلى : أنا لما عرفت إنك فتحت مكتب محاماة قلت لازم آجى أبارك

بتفسى

سعد : دايمًا صاحبة فضل

نازلى : بس لى عندك رجاء

سعد : أمر مش رجاء

نازلى : عندى شوية حاجات قانونية عايزاك تتولاها

سعد : سمو الأميرة حتدى موضوعاتها القانونية لمكتب جديد زى

مكتبى ؟

نازلى : لا يا سعد أفندى أنا مش بأدى حاجتى لمكتب جديد ، أنا بأديها

لمحامى شاطر أنا عارفة خبرتك القانونية فى قلم قضايا الجيزة

وعشان كده أحب أقول لك إن الكلام ده بداية التعاون بيتنا وإنى

حأجيب لك كمان بعض القرايب والمعارف عشان ييقوا زباين

عندك

سعد : سمو الأميرة . . عطفك على ده أكبر من اتى أحتمله

نازلى : ما تقولش عطف يا سعد مكاتلك عندى أكبر من العطف بكثير

تقف

نازلى : على فكرة ، حتجبنى السراية عشان أدى لك الأوراق . . مش كده

سعد : كده طبعًا

نازلى : أورفوار

سعد : أورفوار برنيسيس

تخرج ونرى عليه الدهول

قطع

---

مشهد/ ٢٦ مكتب العروة الوثقى نهار/ داخلي

يدخل جمال الدين الأفغاني حزينا على محمد عبده

محمد : مالك يا شيخ جمال الدين ؟

الأفغاني : الإنجليز جمعوا معظم أعداد « العروة الوثقى » من مصر

محمد : إزاي ؟

الأفغاني : حد من الجماعات السرية عرف قريبا له بأهمية المجلة فوصل

الخبر للإنجليز ، وكانت النتيجة أنهم جمعوا معظم الأعداد قبل

توزيعها

محمد : الخطورة أنهم يعرفوا أسماء التنظيم السري

الأفغاني : لا أظن ، فالأسماء التي يتعامل بها الأعضاء تختلف عن

أسمائهم الحقيقية

محمد : ريتا يستر

قطع

---

مشهد/ ٢٧ قاعة الأميرة نازلي ليل/ داخلي

نازلي تقدم الأوراق لسعد

نازلي : أنفضل يا سيدي ، أدى أوراق الموضوعات التي كلمتك عنها ،

عائزك تدرسها ، وتعمل الحاجات المستعجلة ، ويعدين نتناقش

في بقية الأمور

سعد : أوعدك أنني حاشتغل فيها قبل أي حاجة ثانية

يقف

سعد : استأذن أنا

تمسك يده لتجذبه للجلوس

نازلى : مستعجل ليه ؟ أقعد معايا شوية

سعد : أصل يعنى

نازلى : أصل إيه ؟ أنا ست وحدانية ، والوحدة قاسية جداً . . تخيل

نفسك وحيد فى قصر طويل عريض زى ده

يجلس

سعد : وحيدة رغم كل الناس اللى حواليكى ؟

نازلى : أقسى أنواع الوحدة إنك تكون وحيد وسط الناس

سعد : كلامك بيفكرنى بكلام الصوفية

نازلى : تعرف يا سعد أفندى ، أنا من ساعة جوزى ما مات وأنا حاسة إن

الدنيا قاضية حولى بالف الدنيا ، وأروح تركيا وفرنسا وبلاد

الإنجليز لكن كل ده مش قادر يملأ حياتى

سعد : طب ليه ؟

نازلى : الحاجة الوحيدة اللى تملا حياة الست هى الحب . . تخيل يا سعد

أفندى إن واحدة زى مشكلتها هى البحث عن الحب . الأمرا

بيخافوا منى عشان عارفين العداوة بينى وبين الخديوى توفيق اللى

أخذ الحكم بدل والدى . . وناس كتير بيعسوا بالفرق الاجتماعى

بينى وبينهم فيتعاملو معايا على أنى أميرة ويس

سعد يرتبك ويتمالك

سعد : هه ؟ اه . اه

نازلى : تعرف يا سعد ، أنا عايزة حد ينسى إنى أميرة ويعاملنى كإنسانة .

وفى الحالة دى مستعدة أسيب كل شيء ، وأكون له لوحده

يمد يده للسلام استعداداً للاتصاف

سعد : طيب . . استأذن بعد إذن سموك

تجذب يده قائلة

نازلى : استنى ، مستعجل على إيه

نتجه إلى منضدة عليها ربطة كتب أنيقة ، بينما سعد يهوى على نفسه بإحدى الأوراق مما

يشعر به . تقدم لسعد ربطة الكتب

نازلى : دى مجموعة كتب قانونية بالفرنساوى مش اتعلمت فرنساوى

كويس .

سعد : الحمد لله  
 نازلى : يبقى لازم تقرأها المحاماة مش إنهاء إجراءات ويس ، دى ثقافة  
 وقدرة على البحث ، والاستشهاد والاستنتاج  
 سعد : مفهوم . مفهوم يا أفندم ؟  
 يتناول الربطة منها ليخرج تمسك به  
 نازلى : استنى . . هتشيل إنت ؟  
 تصفق ، يدخل خادم  
 نازلى : وصل سعد أفندى بالحاجة دى ، وخلي العربية توديه بيها لحد  
 البيت  
 الخادم ينحنى

قطع

---

مشهد/ ٢٨      غرفة نوم سعد      ليل/ داخلى

خادم سعد يضع الربطة على المنضدة . سعد يجلس على مقعد ويفتح ربطة عنقه ويهوى  
 بيده على وجهه ، الخادم يلاحظ  
 الخادم : مالك يا سعد أفندى ؟  
 سعد : ما فيش حاجة . . سيبنى لوحدى دلوقت أعمل معروف  
 الرجل ينظر إليه مستغرباً  
 الخادم : حاضر  
 يخرج

سعد : معقول يا سعد . . معقول اللي أنت حاسس بيه ده يكون حقيقة  
 معقول الأميرة خطاك انت بالذات فى دماغها ؟

قطع

---

مشهد/ ٢٩      بهو قصر أمين بك      نهار/ داخلى

أمين يمسك فى يده خطابا ويكلم أم قاسم بحدة

أمين : شايقة ابنك يا هانم ؟ باعت يقول لي آسف . . آسف . . حضرته  
 مش عاوز يتجوز بنت مصطفى باشا الولد ده حيموتنى . . مش  
 عارف طالع نفرى لمين  
 الأم : الدنيا بتتغير يا أمين يه ، والجبل الطالع ده غير جيلنا . دول سافروا  
 بره وشافوا الدنيا ، ولهم عقل شكل ثاني  
 أمين : عقل غلط . . الدراسة بره معناها يكسروا التقاليد ؟ يعصوا  
 أهاليهم ؟ كل ما نقول لهم حاجة يقولوا لا ؟  
 الأم : والله يا أمين بك ما تغضب عليه وهو فى غربته . . ادعى له . . ادعى  
 له بالهداية

بمتهى الغيظ

أمين : لو ما كانش ابنى الوحيد ، كنت عرفت أربيه ، لكن للأسف ،  
 لازم أسكت على آخر الزمن لازم أسكت  
 كهرمانة تأتى ملهوفة  
 كهرمانة : إلحقنى يا سيدى . . إلحقينى يا ستى  
 الأم : فيه إيه يا كهرمانة ؟  
 أمين : إيه اللى جرى ؟ انطقى  
 كهرمانة : ست تفيدة هانم وقعت من طولها مرة واحدة وما بتحطش منطق  
 الأم متزعجة  
 الأم : تفيدة ؟  
 الأب يسرع نحو السلم وهو يزيح كهرمانة من طريقه  
 أمين : أوعى وأوعى كده  
 الأم تجرى وراءه

قطع

مشهد / ٣٠      غرفة تفيدة هانم      بهار / داخلى

تفيدة هانم ممددة على سريرها والأم تقرب من فمها زجاجة نشادر ، والأب يقف متماسكاً  
 وإن كان يبدو عليه التأثر  
 الأم : تفيدة . . تفيدة . . فوقى يا حبيبتى . . فوقى سلامتك

تفريق

تفيدة : الله يسلمك أم قاسم

الأم : إيه اللي جرى ؟

تفيدة : مش عارف أفندم ، حسيت أن فيه إيد جامدة بتعصر قلبي أفندم ،

وبعدين لقيت نفسي بأقع ومش حسيت بحاجة

الأب يخرج

الأم : سلامتك

قطع

نهار/ داخلي

عيادة طبيب

مشهد/ ٣١

أمين بك والطبيب

الطبيب : آسف أمين بيه ، ما أقدرش أوصف دوا من غير ما أكشف

أمين : يا حضرة الحكيم مش ممكن . . أنت عارف الستات بتوعنا

لا يمكن يتكشفوا على حد

الطبيب : خلاص ، روح لذكطور تاني ، لكن أنا ما أقدرش أعالج حد من

غير ما أشوفه قلت إيه ؟

يتردد قليلاً

أمين : خلاص ، أنفضل معايا

قطع

نهار/ داخلي

غرفة تفيدة هانم

مشهد/ ٣٢

أمين يقف بجوار السرير الذي ترقد عليه تفيدة موجهًا كلامه للطبيب الذي لم يدخل بعد

أمين : أنفضل يا حضرة الباش حكيم

تفيدة : حكيم

تشد الغطاء ليغطيها كلها بما فيها رأسها ، من تحت الغطاء

تفيدة : حكيم إيه أمين بيه ؟  
 أمين : حكيم يكشف عليكى عشان بوصف لك الدوا  
 تفيدة : مستحيل أفندم حد يشوف جسم تفيدة هانم إن شاء الله تموت  
 أمين : بلاش عند يا تفيدة  
 تفيدة : أسفة أفندم . . باش حكيم ، إطلع بره ، تفيدة هانم مش عايزة  
 حكيم . . الحكيم ربنا أفندم  
 أمين : ربنا خلق الطب والدوا يا تفيدة  
 تفيدة : لكن مكان مش خلق حكيمه ست تعالج تفيدة هانم أفندم  
 أمين للطبيب  
 أمين : أسف يا باش حكيم . . أدبك شايف عندها  
 الطبيب : هى حرة . لكن أنا ما أقدرش أشخص المرض ولا أدى علاج من  
 غير كشف .  
 يخرج الطبيب ، وهو يقول  
 عن إذنكم . . يا ساتر  
 قطع

---

مشهد/ ٣٣ صالة شقة قاسم وحسن فى مونيليه ليل/ داخل

الأم ماريا تقرأ كتابًا على إحدى الأرائك  
 حسن وجوليا يذاكران على السفرة يتبادلان النظرات أثناء المذاكرة الأم تنهض ، نخاطبها  
 ماريا : تشربوا حاجة ؟  
 جوليا : أيوه يا ماما . . أشرب كافيه  
 ماريا : وأنت يا حسن ؟  
 حسن : أشرب أكبر كباية قهوة عندك ، لأنى عايز أسهر للمصبح  
 ماريا : كل ليلة تقول الكلام ده وتنام بعد ما تشرب الكافيه  
 تدخل المطبخ  
 حسن : جوليا  
 جوليا : هيه

حسن : إيه رأيك لو نتجوز ؟  
 جوليا : مش لما تخلص دراسة ؟  
 حسن : لسه حنستنى لحد ما نخلص ؟  
 جوليا : ليه لا ؟ التعليم شىء مهم ، وبعدين لو اتجوزنا دلوقت حتصرف على منين ؟  
 حسن : يا بنتى الفلوس كتير والحمد لله أنتى ناسية أنى ابن يوسف بيه عين أعيان ملاك الأراضى فى المنصورة ؟  
 جوليا : أنا ما أحيش أتجوز واحد بيمد يده فى جيب أبوه . . أنا شخصيا حاشتغل بعد ما أخلص دراسة ، يبقى إزاي أتجوز واحد من غير شغل  
 حسن : على مهلك على مهلك هو أنا قلت إنى مش حاشتغل . دانا ناوى أملال الدنيا شغل لما أرجع مصر ، لكن أنا باتكلم عن الجواز دلوقت  
 جوليا : حسن . . من فضلك أجل الكلام ده لحد ما نخلص دراسة  
 حسن : حاضر  
 يسكت لحظة  
 حسن : طب تفتكرى ماما حتوافق إنك تيجى معايا مصر ؟  
 جوليا : ساعتها حنسألها  
 صوت الأم قادمة  
 ماريا : الكافيه  
 يهمهم وهى تضع القهوة  
 حسن : جيتى ليه يا هادم اللذات دلوقت ؟  
 ماريا : بتقول حاجة يا حبيبي ؟  
 حسن : لا أبدا ، بأكلم نفسى  
 يشرب القهوة ساخنة ، تلسعه جوليا تبسم  
 جوليا : ذاكر حسن  
 حسن : حاذاكر  
 يعود للمذاكرة

قطع



قاسم قادم من غرفة محمد عبده في نفس الوقت الذى تدخل فيه سلافا ، يصيح

قاسم : سلافا ؟

سلافا : يقولوا الحب بهدلة شايف جابنى من آخر الدنيا إزاي ؟

يضحك

قاسم : مجيك ده عندى يساوى الدنيا كلها . . تعالى

تجلس

سلافا : رئيسة الجمعية النسائية اللي أنا عضوة فيها حتقول محاضرة فى

باريس الليلة عملتها حجتي واستأذنت ماما وبابا وجيت

قاسم : وإكراما لخاطرك حاحضر معاكى المحاضرة

تقدم له كشاكيل

سلافا : خد . . دى المحاضرات اللي فاتتك

قاسم : حافضل طول عمرى مدين لك بالفضل

سلافا : بطل رغى وبالاخلص شغلك عشان نلحق المحاضرة

قطع

سيدة فى الخمسين تلقى محاضرة

المحاضرة : لابد من حصول المرأة الفرنسية على حقوقها كاملة . . لابد

من مساواتها بالرجل فى كل شىء . .

تنسحب الكاميرا لترى الحاضرين وبينهم قاسم وسلافا

المحاضرة : الرجل يجب أن يساعدها فى الأعمال المنزلية لأنها تعمل مثله

وهى يجب أن تحصل على مرتب يساوى الرجل الذى يقوم بنفس

عملها ، لأنه من الظلم أن تقوم بنفس عمله وتأخذ نصف أجره

ويجب أن يكون هناك تشريع يحمى المرأة من الضرب ويسمح لها

بطلب الطلاق إذا أحست أنها لا تريد الاستمرار مع زوجها

قاسم سلافا

قاسم : لو المحاضرة دى انتقلت فى مصر لازم يشنقوا الست دى

سلافا : ليه يعنى ؟

قاسم : لأن مجتمعتنا مجتمع رجالى

سلافا : طب اسكت إلا الست بتبص لنا

يسكت السيدة تواصل

المحاضرة : اننى أؤكد أن المرأة الفرنسية امرأة ضاعت حقوقها ، ولا بد لها

من استعادتها حتى تكون عضواً كامل العضوية فى المجتمع ،

وتشارك فى بناء وطنها

تصفيق

قطع

ليل/خارجى

شارع المقهى «باريس»

مشهد/ ٣٦

قاسم وسلافا والسيدة المحاضرة يتجهون للمقهى وهم يتكلمون

المحاضرة : إذا كانت المرأة المصرية زى ما بتقول كده فدى مصيبة ، مش

للمرأة ، لكن لمصر

يجلسون

قاسم : المهم ، إزاي نبدأ ؟ المرأة ما تقدرش تطالب لنفسها بحقوقها

المحاضرة : إذن البداية تبقى من الرجال

قاسم : راجل يبدأ الكلام عن تحرير المرأة ؟

المحاضرة : ليه لا ؟ آمال إيه دور المفكرين ؟

قاسم : الموضوع ده محتاج شجاعة أكبر من شجاعة الحرب ضد الإنجليز

المحاضرة : فعلاً ، لكن اللى حيقوم بالدور ده حيفضل خالد للأبد فى

ذاكرة وطنه

يصمت مفكراً . . سلافا تداعبه

سلافا : أوعى تكون ناوى تقوم بالدور ده

قطع

جمال الدين يجلس مع محمد عبده ويبدو عليهما حزن  
 محمد : متأكد يا شيخ جمال الدين إن إنجلترا أصدرت قرار يمنع دخول  
 العروة الوثقى مصر ؟  
 الأفغانى : كما أتى متأكد من اسمى هو جمال الدين  
 محمد : دى كارثة بالنسبة لنا  
 الأفغانى : إنجلترا أعلنت علينا الحرب كما أعلننا نحن عليها الحرب  
 محمد : وهل حنسلم  
 الأفغانى : الأفغانى لا يعرف التسليم  
 يدخل قاسم وهو يحمل حقائبه  
 محمد : على فين يا قاسم ؟  
 قاسم : على مونبلييه ، الامتحانات خلاص قريت ولازم أسافر . . على  
 كل حال يا مولانا لو احتجت ترجمة أى حاجة فتحى زغلول  
 موجود  
 الأفغانى : بل لن نحتاج إلى شىء . . يمكنك الرجوع يا ولدى  
 يسلم عليهما ، ويبدأ بمحمد عبده  
 قاسم : أشوف وشك بخير يا مولانا  
 محمد : بالتوفيق إن شاء الله يا قاسم  
 يسلم على الأفغانى  
 قاسم : سلام عليكم يا حكيم الشرق  
 الأفغانى : وعليكم السلام يا ولدى . .  
 قطع

قاسم وحسن وأوجست وسلافا يؤدون الامتحان . يدخل لرنود ليطمئن على اللجنة  
 لرنود : هيه ، إزاي الحال يا أولاد ؟ الامتحانات كويسة ؟

حسن : كويسة يا أستاذنا

سلافا : كويسة جدًا

لرنود : طيبكملوا إجابتكم

أوجست : لو سمحتت بروفيسر لرنود قاسم أمين بيغش

يتوقف متسائلًا . قاسم تبدو عليه المفاجأة

لرنود : عرفت إزاي ؟

أوجست : شفته بيكتب على الحيطه وعلى التخته قبل اللجنة ما تبدأ

قاسم : أنا ؟ . .

أوجست : ممكن حضرتك تتأكد ، بص على الحيطه جنبه وعلى التخته

الى ساند عليها

لرنود يتجه لمكان قاسم ، ينظر للحائط فيجد عليه كتابة وكذلك على التخته

لرنود : معقول يا قاسم ؟

قاسم : والله ما أعرف أى حاجة عن الكتابة دى ، ولا دخلت اللجنة إلا مع

كل الزملا

سلافا : فعلاً قاسم داخل معانا

لرنود يتوجه للمراقب الذى يقول

المراقب : أنا لما دخلت القاعة ما كانش فيها حد خالص

قاسم : لو سمحتت حضرتك الخط ده مش خطى خالص اتفضل حضرتك

شوف خطى

يرفع ورقة الإجابة . طالبة من الطالبات تخاطب لرنود

طالبة : بروفيسر ، أنا شفت أوجست بعد الامتحان اللي فات قاعد على

كرسى قاسم ويكتب على التخته وقلت له بتعمل إيه ؟ قال لى

مالكيش دعوه

أوجست : ما حصلش

طالبة : أنا مش كدابة

لرنود : على أى حال مش وقت تحقيق ، نضغوا الحيطه بالميه وغيروا

التخته الى بيكتب عليها قاسم

المراقب : أوكى بروفيسر

يخرج لرنود . . أوجست ينظر لقاسم نظرة المنتصر . قاسم مندهش ، حسن متغاض ،

الآخرون فى عيونهم نظرة احتقار

## قطع

مشهد/ ٣٩ صالة شقة خضر وجلنار نهار/ داخلى

جلنار تقرأ الصحيفة وابتتها عمرها ستان تجلس على الأرض لتلعب . جلنار تقرأ ببطء  
جلنار : رئيس . . نظار . . مصر . . يستأذن . . من ناظر الخارجية  
الإنجليزية للسفر . . معقول الكلام ده

يفتح خضر باب الشقة ويدخل فرحاً

خضر : جلنار يا وش السعد يا قدم الخير عرفتى آخر خبر ؟

جلنار : لأ ما عرفتش

خضر : ناظر الجهادية طلبنى النهاردة وقال لى أعمل شركة مقاولات عشان  
حيكلفونى بعمل أشغال عسكرية محتاجها الجيش ، يعنى حابقى  
تاجر ومقاول

جلنار : ده رزق بتتنا ، إفراج

خضر : الحمد لله

تحمل البنت

جلنار : تعرف يا خضر ، أنا ناوية لما البنت دى تكبر ابعتها بلاد بره تتعلم

فى المدارس ، أو ابعتها استانبول . . مش عايزاها تطلع جاهلة

خضر : نبعتها ، ليه لأ ؟ ما دام فيه مكسب يبقى كل شىء ممكن

جلنار : على فكرة ، أنا عايزة أقول لك حاجة ، أنا ناوية أزور القصر ،

وأطلب من حريم الخديوى يكلموه عشان يدى لك البهوية

خضر : وابقى خضر بيه بدل خضر أفندي

جلنار : وبعد شوية تبقى خضر باشا

يقبل يدها

خضر : انتى وش السعد والهنا ، انتى قدم الخير

## قطع

يدخل الخادم على سعد  
 الخادم : سعد أفندي . . سمو الأميرة نازلي باعته عربيتها الخصوصي ،  
 وطالبك تروح لها حالاً  
 سعد : حالاً ؟ حاضر يا سيدي  
 ينهض ويلبس الطربوش ويمسك العصا ويتجه للخارج  
 قطع

سعد ونازلي  
 نازلي : شوف يا سعد ، أنا قررت إنك تمسك لي كل القضايا بتاعتي ، بعد  
 ما نجحت في كل الموضوعات التي كلفتك بيها قبل كده  
 سعد : مش كثير كده ؟  
 نازلي : بالعكس ، دي بداية  
 سعد : كل ده وبداية ؟ آمال بعد كده فيه إيه ؟  
 نازلي : فيه كثير ، أنا عايزاك تكبر ، تكبر قوي . . قل لي ، أنت عندك  
 أرض ؟  
 سعد : عشرين فدان وارثهم عن المرحوم والذي  
 نازلي : أنا عايزة العشرين دول يبقوا ألف ، وأنت بدل أفندي تبقى بيه  
 وباشا .  
 سعد : على مهلك علي شوية يا سمو الأميرة  
 نازلي : ما فيش حاجة اسمها على مهلك الدنيا بتجري وأنت لازم تسبقها .  
 سعد : أحوال  
 يدخل الخادم  
 الخادم : سمو الأميرة ، مندوب من عند حضرة المعتمد البريطاني طالب  
 المقابلة

سعد : إيه ده ؟ أنتى على علاقة بالإنجليز ؟  
 نازلى : عندك مانع ؟  
 سعد : بالتأكيد . . تتعاملى مع أعداء البلاد ؟  
 نازلى : أعداء البلاد دول بيحكموها بقالهم ستين شتا أم أينا  
 سعد : حتى لو حكمونا خمسين سنة ، برضه حيفضلوا أعداء البلاد  
 نازلى : هو أنا قلت لك انهم مش أعداء  
 سعد : بإذنك يا سمو الأميرة  
 نازلى : حابعت لك القضايا الليلة  
 سعد : ما قبش داعى . أنا اللي حابعت لك القضايا اللي عندى . .  
 يتصرف محتدًا ، ونرى على وجهها الإحساس بالخطأ  
 قطع

---

مشهد / ٤٢      أمام باب حقوق مونبلييه      نهار / داخلى

حسن وقاسم وسلافا يخرجان من الباب سعداء  
 سلافا : بمناسبة نجاحنا إحنا الثلاثة أنا عازماكم عندى فى البيت  
 حسن : عاشت سلافا  
 قاسم : إيه الكرم الفرنساوى ده ؟  
 سلافا لحسن  
 سلافا : وهات جوليا معاك  
 حسن : حاجيها طبعا ، بس اسمعى ، أنا أحب الهير ، قولى للست أم  
 سلافا تتوصى بالهير  
 سلافا : وحاخليها تعمل لك فته بالخل والتوم كمان  
 حسن لقاسم  
 حسن : شايف البنات الجدعة المترية فى الفجالة . . والله العظيم أنتى  
 أجدع فرنساوية قابلتها فى البلد دى  
 يتوقفون ليفترقوا  
 سلافا : قاسم . . لازم تكون أول واحد يوصل . . أورفوار  
 قاسم : أورفوار

تبتعد

حسن : أنا مش حاكل من هنا لحد يوم الحفلة  
مزج

ليل/ داخل

صالة شقة سلافا

مشهد/ ٤٣

المكان تملؤه الزينة والبالونات ، شاب يعزف على الكمان . الزملاء والزميلات  
يصفقون ، يغنون أغنية جماعية . حسن وجوليا سارحان . سلافا تستقبل ضيوفها هي  
وأُمها وأبوها  
سلافا لقاسم

سلافا : معلش يا قاسم ، أنا عارفة أنت مشغولة عنك

قاسم : أنا عارف أنك مش مشغولة بحد غيري

تقف لحظة وكأنها شعرت بألم ، تمسك برأسها

قاسم : مالك ؟

سلافا : صداع غريب بييجيني في الأيام الأخيرة

قاسم : سلامتك

سلافا : ميرسي

قاسم : ما رحتيش لدكتور ؟

سلافا : حاروح

أم سلافا تصيح في الجالس

سوزى : إيه يا أولاد . . ما تهيصوا وتفرحونا

طالبة تقوم

طالبة : إلى الرقص يا شباب

عازف الكمان يعزف موسيقى راقصة . يبدأ الفرنسيون في الرقص ، بينما قاسم يسير مع

سلافا المتألمة للداخل ، وتلتحق بهما أمها

قطع





سلافا مع أمها وأبوها وقاسم أمين في حفل بيت أسرته

الطبيب يخرج من وراء البارافان بعد الكشف على سلافا ، بينما الأم والأب في الانتظار  
 جورج : عندها إيه يا دكتور ؟  
 الدكتور : الحقيقة الكشف العادي مش مبين حاجة  
 سوزى : يعنى إيه ؟  
 تصل سلافا وهى تعدل ثيابها  
 الدكتور : يعنى ربما يكون أفضل لو رحتم لدكتور متخصص فى باريس  
 عشان نظمتموا  
 سلافا للطبيب

سلافا : تفتكر فيه حاجة خطيرة ؟  
 الدكتور : ما أقدرش أقول أى حاجة فى حدود الكشف اللى عملته  
 جورج : أنا حاروح باريس معاها عشان نظمتم  
 قطع

تتوقف عربة ونرى فيها قاسم وسلافا وجورج . قاسم يتردد فى النزول  
 قاسم : كنت جيت معاكم عند الدكتور  
 جورج : ما تتعش نفسك أفضل نروح لوحشنا  
 قاسم : داكور  
 لسلافا

قاسم : حاطمتمن عليكى إن شاء الله  
 العربة تتحرك . قاسم ينتظر حتى تبتعد ثم يدخل العمارة  
 قطع



سلافا تسقط على الأرض وقاسم أمين يجوارها والام والاب ملهوفان

قاسم يدخل على فتحى زغلول مهلاً

قاسم : ادبنى جيت لكم تاني

فتحى يشير له أن اصمت ، قاسم بصوت خافت

قاسم : إيه ؟ فيه إيه ؟

فتحى : الشيخ محمد عبده بيودع الشيخ جمال الدين

قاسم : يودعه ؟ ليه ؟

فتحى : أصله راجع الشام تاني

قاسم : معقول ؟

ينفتح الباب ويخرج محمد عبده ووراءه الأفغانى يودعه . يسير الشابان إليه وفى عينهما

دموع . قاسم يحتضنه

قاسم : يا ريت كنت أقدر اجي معاك . صعب على فراقك يا مولانا

محمد : مسير الحى يتلاقى ، الشاعر يقول إيه ؟ وقد يجمع الله الشيتين

بعدما يظنان كل الظن ألا تلاقيا

فتحى يسلم بحرارة

فتحى : مع السلامة يا مولانا

محمد : مع السلامة يا أولاد . أشوقكم بخير

ينصرف ، الشابان ينخرطان فى البكاء . جمال الدين يدخل مكتبه

قطع

جمال الدين يجلس على المكتب فى شدة التأثر يضع رأسه بين يديه

الأفغانى : هكذا الدنيا دائماً ، لا تجمع الناس إلا لتفرقهم

قطع

قاسم يجمع متاعه في حقيبة وإلى جواره فتحي زغلول  
 فتحي : طب خليك قاعد شوية  
 قاسم : بعد الشيخ محمد عبده باريس حيقي مالهاش طعم  
 دق مرح على الباب  
 قاسم : مين ده ؟  
 فتحي : مش عارف  
 قاسم : أما أشوف مين  
 يخرج

قطع

قاسم يفتح الباب ، سلافا تتعلق برقبته  
 سلافا : قاسم . . قل لي مبروك . قل لي مبروك . . الدكتور قال لي  
 ما عندكيش حاجة  
 قاسم : الحمد لله . . ياله عيب وانزاح . . فين بابا ؟  
 سلافا : مستنى تحت ، مصمم ما نباتش في باريس عشان يظمن ماما  
 قاسم : كده ، يبقى استنوني ، حنرجع كلنا سوا

قطع

نهاية الحلقة السابعة

## الحلقة رقم (٨)

مشهد / ١ شارع بيت سلافا في مونيليه نهار/ خارجي

عربة تأتي من منعطف الشارع فيها قاسم وسلافا ووالدها . الأم تقف في النافذة ، تنظر نحو العربة . تراهم ، تصيح  
سوزي : سلافا  
تجري نحو الداخل بينما سلافا تلوح لها . تتوقف العربة لتتزل سلافا وقاسم والأب .  
سلافا تتجه للداخل بسرعة  
قطع

مشهد / ٢ مدخل بيت سلافا نهار/ داخلي

الأم تهبط السلم بسرعة وسلافا تدخل سعيدة . حضن عنيف بين الأم وابنتها  
سوزي : بتي ، سلافا ، حبيبتي  
سلافا : أنا بخير يا ماما  
سوزي : شكراً للرب ، عشر شمعات للعذراء شكراً لها على سلامتك  
يدخل قاسم والأب (جورج) لزوجته  
جورج :كملوا العواطف فوق يا سوزي . . إحنا لسه جايين من السفر  
سوزي : ياللا نطلع فوق  
تأخذ يد ابنتها في يدها وتتحرك لأعلى بينما قاسم يتشم إعجاباً بما يرى ، ويتحرك مع جورج لأعلى  
جورج : سوزي اتعلمت من الستات المصريات . . الأم المصرية في رأيي  
أكثر أم عاطفية في الدنيا  
قاسم : فكرتني بماما ، تعرف يا مسيو جورج أنها أكثر حد واحشني في  
مصر

جورج : الأم هي الإنسان التي لا يمكن نساء أي مخلوق  
قاسم : معاك حق

قطع

---

مشهد/ ٣ صالة شقة سلافا نهار/ داخلي

سوزي وسلافا وقاسم وجورج يدخلون  
سوزي : بمناسبة إني انطمنت على صحة سلافا حاضل غدا ما حصلش  
لزوجها  
سوزي : جورج . . تعالى ساعدني  
جورج : أنا تعبان يا سوزي  
تسحب

سوزي : تعالى  
يتجهان للمطبخ ، قاسم وسلافا يجلسان ، سلافا لقاسم  
سلافا : لو مت صحيح يا قاسم ، تعمل إيه  
بتأثر شديد  
قاسم : أرجوكمي ، ما تقوليش كده أبداً . . لو متي أنا كمان حاموت . .  
الدنيا من غيرك مالهاش أي معنى  
سلافا : للدرجة دي بتحبيني يا قاسم ؟  
قاسم : حبي لكى فوق كل الدرجات ، حبي لكى بحر مالوش شطوط ،  
مالوش حدود ، مالوش آخر  
سلافا : على مهلك على إلا كلامك ده يموتني  
قاسم : قلت لك ما تجيبيش سيرة الموت  
قطع

---

مشهد/ ٤ مقر العروة الوثقى بباريس نهار/ داخلي

جمال الدين الأفغانى يحمل حقييته . فتحنى زغلول فى شدة التأثر

فتحى : مصر يا شيخ جمال الدين إنك تمشى ؟  
الأفغانى : قعدى ما عادش له معنى يا فتحى يا زغلول  
فتحى : طيب حنروح فين يا مولانا ؟  
الأفغانى : بلاد الله واسعة ، أكيد حالاقى مكان أو اصل منه الجهاد  
فتحى : باريس من غيرك أنت والشيخ محمد عبده حنقى مكان غير محتمل  
الأفغانى : سيبها ، حاول ترجع تانى مصر ، أنت ما فيش أحكام ضدك  
تمنعك من دخولها  
فتحى : أكيد حارجع  
الأفغانى : وأنت يا فتحى اهتم بالتعليم واللغات ، وحاول تترجم الأشياء  
النافعة وتنشرها فى مصر . مصر محتاجة للأفكار الجديدة  
فتحى : أكيد يا مولانا  
الأفغانى : استودعك الله

يحتضنه

فتحى : مع السلامة يا شيخ جمال الدين مع السلامة يا مولانا  
الأفغانى : أشوفك بخير  
يخرج من الباب المفتوح بينما فتحى يقف لتوديعه  
قطع

مشهد/ ٥ مكتب محاماة سعد زغلول نهار/ داخلى

سعد على مكتب يكتب مذكرة . الباب يدق  
سعد : ادخل  
ينفتح الباب وتدخل الأميرة نازلى . يقف وقد فوجئ تمامًا  
سعد : سموك  
تغلق الباب وراءها  
نازلى : تفتكر إنى ممكن أخسرك بالبساطة دى ؟  
سعد : سمو الأميرة ..  
تجلس على كنية وتشير إلى مقعد قريب



نازلى : اقعد يا سعد أفندى

يتردد لحظة ، يجلس

نازلى : بص يا سيدى ، أولاً أنا مقدرة موقفك من الإنجليز اللى بيحتلوا البلد ، ومش ناسية إنك كنت عضو فى جمعية سرية ، وإنهم قبضوا عليك ، وسجنوك ، وفصلوك من العمل كل دى أشياء تخليك تكره الإنجليز وتكره أى تعامل معاهم ، واللى يقول غير كده يبقى غلطان

سعد : سمو الأميرة أرجوك ، رغم كل الكلام ده من الصعب إنك تفهمينى نازلى : ليه ؟

سعد : لأن . لأن صعب أقول اللى عايز أقوله

نازلى : وورغم كده أنا مستعدة أسمععه مهما كان ، وأوعذك إنى مش حازعل سعد : سمو الأميرة أنا . . أنا

يبحث عن الكلام المناسب يبدأ الحديث بعد أن عثر على البداية

سعد : أنا بين بلدنا وبين رشيد خطوة . سنة ١٨٠٧ لما جه الإنجليز بقيادة فريزر عشان يحتلوا مصر طلع لهم أهل بلدنا وأهل البلاد الثانية اللى حوالينا وعرفوهم الهزيمة تبقى إزاي إحنا يا سمو الأميرة ناس دما حامى وبيننا وبين الإنجليز تار ، لكن سموك حبيبقى بينك وبينهم تار ليه

بصمت ، وتكلم هى بحدة

نازلى : سعد . من فضلك ما تزودش كلمة واحدة أوعى تفتكر إنك اكتر منى وطنية لأنك ابن فلاحين وأنا بنت العيلة المالكة . أنا اتولدت زيك فى مصر ، ما أعرفش لنفسى وطن غيرها ، وبالتأكيد أنا أعرف مصر أكثر منك ، لأنى عشت فى أوروبا ، وشفت هناك مدى الاهتمام بحضارتها ، وقرت عنها بأكثر من لغة إحنا صحيح ممكن نختلف فى الطرق اللى نعتقد إننا بنخدمها بيها ، لكن أرجوك ، بلاش تنهمنى أبداً فى وطنيتى ، أو تتعامل معايا باعتبارى غريبة عنك

سعد : عموماً . . أنا أسف إذا كنت ضابقتك

نازلى : شوف يا سعد أفندى . . الحاجة اللى عايزاك تعرفها ان وجود

الإنجليز في مصر حقيقة . . إنكارهم مش حيفيد ، اللي حيفيد فعلاً إننا نفكر ونشوف إزاي نستفيد من وجودهم لخدمة بلدنا الإنجليز عندهم جامعات . . ليه ما نبعثش ناس تدرس في جامعاتهم ؟ عندهم اختراعات ليه ما ناخدش الاختراعات دي ونستفيد بيها عندنا ؟ الإنجليز عندهم نظم حكم ممتازة ؟ ليه ما نتعلمش منهم ؟ ليه ما ناخدش الديمقراطية الإنجليزية ؟ ليه ما ناخدش مبدأ أن الملك يملك ولا يحكم ؟

سعد : إحنا ممكن نتعلم منهم كل شيء من غير ما يحتلوا بلدنا نازلي : لكنهم احتلوها فعلاً

سعد : يبقى ما فيش بينا وبينهم غير الحرب

نازلي : لأ فيه . . خلينا نفكر بالعقل الحرب اللي ممكن تطلع الإنجليز مش حرب كام واحد في جماعات سرية يهاجموا معسكر ولا يقتلوا عسكري . الحرب دي لازم تكون شاملة . يعني الصناعة المصرية تطرد الصناعة الإنجليزية . . المتعلم المصري ياخذ مكان الموظف الأوروبي الناس عموماً يبقى عندها وعى يرفض استمرار الإنجليز ، وده مش حيحصل في يوم وليلة الناس هلكوا من الحكم الفاسد لسنين طويلة . .

بأسى

نازلي : الناس فقدوا الرغبة في المقاومة . . ولحد ما يحصل حشد للناس لازم يكون فيه حد يتعامل مع الإنجليز وياخذ منهم أحسن ما عندهم لمصلحة البلد . .

سعد : رغم كل شيء يا سمو الأميرة نازلي هاتم ، من الصعب إني أتعامل مع الإنجليز

نازلي : وأنا ما قتللكش أتعامل معاهم ، لكن ما تمنعش غيرك من اللي بيعبوا بلدهم زيك تمام أنهم يتعاملوا معاهم . . ما تديش لنفسك الحق إنك تتهم الآخرين بالخيانة وتبقى أنت الوطنى الوحيد

يبدو أنه تأثر بكلامها ، لكنه متماسك رغم هذا فتتح الباب وتنادى

نازلي : هاتوا القضايا اللي معاكم دي

يدخل خادم سعد وخادمها يحملان ملفات القضايا . . تشير إلى المكتب

نازلى : حطوها هنا

يضعان الملفات

الخادم : خدمة تانى يا هاتم ؟

نازلى : شكراً

يخرجان

نازلى : من دلوقت حنبقى أصدقاء رغم اختلاف الآراء ، بدل ما نكون

أعداء . . اتفقنا ؟ فلاح عنيد

لا يرد ، ترغده برقة وهى تبسم

قطع

نهار/ خارجى

غابة مونبلييه

مشهد/ ٦

قاسم يسحب سلافا من يدها متجهاً إلى مكان قريب

سلافا : ما تفهمنى بس واخذنى كده ورايح على فين ؟

قاسم : رايحين نقعد فى قلب الغابة

سلافا : اشمعنى يعنى قلب الغابة

قاسم : لأننى عايز أكلمك فى موضوع يعتبر أهم موضوع فى حياتنا ، وعايز

الطبيعة تكون شاهدة عليه

تتوقف فى مكان به شجر وعصافير وماء . . إلخ

سلافا : أظن أن المكان ده هو قلب الغابة

قاسم : تقريباً

سلافا : إيه الموضوع الخطير اللى عايز الطبيعة تشهد عليه ؟

قاسم : أولاً عايز اعترف لك إنى باحبك

سلافا : عارفة .

قاسم : ثانياً عايز أطلب منك أهم طلب فى حياتى ، تتجوزينى

يا سلافا لازم تعرفى أنه مش سهل على الشاب الشرقى أن يعترف

لأى امرأة فى العالم أنه يحبها لأنه يعد للأسف أن الاعتراف بالحب

ضعف

تفاجأ

سلافا : الشاب الشرقى متجاوز امرأة مش للمحب يا قاسم الشاب الشرقى  
مممكن يحس أن التاج اللى على رأس المرأة هو عقلها .

قاسم : الشاب الشرقى غيرته خلته يؤمن بان اللى يحمى عفة المرأة مجرد  
غطاء يحجب بعض معالمها ، أما الحارس الأمين عليها هنا عقلها

قاسم : بأقول لك تتجوزينى ؟

سلافا : ده سؤال يا قاسم ؟ أنا يا قاسم أتخلقت عشانك حياتى قبلك كنت  
عاشاها فى انتظارك ، وحياتى من غيرك بعد كده لا يمكن تصورها

قاسم : يعنى موافقة ؟

سلافا : أسأل الطبيعة حوالينا ، أسأل قلب الغابة

قاسم : سألتهم ألف مرة

سلافا : وقالوك إيه ؟

قاسم : قالولى اسألك قدامهم عشان يكونوا شهود عليكى

سلافا : وأنا بأقول بأعلى صوتى للدنيا كلها . . أنا بأحب قاسم وموافقة  
اتجوزه

لقاسم جاده

بس على فكرة مش قبل التخرج

قاسم : مش باتكلم فى الميعاد دلوقت أنا باتكلم فى المبدأ

سلافا : من حيث المبدأ فأنا مش موافقة بس ، أنا باتلكك

قاسم : اشهد علينا يا قلب الغابة الحنون ، اشهدى علينا يا عصفير فوق

الغصون ، اشهد علينا يا شجر ، اشهد علينا يا رب إننا من اللحظة

ده بقى مصيرنا واحد وحبنا خالد ما فيش شىء يقف قصاده اشهد

علينا يا رب

سلافا : طب ياللا بينا

قاسم : إحنا لحقنا ؟

سلافا : لازم أقول لعملى ولأصحابى وللدنيا كلها إننا اتخطبنا . ياللا

تقف وتشده ، ينهض ، تجرى وهى تسحبه نحو الخروج من الغابة .

قطع

أمين يقرأ جريدة الأهرام تجلس إلى جواره الأم وتفيدة تدخل كهرمانة مسرعة بيدها خطاب

كهرمانة : سيدى أمين بك سيدى أمين بك . . جواب من سيدى قاسم أفندى

تفيدة تهجم على الخطاب ، تأخذه ، تحضنه

تفيدة : قاسم حبيبى

الأم يوجد

الأم : قاسم ؟

أمين يأخذ الخطاب

أمين : ورنى

يفتح الخطاب

الأم : اقرأ يا أمين بيه ، طمنى

تفيدة للأم

تفيدة : تعرفى أفندم ، أنا خايقة أموت من غير ما أشوف ولد قاسم حبيبى

الأم : ربنا يرجعه بالسلامة

أمين بيه تنغير ملامحه ، يقول بغضب

أمين : الولد ده اتجنن أكيد

تفيدة : اتجنن لزاي أمين بيه ؟

الأم : الجواب فيه إيه ؟

أمين : ابنك يا هانم عاوز يتجوز واحدة خواجاية

الأم : لزاي ده انا حاطة عينى على كام بنت بنات العائلات ومستنياه لما

يرجع

أمين : الولد ده عايز يعمل فى إيه ؟ السفر لبلاد بره قلنا زى بعضه ، لكن

يتجوز كمان من بلاد الخواجات ؟

الأم : مستحيل ويا عالم ح تسيه يرجع لنا وإلا حتأخذه منا وتخليه يعيش

معاها على طول هناك

الأب : حتى ده مش باين فى الجواب

تفيدة : أمين بك . ما دام هو الذي يتجاوز هو حر  
 أمين : امنى الكلام خالص يا تفيدة هو إيه الذي جرى في الدنيا ؟ الولاد  
 خلاص بقوا هم الذي بيختاروا ويرفضوا العرايس على مزاجهم ؟ لا  
 أنا لازم أحط حد للفوضى دي . . واضح أن التساهل مع الولد ده  
 بوظله الذي بيطلبه ده مرفوض  
 قطع

---

مشهد/ ٨ أمام المدرسة السلطانية بيروت نهار/ خارجي

نتوقف عربية يجرها حصان ويحيط بها الناس وطلبة العلم - يخرج محمد عبده من العربية ،  
 يتجه للمدرسة التي نجد على بابها شيخاً وقوراً ، يسلم عليه محمد عبده  
 الشيخ : أهلاً بك في بيروت يا شيخ محمد  
 محمد : كنت متأكد إنى خارج لها تاني  
 الشيخ : تلاميذك في انتظار دروسك في علم التوحيد  
 محمد : إن شاء الله نكمل مع بعض دراسة هذا العلم وتكون محطة التدريس  
 في المدرسة السلطانية بيروت من أخصب مراحل العمر  
 الشيخ : اتفضل يا شيخ محمد . . اتفضل  
 يدخلون

قطع

---

مشهد/ ٩ المدرسة السلطانية نهار/ داخلي

قاعة للتدريس على الطراز الإسلامي .  
 محمد عبده يجلس على مقعد عال مزين بالارابيسك وأمامه الطلبة  
 محمد : علم التوحيد يا أبنائي هو علم الدفاع عن العقائد الإيمانية بالأدلة  
 العقلية . وهنا نتوقف عند كلمة هامة ، هي كلمة (العقلية) وهي  
 تشير إلى أهمية العقل في فهم الدين الإسلامي والدفاع عنه .

طالب ١ : لكن بعض الفرق يا مولانا مثل أهل الظاهر كانت ترى أن الدفاع عن الدين لا يكون بالعقل ، بل بالنصوص الدينية .  
محمد : حتى هذه الفرق يا ولدي كان عليها أن تحدد منهاجها الفكري معتمدة على الأدلة العقلية

للأولاد جميعاً

محمد : العقل يا أبنائي هو الشيء الذي ميز به الله سبحانه وتعالى بين الإنسان والحيوان . وسبب تخلف المسلمين الآن هو ابتعادهم عن العقل ، لأن العقل هو وسيلة الإنسان لتحقيق العلم والتطور في الحياة . نعود إلى موضوعنا أقول أن علم التوحيد هو علم الدفاع عن العقائد الإيمانية بالأدلة العقلية ، وفي ضوء هذا فإننا سنقوم بالتعرف على آراء الفرق الإسلامية مسترشدين بالعقل

طالب يبدو عليه التعصب

صوت ٢ : أنا أرفض هذه الطريقة يا حضرة الشيخ

محمد : لم ؟

صوت ٢ : العقل ليس هو الوسيلة الصحيحة للتعرف على الحقائق . .

الحقائق لا تصل إليها إلا بنور القلب

محمد : من الخطأ يا أخی أن نجعل العقل والقلب في مواجهة . الإنسان فيه عقل وقلب ، ولا يمكن أن يحيا بواحد دون الآخر

صوت ٢ : لماذا إذن تريد منا أن يكون العقل وحده هو دليلنا عند التعرف على علم التوحيد ؟

محمد : لأن لكل علم وسيلة تناسبه ، ولو كنا في مجال التصرف لكان كل حديثنا عن القلب لكننا في مجال علم عقلی

صوت ٢ : أنا لن أشارك في طلب هذا العلم ، ويجب أن تعلم يا أستاذ أن العقل هو سبيل الشيطان إلى الكائنات ، وإن إبليس حين قال لخالقه ﴿ أسجد لمن خلقت طيئاً ﴾ كان مخلوقاً يقيس الأشياء بعقله ، ويرى أن النار أشرف من الطين ، وأنه لا يصح لشيء أسمى أن يسجد لشيء أدنى . .

وهو يتجه للخارج

صوت ٢ : سلاناً

يخرج ومحمد عبده يواصل

محمد : العقل يا أبنائي محور من محاور الإسلام الكبرى . . العقل هو أساس التكليف ، المجنون لا يكلف ، والطفل الذي لا يدرك ويميز لا يكلف . العقل هو الأساس في التكاليف الشرعية من صلاة وزكاة وصوم وغيرها . وقد ورد ذكره في القرآن باعتباره وسيلة لإدراك آيات الله . قال تعالى في سورة البقرة : بسم الله الرحمن الرحيم ﴿ كذلك يبين الله لكم آياته لعلكم تعقلون ﴾ صدق الله العظيم . وقال في سورة آل عمران ﴿ قد بيننا لكم الآيات إن كنتم تعقلون ﴾ ولهذا يا أبنائي فالأخذ بالمنهج العقلي هو سبيلنا لفهم الدين عامة ، ولمعرفة علم التوحيد على وجه الخصوص

قطع

نهار/ داخلي

غرفة قاسم بمونيليه

مشهد/ ١٠

حسن يمسك في يده خطابًا مفتوحًا . قاسم يبدو عليه عدم الرضا

حسن : يعني أبوك مش موافق على جوازك من سلافا ؟

قاسم : للأسف ، جوابه بيقول كده

حسن : وحتعمل إيه ؟

قاسم : حاخطب سلافا رغم كل شيء

حسن : وتعارض أبوك ؟

قاسم : لا ، أنا مش حأبلغه بالخطوبة ، لكن حافضل وراه بالجوابات لحد

ما يوافق

حسن : اللي يشوف هدوءك المستمر لا يمكن يتخيل عتادك وجراتك

قاسم : الهدوء مش معناه أن الإنسان عديم الإرادة . . لازم تعرف يا حسن

إنى ضد الديكتاتورية على طول الخط ، حتى لو كانت دكتاتورية

الأب على ولاده .

حسن : وأمتى حتعلن الخطوبة ؟

قاسم : فى أقرب فرصه



مشهد / ١١ صالة شقة أم سلافا ليل / داخلي

يبدأ المشهد بالزينة تملأ الكادر ثم تتبين أنها معلقة في شقة سلافا . بعض الطلبة وبينهم حسن وجوليا وسوزى . وبعض الأقارب حول قاسم وسلافا . الكل يضحكون في سعادة ، قاسم يضغظ يد سلافا ترى في عينيها سعادة . حسن يقول لجوليا مشيراً إلى سلافا

حسن : اقرصها في ركبتيها

جوليا : أقرصها ليه ؟

حسن : في مصر يقولوا إن اللي تقررص العروسة في ركبتيها تحصلها في

جمعتها

جوليا : بجد ؟

تقررصها

جوليا : باردون سلافا ، أنا عايزة اتخطب زيك

يأتى جورج من الداخل حاملاً طيلة «دريكة»

جورج : بصوا . . شوفوا المفاجأة دي

قاسم : طيلة شرقي ؟

جورج : أنا جبتها تذكاري معايا من مصر

يشير لزوجته

جورج : سوزى كانت من هواة العزف عليها

حسن يأخذ الطيلة من جورج ويعطيها لسوزى

حسن : كده تبقى اتحلت ، أنا اللي حاحي الحفلة دي سمعينا الواحدة

ونص الرايقة بتاعة مصر

ياخذ وشاح جوليا ويتحزم به

عن إذنك

تطبل سوزى ، يرقص حسن ، سوزى تشاركه الرقص ، حسن يشير للطلبة

حسن : ما تقوم يا ابني أنت وهو . . اتعلموا حاجة تنفعكم

ينهضون يرقصون ، تنهض سلافا مخاطبة قاسم  
 سلافا : قوم ارقص معايا  
 قاسم : الناس ترقص للعريس لكن العريس ما يرقصش  
 سلافا : أنت حر ، أنا حارقص  
 ترقص ، يوسعون لها على شكل دائرة . أثناء الرقص تغيم أمامها الرؤى ، تقف ممسكة  
 رأسها ، يتجمدون ، تسقط ، يسرع قاسم ليدركها  
 قاسم : سلافا . . مالك يا سلافا ؟  
 لا ترد ، الأب الأم يسرعان نحوها  
 سوزى : بنتى . . مالك يا حبيبتى ؟  
 جورج يحملها ويتجه لغرفتها  
 جورج : حد ينادى لنا دكتور يا اولاد . . بسرعة  
 حسن يخلع الوشاح الأسود ويعيده لجوليا ، الوشاح يقطع الكادر فى لقطة ذات دلالة  
 قطع

---

مشهد/ ١٢      غرفة نوم سلافا      ليل/ داخل

سلافا غائبة عن الوعي ، الدكتور انتهى من الكشف ويغلق حقيبتة ، أمامه جورج وسوزى  
 وقاسم  
 جورج : عندها إيه يا دكتور ؟  
 الدكتور : بتكم لازم تنتقل حالا للمستشفى  
 سوزى : طب نفهم إيه اللى حصل لها فجأة  
 الدكتور : صعب تحديده ، لازم نشكل مجلس طبى لفحص الحالة  
 قاسم : هى الحالة خطيرة يا دكتور ؟  
 الدكتور : من فضلكم أجعلوا الأسئلة لما نعمل المجلس الطبى وانقلوها  
 فوراً للمستشفى  
 جورج : حالا حنقلها  
 قطع

مشهد/ ١٣ عمر بمستشفى بفرنسا ليل/ داخلي

ممرضة تدفع ثرولى ترقد عليه سلافا بخطوات نشطة  
قطع

مشهد/ ١٤ غرفة الكشف بالمستشفى ليل/ داخلي

الأطباء حول سلافا الممددة قد انتهوا من الفحص . يسرون نحو منضدة ،  
يجلسون .

كبير الأطباء : فى اعتقادى أن هناك شيئًا بالمخ ربما كان وربما  
الدكتور : كان هذا رأى أيضًا  
طبيب ١ : أنها غير مصابة بالسكر ولا بالكبد لتدخل فى مثل هذه الغيبوبة  
طبيب ٢ : والقلب أيضًا سليم  
كبير الأطباء : أنه المخ  
الدكتور : معنى هذا أننا لن نستطيع أن نفعل شيئًا ؟  
كبير الأطباء : لا أحد يجرؤ على الاقتراب من المخ  
قطع

مشهد/ ١٥ مكان الانتظار بالمستشفى ليل/ داخلي

الأب والأم وقاسم مع الطبيب  
جورج : معنى كده أنها حفضل غاية عن الدنيا كده ؟  
الدكتور : للأسف ، ما عنديش إجابات قاطعة ، كل اللى أقدر  
أقوله لكم ، أدعوالها وصلوا عشانها  
قاسم : مش ممكن . . مستحيل  
سوزى : بتى ، دى لسه شابة  
الطبيب يربت عليها ، يتصرف . قاسم يبكى ، يستند على الحائط وينخرط فى البكاء .

## قطع

مشهد/ ١٦ المدرج بجامعة مونيخيه نهار/ داخلي

قاسم يدخل حزينا ومعه حسن . أوجست يعترض طريقه  
 أوجست : شفت نهاية علاقتها بيك أكيد عديتها بمرض من الأمراض اللي  
 جايها معاك من بلدك المتخلفة  
 قاسم يهوى على وجهه بصفعة لولا أن حسن يمسك يده  
 حسن : بلاش تفقد أعصابك يا قاسم  
 قاسم : الحيوان ده لازم أآديه  
 حسن : قلت لك ما تخليش زعلك يتحكم فيك . . إهدا . .  
 قاسم : سيبني يا حسن سيبني  
 أوجست يبرود  
 أوجست : أنا حاعرف أخد حقى  
 يتجه للخروج أثناء دخول لرنود فيصطدم به  
 لرنود : إيه يا ابني ، مش تحاسب ؟  
 أوجست : مسيو لرنود أنا جاي اشتكى لك من قاسم أمين . .  
 لرنود : أوجست أنت بالذات مش مسموح لك بالشكوى من أى حد  
 أوجست : كان عايز يضربني

آمرا

لرنود : أنت مستفز ، أنا عارفك أقعد ومش عايز أسمع صوتك  
 يجلس فى غيظ ينظر لقاسم فى تحد . لرنود يبدأ الشرح  
 لرنود : حتتكلم النهاردة عن وضع المرأة فى التشريعات فى العصور  
 المختلفة . المرأة فى شريعة حمورابى كان لا قيمة لها كان من  
 الممكن قتلها ودفع دينها أو تقديم بديلة لها أما المرأة فى العصر  
 اليونانى فكانت مخلوقة أقل من الرجل . أما فى العصر الرومانى  
 فالمرأة كانت تنقطع صلتها بأسرتها بالزواج . وفى الهند كانت

المرأة تابعة للرجل لدرجة أنها كانت تحرق نفسها إذا مات زوجها

لحسن

لرنود : حسن . .

حسن : نعم

لرنود : كلمنا عن المرأة في الإسلام

حسن : أنا . . أنا . . اقترح أن يتكلم قاسم في هذا الموضوع

لرنود : وأنت ما تتكلمش ليه ؟

حسن : قاسم أشطر مني في الكلام في الموضوع ده

لرنود : أقعد

لقاسم

لرنود : كلمنا أنت يا قاسم

يبدأ قاسم الحديث

قاسم : المرأة في الإسلام تتساوى مع الرجل في الخلق يقول القرآن «اتقوا

ربكم الذي خلقكم من نفس واحدة وخلق منها زوجها» وهي تتساوى

مع الرجل أيضًا أمام الله في تحمل نتيجة أفعالها يقول القرآن «إنا

خلقناكم من ذكر وأنثى وجعلناكم شعوبًا وقبائل لتعارفوا إن أكرمكم

عند الله اتقاكم» وتتساوى المرأة مع الرجل في الحقوق والواجبات

يقول تعالى «ولهن مثل الذي عليهن بالمعروف» إن الدين الإسلامي

قد يقدم المرأة أحيانًا ففي الحديث النبوي يؤكد النبي أن الأم أحق

بحسن صحبة الابن ثلاث مرات ، بينما يذكر الأب مرة واحدة

لرنود : هذا كلام ممتاز ، للأسف نحن لا نعرف شيئًا كثيرًا عن الإسلام

أوجست : اسمح لي يا بروفيسير بتوجيه بعض الأسئلة لقاسم

لرنود : بدون استفزاز

أوجست : ما هي الحقوق التي أعطاهها الإسلام للمرأة

قاسم : أعطاها حق الإرث ، حق العمل ، حق التصرف في مالها دون ولاية

من أحد ، حق الموافقة على الزواج ، حق طلب الطلاق في حالات

معينة

لرنود : هل يمكن ؟ أن المرأة الأوروبية حتى الآن لا تتمتع ببعض هذه

الحقوق

أوجست : أنا أعتقد أن هذا الكلام فيه مبالغة لقد قرأت في بعض المقالات  
عن تعدد الزوجات بين المسلمين وعن ارتفاع نسبة جهل المرأة

الفاضح

لرنود : ما رأيك يا قاسم

قاسم : بكل أسف يا بروفيسير نحن نعيش ازدواجية . الدين يقول شيئاً  
والمجتمع الذى تأخر بفعل الدكتاتورية يفعل شيئاً آخر العيب فى

الناس وليس فى الدين

لرنود : حسناً يا قاسم أنتى أكلفك يبحث عن . . عن المرأة فى الدين  
الإسلامى وسيكون تقديرى فى أعمال السنة على أساس هذا البحث

قاسم : أعدك بهذا يا بروفيسير

قطع

ليل / دخلى

غرفة سلافا بالمستشفى

مشهد / ١٧

سلافا بجوارها أمها . . سلافا تفتح عينيها

سلافا : ماما ؟ هو إيه اللى حصل ؟

سوزى : سلافا . . أنتى فقتى يا حبيبتى ؟

سلافا : إيه اللى حصل ؟ أنا فاكرة أنى كنت بأرقص وسعيدة

سوزى : ما حصلش حاجة تعبى شوية

سلافا : وفين قاسم

سوزى : زماته جاى

دق على الباب

سوزى : ادخل

يفتح الباب ويدخل قاسم يحمل باقة ورد

قاسم : يومكم سعيد

سلافا بضعف

سلافا : قاسم

يجرى إليها يمسك يدها

قاسم : سلافا ؟ سلامتك . . عاملة إيه دلوقت ؟

تهز رأسها ممتنة

سلافا : بخير

الأم تترقق في عينيها الدموع تنسحب من الحجرة

قاسم : سلافا ، الجامعة من غيرك مالهاش طعم الدنيا وأنتى بعيدة عنى

باهتة مالهاش لون ، والبسمة مالهاش وجود

سلافا : يا حبيبى يا قاسم

قاسم : سلافا ، أنتى بالنسبة لى الحب والنور والحياة وكل شىء جميل

سلافا : أنا أسفة يا حبيبى إذا كنت حولت ليلة خطوبتنا لوقت غير سعيد

بالنسبة لك لكن أوعدك أنى أعوضك عن اللحظات دى

قاسم : أرجوكى ، بلاش أسف أنا متأكد إنك لا يمكن تقصدى غير كل

شىء جميل

سلافا : أنا مش عارفة اللى بيحصل لى ده

مداعباً

قاسم : عندنا دايماً يفسروا الحاجات اللى زى كده بأنها حسد ، انتى أكيد

محسودة . .

سلافا : لا يا قاسم أنا ما بأمش بالتفسيرات غير العلمية دى أنا لازم أسأل

الدكتور وأعرف إيه السبب لحالتى دي

قاسم : أنا مش حاستنى لما أنتى تسأليه أنا حاروح له حالاً عشان اطمئن

واطمنك

سلافا : ما تخيش علي

قاسم : أنتى تؤمرينى

يخرج بظهره وهو ينظر إليها وهى تبسم ابتسامة شاحبة

قطع

الطبيب : ما أخبش عليك الحالة صعبة  
 قاسم : صعبة لحد فين ؟ إحنا المفروض حتتجوز بعد نهاية العام الدراسى  
 الطبيب : مانصحكش  
 قاسم : ليه يا دكتور  
 الطبيب : تقريرنا الطبي أنها مش حتعيش أكثر من ست شهور واضح أن فيه  
 ورم فى المخ وأنه بيزيد يوم هن يوم وجائز يجى وقت تنشل فيه أو  
 تفقد فيه الوعي تمامًا  
 قاسم : لأ لأ . . مش معقول  
 الطبيب : أرجوك . . تماسك  
 قاسم : لو سلافا جرى لها حاجة أنا حاموت قبلها  
 الطبيب : من فضلك بلاش العواطف الشديدة وأن كنت بتحبها فعلاً  
 خليك جنبها الفترة الجاية وحاول تسعددها بقدر الإمكان  
 قطع

---

مشهد/ ١٩                      عمر بالمستشفى                      نهار/ داخل

قاسم يسير ذاهلاً ، ييكى فى صمت وهو يتجه للخروج . يمكن أن نسمع أغنية فى الخلفية  
 لوصف حالته . «أغنية»

مزج

---

مشهد/ ٢٠                      شارع المقهى بمونيليه                      ليل/ خارجى

قاسم يمر أمام المقهى الذى كان يجلس فيه مع سلافا . تستمر الأغنية .  
 الأغنية

مزج



حيث كان قاسم يجري وراء سلافا ويصارحها بحبه ويرى سلافا تجري كما كانت تجري من قبل بينما الأغنية تستمر قاسم يلقي بنفسه على أحد المقاعد فى غاية الإنهاك مع نهاية الأغنية

### قطع

سلافا وأمها

سلافا : ماما قاسم لسه ما رجعتش من ساعة ما راح للدكتور ؟

سوزى : يمكن افكر حاجة نسي يعملها

سلافا : ماما . . تفكرى ان قاسم ممكن يسبنى عشان أنا عيانه ؟

سوزى : قاسم ؟ لا طبعا قاسم ده انسان نادر

سلافا : ماما . . هو أنا عيانه بيعا خطير ؟ من فضلك يا ماما قولى أنا عندى

ليه ؟

الأم تغالب دموعها

سوزى : أنتى . . أنتى ما عندكيش أى حاجة أنتى بخير ويكرة حنخرجى

من المستشفى وتبقى زى الأول وأحسن كمان

سلافا : أنا فعلا عايضة أخف . . عايضة أخف عشان اسعد قاسم

### قطع

قاسم وحسن

حسن : طب فهمنى بس ، بعد ما عرفت حالتها ناوى تعمل ليه ؟

قاسم : ناوى ما اسببهاش لحظة واحدة واتمسك بيها أكثر من الأول

حسن : لو كان أبويا يجي يتعلم منك الوفاء للست اللي ارتبط بيها بدل  
ما كل يوم يتجوز واحدة

قطع

نهار/ داخل

هو قصر أمين بك

مشهد/ ٢٤

يدان تمزقان خطابًا ، تلقيه في الأرض تبعد الكاميرا لتجد أن اليدين هما يدا أمين بك الذي  
يقف غاضبًا بين الأم وتفيده

أمين : الولد ده بيتحدثني ؟ جات له الجرأة أنه بيعت يقول لى أنه مصمم  
على الجواز بالبنت الفرنسية ؟

تفيده : برافوا عليه أفندم

أمين : أنتى بتقولى إيه ؟

تفيده : ولا حاجة أفندم

الأم : يا أمين بيه ما دام الولد مصمم ويقول إن البنت كويسة وبنت ناس وانه  
حار يرجع يعيش بيها هنا تبقى هاوده عشان ما يطلعش من طوعك  
أمين : أنا ما بهاودوش ، أبنى الوحيد لازم يسمع كلامى خصوصًا فى  
مسألة الجواز . . هو قاهم أنه حيقدر ياخد مركز محترم من غير ما  
يناسب عيلة كبيرة ؟ النسب يا هانم هو اللي بيفتح الأبواب للمراكز  
العالية

تفيده : أمين بيه ابتنا قاسم من حقه يختار البنت اللي هيعيش معاها عمره  
كله أفندم . .

أمين : ما فيش ولاد بيختاروا لنفسهم يا هانم آمال الأبهايت بيعملوا إيه ؟

تفيده : أبهايت بنات بس أفندم هم اللي بيختاروا لبنااتهم

أمين : وأبهايت الولاد كمان أنا حايت له جواب أقول له أنه إذا ماكانش  
حيسمع كلامى حاقطع عنه المصروف

الأم : بلاش يا أمين بيه ، ما تخليش الشيطان يدخل بينكم أنت عارف إن  
قاسم دماغه ناشفة

أمين : أنا حاكسر له دماغه الناشفة دي

الأم : اعمل معروف يا أمين بيه ده ابتنا الوحيد  
أمين : أنتى تسكتى خالص . مفيش حد بوظه غيرك . لكن كل الأمور لازم  
تتاخذ بالشدة والانضباط يرجع البيت ده تانى  
قطع

نهار/ داخلي

مكتب سعد

مشهد/ ٢٥

نازلى تدخل على سعد الذى يقف

سعد : برنيس

نازلى : إيه يا سعد أفندى . . مصمم على مقاطعتى ؟

مرتبكاً

سعد : ا . . . أبداً

نازلى : آمال ما بتجيش صالونى ليه ؟

سعد : مشاغل

نازلى : ما فيش حاجة اسمها مشاغل ، أنا حايت لك العربية الليلة تجيبك

عشان تحضر الصالون غصب عنك

سعد : أرجوكى ما تتعبيش نفسك

نازلى : أنت لسه زعلان منى ؟

سعد : مش حكاية زعل

نازلى : سعد أفندى خليك صريح

سعد : بصراحة لسه مش قادر أتصور أنى ممكن أجى الصالون وأقابل ناس

إنجليز

نازلى : لأ لازم تتصور ولعلمك بقى أنا فاتحت سيرافلين بيرنج فى

موضوع يعتبر حلم لكل المصريين ، ولو اتنفذ حيقى الإنجليز

حققوا أكبر حلم كان يتمناه المصريين

سعد : حلم إيه ؟

نازلى : إن المصريين هم اللى يكونوا مجلس نظار الحكومة ، يعنى لأول

مرة مصر حيحكمها المصريين

سعد : وتفتكرى أن السيرايڤلين جاد فى كلامه ؟  
 نازلى : حتى لو كان بيناور ، السياسة بطبيعتها قائمة على المتاورات ،  
 ولازم تكون متاورين إحنا كمان . . سعد صدقنى . . أنت لازم  
 تكون جنبى  
 سعد : سمو الأميرة . .  
 تضع أصبعها على فمه بدلال  
 نازلى : شش . . حايعت لك العربية الليلة  
 قطع

مشهد/ ٢٦ قاعة بقصر الأميرة نازلى ليل/ داخل

عدد ملحوظ من الأجانب بشياهم المدنية والعسكرية يجلسون يتحاورون ، بعض  
 الأتراك ، وعدد من المصريين سعد يجلس أشبه بالمتفرج بينما الجرسونات يدورون بكل  
 أنواع المشروبات . الأميرة تمر على المدعويين لتحييتهم والسلام عليهم  
 نازلى : Bonsoir, Bon Arrivé . Hello, welcome

سعد يتابع نازلى التى تصل إليه وتجلس بجواره  
 البيت بيتكم يا جماعة . . خدوا راحتكم . عارف يا سعد أفندى ،  
 رغم كل الزحمة دى أنا حاسة أن فيه شىء خفى ما حدش شايفة بينى  
 وبينك

سعد : شكرًا  
 يدخل خادم يهمس لها فى أذنها ، تقف معلنة  
 نازلى : فيه مفاجأة الليلة يا جماعة . . عارفين إيه هى ؟  
 الوجوه تنطلق إليها

أصوات : مفاجأة إيه ؟ ؟ Attention Whats the Matter  
 نازلى : سيادة السيرايڤلين بيرنج بنفسه حيشرفنا  
 رجل على الباب يعلن

الخادم : حضرة المعتمد البريطانى فى مصر  
 يدخل اللورد كرومر الأجانب يصفقون يحيى بيديه ورأسه . الأميرة تشير لمقعد فى

نازلى : Please my Sir

السير : Thank you

يجلس الخادم يقدم له صينية المشروبات ، يتناول كأساً

نازلى : على فكرة جناب السير ايفلين قال لى أنه حريص على فتح حوار صريح مع ضيوف صالونى . . تقدروا تسألوه فى أى موضوع يعجبكم . . ما فيش أى خطوط حمرا

يقف سعد وفى عينيه تحد

سعد : جناب السير امتى ناويين تصدروا . . قرارات بالعفو عن زعماء

الأمة محمد عبده ، عبد الله النديم ، محمود سامى البارودى ،

عرايى باشا ، وغيرهم

السير : منطقى جداً . . very logic خصوصاً إذا كان من شاب مثلك . .

whats your name?

سعد : سعد زغلول

السير : شوف مستر سعد ، بالنسبة للعفو أكيد حيصدر عفو عن كل

المدنيين الللى اشتركوا فى المقاومة ضد الإنجليز ، وإحنا بالفعل

أفرجتنا عن ناس كثير كانوا مسجونين والشيخ محمد عبده حنعفو

عنه ونسمح له بالعودة لمصر لكن بالنسبة للعسكريين No مش

حتفرج عنهم دلوقت أبداً Never

سعد : ما تنساش يا جناب اللورد أن العسكريين دول كاتوا بيدافعوا عن

بلدهم

محتدًا

السير : No ، ما كاتوش بيدافعوا عن بلدهم كانوا بيمثلوا تهديد لحاكم

البلاد and we will not allow for anyone إنه يهدد مستر خديوى

سعد : مسألة التهديد دى فيها كلام لان

نازلى تقاطعه برقة

نازلى : سعد أفندى ، أنت كده حتاخذ الجلسة لوحذك ، فيه ناس تانية

عايزة تسأل

السير : واضح أنها مصيدة برنيس نازلى

نازلى : My Sir أنت طلبت تعرف الناس بتفكر فى إيه وعايضة إيه

السير : اول رايت

ينهض أحد المصريين

مصرى : أنا عايز أناقش مع جناب السير موضوع مصر للمصريين ، هل

فعلاً الإنجليز ناويين يخلوا المصريين يشكلوا مجلس النظار ؟

السير : listen to me my friend إحنا ما بهمناش ان الناظر يكون مصرى

أو تركى اللى بهمنا أنه يكون الناظر كفاء لو فيه مصريين يقدروا

يشكلوا الحكومة Why not I promise to give them a complete

chance

سعد لنفسه

سعد : يا ترى نسبة الصدق فى الكلام ده قد إيه . نازلى نفسها قالت السياسة

مناورة ، لكن رغم كل شىء المناقشة الليه افادتني كثير كثير

قطع

نهار/ داخلى

غرفة قاسم بمونبليه

مشهد/ ٢٧

قاسم على مكتبة يفتح دفترًا ويمسك بالريشة ليكتب ، بينما حسن يمتعه ، وأمامهما خطاب  
الوالد

حسن : بلاش ترد على أبوك وأنت متضايق كده . . ما تخليش العند يفسد

العلاقة بينكم

قاسم : أنا حاتجوز سلافا يا حسن مهما كانت الظروف . أبويا ما جريش

الحب أبدًا ، ومستحيل أخلى رأييه يفسد على حياتي

حسن : برضه ما تردش عليه وأنت متضايق

ياخذ الدفتر منه ويغلقه . قاسم يقول وكأنه يخاطب نفسه

قاسم : مش كفاية القدر عايز يحرمنى منها ؟ كمان والدى عايز يقف بينا ؟

ده حرام والله حرام

قطع

الأم تقود قاسم بينما سلافا فى فراشها مستندة إلى ظهر السرير

سوزى : اتفضل يا قاسم يا ابنى

قاسم مبتسماً فى لهجة تمثيلية

قاسم : بونسوار مدموازيل

سلافا : قاسم

تمد له يديها يمسك يديها ، يجلس على طرف السرير

قاسم : كتبت لك المحاضرات اللى فاتتك وجيت أشرحها لك بنفسى

سوزى : تصور يا قاسم أنها مصممة تروح الكلية

لسلافا

قاسم : مش أحسن تستنى لما ترتاحى ؟

سلافا : أما ما فيش حاجة ، أنتم هايزين تحسسونى اتى عيانة بالعافية ؟

سوزى : بلاش عند يا سلافا

سلافا : بلاش تصممى أنتى يا ماما على إنى عيانة

لقاسم

سلافا : قاسم ، أنت شايف انى عيانة ؟

يغالب نفسه

قاسم : أنتى بالنسبة لى وردة مفتحة فى كل الأوقات

سوزى : خلاص ، يبقى نفوت عليها تاخذها كل يوم وأنت رايح

الكلية وتجيبها معاك وأنت راجع

سلافا محتجة

سلافا : ماما . . أنا مش عيلة صغيرة

قاسم : أفهم من كده إنك مش هايزانى أمشى معاكى ؟

ترغده

سلافا : أنت تسكت خالص ما تنغظنيش

يبتسم

قطع

قاسم يسير مع سلافا . أوجست يقابلها  
أوجست : دور كويس اللى بتقوم بيه ده  
لسلافا

أوجست : دور الحارم طبعاً يا ستى ، حارم بيلاش  
قاسم ينظر إليه متمالكاً أعصابه ويستمر فى طريقه بينما سلافا تقول له  
سلافا : ولد غلس غلاسة  
يشيعها أوجست بنظرته لبعض الوقت ثم يواصل طريقه  
قطع

محمد عبده يخرج من المدرسة منصرفاً . يتقدم منه قس ، يقف أمامه لحظة  
القس : الشيخ محمد عبده ؟  
محمد : أيوه  
القس : أنا القس إسحق تيلور  
محمد : أهلاً وسهلاً بيك  
القس : اللى سمعته عنك خلاى اهتم بمقابلتك ، عندك مانع تقعد شوية ؟  
محمد : إطلاقاً  
يشير للمدرسة  
محمد : اتفضل  
القس : أفضل تقعد فى مكان مفتوح  
محمد : ما عنديش مانع  
قطع



لقطة عامة

قطع

محمد عبده والقس إسحق تيلور يسيران نحو منضدة ، يجلسان

محمد : كلي آذان صاغية يا حضرة القس

القس : الموضوع باختصار يا شيخ محمد أن الاحتلال يحاول يلعب على

نغمة مسيحي ومسلم ، وده شيء خطير ، عشان كده أنا جيت

أطلب منك المشاركة في جمعية للتقريب بين الأديان ، وأرجو

أنك ما تخييش ظني فيك

محمد : بالعكس أنا بأرحب جدًا بالفكرة

القس : يعني مش حتسب لك حرج ؟

محمد : إطلاقًا ، والحقيقة إنني شايف أنه لا بد من غرس روح التسامح بين

أبناء الأديان المختلفة ، وده جوهر الإسلام . المسلم ما يبقاش

مسلم إلا إذا آمن بكل الأديان السابقة

القس : ما كنتش متخيل أن مهمتي حتكون بالسهولة دي

محمد : على فكرة أنا عندي وقت لا بأس به ومستعد أشارك بأي دور تطلبه

الجمعية

القس : بالتأكيد حضرتك حتلعب معانا دور كبير ، ده غير ان اسمك

حيخدم الجمعية خدمة عظيمة ، وحيدتها قيمة قدام الناس

محمد : المهم ربنا يقدرنا ونقدر من خلالها نقدم للناس خدمة حقيقية

قطع

مشهد/ ٣٢ مكرر (أ) كنيسة لبنانية نهار/ خارجي

لقطة من الخارج

قطع

مشهد/ ٣٢ مكرر (ب) داخل الكنيسة نهار/ داخلي

محمد عبده ، بجواره القس ، أمامهما الجمهور  
محمد : التقريب بين الأديان مما جاء به الدين الإسلامي «قل يا أهل الكتاب  
تعالوا إلى كلمة سواء بيننا وبينكم» ان القرآن وهو منبع الدين  
الإسلامي يقارب بين المسلمين وأهل الكتاب حتى يظن المتأمل  
فيه . . أنهم منهم لا يختلفون عنهم إلا في بعض أحكام قليلة

قطع

مشهد/ ٣٣ غابة مونيبييه نهار/ داخلي

قاسم وسلافا في الغابة

قاسم : ممكن أفهم ليه أصريتى على اتنا نيجي الغابة ؟  
سلافا : لأن هو ده المكان اللي أنت شهدته على أن مصيرنا واحد وحبنا  
خالد وهو ده المكان اللي باتمنى أموت فيه  
قاسم : أرجوكي ما تجييش سيرة الموت  
سلافا : قاسم ، أنت فاهم أني مش عارفة حالتي ؟ أنا عارفة أني حاموت ،  
نظرات كل اللي حولي أكدت لى المعنى ده رغم أن ما حدش فتح  
بقه بكلمة  
قاسم : لا يا سلافا ، أنتي حتميشي ، حتميشي وحتجوز ، وحنملا الدنيا  
ولاد صغبرين والولاد حيكبروا ويجيبوا لنا أحفاد واحنا حنبقى

عواجز ونمشى مسنودين على عصيان ، ونفضل نحب بعض  
 لأخر دقيقة من العمر  
 سلافا : أنا شخصيا حافظ لك لأخر دقيقة فى عمرى ، وبعد آخر دقيقة  
 فى عمرى . . يا سلام يا قاسم لو كنتم تقدروا تدفونى هنا  
 قاسم : سلافا . . الرحمة . . قلبى ما يستحملش كل القسوة دى  
 سلافا : أنا أقسى عليك ؟ ربنا يشهد أن كل كلمة باقولها مالهاش سبب غير  
 الحب اقعد يا قاسم . . اقعد  
 تجلس ويجلس بجوارها . . تفرد ذراعيها على ظهر المقعد وتغمض عينيها يغمض عينيه  
 سلافا : غمض عينيك أنت كمان يا قاسم تعال كل واحد متنا يفكر فى  
 الثانى يفكر فيه لوحده وينسى كل شىء فى الدنيا غيره  
 وهو مغمض العينين  
 قاسم : أنا بافكر فىكى وأنا مغمض وأنا مفتوح وأنا معاكى وأنا بعيد عنك ،  
 فى صحبانى وفى نومى ، أنتى يا سلافا كل شىء فى حياتى  
 سلافا : فكر من غير ما تتكلم ، أنا حاسمك من غير كلام قلبى بيتقل لى  
 كل دقة فى قلبك  
 يصمتان وعيونهما مغمضة  
 قطع

نهار/ داخلى

عيادة الطبيب

مشهد/ ٣٤

الأم سوزى والأب جورج مع الطبيب  
 سوزى : الصداق بيزيد يا دكتور ، وهى مصرة على دخول الامتحان  
 جورج : أرجوك يا دكتور قل لنا بصراحة : هل دخول الامتحان فيه خطر  
 عليها ؟  
 الطبيب : أنا قلت لكم ان الحالة خطيرة ، وما فيش داعى تجهد المعن باى  
 شىء  
 جورج : طب نعمل لها إيه يا دكتور ؟  
 الطبيب : انصحوها

سوزى : رافضة تسمع الكلام  
 الطبيب : وأنا ما عنديش حل تانى . لازم هى تساعد نفسها  
 قطع

مشهد/ ٣٥ أمام لجنة الامتحان نهار/ داخلى

قاسم وسلافا وحسن يتجهون للجنة . قاسم يدخل أولا ، سلافا تراه يدخل فتستند على  
 الحائط وهى تمسك رأسها من شدة الألم  
 سلافا : آه . . الصداع حيموتنى  
 حسن : اعتذرى عن الامتحان إذا كتى تعبانة  
 سلافا : لا يمكن ، قاسم حيتأثر جداً لو ما شافنيش فى اللجنة ، أنا مش  
 عابزة أكون سبب فى التأثير على نتيجته وإحنا فى اليسانس  
 حسن : لكن أنتى كده بتظلمى نفسك  
 سلافا : قاسم يستحق التضحية عشانه  
 قاسم يخرج من اللجنة  
 قاسم : حسن ، سلافا ، ما دخلتوش ليه ؟  
 سلافا : جايين حالاً آهه  
 تسير إليه وتدخل معه اللجنة . حسن يتابعهما ويقول بعد دخولهما  
 حسن : معقول فيه حب بالشكل ده ؟  
 قطع

مشهد/ ٣٦ قاعة استقبال نازلى ليل/ داخلى

يدخل سعد زغلول  
 سعد : بونسوار برنيسيس  
 نازلى : بونسوار سعد أفندى . . إيه حكايتك ؟ لازم ابعت لك عشان  
 تبجي ؟ احنا مش اصطالحنا

سعد : يا سمو الأميرة أنا راجل فلاح . . ما أقدرش أروح لواحدة ست فى بيتها من غير ما يكون عندها خبر

نازلى : سعد أفندى ، أنت لازم تنسى حكاية ست وراجل دى وانت بتعامل معايا . أنا الست الوحيدة فى مصر اللي عايشة حياة أوروبية ، وشايقة أنها ما فيش أى فرق بينها وبين الرجالة  
سعد : بصراحة لحد دلوقت مش قادر أغالب سلوكى الريفي  
نازلى : نهايته ، أنا كل ما أكون هايزاك حابعت العربية تجييك وأمرى لله . . المهم عايزة أعرفك رأى المعتمد البريطاني فيك . . يهكم تعرف ؟

سعد : ده اختبار ؟

نازلى : مش معقول أبدًا الحساسية بتاعتك دى . . ومع هذا يا سيدى الراجل معجب بيك جدًا ، بيقول أن شاب فى ستك فيه الشجاعة دى ، مش خسارة فيه أنه يكون ناظر أو زعيم فى يوم من الأيام  
سعد : ما أظنش ان ده رأيه الحقيقى ، لأن تصرفه كان بيقول غير كده  
نازلى : صدقتى أن ده رأيه ، أنت اللي بتتصرف بشكل عدائى ضد كل ما هو إنجليزى

سعد : مش لازم ننسى أبدًا أن المصرى مصرى والإنجليزى إنجليزى  
نازلى : خلاص يا سعد . . أنت متعب بجدد

سعد : عارف

نازلى : وعارف كمان انى معجبة بيك رغم عنادك ده ؟

يطاطى رأسه ولا يرد

نازلى : قل لى ، يا ترى الإعجاب ده من ناحية واحدة ولا متبادل  
سعد : ممكن أطلب إعفائى من الإجابة ؟

نازلى : حقك طبعًا ، لكن أنا يهمنى أعرف رأيك

سعد : ما فيش راجل فى الدنيا ممكن يشوف ست متفتحة بالشكل ده ، وواقعة من نفسها كل الثقة دى ، وما يعجبش بيها

نازلى : وإذا قلت لك أنى طمعانة ان إعجابك ده يتحول لصداقة . .

سعد : أقول لك احنا أصدقاء فعلاً

نازلى : نفسى الصداقة دى تبقى الجزء الرئيسى فى حياتى ، تسأل على ،

اسأل عليك ، نقضى وقت فراغنا مع بعض ، استشيرك فى  
مشاكلى ، تحكى لى مشاكلك

سعد يصمت ولا يرد

نازلى : ما بردش ليه ؟

سعد : الصراحة ؟ خايف

نازلى : من إيه ؟

سعد : من حاجات كتير قوى

نازلى : كلمنى عنها

سعد : أفضل السكوت

نازلى : بص يا سعد أنا عايزاك تعرف حاجة واحدة بس : القلوب طبعها

الديمقراطية ، معنى ما تعرفش غنى وفقير ولا حاكم ومحكوم ،

ولا كبير وصغير ، القلوب دولة قوانينها فوق كل القوانين

سعد : الغريب إنى عارف الكلام ده

نازلى : ما دمت عارفة يبقى مش حاطالك بالكلام بس أنا حاطالك

بالتسليم ورفع الراية البيضاء

سعد : صدقنى ، أنا نفسى أسلم ، لكن خايف

نازلى : وأنا مصرة على أنك تسلم وحافظ وراء الخوف ده لحد ما أدك

كل حصونه

سعد : آه يا خوفى من اليوم ده . . آه يا خوفى

قطع

نهار/ خارجى

أمام كلية حقوق مونبلييه

مشهد/ ٦٣

النتيجة معلقة فى لوحة على الحائط الأولاد والبنات يبحثون عن نتائجهم حسن يقف قلقاً ،

سلافا تجلس على طرف السلم ممسكة رأسها قاسم يأتى مهلاً

قاسم : مبروك يا شباب ، نجحنا كلنا

حسن : ألف حمد وشكر لك يا رب

سلافا : أنت تقديرك إيه ؟

قاسم : زى العادة : الأول  
سلافا : براقو  
حسن : إحنا لازم نحتفل بالمناسبة دي  
سلافا تمسك رأسها  
قاسم : مالك يا سلافا ؟  
سلافا : أرجوك يا قاسم ، روحنى بسرعة  
تسقط ، يمسك بها صائحا  
قاسم : سلافا . . سلافا  
قطع

---

نهاية الحلقة الثامنة

## الحلقة رقم (٩)

مشهد / ١ مركبة نقل مقللة نهار / داخلي

قاسم وسلافا وحسن ، سلافا فائدة الوعي ورأسها على كتف قاسم

حسن : دى ما بتحطش منطلق

قاسم : ما هى الحالة لما بتجى لها بتفقد الوعي كده

حسن : مسكينة

سلافا تفتح عينيها ، تنظر لقاسم وتقول بإعياء

سلافا : قاسم

قاسم : سلافا ؟

سلافا : خدنى للحديقة

قاسم : وانتى تعبانة كده

سلافا : لما أروح هناك حاكون كويسة

قاسم : نروح البيت أحسن

سلافا : أرجوك

قاسم : أمرك

حسن : أنا حاقول للأسطى سكة الحديقة واستأذن أنا

قطع

مشهد / ٢ قلب الحديقة نهار / خارجى

قاسم يستند سلافا التى تقاوم ضعفها بصلان للمكان حيث اعترف لها بحبه

سلافا : أيوه ، هو ده المكان اللى قلت لى فيه إن حبنا خالد فيه

تبعده برفق عنها

سلافا : سيبنى أنا حاقف لوحدى



تستند على جذع شجرة

سلافا : اشهدى على يا حديقة . اشهدى على يا شجر . اشهدى  
يا عصافير . اشهدوا على أنى فضلت أحب قاسم لحد آخر دقيقة  
فى عمرى . . حبيته بكل ذرة فى . . كنت وفية بالمعهد وفية لحد  
الموت

قاسم باكيا

قاسم : ما تجيش سيرة الموت يا سلافا . . أنتى مش حنموتى . . أنتى  
حنميشى عشانى . . عشان حينا . . لازم تعيش  
سلافا : لا يا قاسم . . أنا خلاص . . حاسة بالموت بيسرى فى  
عروقى . . اوعى تنسانى يا قاسم .

قاسم : حد ينسى حياته

سلافا : افكرنى دايما وزرنى

قاسم : أرجوكى يا سلافا . . أرجوكى

سلافا : باحبك يا قاسم

قاسم : باحبك يا سلافا . . باحبك أكثر من أى حد فى الوجود من أى شىء  
فى الوجود باحبك أكثر من نفسى من روحى

سلافا : الله . . بعد الكلام ده مش مهم أنى أموت . . . . . يا باحبك قاسم

تروح فى غيبوبة ، يمسك بها قبل أن تقع صارخا

قاسم : سلافا |||||

الصوت يتردد فى الحديقة ، بينما هو يحملها متجهاً لخارج الحديقة

قطع

الشيخ : ألا تجمع هذه الدروس في كتاب حتى تعم المنفعة بهذا العلم ؟  
 محمد : أفكر في هذا ، لكن بعد الرجوع إلى مصر إن شاء الله  
 الشيخ : ماذا تنوى أن تسمى كتابك ؟  
 محمد : رسالة التوحيد  
 الشيخ : على بركة الله . . وما هو الكتاب التالي ؟  
 محمد : أفكر في الكتابة عن إصلاح التربية والتعليم في البلاد الإسلامية ،  
 حتى لا يظل كلامنا كلاماً دون منهج واضح . . وخطوات محددة  
 الشيخ : ما أخرجنا إلى الكتابة في هذا الموضوع  
 قطع

شهد/ ٤ المدرسة السلطانية نهار/ داخل

يبدأ المشهد بقطعة من الحرير الأرجواني توضع عليها المطبوعات التالية واحدة بعد الأخرى . لائحة إصلاح التعليم العثماني . لائحة إصلاح القطر السوري . لائحة إصلاح التربية بمصر . تبتعد الكاميرا لترى الشيخ محمد عبده إلى جوار شيخ المدرسة وأمامهما مجموعة من المشايخ وطلبة العلم .

الشيخ : لقد جمعتكم اليوم لأقرأ هذه اللوائح التي وضعها فضيلة الشيخ محمد عبده لإصلاح التعليم في الدولة العثمانية وإصلاح التربية في مصر ، والإصلاح الشامل للقطر السوري . لكن صدقوني إن الكلمات لا تكفي لشكر هذا الرجل الجليل على هذه الأعمال التي يحتاج إليها المسلمون في هذا العصر أكثر من غيره  
 أصحاب : نريد أن نسمع الشيخ محمد عبده نريد أن نسمعك يا محمد  
 الشيخ : تفضل يا صاحب الفضيلة

محمد : بسم الله الرحمن الرحيم - والصلاة والسلام على خير المرسلين محمد بن عبد الله وأهله أجمعين الإصلاح يا إخواني هو منهج الأنبياء . قال شعيب عليه السلام لقومه ﴿إِنْ أَرِيدُ إِلَّا الْإِصْلَاحَ مَا اسْتَطَعْتُ﴾ وقد جعل الله سبحانه وتعالى الإصلاح أساساً لبقاء الكون . قال سبحانه في سورة هود ﴿وَمَا كَانَ رَبُّكَ لِيُهْلِكَ الْقُرَى

بظلم وأهلها مُصلحون ﴿ ولذا فأننا أحاول أن أجد السبيل القويم  
لإصلاح حال الإسلام والعباد وأدعوكم جميعاً إلى السير على نفس  
التنهج ، وأقول قول شعيب عليه السلام ﴿وما توفيقى إلا بالله عليه  
توكلت وإليه أنيب﴾

أصوات : بارك الله فيك يا مولانا وفقك الله لما تحب وجعلك الله ذخراً  
للخير

يقترّب أحد الشيوخ من محمد عبده ويهمس له

صوت ١ : يوجد ضيف في انتظارك بمكتب الشيخ

محمد : ضيف ؟ من يكون ؟

صوت ١ : يقول إنه من طرف الشيخ جمال الدين الأفغاني

محمد يهلل

محمد : الشيخ الأفغاني ؟

للجميع

استأذنكم يا إخواني

يتجه إلى داخل المدرسة

قطع

---

مشهد/ ٥      غرفة شيخ المدرسة السلطانية      بهار/ داخل

محمد عبده يدخل الغرفة يستدير الضيف فنجد عارف الذي كان مع الأفغاني عند القبض  
عليه في مصر . محمد عبده يهتف

محمد : الشيخ عارف ؟

عارف : أستاذنا الجليل ؟

يحتضن كل منهما الآخر

محمد : إزيك يا شيخ عارف ، وإزاي أستاذنا الأفغاني ؟

عارف : الحمد لله . بخير

محمد : فين دلوقت ؟

عارف : ببلاد الله الواسعة ، لكن السلطان باعت له عشان يكون في استانبول

محمد : باعت له عشان يكون تحت أمره  
عارف : كده هو . يفكر كويس قبل ما يوافق . . المهم .  
يقدم له كتاباً بالفارسية صغير الحجم  
محمد : أيه ده ؟

يتفحصه

عارف : كتاب الفقه بالفارسية بيرد بيه على أصحاب المذاهب اللي بتنكر  
وجود الله

محمد عبده يقرأ

محمد : الرد على الدهريين لا بد إذن أنه ييقدم فيه الأدلة العقلية على وجود  
الله

عارف : فعلاً ويبين كمان أهمية الدين فى المجتمع وخطورة التخلي عن  
الدين وطالب منك أنك تترجمه للعربية عشان ينتفع بيه الناس  
محمد : مولانا يؤمر وأنا رهن الإشارة . لكن سيك من كل ده ، الكلام  
خدنا اتفضل معايا

عارف : على فين ؟

محمد : أنت ضيفى طول فترة وجودك فى بيروت

عارف : مش عايز أحملك أعباء جديدة فى غربتك

محمد : ما تكملش ، مستورة والحمد لله ياللا بينا

يخرجان

## قطع

---

مشهد/ب ٦ شؤون الطلبة فى حقوق مونبلييه نهار/ داخلي

قاسم يتسلم الأوراق من نفس المرأة التى سلم إليها الأوراق عند مجيئه . عليه سمات  
الحزن ويرتدى كرافته سوداء

الموظفة : درجاتك هائلة ، لو كنت فرنساوى كانوا عينوك فى الكلية

قاسم : بلدى أولى بى

الموظفة : أتمنى لك التوفيق

يأتى حسن

حسن : أنت هنا وأنا عمال أدور عليك ؟

قاسم : فيه حاجة يا حسن ؟

حسن : بروفيسير لرنود عايزك ضروري

قاسم : حاطط له حالاً

يحيى الموظفة وينصرف . الموظفة لحسن

الموظفة : عايز أوراقك ولا حتقعد شوية تعاكس البنات ؟

حسن : بطلت خلاص

الموظفة : طب تعال خدعها

تبحث له عنها

### قطع

نهار / داخلي

مكتب لرنود

مشهد / ٧

قاسم يقف أمام لرنود

لرنود : الموضوع باختصار أني عايزك تشتغل معايا هنا في المكتب

قاسم : أشك يا أستاذي أني حاقدر استمر في مونيليه بعد كده

لرنود : ليه كده ؟ مات تخليش الحزن يسيطر عليك يا قاسم الدنيا ما بتنتهش

لأن واحد من اللي بنحبهم مات بلاش تخلي العاطفة تتحكم فيك

ربنا ادانا العقل عشان نتحكم بيه في انفعالاتنا ، وأنت عقلك ممتاز

يبقى ليه تلفيه ؟

قاسم : الموقف اللي أنا فيه صعب جداً يا أستاذي

قاسم يصمت

لرنود : أنا أعرف أن فيه مثل عربي يقول عند الشدائد تعرف الرجال وأنا

عايز أشوفك وانت بتواجه الشدائد . شوف يا قاسم ، الفرصة اللي

بأعرضها عليك يتمناها أي واحد من زميلك ، أنا حاديك فرصة

تفكر ، وحاستني منك رد بعد أسبوع ، وأرجو أنك تأخذ قرارك

بعد تفكير وبدون انفعال

قاسم : ده كرم منك يا أستاذ لا يمكن أنساه

### قطع

حسن وجوليا

حسن : جوليا ، أظن حجتك دلوقت بأنى لسه ما اتخرجتش انتتت ، وأنا

عايز منك رد نهائى : حتجوزينى ؟

تهز رأسها بالإيجاب يصيح مهلاً

حسن : الله أكبر . . امتى ؟

جوليا : مش عارفة ، حدد أنت الميعاد

حسن : إذا كان على مستعد أتجوزك دلوقت لولا . .

جوليا : لولا إيه ؟

حسن : لولا مراعاتى لظروف قاسم

جوليا : خلاص ، نستنى شوية

حسن : وأنا كنت عايز أرجع مصر ، أصل كل حاجة فيها وحشتنى

جوليا : استأذن منه

حسن : لا . يبقى شىء غير إنساني

جوليا : حيرتنى معاك يا حسن

حسن : أنا نفسى مختار . . أمرى لله . . استنى كمان شوية لحد ما ربنا

يحلها بمعرفته

قطع

قاسم أمين يتحسس المقعد الذى كان يجلس مع سلافا عليه ، يتحسس الشجر الذى كان

يقف معها عنده يستند إلى شجرة ويلقى برأسه للخلف ، يرى مشاهد مما كان يدور بينه

وبينها

يستدير نحو الشجرة وينخرط فى البكاء . يد تمتمد لتربت على كتفه ، يستدير ليرى حسن

قاسم : حسن

حسن : وآخرتها يا قاسم



حسن وجوليا بعد الزواج

قاسم : مش عارف . .  
حسن : اللى بتعمله ده مش ممكن يستمر  
حقاسم : عارف ، لكن اعمل إيه مش بإيدي  
حسن : الحل الوحيد تسافر ، وترجع مصر  
قاسم : ما أقدرش  
حسن : أنا كده مضطر أكتب لأبوك . . مش ممكن أسيك تضيع  
قاسم : ليه بتقى على بالشكل ده ؟  
حسن : لأنى بأحبك  
قاسم : لو بتحنى صحيح سيبنى فى حالى  
حسن : لا مش حاسيك أنا حاجز لك تذكرة النهاردة لأسكندرية ، على  
أول مركب  
قاسم : وأسيب مونبليه ؟ مستحيل  
حسن : لا حسيها غصب عنك  
قاسم : طب بص . . بص . . أنا . . البروفيسير لرنود طالب منى أتدرب  
عنده ، أنا حاوافق ، وحاندرب معاه من بكرة ، ممكن تسيبنى فى  
حالى بقى ؟  
حسن : لأ مش حاسيك فى حالك غير لما أحس إتك رجعت قاسم بتاع  
زمان  
قاسم : بتاع زمان ؟ طب إزاي ؟ إزاي  
قطع

قاسم يقف أمام لرنود الذى يقدم له ملفاً  
لرنود : خد يا قاسم ، ادرس القضية وقل لى لو جيت تكتب مذكرة للدفاع  
حتعمد على أنهى نقط عشان تجيب حق موكلك  
قاسم : حاضر يا أستاذ  
لرنود : الوقت مهم يا قاسم



قاسم : حاضر يا پروفيسر

يخرج

قطع

نهار/ داخلي

امام مكتب لرنود

مشهد/ ۱۱

قاسم يخرج فيقابل امامه اوجست

اوجست : أنت هنا ؟

قاسم : هو أنت ورايا ورايا ؟

اوجست : طول ما أنت في فرنسا حتلاقيني في وشك ، دي بلدنا ، أنت

اللي غريب

يزيحه بيده

اوجست : عن إفتك

يدق الباب ويدخل ويفلق الباب . ينظر قاسم للباب ثم ينصرف في ضيق

قطع

نهار/ داخلي

مكتب لرنود

مشهد/ ۱۲

لرنود لأوجست

لرنود : الشيء الأساسي اللي حاقلهولك قبل ما أوافق على تدريبك معايا

هو التحذير من أي احتكاك مع قاسم أمين

اوجست : للدرجة دي بتحرص على مشاعره يا أستاذ ؟

لرنود : أيوه

اوجست : خلاص يا پروفيسر اللي تشوفه

قطع

قاسم على مكتبه يكتب . أوجست يحدد النظر فيه ، قاسم لا يلتفت إليه ، ينهض متجهًا إليه ، يقف بجوار مكتبه ويمد يده إلى الورق الذي يكتب فيه ، قاسم ينظر إليه

أوجست : يا ترى بلدكم له فيها قانون بعد الاحتلال ؟

قاسم : قبل الإنجليز ما يدخلوها كان فيها قانون ، لو كان اتلغى دلوقت

يبقى الفضل لأبناء الحضارة الأوروبية

أوجست : الحضارة الأوروبية هي سيدة العالم

قاسم : ما أقدرش أنكر ، وأنا شخصيًا جيت أتعلم من الأوروبيين

أوجست : تفكر ان بلدكم المتأخر ممكن يستفيد من العلوم المتقدمة

الموجودة في أوروبا صحيح ؟

قاسم : بلدنا المتأخر ده لما محمد علي وفر له الاحتكاك بالحضارة

الأوروبية سبقها ، واتحدت أوروبا كلها عشان تكسره وتوقف

مسيرته

أوجست : كسرت ، لأن أوروبا بس هي اللي لازم تكون سيدة العالم

قاسم : قل لى يا أوجست ، أنت ليه مصر على أنك تستفزنى وتخلينى

عدوك ؟ ما تحتفظ بأراءك لنفسك وخلينا صديقين مختلفين فى

الرأى

أوجست : أنا باكره كل شىء غير أوروبى ، شايف أن بقية الدول لازم

تكون خدم لنا ، إحنا احتلينا الجزائر وتونس وبكره حنحتل

المغرب وبلاد الشام وأنت وبقية أهل بلدكم تكونوا عبيد عندنا

قاسم : عمومًا أنا مش حارد عليك ، أنا حاطب من بروفيسر لرئود يشوف

لى مكان غير اللى انت قاعد فيه متعًا للمشاكل

أوجست يمسكه

أوجست : ما فيش داعى ، أنا حاحاول أمسك نفسى رغم عدم رضائى عن

القاعد معاك . أنا وعدته

قطع

أمين ينزل يده الممسكة بخطاب وإلى جواره تفيدة والام

تفيدة : فيه إيه الجواب ده أمين بيه ؟

الأم : قاسم جرى له حاجة ؟

أمين : لأ ، قاسم بخير

الأم : آمال فيه إيه

أمين : البنت اللي كان حيتجوزها تعيشوا أنتم

تفيدة : مسكين قاسم حبيبي ، قلبه انكسر مرتين ، مرة لما مارضيتش

تجوزها له . ومرة لما الموت خطفها

الأم تنظر إليه بمشاعر مكتومة ثم تنصرف محتجة في صمت ، يناديها بحزم

أمين : تعالى هنا

لا تتوقف وتمضي لأعلى

أمين : قلت تعالى هنا

تواصل الصعود

قطع

تدخل غرفتها وتجلس على السرير بنفس المشاعر المكتومة . يدخل أمين بيه ، يخاطبها

بحزم

أمين : لما ناديتك ماردتيش ليه ؟

لا تنظر إليه

أمين : حتى مش عايزة تبصلي لي وأنا باكلمك ؟

يجلس في مواجهتها متحديًا ، تدير وجهها الناحية الأخرى

أمين : للدرجة دي كارهة تصرفاتي ؟

لا ترد ، ينهض مغتاظًا

أمين : الولد ، عنده حق يعمل اللي بيعمله ، هو مش ابنك ؟ وارث منك

السكوت والعتاد ، لكن أنا ما حدش يقدر يعاندنى ، أنا صاحب  
الأمر والنهى فى البيت ده ، والكل لازم يطيع أوامرى ، مفهوم  
الكل لازم يطيع أوامرى  
لا تنظر إليه . يتصرف فى عصبية

قطع

مشهد/ ١٦ بهو قصر مصطفى فهمى باشا بهار/ خارجى

مصطفى فهمى باشا يضحك بعمق ثم تبتعد الكاميرا لنرى أمامه فى مقعد آخر أمين بك  
مكفهرًا

مصطفى : بنتشكى من ابنك ومراتك يا أمين بيه ؟ بالذمة ده كلام ؟ فين أمين  
اللى كانت هلته على الآلاى تخلص أجدع ظابط ركبته تخط فى  
بعضها ؟

أمين : زهقت خلاص من عيشة البطش والجزاءات  
مصطفى : لا ، أنت بتحبهم والحب ده هو اللى مخليك ضعيف قدامهم  
أمين : أمال حاكركه أهل بيتى ؟ . . أقولك إيه يا مصطفى يا أخويا . . ده أنا  
ساعات بعد ما شحط فى الولد وأطرده من قصادى . . أبقي عايز  
أجرى وراه واخده فى حضني ألاقى نفسى متمسر فى الأرض  
وذراعى متصلب جنبى أنا مش عارف مين اللى زرع جوانا كل  
القساوة دى

مصطفى يضحك باندهاش

مصطفى : لا لا إيه ده كله . . أنا عمرى ما فكرت زيك كده . . لكن على  
كل حال . . أهلكنا ريونا على كده . . وإحنا طلعنا عاملنا أهل بيتنا  
وولادنا بنفس الطريقة

أمين : من غير ما تفكر إذا كان ده صح ولا غلط ؟

مصطفى مقاطعًا وهو ما زال يواصل الضحك باستغراب

مصطفى : جرى إيه يا أمين بيه ؟ . . ده بظهر دماغ ابنك الناشفة جابت  
نتيجة معاك . . ده على كده حتخلينى أحمد ربنا للى ما خلقتش غير

بنات . . بصة واحدة لهم تخليهم يجرؤا . . لكن شباب اليومين  
دول اللى اتعلموا به . . خلوا أهاليهم يكلموا نفسهم زيك كده الله  
يكون فى عونكم

قطع

نهار/ دخل

مكتب لرنود

مشهد/ ١٧

لرنود يريت على كتف قاسم وفى يده ملف واضح أنه انتهى من قراءته لنوه  
لرنود : هایل يا قاسم . دراسة قانونية من الطراز الأول كل دراسة بتكتبها  
بتأكد لى أنك حتبقي قانونى ضليح  
قاسم : أنا فى الأول وفى الآخر تلميذك يا أستاذى  
لرنود : تعرف يا قاسم ، أنت لو استمررت فى فرنسا حيبقى لك مستقبل  
كبير ممكن تكمل دراستك وتبقى واحد من أعضاء هيئة التدريس  
اللامعين ، ممكن تبقى مستشار قانونى لجهات كثيرة ، وممكن  
تفتح مكتب محاماة ناجح  
قاسم : أشكرك لحسن ظنك فى لكن الحقيقة أنا أفضل الرجوع لمصر .  
مصر محتاجة أبناءها المتعلمين فى أوروبا عشان يعوضوا لها  
المسافة اللى بينها وبين الدول الأوروبية  
لرنود : يعجبني فيك الانتماء  
قاسم : شكراً  
لرنود : على كل حال بعد التدريبات اللى أثبت فيها نجاحك كباحث  
قانونى ضرورى تبدأ التدريب فى المحاكم  
قاسم : أنا مستعد لأى تكليف  
يعطيه ملفاً من على مكتبه  
لرنود : خذ القضية دى ، واستعد للمرافعة فيها  
قاسم : حاضر يا أستاذ  
يتجه للخروج ، إلا أن الباب يفتح وتدخل منه فتاة جميلة فى نفس عمر قاسم مندفعة وهى  
تصبح

الفتاة : يا يا بابا

تتوقف وهي تكاد تصطدم بقاسم تعتذر

الفتاة : أوه . . باردون

لرنود : مادلين ، أنت دائماً مندفة كده ؟

الفتاة : الدنيا بتجري يا بابا ، واحنا كمان لازم نجري عشان نسبقها

لرنود : طب على مهلك شوية عشان أعرفك على أتيغ تلميذ قابلته لحد

دلوقت ، مادلين قاسم أمين بنتي مادلين

تسلم على قاسم ، لرنود يكمل التعارف يتبادلان التحية

لرنود : مادلين ، ما حبتش تدرس قانون وفضلت عليه دراسة الفنون

قاسم : انتشانتبه مدموازيل . . بتدرسي أى فنون ؟

مادلين : موسيقى وغناء أوبرالي

لرنود : ومشتركة فى عرض دلوقت على مسرح إيه رأيك . . أنا لسه

مارحتش أتفرج على العرض تحب نروح سوا

قاسم : طبعا . . بس تسمح لى أنا حكافىء نفسى فى حالة ما أكسب

القضية اللى حضرتك اديتهاالى النهاردة أنا نروح المسرح نحضر

مادلين مقاطعة

مادلين : معقول بابا . . مش حتتفرج على العرض لحد

الأب مقاطعة

لرنود : لا طبعا

يوجه كلامه لقاسم

عقبال ما تكسب القضية يا قاسم يكون العرض خلص إحنا حتتفرج

على العرض بكرة أو بعده حسب ظروفك أما فى حالة ما تكسب

القضية . . حنحتفل بيك فى البيت عندى

قطع

ليل / داخل

أحد المسارح

مشهد / ١٨

مشهد من إحدى الأوبرات حيث نرى مادلين تغنى إحدى المقاطع

مادلين : تغنى إحدى المقاطع الأوبرالية . .  
وقد تصاحب الأغنية إحدى رقصات البالية ونرى بين الحضور يجلس الأب لرنود ومعه  
قاسم وهما فى قمة الاندماج

### قطع

مشهد/ ١٩ إحدى المطاعم فى مونيبيه ليل/ داخل

لرنود وقاسم ومادلين يجلسون لتبادل طعام العشاء  
مادلين : يعنى مصر فيها مسارح ؟  
قاسم : طبعاً وفيها أول دار أوبرا فى أفريقيا . . شيدها خديوى مصر  
السابق . . الخديو إسماعيل سنة ١٨٦٩ وكان مفروض يتعرض  
عليها فى يوم افتتاحها أوبرا عايدة . . لكن . . فردى مانتهاش من  
تلحينها قبل الافتتاح . . فانتعرض عليها أوبرا لاترفياتا . .  
ودلوقت بتعرض عليها بعض الفرق الأجنبية والمصرية  
مادلين : يعنى عندكم فرق أوبرا مصرية  
قاسم : لا ما عندناش أوبرا مصرية . لكن عندنا مسرح غناء . . أصل  
المصريين مفتونين بالغنا  
مادلين : وعندكم باليه  
قاسم ضاحكاً  
قاسم : إحنا ما عندناش ممثلة مصرية  
لرنود فى استغراب

لرنود : آمال الفرقة المسرحية كلها رجال  
قاسم : مش بالضبط . . فيه فرق فيها ممثلات . . بس مش مصريات  
أجنيبات أو من بلاد الشام وفيه فرق تانية شباب الفرقة يلبسوا  
ملابس النساء ويأدوا الأدوار النسائية  
مادلين : طب ليه ما فيش ممثلات مصريات ؟  
قاسم : لأن تقاليدنا تمنع اشتغال المرأة بالتمثيل . . ولأن المرأة المصرية  
محجبة . . يعنى ما تقدرش تقف على المسرح وهى كاشفة عن

وجهها

تنظر مادلين إلى قاسم باستغراب

قطع

---

مشهد/ ٢٠ صالة شقة قاسم وحسن بمونيليه ليل/ داخلي

حسن وجوليا يجلسان

جوليا : أظن كفاية كده ، دلوقت فات ٣ شهور وأنت مش قادر تكلم

صاحبك فى موضوع جوازنا

حسن : بصراحة محرج منه قوى يا جوليا ، والحزن اللى فى عينيه ييمسك لسانى

جوليا : قول إن أنت غيرت رأيك فى الارتباط بى . أنا غلطانة إني حبيتك

حسن : أنا أغير رأى فيكى ؟ معقول يا جوليا ؟

جوليا : يبقى لازم تكلمه

حسن : حاضر ، حاحاول

قطع

---

مشهد/ ٢١ غرفة نوم سعد نهار/ داخلي

يدخل الخادم على سعد . ينظر إليه

الخادم : لامواخله يا سعد أفندى

سعد : فيه إيه ؟

الخادم : عربية سمو الأميرة نازلى مستنيك قدام الباب

سعد : عربية إيه ؟ النهاردة الجمعة البلد كلها إجازة

الخادم : تحب أمشيها ؟

سعد : ما فيش داعى .

يتجه للباب

قطع



مشهد/ ٢٢ أمام بيت سعد نهار/ داخل

عربة الأميرة المقفلة تقف ، وفي الصدارة يجلس العريجي بشيابه الفاخرة  
سعد يقترب من العربة مستغرباً ، يهمهم  
سعد : عربة مقفولة ؟  
يفتح الباب فيفاجأ بيد الأميرة تشده للدخل . يدخل . الأميرة بشياب ركوب الخيل  
قطع

مشهد/ ٢٣ داخل العربة المقفلة نهار/ داخل

الأميرة نازلي تضحك في طفولة بينما سعد يجلس مندهشاً  
نازلي : إيه رأيك في المفاجأة دي ؟  
سعد : سمو الأميرة ، أنا مش قدك  
نازلي : أنت ؟ وأنت يخلالك بلاد  
يجلس صامتاً  
مش تسال رايحين على فين ؟  
سعد : بصراحة مش هو ده السؤال اللي عاوز أسأله  
نازلي : أما إيه هو السؤال اللي عايز تسأله ؟  
سعد : عايز أسأل : وبعدين ؟  
نازلي : هو فيه قبلين عشان تسأل وبعدين ؟ ما تستعجلش  
مستسلماً  
سعد : حاضر . . مش حاستعجل  
قطع

مشهد/ ٢٤ حدائق قصر من قصور الأميرة نازلي نهار/ داخل

عربة الأمير تقف وسط الحدائق الواسعة الرائعة . أحد الخدم يفتح الباب . تنزل الأميرة ،

الخدام ينحنى

الأميرة : أتفضل يا سعد أفندى

ينزل ، ينظر حوله مستغرنا . الأميرة للخدام

الأميرة : عايزين نأكل أكلة فلاحي ، رز معمر وحمام محشى وفطير وجبه

وعسل . . ممكن ؟

خدام : تؤمرى يا سمو الأمير

ينصرف نحو القصر . الأميرة تشير للخدام

الأميرة : أتفضل يا سعد أفندى

يسير وراءها

الأميرة : تعرف تركب خيل ؟

سعد : أعرف

الأميرة : حاخليهم يجهزوا لنا حصانين حالا

قطع

---

نهار / داخلى

حداائق القصر

مشهد / ٢٥

سعد ونازلى على جوادين

نازلى : إيه رأيك تيجى نتسابق ؟

سعد : تعرفى تسابقى ؟

نازلى : نجرب

مسلمًا

سعد : نتسابق

يبدءان السباق . لقطات لكل منهما وهو يحث جواده ليسبق الآخر ، يدوران حول

المكان ، للعودة لنقطة بدء السباق - تصل الأميرة أولا رغم أن سعد يحث جواده . ينتهى

السباق . الأميرة تضحك عند نزول سعد

نازلى : مش قلت لك مش قدى ؟

سعد : وأنا سلمت ورفعت ايديا الاثنين

تضحك يسيران نحو برجولا ، سعد صامت . تباغته

نازلى : بتفكر فى إيه ؟

سعد : خطرت فى بالى صورة الستات فى بلدنا ، ولقيت نفسى باحطك  
جنبهم . . . وقلت لنفسى : هل ممكن نحكم على الستات فى مصر  
من خلالك ؟

نازلى : لأطبعا ، أنا وحيدة عصرى وزمانى . الست المصرية عشان تحقق  
اللى أنا حققتها عايزة ميتين سنة . مين فى مصر مؤمن بحق المرأة فى  
التعليم وإدارة أعمالها وحريتها فى السفر والاختلاط بالرجال من  
غير حجاب . . . لالا . . . انسى . . . دى مقارنة ظالمة

سعد : المهم أن كل سؤال له عندك إجابة

نازلى : ودى ميزة ولا عيب ؟

سعد : ميزة أكيد

نازلى : عشان تعرف ان كللى مميزات

سعد : عارف

فى عيني سعد حيرة طول الوقت

نازلى : إيه يا سعد ، رغم كل محاولاتي لإزالة الجليد بيتنا لسه شايقة فى  
عينيك أسئلة وشايقة فى تصرفاتك تحفظ . ليه ؟

سعد : ما أخبش عليكى ، محتار

نازلى : إيه اللى محيرك ؟

سعد : اللى بيتنا ده اسمه إيه ؟

نازلى : تسميه .

يصل خادم ، يقف بعيدا قليلا ويكح لينبهما لوجوده - نازلى متمنعة

نازلى : ده وقته

تلتفت للخادم

نازلى : نعم ؟

خادم : مصطفى باشا فهمى طالب المقابلة

نازلى : أولا التهارة الجمعة ، ثانيا : إيه عرفه انى هنا ؟

الخادم لا يرد

نازلى : روح قدم له حاجة على ما أجبى

الخادم ينحنى ويتصرف

نازلى : راجل لا يحتمل ده بقى مش من انصار التعاون مع الإنجليز بس ،  
لكن المصيبة أنه ما يبجش غير الأتراك والشراسة ، ونفسه يبقى  
رئيس نظار بأى شكل من الأشكال

سعد : وإيه اللى يجبرك تتعاملى معاه ؟

نازلى : يا سعد بطل طريقتك دى فى التفكير ، أنت عايز ناس على مقاسك  
عشان تتعامل معاهم ؟ أنت لازم تتعامل مع الناس زى ما هم ، لو  
كنت عايز يبقى لك شأن فى المستقبل لازم تعرف الكل وتتعامل  
معاهم ، وهم كمان يعرفوك ويعرفوا اتجاهك

سعد : كلامك غريب

نازلى : لكن مهم . ولازم تسمعه لأنى عايزاك كبير ، كبير قوى . . أكبر  
واحد فى مصر

قطع

---

مشهد/ ٢٦ قاعة أخرى بقصر من قصور الأميرة نهار/ داخلى

تأتى الأميرة بثياب الركوب . مصطفى باشا فهمى يقف وينحنى ويقبل يد الأميرة

مصطفى : سمو الأميرة

نازلى : خير يا مصطفى باشا ؟

مصطفى : طالب منك خدمة ما حدش يقدر يقوم بيها غيرك

نازلى : اتفضل

مصطفى : مولانا الخديوى كل شوية يطلب طلبات مالية ويزعل لو

مانفذتهاش وأنا أرجوكم تشرحى له موقفى ، الإنجليز كلفونى

بنظارة المالية لأنهم واثقين فى ، وأنا ما أقدرش أخون الثقة

تنظر إليه بعينى ، ثم تبسم بمرارة

نازلى : قل لى يا مصطفى باشا ، أنت ولاءك لمين ؟ للإنجليز

ولا للخديوى ؟

يرتبك

مصطفى : أنا . . أنا . . أنا باتعاون مع الطرفين بقدر الإمكان



مصطفى فهمى باشا رئيس وزراء مصر مع الأميرة نازلى فاضل

نازلى : لا يا باشا ، أنا بالذات ما تحاولش تضحك عليّ . . وعموماً أنا  
كمان مش حاضحك عليك . . للأسف مش حاقدر أقوم بالمهمة

دى

مصطفى : طب ليه ؟

نازلى : ما أحيش أتعاون مع توفيق . . هو صحيح ابن عمى ، لكن أنا  
ما باقبلوش

بصمت قليلاً ساهما ، ثم يقول

مصطفى : كنت أظن أنك حستاعدينى . . بعد إذ أنك

يخرج

تمسك جرساً نحاسياً ، تهزه يدخل الخادم ويتحنى

الخادم : أفندم سمو البرنيس ؟

نازلى : نادى لى سعد أفندى

خادم : سعد أفندى مشى يا أفندم

بغيط

نازلى : مشى ؟ إزاي يمشى من غير ما يقول لى ؟

خادم : قال أنه مش عاوز يشغلك يا صاحبة السمو

نازلى : طب روح من وشى . . اتفضل

فى غيظ

نازلى : فلاح عنيد

قطع

محمد عبده وعارف الأفغانى الذى يمسك بمجموعة أوراق فى يده  
عارف : معقول يا أستاذنا خلصت ترجمة كتاب الشيخ الأفغانى فى الرد  
على الدهريين ؟  
محمد : مش خلصته وس ، دأنا لقيت كتاب الشيخ جمال الدين صغير  
فعملت له مقدمة قد الكتاب نفسه ، عرفت الناس فيها بحياة الثائر

العظيم

عارف : بسم الله ما شاء الله .

محمد : تعرف يا شيخ عارف أنا حاسس إن فترة وجودي في بيروت هي

أخصب فترة في عمري من حيث الإنتاج العلمي

عارف : ربنا يزيدك علم ، ويتفتح الناس بعلمك

دق على الباب

محمد : مين ده اللي جاي لنا دلوقت

يفتح فيجد عامل تلغراف لبناني

عامل : هون سكن الشيخ محمد عبده ؟

محمد : أبوه يا سيدى

يقدم له تلغرافاً

عامل : تلغراف من مصر

يتناوله

عامل : امضى هنا

محمد : وادى امضا

ينصرف العامل ، يغلق الباب ، يقرأ التلغراف فيتغير لون وجهه عارف يلحظ ذلك

عارف : مالك ، يا شيخ محمد ؟

محمد : أم الولاد تعبانة قوى في مصر

عارف : سلامتها

محمد : الله يسلمك ؟

وكانه يقول لنفسه

محمد : أقسى عقاب في الدنيا هو النفى . السجن سهل . . الجلد

سهل . . لكن النفى والبعد عن الأحباب هو العذاب ذاته

قطع

مجموعة من الشباب يرقصون بينهم أوجست وزملاء المكتب وحسن وجوليا . قاسم أمين  
يجلس مع لرنود ، بينما مادلين ترقص مع الآخرين  
لرنود : أدائك كان ممتاز في المرافعة ، والحفلة دى تذكار ، عشان تفضل  
دايما فاكرو أول قضية تكسبها  
قاسم : مش عارف أشكرك إزاي على اهتمامك بي  
لرنود : أنت تستاهل أكثر من كده  
مادلين تترك من ترقص معه وتأتى لقاسم مخاطبة أباهها  
مادلين : بابا . سيبه شوية من فضلك تعال يا قاسم ، إحنا كلنا بنحتفل  
بيك وأنت قاعد ؟ قوم شاركنا  
يقوم قاسم يشاركها إحدى رقصات الفالس  
جوليا : شايف قاسم واضح انه بدأ يخرج من الحالة اللى فيها .  
حسن يدعوه  
حسن : حنتهز أقرب فرصة وأكلمه  
جوليا : يا حبيبى يا حسن  
جوليا تسحب وتخرج به للشرفة  
مزج

مشهد/ ٢٩ صالة شقة لرنود ليل/ داخلى

أمام البوفيه الجميع يقفون . لرنود يقف بجوار قاسم يقول  
لرنود : قبل ما نفتح البوفيه لازم نسمع قاسم ما تنسوش ان الحفلة دى على  
شرفه  
قاسم : الشئ اللى أحب أقوله اتى استفدت كثير قوى من مجيئى لفرنسا ،  
وإن أكثر ما أفادنى هو البروفيسير لرنود . . أنا بأشكره على كل  
شئ قدمهولى . . بأشكره على تعليمى فى الكلية ، على تدريبي  
فى مكتبه ، على اهتمامه بتثقيفى وتعليمى أصول البحث العلمى  
بأشكره وباعترف أنى أعجز من أنى أرد كل هذه الأفضال

تصفيق



قاسم : كلمة أخيرة . . المفروض أن الحفلة دى للاحتفال بى فى أول  
خطوة عملية لى بعد التخرج ، لكن أنا حاسم لكى مفاجأة  
أصوات : مفاجأة . مفاجأة إيه يا قاسم . قل لنا إيه هى المفاجأة دى  
قاسم : المفاجأة أنى قررت أرجع بلدى مع أول سفينة لمصر  
أوجست يتسم

قطع

---

مشهد/ ٣٠ شارع بمونبليه ليل/ خارجى

قاسم وحسن وجوليا يركبون عربة فى طريق العودة . جوليا تخبط حسن وتقول له بعينها :  
كلمه . قاسم يستدير لحسن ويهمس له

قاسم : مش الأصول يا حسن ترتبط بجوليا قبل ما ترجع  
حسن : أبوه طبعا . . أكيد حنرتبط . . أكيد مش كده يا جوليا ؟

بفرح

جوليا : كده طبعا

العربة تسير فى الشارع

قطع

---

مشهد/ ٣١ أمام مقبرة سلافا نهار/ خارجى

قاسم يضع باقة ورد . يخلع قبعته ويقرأ الفاتحة :  
قاسم : بسم الله الرحمن الرحيم الحمد لله رب العالمين . .  
يشير بيده نحو القبر بمعنى وداعا يستدير منصرفا والدمع فى عينه

قطع

زينة تملأ الكادر ، وموسيقى سعيدة الناس على مناضدها للطعام وبينهم حسن وقاسم وجوليا على منضدة القبطان . يدخل بحار يدفع عربة صغيرة عليها تورته يقف القبطان معلنا

القبطان : السيدات والأنسات والسادة معنا على ظهر السفينة عروسان

وأرجو أن نشارك جميعًا في تحيتهم

بصفق ، الكل يصفقون القبطان يقدم لهما هدية

القبطان : دى هدية تذكارية من السفينة للعروسين

حسن يتسلم الهدية وسط التصفيق

حسن : شكرًا

القبطان : ودلوقت بتفضل العروسين بتقطع التورته

العروسان يقومان بتقطع التورته وسط الموسيقى . قاسم يتخيل نفسه هو وسلافا يقطعان

التورته . حسن يقدم قطعة تورته فى قم جوليا . قاسم يرى نفسه وسلافا مكان العروسين

القبطان يعلن

القبطان : والآن إلى الرقص

الموسيقيون يعزفون . يبدأ الرقص ينسحب . قاسم أمين نحو شرفة السفينة متكئا على سور

وينظر إلى أسفل . قطع إلى مياه البحر وهى تتلاطم

مزج

مزج

الشارع بحى الحلمية الذى به سرايا يوسف بك وأمين بك . تتقدم عربتان حنطور محملتان

بشئط سفر تتوقف عربة أمام سرايا يوسف بك وينزل منها حسن ويوسف بك . بينما تتقدم  
العربة الأخرى نحو باب سرايا أمين بك وتتوقف أمامها . وينزل قاسم وأمين بك ويندفع  
نحوهما سباعى وخادمان أخران لحمل الشئط

### قطع

---

مشهد/ ٣٥ بهو قصر أمين بك نهار/ داخلى

الأم وتفيدة . الأم تمسك بيد تفيدة وهى فى حالة عاطفية متوهجة  
الأم : قلبى بيدى ، حاسة انه حينئذ من صدرى  
تفيدة : واحشنى ولد قاسم خلبوص . . واحشنى تمام أفندم  
ينفتح الباب ويدخل أمين ثم قاسم . المرأتان تصرخان تقريبا من شدة الشوق  
الأم : قاسم  
تفيدة : حبيبى  
قاسم يجرى على أمه يحتضنها  
قاسم : أمى  
الكاميرا كلوز على وجه الأم وهو يتمرغ فى كتف قاسم  
تفيدة تتقدم ، تزيح الأم برفق  
تفيدة : كفاية أفندم ، قاسم مش ابنك لوحدهك  
الأم تتركه لتفيدة لتحتضنه ، وإن كنا نرى فى عيني الأم حبا عميقا . الأب يجلس على مقعد  
يتابع ما يحدث فى صمت

### قطع

---

مشهد/ ٣٦ بهو قصر يوسف بك نهار/ داخلى

أم حسن تحتضن ابنها حسن ، حسن يخرج من حضن أمه ويتجه إلى جوليا الواقفة تراقب  
ما يحدث

حسن : جوليا مرأتى يا أمى

الأم تفاجأ بالخبر تنظر إلى زوجة ابنها فى توجس حسن يدفع جوليا للسلام على أمه  
 حسن : جوليا سلمى على ماما  
 جوليا تتقدم للأم . . حسن يبحث أمه على السلام على زوجته  
 حسن : احضنيها يا أمى دى مرات ابنك  
 الأم تحتضن زوجة ابنها

قطع

---

مشهد/ ٣٧ صالون منزل يوسف بك نهار/ داخل

طابور الثلاث زوجات يتقدمن للسلام على جوليا التى تجلس فى الصالون ويجوارها  
 حسن وعلى يمينها ويسارها أم حسن ويوسف بك والد حسن  
 يوسف بيه : أم محمود مرأتى  
 جوليا تقف للسلام على الزوجة وهى مندهشة وتنظر تجاه حماتها تتقدم الأخرى  
 يوسف بيه : أم مصطفى مرأتى  
 تتقدم الزوجة الثانية وتحتضن جوليا وتتقدم الثالثة وهى فتاة شابة صغيرة حامل  
 يوسف بيه : ودى لسه مرأتى لسه ما خلقتش يعنى عروسة زيك  
 جوليا تنظر للأب فى دهشة ثم تنظر لحسن وهى تقول له  
 جوليا : كاتر

قطع

---

مشهد/ ٣٨ حجرة نوم بسرايا يوسف بك ليل/ داخل

تدخل جوليا ويتبعها حسن والقلق بادى على وجهها تلتفت إليه قائلة  
 جوليا : حسن . . أنت ممكن تتجوز ثلاثة غيرى ؟  
 حسن يتشم وهو يداعبها  
 حسن : أنا متجوز واحدة . . ولكن بأربعة  
 جوليا : أنا بأنكلم جد

حسن : جد إيه يا جوليا . . الدنيا بتتغير يعنى والدى ده جيل قديم .  
 ما تعلمش ولا سافر أوروبا  
 جوليا : لا أنا خايفة يا حسن . . حسن أنا عايزة أرجع فرنسا  
 حسن يتقدم منها  
 حسن : وتسيى حبيبك حسن . . جوليا حبيبتى أرجوكى نتقى فى وأنا  
 حبت لك إنك عندى بالدنيا كلها  
 قطع

مشهد / ٣٩ صالون قصر أمين بك ليل / داخل

أمين يقود مصطفى باشا قهوى للجلوس  
 أمين : تاعب نفسك ليه يا مصطفى باشا يا أخويا ؟  
 مصطفى : ده كلام برضة يا أمين بيه ؟ قاسم ده ابني  
 أمين : ربنا يديم المعروف  
 مصطفى : هو فين ؟  
 أمين : جاي حالا  
 الباب يدق  
 أمين : أدخل  
 يدخل قاسم  
 قاسم : سلام عليكم يا سعادة الباشا  
 مصطفى : وعليكم السلام ورحمة الله . . حمد الله على السلامة يا بطل  
 قاسم : الله يسلم حضرتك  
 مصطفى : درست القانون على أصوله فى فرنسا ؟  
 قاسم : وطلعت الأول  
 مصطفى : عظيم ، هيه ، وناوى تشتغل فى المحاماة ولا عايز وظيفة ميرى  
 فى النيابة ؟  
 قاسم : الحقيقة يا عمى لسه ما فكرتش  
 مصطفى : على كل حال فكر ، الاثنين فى أيدينا أنا حاكم نوبار باشا رئيس

النظار بخصوص تعيينك في الحقانية من دلوقت  
قاسم : حضرتك دايماً صاحب أفضال يا عمي  
مصطفى : أقعد أقعد احكي لي عملت إيه في فرنسا وشتت إيه  
أمين : احكي لعمك يا قاسم . . أقعد  
قطع

نهار/ داخلي

المدرسة السلطانية

مشهد/ ٤٠

محمد عبده يسير مع الشيخ  
الشيخ : مالك يا شيخ محمد ؟ لم كل هذا الشرود ؟  
محمد : أم الولاد بيشتد عليها المرض كل يوم عن اللي قبله  
الشيخ : شفاها الله  
محمد : قادر على كل شيء  
الشيخ : لم لا ترسل لأولى الأمر في طلب العفو ؟  
محمد : اطلب العفو من الخديوى أم اللورد كرومر الإنجليزى صعب  
الشيخ : الغلبة لها أحكام  
محمد : ما أقسى هذه الأحكام  
الشيخ : ورغم هذا فعلينا أن نتحمل قسوتها  
محمد : انتنى أفكر فى أن أكتب إلى بعض الأصدقاء ليتدخلوا لدى  
أصحاب الشأن فى مصر لطلب العفو أما أنا فمحال أن أكتب  
للخديوى أو كرومر ، لأنى إذا طلبت منهم اليوم الرحمة فلن  
استطيع أن أواجههم غدا  
الشيخ : أكتب لمن تشاء ، من يدرى لعل الله يأتى على أيديهم بالفرج  
محمد : يفعل الله ما يريد  
الشيخ : أتركك الآن لدرسك بإذنك  
محمد : تفضل يا أخى  
ينصرف شيخ المدرسة . محمد عبده يتجه لحلقته . ويلقى السلام على طلبته  
محمد : السلام عليكم ورحمة الله

الجميع : وعليكم السلام ورحمة الله

محمد : سنبدأ منذ اليوم درساً في الأدب وسنقرأ معا . .

طالب ١ : عفوا يا شيخنا ، هل جئنا إلى هنا لتتعلم ديتنا أم لتتحدث في الأدب ، وبأخذنا الحديث إلى الحب والغزل وغيرهما من أحاديث الفسق ؟

محمد : هل ترى الشعر حراماً ؟

طالب ١ : قطعاً

محمد : ألا تعرف أن النبي (ﷺ) عفا عن كعب بن زهير بعد أن أباح دمه ،

طالب ١ : لأ

محمد : لأنه قال فيه قصيدة ؟

طالب ١ : ربما كانت قصيدة دينية جلييلة وليس فيها غزل أو هجر

محمد : بداية القصيدة تقول : باتت سعاد فقلبي اليوم مبتول وباتت

أى ابتعدت ، وقلبي اليوم مبتول أى فاقد الصواب لبعد المحبوبة

طالب ١ : حتى لو حدث هذا فمحال أن تترك طاعة الله لتتحدث في معصيته

محمد : من قال يا أخى أن الشعر معصية ؟

طالب ١ : جاء في القرآن قوله تعالى ﴿ وَالشُّعْرَاءُ يَتَّبِعُهُمُ الْغَاوُونَ ﴾ [الزمر

أَنَّهُمْ فِي ضَلٰلٍ كَثِيٍّ وَأَنَّهُمْ يَقُولُونَ مَا لَا يَفْعَلُونَ] [سورة الشعراء

الآيات ٢٢٤ ، ٢٢٥ ، ٢٦٦] وقال سبحانه عن النبي (ﷺ) : «وما علمناه الشعر

وما ينبغي له إن هو إلا ذكر وقرآن مبين»

محمد : يا أخى هل تشك في أن النبي كان أعرف الناس بالحلال والحرام ؟

طالب ١ : لا

محمد : هل تعلن أنه عليه الصلاة والسلام كان من الممكن أن يعرف أن

الشعر حرام ورغم هذا يرضى الشعراء ؟

طالب ١ : لا

محمد : ما رأيك إذن أن النبي (ﷺ) كان يحتضن نفسه الشاعر حسان بن

ثابت ويحثه على هجاء المشركين ؟

صوت ١ : أنا يا شيخى لن أدرس الأدب وكفى

محمد : أنت حر

ينصرف طالب/ ١

محمد : المؤسف أننا نشغل أنفسنا بمناقشة الأمور الأولية . بينما الدنيا  
تجرى ، وأوروبا تفتح كل يوم باباً جديداً من أبواب العلم  
طالب/ ٤ : لا تهتم يا مولانا وهات ما عندك فإنا أرض عطشى لعلمك . .  
محمد : توكلنا على الله . . نبدأ دروس الأدب العربي  
قطع

مشهد/ ٤١ مدخل بيت سعد زغلول نهار/ داخل

سعد زغلول يفتح الباب داخلاً ومعه حقيبة سفر صغيرة وبالطو ، بينما يغلق الباب إذ به يرى  
صاحبيه قاسم وحسن

سعد : معقول ؟ قاسم وحسن مرة واحدة

يجرى عليهما بعد أن يلقى ما فى يده يحتضنهما معاً ويحتضنانه

سعد : إزيك يا قاسم

قاسم : إزيك يا سعد

سعد : إزيك يا حسن

حسن : بقى يا راجل نبعث لك تلغراف إننا جايين ما تجيش تقابلنا

سعد : والله ما شفته أصل أنا كنت باترافع فى قضية فى أسبوط . .

قاسم : على كل حال حمد الله على السلامة

سعد : حمد الله على سلامتكم أنتم إيه أخبار الحريم فى بلاد الفرنجة

يا هو على ؟

لحسن

قاسم : أبو على اتجوز من بلاد الفرنجة ويطل بصبصة

سعد : معقول ؟

حسن : معقول ونص دانا دلوقت خايف إلا البنت تسيبنى وترجع بلدها

قاسم : هى لحقت ؟

حسن : أيوه يا سيدى لحقت المهم أنت ما اتجوزتش ليه لحد دلوقت ؟

سعد : أنا حكايتى حكاية سيبنى أنا دلوقت ، وأنت يا قاسم . .

قاسم يتغير



حسن : سيب قاسم دلوقت هو كمان . .  
 سعد : لالا لا ، الكلام ده مش حيفتفع أنا لازم احتفل بيكم احتفال كبير  
 قاسم : أنا عازمكم على عيد ميلادى الخميس الجاى ووفر أنت حفلتك  
 يا عم سعد  
 حسن : أعياد الميلاد تقليد أوروبى ولهذا سيقام الاحتفال فى بيتى  
 الجديد ، وأهى فرصة لشغل جوليا  
 قاسم : إذن نحتفل مع جوليا  
 قطع

---

مشهد/ ٤٢ صالون شقة جوليا وحسن بمصر ليل/ داخل

حفل عيد الميلاد ، قاسم وحسن وجوليا وسعد يقفون حول التورتة والشمع ، بينما الزينة  
 تملأ السقف الجميع ينفخون الشموع تصفيق . .  
 سعد : كل سنة وأنت طيب  
 حسن : كل سنة وأنت طيب  
 جوليا : كل سنة وأنت طيب  
 قاسم : كل سنة وأنتم طيبين جميعًا وبالمناسبة دى أحب أبلغكم بخبر مهم  
 جدًا  
 الجميع : خير إيه ؟  
 قاسم : تم تعيينى اليوم فى النيابة المختلطة

قطع

---

نهاية الحلقة التاسعة

## الحلقة رقم (١٠)

مشهد/ ١ مصر . المحكمة المختلطة نهار/ داخل

قاسم أمين يسير في اعتداد يقف عند باب عليه عسكر ولافتة نحاسية لامعة سكرتارية رئيس المحكمة المختلطة

قطع

مشهد/ ٢ غرفة سكرتارية رئيس المحكمة المختلطة نهار/ داخل

يدخل قاسم على مدير المكتب الإنجليزي

قاسم : صباح الخير يا أفندم

المدير : good morning

يقدم له الورقة

قاسم : أنا قاسم أمين وجاى استلم العمل

المدير : why you don't speak English

موظف مصرى متعلم بين الجالسين

موظف ١ : التفاهم هنا يا أستاذ بالإنجليزي والفرنساوى أو أى لغة أوروبية

تانية . . أنت هنا فى المحكمة المختلطة

قاسم : المحكمة دى مش تبع مصر ؟

موظف ١ : تبعها ومش تبعها

قاسم : يعنى إيه ؟

المدير للموظف وهو يعطيه خطاب التعيين

المدير : Please tell him how we are working

المدير يدخل مكتب رئيس المحكمة المختلطة - قاسم يتمم

قاسم : بداية غير مشجعة بالمرّة . .

موظف/ ١ : تعال يا قاسم أفندى ، تعال اقعد

يجلس قاسم

الموظف : شوف يا قاسم أفندى ، المحكمة المختلطة دى أساسها حل الخلافات بين المصريين والأجانب . معظم العاملين فيها أجانب من دول أوروبا صاحبة الامتيازات ولها قانون لوحدها ، والأحكام فيها . . غالبًا يتكون لصالح الأوروبيين عشان كده بأقول لك أنها تبعنا ومش تبعنا

قاسم : واضح ان مهمتى هنا مش حتكون سهلة  
موظف/ ١ : بالضبط . . اللغة العربية هنا غريبة وأى شىء مصرى بيعامل على أنه أقل من نظيره الأوروبي . . ما تنساش اتنا فى فترة احتلال قاسم : شىء غريب جدًا إن الواحد يكون غريب فى بلده  
موظف/ ١ : حسب معلوماتي إنك مش مصرى إنما تركى وواسطتك مصطفى فهمى باشا عموماً اطمئن الأتراك هنا لهم احترامهم قاسم : لا يا أستاذ أنا مصرى اتولدت فى مصر وما أعرفش لنفسى بلد غيرها . .

الموظف/ ١ : نصيحة منى ، هدى شوية عشان أمورك تمشى مدير المكتب يخرج من مكتب رئيس المحكمة يخاطب قاسم  
المدير : اتفضل  
يدخل قاسم مكتب رئيس المحكمة

قطع

---

مشهد/ ٣ مكتب رئيس المحكمة المختلطة نهار/ داخل

قاسم يقف أمام رئيس المحكمة ، الذى يبدأ المشهد به قائلاً . .  
رئيس المحكمة : Listen to me MrKassem المكان اللي اتعنت فيه ده ما يحلمش بيه أى مصرى you understand? من أول دقيقة بأقول لك إحنا هنا فى قلب السياسة ، لكن خد بالك السياسة بتحرق صوابع أى حد يلمسها ، يعنى بتعامل معاها من غير ما تسمح لها

تثذينا

قاسم : أنا مش فاهم حاجة القانون الفرنسي اللي اتعلمته بيقول إن العدالة هي العدالة ولا يصحح أن تكون تابعة لنظام سياسي أو سلطة خارجية

رئيس المحكمة : ده كلام نظري Theoretical

قاسم : إذن أسمع لي أقول لك اني مش فاهم حاجة

رئيس المحكمة : بالممارسة حتفهم كل حاجة الشيء الرئيسي اللي عايزك

تعرفه هو إن الطاعة مطلوبة جدًا هنا على قد طاعتك على قد

ما حتتقدم في وظيفتك

قاسم : جناب رئيس المحكمة أحب أقول لحضرتك اني اتعلمت في

فرنسا واتدربت على ايدين واحد من أكبر أساتذة القانون ومسألة

الطاعة دي أساسية عندي ما دامت في إطار علاقة الرئيس

بالمرءوس وفي حدود القانون ومش حتتذي حد

رئيس المحكمة : واضح أنك متعب

قاسم : بالعكس أنا مريح جدًا ما دمت باشتغل في حدود القانون

رئيس المحكمة : all right we will see, you can go now

وهو يستعد للخروج

قاسم : Excuse me

يتجه للباب . .

قطع

نهار/ داخلي

قاعة بقصر الأميرة نازلي

مشهد/ ٤

نازلي تستقبل سعد زغلول

نازلي : مش معقول ، أول مرة تغلط وتيجي لوحدةك يا سعد أفندي

سعد : فعلاً

نازلي : أكيد فيه حاجة مش طبيعية هي اللي خلثك تيجي . خير

سعد : الشيخ محمد عبده قلقان جدًا في لبنان لأن مراته تعبانة جدًا هنا

الراجل طال نفيه كلمي له سير بيرنج يطلب له العفو من الخديوي

نازلى : ومين قال لك إني ما كلمتوش ؟  
سعد : أمال ما أفرجش عنه ليه ؟ ده قال هنا أنه حيفرج عنه قريب جدًا  
نازلى : الخديوى مش موافق  
سعد : بس حرام ، الشيخ محمد عبده كان بيدافع عن بلده وكفاية أربع  
سنين نفى وغربة  
نازلى : أوعذك يا سعد أفندى أتى أكلم السير بيرنج تانى  
سعد يسكت حزينا  
نازلى : سكت ليه ؟  
سعد : تخيلي أن المعتمد البريطاني اللي كنت امبارح رافض التعاون معاه  
تماما احتاج له النهاردة ، وأطلب واسطته كمان ؟  
نازلى : أهم سمات السياسة الناجحة أنها واقعية لكن إيه ده . . إحنا حنقعد  
نتكلم فى السياسة حتى وإحنا لوحدنا ؟ اسمع يا سعد خلينا نتكلم  
عن نفسنا شوية . .  
سعد : اتفضل  
نازلى : تعرف اتى جاي لى عريس  
سعد : إيه  
نازلى : مستغرب ليه ؟ هو أنا مش ست ؟  
سعد : إزاي بقى ؟ دانتى ست الستات كمان  
نازلى : إيه رأيك أقبله ولا أرفضه  
يحاول أن يهرب  
سعد : الحقيقة ما أقدرش أقول رأى فى موضوع ما درستوش  
نازلى : يا برودك يا أخى  
بندهش  
سعد : إيه ؟  
نازلى : طب رد قل لى أرفضه هو أنت إيه جيل ما بتتحركش ؟  
سعد : سمو الأميرة  
نازلى : ما تقوليش الكلمة دى تانى طول ما إحنا لوحدنا اسمى نازلى . .  
نازلى ويس  
سعد : ما أدرش أناديكى باسمك

نازلى : لا يا سعد ، حتتادينى باسمى ، ومن هنا ورايح ما دمنا قاعدين  
لوحدنا مش حتتادينى غير باسمى  
سعد : لكن . .  
نازلى : خلصنا  
سعد : أمرك ، اللى تشوفيه  
نازلى : أنا نفسى أفهم سر برودك ده إيه ؟ فيه حد من أجدادك كان  
إنجليزى ؟

ضاحكاً

سعد : إلادى . . لكن جايز كان حلاق  
نازلى : طب فهمنى  
سعد : يا نازلى أفهمينى أنا راجل فلاح ، من عيلة مستورة كل اللى ورثته  
عن أبويا عشرين فدان وزودت عليهم من شغلى أربعين فدان أروح  
فين أنا جنب أميرة من العيلة المالكة وينت عم الخديو . . وينت  
مصطفى باشا فاضل اللى كان مفروض يبقى هو خديو مصر ؟  
علاقتنا ده محكوم عليها بالفشل  
نازلى : بس أنا باحيك  
سعد : وأنا مش جماد أنا حاسس بكل مشاعرك لكن مش عايز أحط نفسى  
فى وضع لا أحسد عليه  
نازلى : الحب لا يمكن يكون عقلانى كده الحب طبيعته الجنون  
سعد : كل قصص الحب المجنونة دمرت أصحابها  
نازلى : يعنى بترفض حبى ؟  
سعد : يا ريت كنت أقدر أرفضه أنا غضب عنى بأفكر فيكى ، مشغول  
بيكى ، لكن باحاول أمتع نفسى من الاتدفاع اللى ما يعلمش نهايته  
إلا الله

نازلى : وتمنع نفسك ليه ؟ سعد . . إحنا لازم نستمتع بحبنا ، نعيش  
الحب . . ما فيش داعى نخنقه  
سعد : وبعد ما نعيش الحب ؟ تفتكرى أنه ممكن حبنا ينتهى فى يوم من  
الأيام بالنهاية السعيدة ؟ بالجواز  
نازلى : ليه لا ؟ أنا مستعدة أتحدى الدنيا . . علشانك

سعد : كلامك بيزلزلنى  
نازلى : وأنا سعيدة باعترافك ده أنا أسعد مخلوقة فى الدنيا  
تمد له يديها بوجد يمسك يديها . كلوز على الأيدى وهى تتعائق  
قطع

نهار/ داخل

يهو قصر أمين بك

مشهد/ ٥

قاسم يدخل ، تستقبله كهرمانة متهللة  
كهرمانة : سيدى سيدى  
قاسم : فيه إيه ؟  
كهرمانة : عارف مين هنا  
قاسم : مين ؟  
كهرمانة : أختك الست جلنار وجوزها خضر بيه  
قاسم : جلنار ؟ هى فين  
جلنار قادمة من الداخل  
جلنار : أنا أهه  
قاسم مهلاً بفرح  
قاسم : جلنار ؟ إزيك يا جلجلة  
جلنار : بخير ؟ إزيك أنت يا أخويا ؟  
قاسم : الحمد لله . . ياه . . والله واحشاني بجد  
جلنار : طب ما جيتش ليه ؟  
قاسم : مانا ما أعرفش مواعيد جوزك  
جلنار : أنت أخويا ، تيجى فى أى وقت  
قاسم : آه طبعا . . بالمناسبة فين جوزك ؟  
جلنار : خضر ؟ أنت ما شفتوش ؟  
قاسم : أنا لسه داخل حالا هو قاعد تحت مع والدى  
قطع

قاسم يسلم على خضر في حضور والده وجلنار

قاسم : إزيك يا خضر أفندى

خضر : أفندى إيه بقى ؟ أنا دلوقت خضر بيه ، الخديوى أنعم على بالهوية

قاسم : دى أخبار عظيمة ، واضح أنك قدرت تفوز برضا الخديوى

خضر : البركة فى جلنار ، علاقتها بستات القصر ساعدتنى كثير

الأب ينظر إليه نظرة صامته فيها لوم . قاسم يتجاوزها

خضر : المهم . . انت عامل إيه فى وظيفتك الجديدة

قاسم : مش مبسوط

أمين : مش مبسوط ليه ؟ إذا كان فيه حاجة مضايك نكلم مصطفى باشا

فهى

قاسم : للأسف يا والدى . . مش حيقدر يعمل حاجة

أمين : ما يقدرش يعمل حاجة إزاي انت ناسى إنه ناظر المالية ؟

قاسم : لا مش ناسى . لكن المشكلة مش من اختصاص أى ناظر ، ويمكن

مش من اختصاص الخديوى نفسه المشكلة أكبر من الاثنين

خضر : مشكلة إيه ده يا قاسم أفندى ؟

قاسم : مشكلة المحاكم المختلطة . المحاكم المختلطة دى لازم تتلغى

ما يتفعش بلد يحكمها قانونين ، واحد للأهالى وواحد للأجانب

أمين : انت رايح تشتغل ولا رايح تعدل

خضر : عموماً إذا ما كنتش مرتاح ممكن . . تيجى تشتغل معايا ، الخير

كثير والحمد لله

خطب على باب الصالون . يفتح ويدخل سباعى وهو يتكلم باندفاع

سباعى : يا سعادة البية . . ولاد جارنا يوسف بيه مقطعين بعض فى الجنية

بتاعتهم ويوسف بيه مش موجود ومحدثش قادر عليهم عشائ كده

أهل البيت مشيعين مرسال يستنجدوا بسعادتك

أمين بك يقف

أمين بك : طبعا راجل عنده ييجى عشرين عيل حيربيهم إزاي



يتجه أمين بيه للخروج ووراءه قاسم وخضر  
قطع

---

مشهد/ ٧ حديقة سرايا يوسف بك نهار/ خارجي

حوالى ٦ أولاد فى أعمار مختلفة يتشابكون بالأيدى والأرجل . . وأثار المعركة بادية على  
وجوههم وملابسهم . أصوات الأولاد أثناء المعركة . . مع صرخات من خارج الكادر  
لأصوات النساء . يدخل من العمق أمين بك وقاسم وخضر . يتداخل مع صوت معركة  
الأولاد أصوات نسائية من الأدوار العليا

قطع

---

مشهد/ ٨ بهو سرايا يوسف بك نهار/ داخلي

إحدى الزوجات تمسك بشعر الأخرى بينما تقف بينهما أم حسن وزوجة أخرى فى محاولة  
لفصل بينهما

أم حسن : كفاية . . كفاية . . ولادكم مقطعين بعض تحت  
الزوجة رقم/ ١ : هى اللى سلطت ولادها على ولادى  
الزوجة رقم/ ٢ : من طول لسانك . . بتعاير ولادى وتقولهم . . بلى أهل  
أمكم فلاحين أجريين . . يعنى هى اللى أبوها شهندر التجار  
الزوجة رقم/ ١ : أوعى تتكلمى على أسياذك  
الزوجة رقم/ ٢ : أسيادى . . طيب ان ما كنت أخليه يطلقك  
الزوجة الأولى تقفز نحوها فى غيظ  
الزوجة رقم/ ١ : أنا اللى حخليه يطردك يا بنت الـ

قطع

أحد الأولاد يقفز نحو الآخر وكأنه يكمل قفزة أمه  
 أمين بيه : بس يا ولد أنت وهو كفاية . . قلت كفاية  
 قطع إلى منظر عام وهو يفرق بين الولدين  
 أمين بيه : عدوا قدامي . . أنت وهو  
 وقاسم ممسك بابنين آخرين . . الجميع يبدأون في التحرك إلى خارج الحديقة  
 قطع

الأولاد الذين كانوا يتشاجرون ، خضر وقاسم وأمين بك  
 أمين : فيه خوات يعملوا في بعض كده ؟  
 الابن ٢ : هم وأهمم بيشتموا أمي ، أهمم بتسلطهم  
 الابن ١ : وأنتو أمكم بتسلطكم  
 الابن ٣ يتنضم للابن ١  
 أمين : أنتم كلكم بتحملوا اسم واحد ، اسم يوسف بيه إزاي تسمحو  
 لنفسكم باللي بتعملوه ده ؟  
 بحزم يصمتون  
 خضر : يا ناس ، ده اللي بيتخط بيقول أخ . .  
 قاسم يتأمل ما يحدث دون أن يتكلم  
 الابن ١ : يطلوا يشتموا أمي وإحنا نسكت  
 يأتي صوت يوسف بك من الخارج  
 يوسف : يا ساتر  
 الأولاد يشعرون بالخوف ، الابن ١ إلى ٣  
 الابن ١ : أبوك  
 الابن ٣ : علقه نفوت ولا حد يموت  
 الابن ٢ يطرق برأسه نحو الأرض . قاسم يستقبل يوسف

قاسم : انتفضل يا عمى  
 يوسف : إزيك يا قاسم أفندى  
 قاسم : الله يسلمك  
 يوسف يسلم على أمين  
 يوسف : إزيك يا أمين بك . . إزيك يا خضر بيه  
 أمين : أهلاً يا يوسف بيه  
 خضر : أهلاً وسهلاً  
 يوسف ينظر لأولاده  
 خضر : فرجتم الدنيا عليكم يا ولاد يوسف ؟  
 لا ينطقون ، عدا الابن ٢  
 الابن ٢ : بيستموا أمى ، أمهم بتسلطهم  
 يوسف : الكلام مش هنا ، فوتوا قدامى  
 يسبيرون منكسى الرؤوس صامتين . .  
 يوسف : متشكرين يا حضرات على كل اللى عملتوه كتر خيرك يا أمين بيه  
 أمين : العفو يا يوسف بيه إحنا ما عملناش غير الواجب  
 يخرج يوسف . أمين بيه لقاسم  
 أمين : هو إنت قاعد ساكت كده على طول مش تقول كلمة  
 قاسم : أقول إيه ؟ أنا قاعد أفكر فى أن تعدد الزوجات إزاي بيفسد معنى  
 الأخوة . الولاد بدل ما يحبوا بعض بيبقى كل فريق تبع أمه ،  
 والأمهات ضرورى بيكرهوا بعض لأنهم ضراير والأخوات كمان  
 بيبقوا زى أمهاتهم ، يكرهوا بعض ده شىء خطير  
 أمين : الشرع يسمح بتعدد الزوجات  
 قاسم : لكن ربنا ما يرضاش إن الأخوات يبقوا فرق كل فرقة تقطع فى الثانية  
 خضر : واضح إن قاسم أفندى راجع من أوروبا بأفكار شكل تانى  
 أمين : إحنا مش أوروبا  
 قاسم : أوروبا مالهاش دعوة بالموضوع . . اللى شغناه ده كويس  
 ولا وحش ؟  
 خضر : وحش طبعاً  
 قاسم : إيه سببه وإزاي نصلحه ؟ هو ده السؤال من غير ما نحشر أوروبا

أو غيرها في الموضوع  
أمين : حضرتك ناوى تصلح الكون ؟  
قاسم : ليه لا ؟  
أمين : طبعا ، هو أنت مش كنت تلميذ للأفغانى ومحمد عبده ؟ رينا يستر  
عليك

قطع

---

مشهد / ١١ هو قصر يوسف نهار / داخلي

الزوجة ١ تقف وإلى جوارها أولادها فى الصدارة . وبقية الأولاد يقفون فى صف على اليسار بجوار أمهم . بقية الحريم يقفون أعلى السلم . الأولاد ينظرون من الأبواب الموارية ومن بين سيقان الأمهات . يوسف بيه شامخا وفى يده خيزرانة . يضرب الهواء بها عدة مرات على سبيل التجربة . ينظر للجميع الذين يبدو عليهم الرعب . يتجه للزوجة ١ ، والزوجة ٢

يوسف : بتسلطى عياللك ليه يا فوزية على إخواتهم ؟

الزوجة ١ : وحياتك ما سلطتهم

تشير لأولاد ضررتها

الزوجة ٢ : ما تصدقش العيال الكذابيين دول شتموا ولادى وقالوا لهم

يلتفت لأولادها وهو يحرك الخيزرانة فى يده ، يسألهم بحزم . الزوجة الأخرى مقاطعة

الزوجة ١ : لا ولدك هم اللي

يستدير إليها مقاطعة بحدة

يوسف : بس عارفين اللي بيوظ النظام فى بيت يوسف بيه يحصل له إيه ؟

تطأطأ رأسها وتقول بخوف

الزوجة ١ : أنا غلطانة يا خويا . . ما عدتش أعمل كده تانى . .

الزوجة ٢ : آخر مرة والله . . سامحننا

يوسف : اللي بيسامح رينا ، لكن أنا ما عنديش يا أمه ارحمىنى . . انتى

طالق يا هانم . . وانتى كمان

زوجة ١ تصرخ

زوجة ١ : يا لهوى .. يا لهوى  
يوسف : وكمان بتصوتنى ؟ ما كفتكىش الفضيحة الأولانية بتعملى لى  
فضيحة تانية ؟ طب أنا حاعلمك الأدب  
بنهال عليها ضرباً وهى تصرخ

قطع

مشهد/ ١٢ غرقة قاسم أمين ليل/ داخلى

قاسم يجلس إلى مكتبه ، يكتب فى نوتته وهو يقول بصوت مسموع  
قاسم : إن الأولاد من أمهات مختلفات ينشأون بين عواطف الشقاق  
والخصام فلا يجدون ما يساعدهم على تمكين علائق المحبة  
بينهم ، بل يجدون ما ينمى فى نفوسهم البغضاء ، ولا يستطيع أحد  
أن يحول بين ما يشهدون من تخاصم أمهاتهم بعضهم مع بعض ..  
فيسرى فى أفئدتهم سم الغش والخداعة والشر ، ويظهر أثر كل  
ذلك عند الفرصة

قطع

مشهد/ ١٣ شقة حسن وجوليا ليل/ داخلى

جوليا تقرأ فى إحدى المجلات الفرنسية تلقى بالمجلة وتقوم وهى تتحرك بعصبية  
جوليا : حسن أنا لا يمكن أقعد طول النهار محبوسة كده بين أربع  
حيطان .. أمبوسيل  
حسن : قولى لى إيه اللى ممكن تعمليه وأنا أوافق عليه فوراً  
جوليا : عايزة اشتغل  
حسن فى ذهنة  
حسن : تشتغلى .. مستحيل  
جوليا : ليه

حسن : لأن شغل الست . . معناه أنها محتاجة مش لاقية حد يصرف عليها  
وبعدين ما فيش ستات يشتغل هنا  
جوليا : وأنا ما خدتش الشهادة عشان أحطها فى برواز وأعلقها على  
الحيط . . طب ليه ما قتلش وإحتا فى فرنسا إن الستات هنا ما  
ببشتغلوش ؟

حسن : لأن حكاية الشغل دى ما جتش على بالي  
جوليا : طب حتى ما فيش نادى . . اللعب فيه رياضة أقابل فيه أصحاب . .  
بدل ما أنا قاعدة كده  
حسن : أنا عملت لك اشتراك فى كل المجلات والجرائد الفرنسية . .  
اقرى سلى نفسك

جوليا : زهقت من القرابة . . زهقت من الحبسة ده ممكن تؤثر على  
صحتي . . عايزة أخرج . . عايزة أشم هوا نقي  
حسن : حتروحى فين بس . . وبعدين حتبقى فرجة لكل راجل ماشى فى  
الشارع عشان لبسك وشكلك مختلف عن لبس وشكل الستات  
اللى متعودين يشوفوهم

جوليا : ليه ما فيش ستات أجانب غيرى فى مصر  
حسن : لا فيه طبعا . . بس معظمهم معوزين أجانب لكن أنا راجل  
شرقى . . يعنى بصراحة ما حبش راجل غريب يشوف مراتي  
جوليا : خلاص نرجع فرنسا . . عشان نبقى على حريتنا . . وخصوصا  
إنك لسه لغاية دلوقت ماشتغلتش ومش عارفة ليه ؟

حسن : إحنا بلد محتلة يا جوليا والإنجليز يتحكموا فى الوظائف المناسبة  
للهشادة اللى أنا حاصل عليها من فرنسا ويفضلوا يعينوا فيها أولاد  
الأثراك مش المصريين

جوليا : Bien يبقى نرجع فرنسا أنا اشتغل وأنت كمان حتلاقي

مقاطعا لها

حسن : اصبرى على بس يا جوليا . . والدى بيسمى لى عشان اشتغل فى  
القصر ولو ده تم . . حييى باب السعد  
جوليا : أنا حصير يا حسن بس مش حصير كثير  
قطع

محمد عبده على مكتبه ، من الواضح أنه لا يستطيع أن يكتب . عارف أفندي يجلس معه ، يراقبه

عارف : مالك يا شيخ محمد ؟

محمد : مش قادر اشتغل يا عارف أفندي تعب ست الدار في مصر شاغلني تماماً كل ما أحاول أقرأ ألاقى صورتها قدامي على صفحات الكتاب

عارف : كان الله في عونك

محمد : وفي عونها . . أكيد هي دلوقت في شدة الحاجة لوجودي جنبها

عارف : المصلحين اللي زيك لازم يدفعوا ثمن إصرارهم على توصيل

رسالتهم

محمد : آديني بادفع

محمد يغلق الكتاب ، يقول لعارف

محمد : تاوولي المصحف يا عارف أفندي ما فيش غير القرآن الواحد يلجأ

له في الظروف القاسية دي

عارف يناوله المصحف

عارف : اتفضل يا مولانا

يمسك المصحف بيديه

محمد : يا رب . . ألهمني الصبر

قطع

تدخل أم قاسم عليه وهو يقرأ ، يقف

قاسم : أهلاً يا أمي . . تعالى

تجلس

الأم : اقعد

يجلس

قاسم : قعدت

الأم : أنت يا ابني قريت بيقى عندك ٢٥ سنة وما اتجوزتش . . ليه كده ؟

قاسم يطاطب رأسه فى حزن

الأم : الولاد بيتجوزوا وهم لسه فى المدارس ، وأنت بسم الله ما شاء الله

خلصت التعليم فى بلاد بره . . مش أن الألوان بقى تفرح بيك ؟

لا يرد

ما يتردش ليه يا ابني ؟

قاسم : أنا يا أمى مش حاتجوز

الأم : ليه يا قاسم ؟

قاسم : أرجوكى أعفينى من الإجابة

الأم : مش قادر تنسى البنت القرنساوية ؟

قاسم : من فضلك يا أمى ، أفضلى الموضوع ده

الأم : أفضله إزاي يا ابني ؟ مش ممكن وحتى إذا أنا قفلته أبوك مش حيقفله

أبوك مالوش اخوات ، وأنت مالكش اخوات . ولازم تتجوز عشان

تجيب لنا عيل يشيل اسم العيلة

قاسم : لو سمحتنى يا أمى ، مش عايز حد يكلمنى فى الموضوع ده أظن من

حقى اتى اختار لنفسى أتجوز ولا لا

الأم : لا مش من حقتك ما إحنا لو كان عندنا ثلاث أربع أولاد غيرك جايز

كنت سبتك على مزاجك لكن أنت ابنتا الحيلة أملنا الوحيد أن

البيت ده بيقى فيه أطفال بيقى فيه حاجة نعيش عشانها

قاسم : ريحى نفسك يا أمى وريحينى أنا الموضوع بالنسبة لى انتهى ،

وصفحة الجواز انطوت للأبد

الأم : ما فيش حاجة اسمها انتهى ، وما فيش حد يستغنى عن الجواز . . أنا

حاسبيك دلوقت ، لكن لعلمك أبوك مش حيسكت ، وأنت حر

يهز رأسه ، تخرج

قطع



أمين وتفيدة غاضبان والام تسمع لهما

الأب : معنى إيه مش عاوز يتجوز ؟ ده كلام فارغ

تفيدة : مش يتجوز إزاي أفندم ؟ قولى له أمك تفيدة عاوز يكون لها حفيد

أفندم عايضة تفرح بأولاد صغيرين

الأم : معنى حاضريه على ايده ؟

الأب : كل عائلات البلد يتجوز ولادها من غير ما يأخدوا رأيهم ، يظهر إن

التسامح غلط فى البيت ده اسمعى ، اسمعوا أنتم الاثنين ، ابدأوا

من دلوقت فى البحث عن عروسة مناسبة ، وأنا حاجوزه غصب عنه

الأم : هو بنت يا أمين بيه . . فيه راجل يتجوز غصب عنه ؟

الأب : أبوه . . فيه . . ما دام الذوق مش نافع يبقى لا بد من القهر

تفيدة : لا أمين بيه ، بلاش تكون شديد معاه فى حكاية جواز أفندم ،

ما تنساش إنك كنت شديد معاه لما طلب قبل كده أنه يتجوز حبيبتة

خوجاية

الأب : أنا أعرف مصلحته أكثر منه

تفيدة : ماعلش أمين بيه ، برضه هو اللي حيتجوز أفندم

يقف رافعاً صوته

الأب : خلاص ، مش عايز كلام تانى ، البيت ده بقى لا يحتمل

قطع

أمين يسير عاقداً كفيه خلف ظهره مفكراً

أمين : مين الصبح فينا ؟ أنا ولا هو ؟ أنا ما عدتش عارف أعمال الولد ده

إزاي ؟

يقرب منه سباعى الجنائى

سباعى : مالك يا سعادة البيه

أمين بعصية

أمين : أنت مالك أنت ؟ خليك فى حالك ، أنفضل ياللا  
سباعى : لامؤاخذه يا به  
يتصرف سباعى ، يجلس أمين على مقعد فى الحديقة ويتنهد بعمق  
قطع

ليل / داخل

شقة حسن وجوليا

مشهد / ١٨

حسن يدخل الشقة مهلاً

حسن : جوليا .. مبروك .. خلاص .. اتحلّت مشكلتك

جوليا : صحيح يا حسن ؟

حسن : مش مشكلتك لوحدهك ، مشكلتنا إحنا الاثنين

جوليا : إزاي ؟

حسن : رحت القنصلية الفرنسية النهاردة عشان أخلص بعض الأوراق ،

دار حوار بينى وبين الموظفين اللي هناك ، أول ما عرفوا إني متجاوز

فرنساوية أخذوني أقابل القنصل

جوليا : وبعدين

حسن : الراجل كان فى منتهى الذوق ووعدنى بأنه جيعينك مدرسة فى أى

مدرسة فرنساوية هنا ، وحشوف موضوع تعيينى فى المحكمة

المختلطة قبل الأسبوع ده ما ينتهى

جوليا : هایل .. طب ليه ما رحتش من زمان المشوار ده ؟

حسن : كل شىء بأوان يا جوليا

قطع

نهار / خارجى

لافتة مدرسة الساكركير

مشهد / ١٩

قطع

مشهد/ ٢٠ ممر أمام مكتب ناظرة المدرسة نهار/ داخلي

تدخل جوليا مكتب الناظرة

قطع

مشهد/ ٢١ مكتب الراهبة نهار/ داخلي

الناظرة ترحب بجوليا

الناظرة : اتفضلتي ، اسيفو Asseyez - vous

جوليا تجلس

جوليا : ميرسي

تقدم لها خطاباً

الناظرة : تأكدي إنك حثكوني مبسوطة كتير معانا مدام جوليا . . انتي

اشتغلت بالتدريس قبل كده ؟

جوليا . لا

الناظرة على كل حال ما تنقشش ، أنا حادبكى فصول الابتدائي

قطع

مشهد/ ٢١ (١) بهو سرايا يوسف بك ليل/ داخلي

يوسف يقفز من على الكرسي الجالس عليه قائلاً

يوسف بيه : بتقول إيه ؟ مراتك اشتغلت أنت إيه ابني حقيقي . . يعني الدم

اللي بيحرق في عروقك هو دمي

حسن : دي شغلانة محترمة يا بويا

يوسف : شغلانة محترمة . . أنت يا ابني بتكلم عن راجل ولا ست . . فيه

ست من عيلة تشتغل . خلاص فرنسا ناستك العيب والأصول

وبعدين هو أنا مش قايم بواجبي ناحيتك فاتحلك بيتك ويدبلك  
فلوس من غير ما تطلب .. إيه حتعيش من كد ست يا حسن  
حسن : يا والدى أفهمنى .. جوليا لو ما اشتغلتش حتسبني وترجع فرنسا  
الأب : يا ريت ترجع .. وأنا بعدها بأسبوع أكون مجوزك أربعة مش  
واحدة

حسن : بس أنا مش عايز أربعة .. أنا مستكفى بجوليا  
الأب : جوليا .. ابني بقى بتاع جوليا .. يا خسارة تعليمي فيك ..  
يا خسارة اللي صرفته عليك

حسن يعد تردد

حسن : يابويا .. أنا .. أنا بحبها  
الأب : بتحبها .. ده كلام نسوان مش رجالة .. قسماً عظماً .. إذا  
ما لميت مراتك وقعدتها من الشغل .. وحجبتها فى البيت  
وما حدش يشوف ضفرها .. إلا اللي حللهم الشرع .. ما حاطط  
أيدى فى إيدك ولا حيوصلك منى مليم واحد  
قطع

نهار/ داخلي

حديقة قصر نازلى

مشهد/ ٢٢

نازلى تركب جواذاً للترريض ، تصل إلى موضع البرجولا لتجد خادمها يقف منتظراً  
نازلى : واقف كده ليه ؟  
خادم : سعد أفندى زغلول طالب المقابلة  
نازلى : خليه يتفضل  
يتقدم السائس ليأخذ الجواد ، وآخر يقدم فوطة للأميرة ، وآخر بإبريق ماء ، تغسل  
وجهها ، تمسحه ، تشير لهما فينصرفان  
الخادم يأتى بسعد  
الخادم : أتفضل يا سعد أفندي  
يتقدم سعد وينصرف الخادم  
نازلى : مخصص منك مرتب سنة يا أستاذ .. عشان ما بتجيش الصالون

سعد : خليفهم ستين  
 نازلى : مش هأمك ؟  
 سعد : الأرزاق على الله  
 الخادم يتقدم بأكواب العصير  
 خادم : العصور يا أفندم  
 سعد يتناول كأساً والأميرة آخر  
 نازلى : شكراً  
 سعد : شكراً  
 يشربان يضعان الكؤوس . الأميرة للخادم  
 نازلى : سيونا لوحدنا  
 الخادم يتحنى وينصرف . الأميرة لسعد  
 نازلى : ممكن أعرف ليه ما بتجيش الصالون ؟  
 سعد : بصراحة ؟  
 نازلى : طبعاً بصراحة  
 سعد : باحس وأنا موجود فى الصالون إنك مش نازلى بتاعتى لوحدى .  
 باحس إنك واحدة ثانية  
 نازلى : معقول يا سعد ؟  
 سعد : انتى طلبتى الصراحة  
 نازلى : يا حبيبى أنا معاك لوحدك حتى لو كل الدنيا حوالينا  
 سعد : لكن أنا ما باحش يده ، وأنا أنانى  
 نازلى : كل المحبين أنانيين ، لكن لو سابوا أنفسهم للأثانية الدنيا تقف ،  
 لازم يتغلبوا على رغبتهم فى الاستئثار بأحبابهم  
 سعد : صعب  
 نازلى : درّب نفسك . جرب إنك تكون فى وسط الناس وتكون فى نفس  
 الوقت معايا لوحدى  
 سعد : أحاول  
 نازلى : حتتغدى فى النهاردة ؟  
 سعد : فى بيتى زى العادة  
 نازلى : بيتك إيه بس ؟ أكيد الخدام بتاعك بيعمل لك أى أكل

سعد ضاحكاً

سعد : أتعودت عليه

نازلى بشكل تقريرى

نازلى : أنت حتتغدى معايا النهاردة

سعد : مش عاوز أعود نفسى على أكل السرايات

نازلى : أوامر أنت والسرايات باللى فيها يجوا لحدك

قطع

نهار/ داخلى

غرفة سفرة الأميرة

مشهد/ ٢٣

نازلى وسعد يتناولان الغداء

نازلى : على فكرة ، أنا عايزة احتكر جهودك أنت ومكتبك

سعد : ما أننى محتكر اهم فعلاً

نازلى : لالا ، القضايا اللي مدياها لك ، دى حاجة بسيطة قوى . . إيه

رايك لو تبقى وكيلى ؟

سعد : أنا أعرف أن لكى وكيل بسم الله ما شاء الله

نازلى : عايزة أغيره

سعد : أنا ما أتعودتش أخذ حاجة من حد

نازلى : بس أنا عايزاك أنت بالذات تبقى وكيلى . حالا فى مين قلبه على

وعلى أموالى أكثر من حبيبى ؟

سعد : نازلى ، لى عندك رجاء ، ماتحسنينش ابداً إن انتى اللي بتكبرينى ،

أنا أحب أكبر لوحدى

نازلى : أنا اللي أرجوك بلاش الحساسية دى بيتنا ، أنا مش بتصرف معاك

باعتبارك غريب عنى ، أنا باعتبرك جزء منى

سعد : وأنا باعتبر إننا إحنا الاثنين شىء واحد روح واحدة ، لكن ما أقدرش

أبداً أنسى اتى راجل له كرامته واعتزازه بنفسه

قطع

قاسم أمين يدخل ، الساعة والحرس الذين يمر بهم يقفون ويحيونه باحترام ، يرد التحية ويدخل مكتبه

## قطع

قاسم يدخل من الباب ، يفاجأ أمامه بحسن على أحد المكاتب  
 قاسم : حسن ؟ حسن بن الحاج يوسف على سن ورمح ؟  
 حسن : بشحمه ولحمه  
 قاسم : إزيك يا بو على  
 حسن : إزيك يا عم قاسم  
 قاسم : بتعمل إيه فى المحكمة المختلطة ؟ أوعى تقول لى إنك جاي  
 تزورنى من بدرى كده  
 حسن : يا ابنى أنا بقيت وكيل نيابة زيك هنا وجاى استلم العمل زيك  
 قاسم : طب إزاي ؟ ده أصعب شىء هنا دخول المصريين  
 حسن : يا ابنى انت ناسى انى متجاوز فرنساوية ، وأن الجمهورية الفرنسية  
 بلداتها واقفة جنى  
 قاسم يتنهد بعمق وهو يجلس  
 قاسم : الغريب فى البلد دى إن أى حد له سعر فيها إلا ولادها . . يعنى أنت  
 من غير واسطة الجمهورية الفرنسية كان زمانك عواطلى  
 حسن : ربنا ستر  
 قاسم : لكن كويس إن ربنا بعثك لى ، أصل أنا كان فاضل لى شوية وأطق  
 من المحكمة المختلطة دى . تعرف أنا بافكر فى إيه ؟  
 حسن : إيه ؟  
 قاسم : أكتب مجموعة مقالات أطلب فيها إلغاء المحكمة المختلطة  
 حسن : يظهر إنك ناوى تترقد . يا ابنى أعقل

قاسم : أدينى عاقل لما أشوف آخرتها إيه

يقف حسن

حسن : أسيك أنا وأروح استلم العمل . . عن إذنك

قاسم : أتفضل يا سيدى

حسن يخرج فى نفس اللحظة التى يدخل فيها موظف مصرى معه تاجر مصرى وآخر  
فرنسى ، التاجر المصرى دمه متجمد على جبهته ، وعلى ثيابه ويده مربوطة يمسك به  
عسكرى ويخاطبه بغلظة

الجندى : أدخل

التاجر المصرى يدفع يد الجندى

المصرى : ما تزقش

قاسم للجندى

قاسم : مالهم دول ؟

الموظف : خناقة ، السيد رئيس النيابة بيقول لحضرتك حقق معاهم

قاسم : حاضر

للمتشاجرين

قاسم : قربوا

يقتربان ، يوجه كلامه للمصرى

قاسم : اسمك وستك وعنوانك

المصرى : صابر محمد عبد الله ، ٤٠ سنة ، حارة برجوان بالجمالية

قاسم : جنسيتك ؟

المصرى : مصرى

قاسم : إيه الذى حصل يا صابر ؟

المصرى : يا سعادة البيه أنا اشتريت عمارة من الراجل الخواجة ده ،

ودفعت له فلوسها على داير مليم

قاسم : وبعدين ؟

المصرى : رحت العمارة أحصل الإيجار لقيت راجل هناك قالى . . أنه

صاحب العمارة وأنه ما باعهاش وريته الورق الذى معايا . . قالى ده

عنوان عمارة ثانية . . دورت على العمارة الثانية ما لقيتلهاش وجود

قاسم : الله . يعنى أنت ما قرتش الورق كويس قبل ما تمضى عليه ؟



المصري : أنا ما أعرفش أقرأ لكن الخواجة ورائي العمارة وأنا وافقت  
اشترىها . فكتب عقد البيع والشرا ، وقرالى الورق ، وأنا ختمت  
وقبضته الفلوس

قاسم : وبعدين إيه حصل بعد كده  
المصري : لما اتأكدت أن الخواجا نصب على قلبت الدنيا عليه لحد  
ما لقيته وواجهته بصاحب العمارة . . قام أنكر قصاده أنه باع لى أى  
حاجة أو قبض منى أى فلوس - طبعًا يا بيه الدم غلى فى عروقى . .  
روحت هاجم عليه راح هو مطلع الغدارة بتاعته وضربنى بالنار . .  
ستر رينا الطلقة جات فى إيدي

قاسم يلتفت للخواجا

قاسم : هيه . . اسمك وسنك وعنوانك ؟  
الخواجا : أوجست لوجس بول . . ٣٥ سنة . . ١٥ شارع شبرا  
قاسم : جنسيتك  
الخواجا : فرنساوى  
قسم : إيه رأيك فى الكلام ده اللي قاله صابر ؟  
الفرنسى : حبيبي ، مصرى ده مغفل ، القانون مش يحمى مغفلين  
قاسم : وضربه بالنار ؟  
الفرنسى : مسيو ، أنا كنت فى حالة دفاع عن نفس . مصرى ده كان

بيهددنى

قاسم : كان معاه سلاح ؟

الفرنسى : No

قاسم : أمال كان بيهددك بإيه ؟

الفرنسى : بصوته العالى

قاسم : معنى مطلوب منه لما ينتصب عليه يكون مؤدب كمان ؟ معاك شهود  
يا صابر

المصري : معايا . . الراجل صاحب العمارة ، والشهود اللي مضوا على  
العقد

قاسم للجندى

قاسم : نادى الشهود

قطع

مشهد/ ٢٦ مكتب رئيس المحكمة المختلطة نهار/ داخلي

يبدأ المشهد بتمزيق أوراق التحقيق ، ثم نرى رئيس المحكمة نائرا وأمامه مدير مكتبه  
رئيس المحكمة : دى كلام فارغ ، دى فوضى ، قاسم أفندي دى مش ينفع  
يكون وكيل نيابة فى محكمة مختلطة ، دى يشوف له حنة ثانية  
يشتغل فيها . يعنى إيه يخلى واحد فرنساوى مدان قدام مصرى  
المدير : جناب رئيس المحكمة ، دى واسطته حضرة ناظر مالية  
رئيس المحكمة : حتى لو كان واسطته جناب خديوى ، اسمع خلى حد  
ثانى فرنساوى يعيد التحقيق مفهوم ؟  
المدير : مفهوم  
رئيس المحكمة : وابعت لى قاسم أفندي حالا . . حالا يكون عندي هنا  
قطع

مشهد/ ٢٧ الممر المؤدى لمكتب رئيس المحكمة المختلطة نهار/ داخلي

قاسم أمين يدق الباب ، يدخل

قطع

مشهد/ ٢٨ مكتب رئيس المحكمة نهار/ داخلي

قاسم يدخل على رئيس المحكمة الثانى  
رئيس المحكمة : انت أفندي أنت فاهم نفسك وكيل نيابة بجد ؟ No انت  
مجرد وسيلة لتنفيذ الأوامر

قاسم : آسف  
 رئيس المحكمة : آسف يعنى إيه أفندى ؟  
 قاسم : يعنى أنا هنا عشان أحقق العدالة ، ومش حاعمل غير اللى ضميرى  
 يرتاح له  
 رئيس المحكمة : .. wrong غلط  
 قاسم : أنا أقدر أميز بين الصح والغلط  
 رئيس المحكمة : أنت إذن بتتحداى ؟ you challenge me  
 قاسم : أنا قلت رأيى  
 رئيس المحكمة : أنا غلطان من الأول انى وافقت على تعيينك من غير  
 ما أقابلك  
 قاسم : من الممكن تصحيح هذا الخطأ . . عن إذنك  
 قاسم يخرج . رئيس المحكمة يضرب المكتب بيده  
 قطع

ليل / داخلى

صالون أمين بك

مشهد / ٢٩

مصطفى فهمى . أمين بك  
 مصطفى : أمين بيه ، أرجوك لازم تكلم ابنك ، النيابة المختلطة ما حدش  
 طايلها واللى بيعمله ده غلط  
 أمين : أنا ما عدتش عارف اتصرف إزاي مع الولد ده  
 مصطفى : ده ما عادش صغير  
 أمين : مش عارف جاب العناد ده منين ، أقول له ما تتجوزش الخوجاية  
 يصر على الجواز منها ، أقول له اتجوز دلوقت يقول لأ ، توديه  
 أحسن حته يشتغل فيها ، يعاند رؤسائه . . أعمل له إيه ؟ قل لى  
 يا مصطفى باشا يا خويا أعمل له إيه ؟  
 ينهض مصطفى للانصراف  
 مصطفى : عقله يا أمين بيه . . أنا استخدمت نفوذى لأقصى درجة عشان  
 أصلح اللى هو عمله مع رئيس المحكمة ، لكن مش حاقدر أعمل

كده على طول

وهو يسير نحو الباب

أمين : معاك حق . . عموماً أنا شاكر جداً يا مصطفى باشا ، وأوعدك إنى  
أشد وداته الاتنين

قطع

ليل / داخلى

مكتب سعد زغلول

مشهد / ٣٠

سعد ، حسن ، قاسم

حسن : الله يخرب بيتك يا قاسم يا أمين ، رئيس المحكمة كان قدامه قرار

التعيين عشان يمضيه بعد اللى أنت عملته وقف القرار

قاسم : وأنا قتلته أوقفه ؟

سعد : يا سيدى نسايبك الفرنساويين حيصلحوا لك كل شىء ما تخافش

قوى كده

حسن : من غير طريقة وحياة أبوك . انت مش متجوز وما تعرفش يعنى إيه

انك تبقى قاعد قدام مراتك من غير شغل

قاسم : بصراحة هى شغلانة ما يتيكيش عليها

حسن : بالنسبة لك انت جايز ، لكن بالنسبة لى الأمر يختلف . اللى

ما تعرفهوش ان أبويا رافض يدبني أى فلوس . . طول ما جوليا

مصرة تشتغل

سعد : أنا متهاىلى عشان مراتك فرنساوية حيعينوك يا أبو على - المهم أنهم

لما يعينوك يفضل ضميرك صاحى وما تبقاش لعبة فى ايديهم

قطع

ليل / داخلى

الممر المؤدى لغرفة قاسم

مشهد / ٣١

قاسم يسير لغرفته ، يصل إليها ، يأتيه صوت أبيه

أمين : استى عندك  
 قاسم : خير يا والدى  
 أمين : إيه يا أفندى اللي أنت عملته ده مع رئيس المحكمة ؟ الراجل كان  
 مصر انه يرفدك  
 قاسم : يرفدنى  
 أمين : أنت بتقول إيه ؟  
 قاسم : الأول حضرتك عرفت إزاي ؟  
 أمين : من عمك مصطفى باشا فهمى  
 قاسم : آه عموماً يا والدى أنا بافكر أستقيل واشتغل بالمحاماة  
 أمين : محاماة إيه يا أستاذ ؟ دى شغلانة اللي مالوش شغلانة . أنت فى  
 ايدك نعمة مش حاسس بيها  
 قاسم : لا يا والدى ، المحكمة المختلطة دى مش نعمة ، دى عايزانى أبيع  
 ضميرى ، وأنا لا يمكن أبيعهم بوظائف الدنيا كلها . . ترضى لى  
 حضرتك أبيع ضميرى ؟

أمين يبدأ فى تغيير أسلوبه  
 أمين : يا أبنى أنا ما قتللكش بيع ضميرك لكن أكيد فيه حلول وسط  
 قاسم : ما فيش حلول وسط فى مسألة الضمير  
 أمين بأسلوب هادئ تماماً  
 أمين : اسمع يا أبنى ، أنا مش حاقد أقول لك خالف ضميرك . . كل اللي  
 حااطلبه منك أنك ما تخسرش وظيفتك بالعناد  
 قاسم : حاضر يا والدى ، أوعدك انى أحاول عشان خاطرك مرة ثانية  
 قطع

جوليا وحسن يتناولان عشاء خفيفاً  
 جوليا : حسن ، أنا لقيت حل كويس كتير لمشكلتك حسن  
 حسن : حل إيه ، حتروحى لرئيس المحكمة المختلطة وتتحابلى عليه ؟

جوليا : لا طبياً  
حسن : آمال إيه ؟  
جوليا : حانروح أنا وأنت لقتصل فرنسا نشكره على تعيينى ونبلفه باللى  
حصل لك فى المحكمة وأكيد هو حيتدخل  
حسن : والله فكرة ، لكن .  
جوليا : لكن إيه ؟  
حسن : لو اتوظفت بالشكل ده مش حاقدر افتح عينى قدام رئيس  
المحكمة  
جوليا : طب إيه الحل ؟  
دق على الباب ، ينظران لبعضهما

قطع

---

مشهد/ ٣٣ حجرة استقبال فى سرايا يوسف بك ليل/ داخلى

يجلس حسن وأمامه والده الذى يبدو متحفظاً  
يوسف بيه : أنا عرفت أن المحكمة المختلطة رفضت طلب تعيينك وأنتك  
لسه خالى شغل وعشان كده بعثتك  
يقدم له ورقة يأخذها حسن ويفتحها  
حسن : إيه ده يا بابا . ده قرار التعيين فى القصر عينونى مترجم . أنا مش  
عارف أقولك إيه يا بابا أنا ممنون لك أنا .  
يوسف : أنت ابني والضفر ما يطلعش من اللحم  
حسن ينكب على يد والده يقبلها . الوالد يسحب يده ويشاور بها  
يوسف : بس لى شرط . . مراتك تسبب الشغل  
حسن يصمت ثم يتكلم  
حسن : أوكى بابا

قطع

الاثنان يجلسان على منضدة الطعام المضادة بالشموع وهنا لا يأكلان بل ينظران إلى بعضهما في صمت والحزن يادى على جوليا وحسن فى قمة القلق

حسن : قولتى إيه يا جوليا

جوليا تترك منضدة الطعام وتجه لتجلس على كنية يتحرك حسن نحوها ويجلس إلى جوارها وهو يربت عليها ويستطرد قائلاً

حسن : أحاول أعوضك يا جوليا عن الشغل بقى كام شهر حخحك ونسافر

فرنسا

جوليا ما زالت منكسة الرأس يستطرد حسن قائلاً

حسن : انت عارفة يا جوليا . . أنا بحبك قد إيه عشان كده ما أقدرش

أشوف الوش الجميل ده حزين ابداً فين الابتسامة الحلوة

يرفع رأسها بيده وهو يتحسس وجهها تسقط دمعته من عين جوليا ولكن شفتاها فى الوقت نفسه تنفرج عن ابتسامة . حسن يأخذها بين أحضانه وهو يربت عليها

قطع

محمد عبده يجلس على شلته ، أمامه مسند يضع عليه المصحف ويقرأ وهو يهز رأسه الشيخ عارف يجلس إلى جواره لبييض كتاباً لكنه مشغول بمتابعة محمد عبده

عارف : مالك يا أستاذنا . ما عدتش بتسيب القرآن ، هل وجدت فيه

السلوى ؟

محمد : نعم ، وهل بعد القرآن سلوى ؟ لكن لا أخفيك أن ملازمتى للقرآن

أوحت لى بفكرة ممتازة

عارف : أى فكرة ؟

محمد : أن أقوم بتفسير القرآن

عارف : تفسير القرآن ؟

محمد : أبوه ، حافسر القرآن بمنهج عقلى وبأسلوب بسيط ، بحيث

يفهمه الناس على وجهه الصحيح ، بدلا من عدم فهمه ، أو فهمه  
بصورة مشوهة

عارف : والتفسير ده حتقدمه فى المدرسة السلطانية برضة ؟  
محمد : لا ، حاقدمه فى المسجد عشان يحضره أكبر عدد من الناس ،  
وحايت له مواعيد عشان الناس تقدر تتابعه  
عارف : الفكرة ممتازة

دق على الباب

محمد : افتح يا عارف أفندى

يفتح عارف فيجد عامل التلغراف

العامل : تلغراف للشيخ محمد عبده

يتناوله ويوقع له

عارف : شكرا

يتصرف العامل

محمد : ورنى يا عارف أفندى

يتناوله له ، ثم يبدو عليه التغير ويلقى برأسه على الحائط مغمض العينين . عارف بلهفة باكيا

عارف : مالك يا أستاذنا ؟

محمد : أم الولاد توفاه الله

عارف : إنا لله وإنا إليه راجعون

محمد : شفت قد إيه التمن اللى بيتحملة المصلحين غالى يا عارف

أفندى ؟ اللهم رحمتك اللهم رحمتك

قطع

---

نهار / خارجى

المسجد العمري ببירות

مشهد / ٣٦

لقطة عامة للمسجد والناس تدخل

قطع



محمد عبده يجلس على مقعد وأمامه مصحف والناس يملأون المسجد . يقرأ من المصحف

محمد : ويقول جل وعلا في سورة آل عمران «من أهل الكتاب أمة قائمة

يتلون آيات الله آناء الليل وهم يسجدون . يؤمنون بالله

يرفع أحد أصابع يده

واليوم الآخر

يرفع إصبعاً آخر

ويأمرون بالمعروف

يرفع إصبعاً ثالثاً

وينهون عن المنكر

يرفع إصبعاً رابعاً

ويسارعون في الخيرات

يرفع إصبعاً خامساً

وأولئك من الصالحين . وما يفعلوا من خير فلن يكفروه والله عليم

بالمعتقين»

محمد : ما معنى هذه الآيات ؟ معناها : العدل الإلهي مع أهل الكتاب

و «هي دليل على أن دين الله واحد على السنة جميع الأنبياء وإن كل

من أخذه بإذعان ، وعمل فيه بإخلاص فأمر بالمعروف ، ونهى عن

المنكر فهو من الصالحين وفيها «ابتعاد عن التفرقة بين الأمم

والممل التي لم يكن يعترف فيها أحد الفريقين بفضيلة ولا مزية

لآخر كأنه بمجرد مخالفته له في بعض الأشياء تتبدل حسناته

بسيئات» .

أصوات : الله الله الله فتح الله عليك يا مولانا هكذا العلم وإلا فلا

يقوم رجل يبدو عليه التعصب

رجل ١ : ما معنى هذا يا شيخ محمد ؟ هل جئنا لنسمع تفسيراً للقرآن أم

لنسمع مدحاً في أهل الكتاب ؟

محمد : وهل جئت بشيء من عندى ؟ إنه كتاب الله

رجل ١ : بل أنت في سعيك الدائم للتقريب بين الأديان تتساهل كثيرا في فهم النصوص الدينية وتؤولها لصالحهم  
 محمد : أعوذ بالله من أن أحمل كتاب الله ما لا يحتمل .  
 الجالسون ينهرونه

أصوات : اجلس يا رجل . لا ادعى لهذا التعصب  
 رجل ١ : بل أنا متمسك بهذا التعصب

محمد : لا يا أخى في الله ان التعصب الدينى يفسد علينا الإخوة في الوطن  
 ولو تعصب كل واحد لدينه ضد أصحاب الأديان السماوية الأخرى  
 لفسدت البلاد وضاعت مصالح العباد يقول تعالى في سورة  
 الممتحنة : ﴿ لَا يَنْهَكَ اللَّهُ عَنِ الَّذِينَ لَمْ يُقَاتِلُوكُمْ فِي الدِّينِ وَكَمْ يَخْرُجُوكُمْ مِنْ دِينِكُمْ أَنْ تَبْرُوهُمْ وَتَقْطِعُوا إِلَيْهِمْ إِنَّ اللَّهَ يُحِبُّ الْمُقْطِعِينَ ﴾ (٨) إِنَّمَا يَنْهَى اللَّهُ عَنِ الَّذِينَ قَاتَلُوكُمْ فِي الدِّينِ وَأَخْرَجُوا مِنْ دِينِكُمْ وَظَهَرُوا عَلَى إِخْرَاجِكُمْ أَنْ تَوَلَّوهُمْ وَمَنْ يَتَوَلَّهُمْ فَأُولَئِكَ هُمُ الظَّالِمُونَ ﴿٩﴾

أصوات : الله أكبر . الحجة قاطعة . أكمل يا شيخنا . . أكمل فتح الله عليك

قطع

مشهد/ ٣٨ مدخل بيت سعد زغلول ليل/ داخل

سعد وقاسم يشريان الشاي

سعد : يعنى إيه تستقيل ؟ غلط طبعا  
 قاسم : بأقول لك ما عادش بيدينى أى شغل  
 سعد : ولو ، واجه المشكلة بشجاعة ما تهرش  
 قاسم : أعمل إيه يعنى ؟ اضربه على ايده ولا أتحايل عليه عشان يشغلنى ؟  
 سعد : ولاده ولاده ، انت تقابله وتناقشه بهدوء وتوصل معه لحل . البلد دى بلدنا ، ولا يمكن ننسحب ببساطة قدام أى غريب عنها  
 قاسم : تفكر ان المقابلة حتجيب فائدة ؟  
 سعد : حتى لو ما جابتش ، الاستقالة دى تشيلها من دماغك تماما ، فاهم ؟

قاسم على مضض

قاسم : ولو أنى مش عاوز أشوف خلقة رئيس المحكمة ده لكن أمرى  
الله . . أروح أقابله

قطع

نهار/ داخلي

مكتب رئيس المحكمة المختلطة

مشهد/ ٣٩

يبدأ المشهد بلقطة متوسطة لرئيس المحكمة وهو يقول لقاسم

رئيس المحكمة : نعم قاسم أفندى ؟ why you asked to meet me?

قاسم : عايز أقول لجنتك إنى قاعد من غير شغل تمامًا ، ما فيش تحقيق  
واحد بأعمله

رئيس المحكمة : I know . أنا عارف

قاسم : طب ليه ؟

رئيس المحكمة : قاسم أفندى ، مصطفى باشا فهمى صديق عزيز ، أنا  
مش عاوز أخسره لو أنت عملت مشاكل تانى ، ممكن جدًا أنا  
أخسر مصطفى باشا

قاسم : وأنا أرفض اتنى أخدم مرتبى من غير شغل يا جناب الرئيس . أنا كنت  
الأول على دفعتى فى دراسة الحقوق فى مونتيليه ، مش ممكن أبقي  
قاعد كده بدون عمل

رئيس المحكمة : اوريت سوف أرى ؟

قاسم : متشكر

قطع

نهار/ داخلي

حديقة قصر أمين بك

مشهد/ ٤٠

قاسم أمين يدخل متجهًا إلى الباب الداخلى . يجرى سباعى نحوه  
سباعى : ألحقنا يا قاسم أفندى . ألحقنا يا قاسم أفندى .

قاسم : فيه إيه يا عم سباعى ؟  
 سباعى : أمين بيه حالته صعبة قوى ، الحقنا اعمل معروف  
 قاسم : والدى ؟  
 قاسم يجرى ، يدخل من الباب  
 قطع

مشهد / ٤١ غرفة نوم الأم نهار / داخلي

الباب مفتوح والحجرة بها الأب ممدد على فراشه وحوله الأم وتفيدة وجلنار ، قاسم يدخل مندفعاً

قاسم : ماله والدى ؟ فيه إيه ؟  
 لا ينتظر ردًا ويتجه لوالده الذى يرقم مغمض العينين  
 قاسم : سلامتك يا والدى . الف سلامة  
 الوالد يفتح عينيه  
 أمين : مش باين لها سلامة المرة دى يظهر يا قاسم أنه خلاص  
 يستدير للواقفات

قاسم : ما تقولش كده يا والدى أنت بخير ما جيتوش حكيم  
 الأب يشد بيد واهنة

أمين : ما فيش داعى ، الحكيم مش حيعمل حاجة . اسمعنى أحسن . .  
 أمك وتفيدة هانم أمانة فى رقبتك . . خلى بالك منهم

قاسم : الاتنين فى عيني  
 أمين : وإذا كنت فى يوم اتشددت معاك فسامحنى ، أنا كنت يا ابنى عايز  
 مصلحتك

قاسم يقبل يديه ووجهه  
 قاسم : أنت اللي تسامحنى يا والدى أنت اللي تسامحنى  
 يموت . قاسم والجميع يصرخون للداخل  
 قاسم : والدى  
 جلنار : والدى

الأم : أمين بك  
نفيدة : حبيبى

قطع

---

نهاية الحلقة العاشرة



قاسم امين مع امه

قاسم امين مع امه

## الحلقة رقم (١١)

مشهد / ١ صوان ليل / خارجي

مصطفى فهمي يقف ليتقبل العزاء وبجواره قاسم ، وخضر وحسن وسعد زغلول .  
الناس على وشك الانتهاء ، يتنهون . مصطفى يمسك بقاسم  
مصطفى : عايزك  
يسيران متجهين إلى الحديقة

قطع

مشهد / ٢ حديقة قصر أمين بك ليل / خارجي

قاسم ومصطفى فهمي يقفان قريبا من الباب وحدهما  
مصطفى : يا قاسم يا ابني مش حاوصيك . أمك ومرات أبوك تحطهم في  
عينيك .  
قاسم : طبعا يا عمي .  
مصطفى : لو احتجت لأي شيء أنا موجود . . إوعي تفكر أن أبوك مات  
إنت ابني . أنا ما خلفتش صبيان وانت في محل ابني تمام .  
قاسم : كتر خيرك يا عمي .  
يقدم له نقودا .  
مصطفى : خد دول .  
قاسم : لا شكرا . . مستورة يا عمي والحمد لله .  
مصطفى : قلت خد .  
قاسم : والله يا عمي . .  
مصطفى : ما تعارضنيش . . دي أصول .

قاسم : والله مستورة يا عمى شكرًا .  
مصطفى : ولد عنيد .  
مصطفى يعيد النقود لجيبه في ضيق .

قطع

---

مشهد / ٣ السفره نهار / داخل

قاسم يسير إلى السفره وكهرمانه تتجه ناحيته .  
قاسم : فين الهوانم ؟ مانزلوش يفتروا ليه .  
كهرمانه : يفتروا ؟  
قاسم : ايه باقول حاجة غريبة ؟  
كهرمانه : ما انت عارف يا سيدى انهم بياكلوا فوق طول عمرهم . .  
السفره هنا للرجال بس .  
قاسم : شيلى الأطباق دى وطلعها فوق . .  
كهرمانه : رايح فين يا سيدى ؟  
قاسم : شيلى ما لكيش دعوه ، هاتى الأطباق وتعالى ورايا  
تتجه للخارج تتعجب مما فعل لكنها تحمل بقية الأطباق

قطع

---

مشهد / ٤ حجرة الجلوس فى الطابق الأعلى نهار / داخل

قاسم يسحب أمه وتفيدته متجها للمتضدة الموجودة فى الحجرة واللى تحولت إلى مائدة طعام .  
تفيدته : واخذنا فين قاسم حبيبي ؟  
الأم : ما تفهمنى يا ابنى صاحبنا كده ليه ؟  
يقف بالقرب من المتضدة ويخاطبهما بهدوء  
قاسم : شوفوا بقى من النهارده فيه حاجات حتتغير فى البيت هنا أولها أننا  
كلنا حناكل مع بعض .



الأم : ناكل مع بعض ؟! ما يصحش يا ابني ، ما تعودناش يا ابني على كده .

قاسم : نتعود مش حناكل غير مع بعض .

نفيدة : قاسم حبيبي رجاله ناكل لوحدها ستات ناكل لوحدها .

قاسم : غلط

نفيدة : ابوك مش ممكن يعمل غلط حبيبي .

قاسم : مش ابويا اللي عمل الغلط ، ابويا اتولد لقي الغلط قلده من غير ما

يفكر .

الأم : إهدا بالله يا ابني ربنا يهديك .

قاسم : لأ مش حاهدا وشوفوا بقى ، أيام النبي عليه الصلاة والسلام . .

الأنتان : عليه الصلاة والسلام .

قاسم : كان الرجاله بياكلوا مع الستات ، والنبي نفسه كان بياكل مع زوجاته

وبيحط لهم اللقمة بييده فى يقهم كمان ؟

الأم : معقول يا قاسم ؟

قاسم : يعنى حاكذب فى الدين كمان ؟

نفيدة : قاسم حبيبي زوجات النبي صلى الله عليه وسلم غيرنا ، احنا فين

وهم فين ؟

قاسم : لا اله الا الله . يا هو انتم اسمعوني ما تتعبونيش النبي ، عليه الصلاة

والسلام كان بيعمل كده عشان نقلده ، وانا باعمل السنة ، وانتم

حناكلوا معايا يعنى حناكلوا .

نفيدة : لا أفندم . أكل معاك يوك

الأم : ما تحكمش رأيك يا ابني .

قاسم : والله العظيم اذا ما أكلتم معايا مانا واكل . . حناكلوا معايا

ولا لا ؟ . . هيه

المرأتان تنظران لبعضهما .

الأم : خلاص يا ابني حناكل . .

نفيدة : لكن قاسم حبيبي . .

قاسم : هيه . . مش عايز مقارحه .

تجلسان متضررتين . يبدأ الأكل . تأكلان بغير رضى

قطع

محمد عبده وشيخ المدرسة

محمد : اهلا وسهلا بيك يا مولانا . . اتفضل .

الشيخ : يا شيخ محمد عبده انا جاي لك طالب المصاهرة فهل ترضى . .  
بمصاهرتي ؟

محمد : مصاهرتك ؟

الشيخ : أي نعم . أنت رجل أعزب ، وأنا عندي بنت تصلح للزواج ، ولن  
أجد لها زوجا افضل منك .

محمد : يا مولانا . . نسبك يشرف أي مخلوق وطلبك عزيز . . لكن .  
الشيخ : من غير لكن . . عارف ان ذكرى أم الولاد ، غالية لكن الزواج نص  
الدين ، والسلف الصالح كانوا لا يبيتون دون زواج ، وزوجتك  
ماتت من وقت طويل .

محمد عبده يطأطي رأسه يفكر فترة ، ثم يقول للشيخ

محمد : نخليها خطبة دلوقت كفاية .

الشيخ : بل زواج . قرأت ان إمام التابعين سعيد بن المسيب كانت له بنت  
علمها وادبها حتى أن ، أمير المؤمنين عبد الملك بن مروان طلبها  
لابنه ، لكن سعيد رفضه ، لأنه كان يريد أن يزوج ابنته من رجل  
يعرف الله حق معرفته ، وتصادف أن غاب تلميذ من تلاميذ سعيد  
عن حلقة العلم عدة أيام ، ثم عاد فلما سأله عن سر غيابه قال إنه فقد  
زوجته فقال له سعيد بن المسيب : هل تتزوج ابنتي ؟ قال الرجل :  
كيف أتزوج ولا أملك سوى درهمين ؟ فقال سعيد : هما مهر  
ابنتي . . وعقد العقد ، وفي المساء بعد ما عاد التلميذ لبيته وجد من  
يدق بابه ، فلما فتح وجد سعيد بن المسيب قد جاء إليه بالعروس ،  
وقال له : لا أحب أن تبيت ليلتك أعزب .

محمد : رحم الله الاستاذ والتلميذ .

الشيخ : هل ترضى بابنتي اذن ؟

محمد : ارضى وأشكرك لكن . .

الشيخ : لكن ايش تاني ؟

محمد : من حق بنتك أن ترانى ، وأن يؤخذ رأيها فلا يمكن أن انادى  
بالحرية وأحرم المرأة التى أتزوجها من حق موافقتها على من  
سيتزوجها .

الشيخ : قوم معايا

محمد : على فين ؟

الشيخ : ناخذ رأيها .

محمد عبده يتردد لحظة

الشيخ : قوم يا شيخ . . قوم

ينهض الشيخ محمد ، ويتحركان للباب .

قطع

---

مشهد / ٦ بيت شيخ المدرسة السلطانية هار / داخلى

يبدأ المشهد بفتاة جميلة تسحب الطرحة لتواىى وجهها خجلا تسع الدائرة لثرى والدها  
شيخ المدرسة السلطانية أمامها

الشيخ : إنكلمى يا رضا يابتنى ، نوافقى على زواج الشيخ محمد ؟

رضا : اللى تشوفه يا والدى .

الشيخ : على بركة الله .

نسمع صوت الدفوف

مزج

---

مشهد / ٧ بيت شيخ المدرسة السلطانية (قاعة داخلية) ليل / داخلى

يبدأ المشهد بزينة تملأ الكادر مع صوت دفوف ، ثم نرى الدفوف والأيدى تدق عليها ثم  
تنتقل الكاميرا لتصور لنا نسوة يقمن بالدق على الدفوف والعروس رضا تجلس وسط  
صاحباتها سعيدة واحدى النساء تغنى أغنية زفاف شامية . تنهض امرأة أو أكثر ليرقصن .

قطع

مشهد / ٨ غرفة الضيوف بيت شيخ المدرسة ليل / داخل

الشيخ وهو يعقد القرآن . يجلس شيخ المدرسة ومحمد عبده والمدرسون والأعيان الذين يهتنون الشيخ محمد ، بينما صوت الدفوف يأتي من الداخل ، الجميع يهتنون محمد عبده .

الجميع : مبارك يا شيخ محمد . . بالرفاء والبئين ربنا يرزقكم بالذرية الصالحة إن شاء الله .

يرد التحية بيده

محمد : شكرا . . بارك الله فيكم . . عقبال أولادكم ان شاء الله .

يقف الشيخ

الشيخ : ما يكفي هذا ؟ ياللا يا شيخ محمد قوم خذ عروستك وروح

بيتك . .

محمد : على بركة الله .

ينهض ويتجه للداخل .

قطع

مشهد / ٩ بيت شيخ المدرسة السلطانية (قاعة داخلية) ليل داخل

يبدأ المشهد بكلوز على وجه امرأة تزغرد ، ثم نرى العروس تسير نحو الباب وسط التصفيق وأغاني الزفاف الشامية من النساء .

قطع

مشهد / ١٠ سكن محمد عبده ببيروت ليل / داخل

محمد عبده وزوجته رضا بملابس الزفاف . الزوجة تقف بخجل . محمد عبده يمد يده إلى ذقنها ويرفع وجهها لتتظر اليه .

محمد : رضا

رضا : نعم يا شيخ محمد

محمد : انا يا بنت الناس ما احبش اغش حد انا حياتي مش هادية ، وكل يوم  
فى حال ، وكل شوية فى بلد ، حتستحملينى ؟

رضا : انا خدامتك يا شيخ محمد .

محمد : انا مش عايز خدامة ، انا عايز زوجة تشاركنى حياتى ، وتفهم  
رسالتى .

رضا : فهمنى وان شاء الله مش حتندم أبدا

محمد : ريتا ما بيجيب ندم .

يمد يده ليخلع عن رأسها الطرحة .

قطع

ليل / داخلى

بهو قصر امين بك

مشهد / ١١

تدخل كهرمانة فنجد كلا من سنية وتفيدة تجلسان حزيتين .

كهرمانة : لا مؤاخذه يا هانم أصل خزين البيت قرب يخلص . . وعاوزين  
بلح ، وسمنة . . ودقيق ، وباقى لوازم الواجب الللىح نعمله عشان  
خمسان المرحوم .

تفيدة وسنية تكيان .

تفيدة : أمين بك بقى مرحوم

سنية : الله يرحمه ويحسن اليه ، عمرنا ما حملنا هم لحاجة فى وجوده قبل  
الخزين ما يخلص يكون جاب كل حاجة وبالزيادة .

تفيدة : البركة فى ولدنا قاسم يا سنية هانم . . ليه مش قلتى لسيدك قاسم  
كهرمانة ؟

كهرمانة : قلت له يا ستى ، قاللى قولى للهوانم .

سنية : إحنا ؟ واحتاح نعمل ايه ؟

يأتى قاسم

قاسم : روحى اتنى يا كهرمانة

تتصرف كهرمانة

قاسم : شوفوا ياهوانم ، من النهارده لازم تعرفوا كل حاجة عن دخلنا ومصاريفنا .

تفيدة : بس ده شغل رجالة أفندم

سنية : والدك عمره ما اتكلم معانا فى حاجة زى دى . . المهم كتا بنلاقى كل طلباتنا .

قاسم : كلنا اعتمدنا عليه ، وانا أولكم . . لكن جه الوقت اللى لازم نعتمد على نفسنا .

تفيدة : بس احنا ما بنعرفش نحسب .

قاسم : تتعملوا .

سنية : ح نتعلم الحساب يابنى فى السن ده .

قاسم : ليه لا . يا أمى أنا بيتعرض على قضايا كتير وباشوف قد إيه جهل الستات بأحوالهم بيخليهم بيتسرقوا وحقوقهم تضيع .

سنية : ليه يا قاسم عاوز تتخلص من مسئوليتنا ليه ؟ ماتكوش ناوى تسافر بره تانى .

تفيدة : عفارم سنية لازم ده السبب .

قاسم حانقا

قاسم : ما تغيروش الموضوع أنا ما باطلبش منكم تعملوا معجزة . الستات فى أوروبا بيشتغلوا ، بيتاجروا ، بيديروا مشاريع ، مش معقول الست فى مصر ما تعرفش حتى تدبر بيتها .

يتصرف غاضبا

تفيدة : الله يرحمك أمين بك

سنية : وبعدين يا تفيدة ياختى . . ده باين مصمم . تفتكرى نعرف نتصرف ؟

قطع

ليل / داخلى

منزل حسن وجوليا

مشهد / ١٢

حسن يجلس على مكتبه وأمامه أوراق وفانوس كبير ، وهو منهمك فى العمل . تدخل

جوليا ، وتنتجه إليه وتقبله وهي تتكلم فى دلال .  
 جوليا : حسن . . ممكن تستريح شوية من الشغل ونشرب مع بعض فنتجان  
 شاي . .  
 حسن يقوم فرحا . .  
 حسن : قوي الشاي ده فى وقته تماما .  
 قطع

---

مشهد / ١٢ ركن آخر بالمنزل ليل / داخل . راكود

الاثنان يجلسان . جوليا تقدم له فنتجان الشاي ، وتصب فنتجانا لنفسها وتتكلم .  
 جوليا : امبارح وانا بأخلص أوراقى فى القنصلية . . إتمرض على عرض  
 صعب حد يرفضه . .  
 حسن : عرض إيه ده ؟  
 جوليا : إدرس لغة فرنساوية لبنت باشا من قرايب الخديوى . . بمرتب  
 خمس أضعاف المرتب اللى كنت باخده من المدرسة .  
 ينزل الفنتجان  
 حسن : شوفى يا جوليا . . لما يكون المرتب اللى حتاخديه قده خمسين  
 مرة . . برضه اسف باردون .  
 جوليا : يعنى إيه باردون ؟  
 حسن : يا سى افهمينى . . إحنا اتكلمنا فى الموضوع ده قبل كده . .  
 وقلت لك انتى هنا مش فى فرنسا . . إنتى فى مصر . . وشغل  
 الستات هنا عيب ، والشغلانة دى بالذات . .  
 جوليا : وفيها إيه الشغلانة دى ؟ انا حشتغل مدرسة . .  
 حسن : فيها انك مش حشتغلى فى مكان عام . . لأ . . حشتغلى عند حد  
 فى بيته . . وده يهز مكانة والدى ومكانتى الاجتماعية . . ده والدى  
 كان يعمل مصيبة لو عرف ان مرات ابنه بتشغل عند حد . .  
 جوليا : والدك غلطان .  
 حسن : غلطان مش غلطان . . دى عادتنا وتقاليدنا .

جوليا : عاداتكم وثقاليدكم دى مش حيخلوني اخسر مرتب كبير زى ده  
 بس . . لأدول حينسونى اللى درسته كمان . . عقلى خلاص قرب  
 يقف . . أيامى كلها بقت زى بعضها . . النهاردة زى امبارح زى  
 بكره . . ده ظلم .  
 حسن وقد رأى انه يجب أن يهادنها . .  
 حسن : جوليا . . إنتى عارفة أنا باحبك قد ايه ، عشان كده باطلب منك  
 تراعى ظروفى .  
 جوليا : وانت ما بتراعى ظروفى ليه ؟ أنا آسفة ؟ انا قبلت الوظيفة  
 خلاص .  
 حسن : لو قبلتى الوظيفة تبقى بتضحى بحبنا ، وأنا مضطر انسحب واسيب  
 لك البيت حالا . .  
 جوليا : برضه حاشتغل يا حسن .  
 يندفع حسن خارجا من الكادر وتستقر الكاميرا على جوليا . .  
 قطع

---

مشهد / ١٣ صالة بيت سعد ليل / داخلى

سعد يسير ويده على كتف حسن  
 سعد : ولا يهملك يا ابو على البيت ، يساع من الحبايب الف ، خليك قاعد  
 معايا لحد ما تروق  
 حسن : لا يا سعد الحكاية مش حكاية روقان ، ده موقف ، لو جوليا قبلت  
 الوظيفة دى حاطلقها  
 سعد : طيب اسمع ، هى مش تعرف قاسم كويس ؟  
 حسن : أيوه  
 سعد : طب ما توسط قاسم بينكم  
 حسن : يعنى قاسم حيغير موقفها ؟  
 سعد : ليه لا ؟ الصلح خير يا ابو على ، كمان شوية نروح نقابله على القهوة  
 وربنا يعمل ما فيه الخير .



## قطع

ليل / خارجي

مقهي

مشهد / ١٤

الثلاثة يجلسون على المقهى قاسم وسعد وحسن

قاسم : آسف مش حاتوسط فى الموضوع ده

سعد : طب ليه ؟

قاسم : تقدر تفهمنى ايه وجه اعتراضك يا حسن ؟

حسن : هى الحكاية عايزة شرح يا قاسم ؟ . . ولانت مش عايش فى مصر

وعارف ان شغل الست عيب ؟ . . ومعناه ان جوزها مش قادر

يعملها ؟

قاسم : بس يا حسن الإسلام ادى المرأة الحق فى إنها يكون لها ذمة مالية

مستقلة . . يعنى معنى كده إنه ممكن يكون لها إيراد مستقل عن

جوزها ، وده مش حيقلل من قدره . .

حسن : طب تقول ايه فى الشغلانة اللى حشتغلها جوليا ؟ . تشغل عند

حد فى بيته يا قاسم ؟ . .

قاسم : وهى حتشوف الحدد ولا هو حيشوفها ؟ دى حتدرس للبت . .

وحىكون مكانها الحريم ، والسرايا مليانة جوارى واغوات

وخدم . . يعنى مش حتقعد هى والباشا فى خلوة .

حسن : شوف يا قاسم المثل بيقول اللى على البر عوام . .

قاسم : مش فاهم . .

حسن : يعنى بتكلم وتحكم عشان مش متجوز . لكن لو انت مكاتى ،

ومراتك طلبت منك تشغل مش حتوافق .

قاسم : مين قال ؟ لو انا اتجوزت واحدة زى جوليا أو سلافا . . حاريها

الحق انها تشغل . . دى مش بس حتنتفع نفسها . . لأ . . حتقيد

مجتمعها كمان .

## قطع

قاسم يسير نحو مكتبه ، السعاة يقفون ، يحيونه ، يرد التحية بيده ، يصل لمكتبه يفتح الباب .

## قطع

قاسم يدخل فيفاجأ بجوليا جالسة تنتظره

قاسم : أوه .. جوليا .. بونجور

جوليا : بونجور قاسم .

مداعبا

قاسم : إيه .. عندك قضية ؟

جوليا : قاسم .. فين حسن ؟ إنت تعرف مكانه ؟

قاسم : أعرفه .

جوليا : سيلفو بليه ، خدنى ليه ، الا انا حاسة بثنائب الضمير .

مداعبا

قاسم : عندنا هنا الستات ما تروحش للرجالة ، لكن يقعدوا في بيتهم

والرجالة هم اللى ييجوا لحد عندهم . أنتى تروحي وانا حاجيه

لحد عندك وتتفاهموا مع بعض بهدوء .

جوليا : صحيح حتجيه ؟

قاسم : امال باهزر ؟

جوليا : ميرسى قاسم .. ميرسى بوكو .

تنصرف جوليا .. يتشم قاسم

قاسم : والله العظيم الستات دول نعمة . الله يرحمك يا سلافا

يتبدل وجهه وينظر لأسفل .

## قطع

ناس تسعى للمسجد ، بينما نرى رجلين أحدهما من الوجوه المألوفة في دروس ومجالس محمد عبده والآخر جديد .

المألوف/ أبو وليد : وينك رايح بطرس ؟

الجديد/ بطرس : رايح اسمع درس الشيخ محمد عبده في التفسير .

أبو وليد : مسيحي وتسمع درس في تفسير القرآن ؟

بطرس : نص هاللي يسمعوا التفسير مسيحيين .

أبو وليد : شو . . فهمني بطرس . . كيف يحصل هذا ؟

بطرس : يا أبو وليد هالشيخ المصري محمد عبده بيخلي الواحد يعرف كيف يفكر ، كيف يعامل الناس حواليه ، وایش ينتظره في الآخرة ، وما بيعادي التصاري .

أبو وليد : يظهر ان الشيخ محمد سره يانع ، حيوجد الناس على اختلاف أديانهم في بيروت . . بركاتك يا شيخ محمد .

يصلان للجامع . ويجدان الزحام يصل للباب ، وليس هناك موضع لقدم

أبو وليد : أنا ما شفت زحام على درس هيك .

بطرس : اسكت يا شيخ خليفنا نسمع

يتطلعان نحو الداخل ليريا محمد عبده .

قطع

محمد عبده يفسر القرآن أمام المستمعين الذين يملأون المسجد محمد : ثم نأثي الى قوله تعالى في سورة النساء ﴿ وان خفتن شقاق بينهما فابعثوا حكما من أهله وحكما من أهلها إن يريدوا إصلاحا يوفق الله بينهما ﴾ . قال بعض المفسرين : إن الخطاب هنا موجه إلى من يمكنهم القيام بهذا العمل وهم الحكام ؟ وقال بعضهم : إن الخطاب عام ويدخل فيه الزوجان أو ذوو القربى أو الجيران . .

وكلا القولين وجيه فالأول يكلف الحكام ملاحظة أحوال العامة  
والاجتهاد في اصلاح احوالهم ، والثاني يكلف كل المسلمين ان  
يلاحظ بعضهم شؤون بعض ويعينه على ما يحسن به حاله .  
قطع

مشهد / ١٩ على باب المسجد العمري نهار / خارجي

أبو وليد وبطرس يقفان على الباب مع بقية الناس لشدة زحام المسجد .  
بطرس : شايف يابو وليد . . بدمتك ها الكلام للمسلمين وحدهم ولا لكل  
الناس ؟  
أبو وليد : الشيخ محمد عبده يقول ان جوهر الأديان واحد لولا أن بعض  
الناس مفرمة بالخلاف .  
بطرس : اسمع يابو وليد وحياء أبيك . . اسمع .  
قطع

مشهد / ٢٠ صالة شقة حسن وجوليا ليل / داخلي

جوليا لحسن بينما قاسم يجلس بينهما  
جوليا : حسن حبيبي أنا مش ابيعك بفلوس الدنيا كلها .  
حسن : خلاص يا جوليا اتسي اللي فات .  
قاسم : كده بقى اقدر أمشي انام . . تصيح على خير يابو على .  
لجوليا  
الاثنان : bon nuit julia bon unit kassem  
ينتظر حسن لجوليا معاتباً بحب تطأطأء رأسها  
جوليا : حبيبي  
بمسك حسن يديها ، ثم جوليا تمسك يديه وتنظر الى عينيته بحب ، حسن يتدفع نحوها  
يحتضنها .

قطع

قاسم يجلس على المكتب ويدون في مذكراته .  
 «العاشق عنده ما يكفيه سماء صافية مهما تراكمت عليها السحب  
 تتنابه الحوادث ولا تترك به أثراً لأنه لا يعياً بها» .  
 يغلق نوكتة يتنهد بعمق ثم يقول بحسرة .  
 مالکش نصیب یا قاسم افندی تستمتع بالعشق للنهائة .  
 قطع

قاسم امامه أوراق كثيرة يفحصها . على وجهه علامات الصدمة . ينتهي من الفحص .  
 يضع الورق في صندوق ويخرج وهو ينفخ .  
 قطع

قاسم يخرج على امه وتفيدة هانم  
 الأم : مالك يا قاسم ؟ فيه ايه ؟  
 تفيدة : لقيت حاجة في الأوراق زعلتك ولدنا قاسم ؟  
 قاسم : للأسف .  
 تفيدة : لقيت ايه قاسم ؟  
 قاسم : الديون اللي على والدي حتاخذ معظم التركة .  
 الأم : ديون ؟ أبوك كان مديون ؟ ما قالش .  
 تفيدة : الله يرحمه أمين بيه مش كان يقول حاجة أبدا .  
 الأم : ويعدين يا قاسم ؟ حتعمل ايه دلوقت ؟

قاسم : حاسوى الديون وبعدين نوزع الباقي حسب الشرع .  
 تفيدة : إسمع قاسم جيبى أنا وامك نبصم لك على ورقة أنك تعمل كل  
 حاجة عشان اسم أمين بيه يفضل فوق . بعدها نتكلم افتدلم .  
 قاسم : تعملولى توكيل معنى ؟  
 تفيدة : تمام افتدلم .  
 ينظر لأمه التى تقول وهى تغالب نفسها  
 الأم : وارفع لى قضية على خالك عشان تطلب نصيبى فى الورث .  
 قطع

مشهد / ٢٤ بيت الخال فى الدنيا نهار / دخل

الخال الكبير وحوله اخوته الأصغر . فى يد الخال اعلان يلوح به  
 الخال : اختكم باعته إعلان على يد محضر بتطلب نصيبها فى الورث .  
 أخ ١ : وايه اللى تشوفه يا كبير ؟  
 يتمتم وكأنه يخاطب نفسه  
 الخال : والله يا قاسم كبرت ودرست القانون ورفعت قضية على خالك .  
 أخ ٢ : لو ادبناها نصيبها كل البنات حيطلبوا نصيبهم . وارضنا تروح  
 للأغراب .

الخال للاخ ١

الخال : اختكم بعد جوزها ما مات محتاجة فلوس . . ناخذ لها عشرين  
 جنيه وزيارة كبيرة وتندلى على مصر . . وقل لها أخوكى الكبير  
 بيقول لك عيب لما أولاد خطاب بك يرفعوا قضايا على بعض .  
 أخ ٢ : واذا عندت ؟  
 الخال : ما تزعلهاش . . لكن أنا لى تصريف تانى .  
 أخ ١ : بس انت بتقول ان ولدها بقى محامى .  
 الخال : القانون اللى درسه فى بلاد بره ما يمشيش هنا . . المحامين هنا  
 يعرفوا كيف يضيعوا عمر الواحد وهو ييجرى ورا أرضه .

قطع

جلنار وخضر

خضر : يعنى عايزة إيه دلوقت يا جلنار ؟

جلنار : عايزة سرايا فى الحلمية . . انت فاهم انى حاطب لك الباشوية

وانت لسه ساكن فى شقة صغيرة زى دى ؟

خضر : هو حرام يعنى الباشوات يسكنوا فى شقق ؟

جلنار : أيوه حرام .

خضر : حاضر يا ستى من بكره حادور على سرايا اشتريها ، واذا ما لقيتش

حابنى

جلنار : السرايا تكون فى الحلمية مع الأكابر .

خضر : حاضر . . بس خلصينى بقى من انتظار الباشوية .

جلنار : السرايا الأول .

خضر : حاضر يا ستى السرايا الأول .

قطع

الأم وأخ ٢ وقاسم

الأم : قول لآخوك انى بعد موت أمين بيه محتاجة لكل ملهم . .

أخ ٢ : بلاش يا بنت والدى سكة المحاكم ، الزوادة حتجيلك أول باول ،

وكل سنة حتجيلك نصيبك ، لكن بلاش المحاكم .

الأم : ايه رأيك يا قاسم ؟

قاسم : رأيى ان كل واحد أولى بحقه .

أخ ٢ : بلاش تعاند خيلاتك يا ابن اختى .

قاسم : طب ادونا حقنا .

أخ ٢ : لا . . مافيش بنات تورث عندنا ، أرضنا ماتروحش للغرب أبدا .

قاسم : يبقى مافيش غير المحاكم .



خضر باشا و زوجته چلنار



أخ ٢ : انت حر يا ابن أختي پس افنكر انك انت اللى ابتديت .  
 الأم : حتمشى فين بالليل كده ؟  
 أخ ٢ : اللوكاندات فى مصر مافيش أكثر منها .  
 الأم : بيتى موجود وتبات فى لوكاندة ؟  
 أخ ٢ : مادام رفعتى قضايا وناوية تودينا المحاكم تبقى بعيتنا . عن اذنكم  
 يتصرف مندفعاً غاضباً . الأم وقاسم ينظر كل منهما للآخر .  
 قطع

مشهد / ٢٧ مكتب سعد نهار / داخلي

سعد ، قاسم  
 سعد : معقول يا قاسم عايز تستمر فى القضية ضد خالك عشان الأرض ؟  
 قاسم : ليه لا ؟ امال بعنت له الإعلان ليه ؟  
 سعد : اسمح لى اقول لك انت مش فاهم حاجة .  
 قاسم : ازاي بقى ؟  
 سعد : الفلاحين عندنا خبرا فى التحايل على القانون ، عشان ما يسلموش  
 الأرض لخواتهم البنات .  
 قاسم : يعنى ايه ؟ نسيب الأرض تضيع كده ؟  
 سعد : عايز نصيحتى ؟ بيعموا الأرض دى لخالك .  
 قاسم : لخالى ؟  
 سعد : ما هو لا يمكن حيسمح ان حد غيره يشتريها .  
 قاسم : معقول الكلام ده ؟ يعنى البنات دول أجروا انهم اتولدوا بنات  
 عشان حققهم يضيع كده ؟ سبحانك يارب .  
 سعد : من غير مواعظ ، ادعى بس انه يرضى يشتريها .  
 قاسم : كمان ؟  
 سعد : أنا مش فاهم بتستغرب ليه ، ما هى الأرض معاه بيلاش ، يشتريها  
 ليه ؟  
 قاسم : خلاص . . أنا حانسى الموضوع ده دلوقت لما افضى له .

سعد : بس نصيحتي حله ودي . المحاكم مش حتجيب نتيجة .  
قطع

ليل / داخلي

شقة خضر

مشهد / ٢٨

خضر يدخل على جلنار سعيدا مهللا

خضر : جلنار .. قولي لي مبروك يا جلنار .. قولي لي مبروك .

جلنار : قل لي الأول على إيه ؟

يسحب يده من خلف ظهره فاذا به يمسك ورقة

خضر : شايقة إيه دي ؟

تشدها منه بحركة مباغثة

جلنار : إيه دي ؟ وريني

تقرأ بعربية مكسرة لخضر

جلنار : ع .. عقد .. شراء .. اشتريت إيه ؟

خضر : حزري .

جلنار : إنكلم يا خضر .. هي فزورة ؟

خضر : إنتي طلبتي إيه ؟

تفكر لحظة

جلنار : طلبت سرايا

خضر : وانا اشتريت لك سرايا

جلنار : صحيح يا خضر ؟

خضر : خضر بيه إذا قال فعل .. إستعدى يا هانم فور الانتقال للسرايا .

جلنار : حالا .. تعرف .. لو اعرف ازغروط كنت زغروطت .

خضر يتسم وهو يجلس مستريحا

خضر : والله يا خضر جالك يوم تبقى فيه من سكان السرايات .

قطع

سعد يخرج من غرفته ومعه حقيبة صغيرة . الخادم يراه يسأله  
 خادم : على فين يا سعد افندى ؟ عندك قضية حشافر لها ؟  
 سعد : لا يا سيدى أنا رايح اسكندرية استقبل اخويا فتحي .  
 خادم : هو خلاص يا سعد افندى خلص دراسته فى بلاد برة ؟  
 سعد : أيوه خد ليسانس حقوق من باريس .  
 خادم : السنين بتجرى .  
 سعد : الصغير بيكبر . عن إذتك بقى عشان الحق قطر اسكندرية .  
 سعد يتجه للباب  
 خادم : مع السلامة يا سعد افندى . . مع السلامة . .  
 قطع

قاسم يجلس مع مصطفى باشا  
 مصطفى : خير يا قاسم يا ابنى .  
 قاسم : طالب خدمة يا مصطفى باشا .  
 مصطفى : اطلب يا ابنى ، انا زى والدك بالظبط . . إوعى تفكر ان والدك  
 مات طول مانا موجود .  
 قاسم : كتر خيرك يا عمى .  
 مصطفى : هيه إيه الخدمة اللى انت عايزها ؟  
 قاسم : عايز أتنقل من النيابة المختلطة .  
 مصطفى : تنتقل من النيابة المختلطة تروح فين ؟  
 قاسم : أروح قضايا الحكومة .  
 يفكر لحظة .  
 مصطفى : طيب ادينى مهلة بسيطة .  
 قاسم : أرجو انى ما اكونش بأسبب لحضرتك حرج .

مصطفى : ما أخبش عليك انى مختلف مع نوبار باشا رئيس النظار لكن  
مش مهم ، حا عمل لك الى انت عايزه . . إدينى بس مهلة .  
قطع

مشهد / ٣١      غرفة قاسم فى المحكمة المختلطة      نهار / داخل

قاسم يقرأ كتابا فرنسيا . الباب يدق .  
قاسم : ادخل .  
يفتح الباب ونرى سعد وفتحى زغلول .  
سعد : السلام عليكم .  
فتحى : بونجور مسيو .  
قاسم يفاجأ  
قاسم : فتحى ؟ حمد الله على السلامة يا ابو الفتوح ازيك يا راجل .  
يحتضن كل منهما الآخر .  
فتحى : انا عال العال . المهم انت ، اخبارك ايه ؟  
قاسم : قل له يا سعد .  
سعد : اقول له ايه ؟ ده من ساعة ماجه بيكلمنى على إنه لازم يبقى ناظر  
للحقانية . كلمه انت بنفسك احسن .  
قاسم : ناظر للحقانية مرة واحدة ؟  
فتحى : أقل منها ؟ على الأقل أنا دارس القانون فى باريس . . حد من  
الوزرا درس فى باريس ؟  
سعد : يا ابنى الحكاية مش باريس ومصر . الحكاية إنه مافيش وزرا من  
ولاد الفلاحين الوزرا لازم يكونوا تراكوة .  
فتحى لسعد  
فتحى : غلط .  
قاسم : طب اعدوا الاول وبعدين اتخانقوا .  
يجلس فتحى يخاطب الاثنين  
فتحى : شوفوا يا اخواننا العقل بيقول ايه ؟ بيقول ان الانجليز لازم

يكون عندهم مجموعتين في مصر يلاعبوهم قصاد بعض :  
مجموعة تركية ومجموعة مصرية ، هم دلوقت يلاعبوا بالمجموعة  
التركية لوحدها ، لأن كبراء المصريين كانوا مشتركين في الحرب  
ضد الاحتلال سنة ٨٢ ودلوقت يا إما متفيين يا إما مركونين ، لكن  
بعد شوية حيكون فيه جيل جديد من الشباب درس بره ، ولمع في  
الداخل وأصبح مؤهل للقيادة .

قاسم : ما كانش عاجبك ناظر أهو بقى رئيس نظار . . خنسكت ولا يبقى  
الخدوي ذات نفسه ؟

سعد : تعرف يا قاسم إيه اللي مخوفنى في الكلام ده ؟ إنه يتسلط على دماغه  
ويسمى له بدون ما يفكر في الصح والغلط وفي الحالة دى جايز  
يخسر نفسه في سبيل طموحه .

قاسم : كلامك صح يا سعد لكن الغريب ان كلامه هو كمان صح  
والانجليز حيسموا بنفسهم لتكوين مجموعة مصرية تشارك في  
الحكم .

سعد : نازلى قالت لى الكلام ده من زمان يعنى مش أول مرة اسمعه .

الباب يدق يدخل موظف التحقيقات ويقول لقاسم

موظف : جناب رئيس المحكمة طالك

بضيق

قاسم : حاضر عن اذنكم يا جماعة .

قطع

رئيس المحكمة وأمامه قاسم

رئيس المحكمة : At last Mr. Kassem اخيرا حسينا ؟

قاسم : أرجو ان مشى من النيابة المختلطة يكون مريح لكل اللي كانوا

متضايقين من وجودى .

ر . المحكمة : بالعكس . . مستر قاسم . إسمح لى اكلمك بصراحة

لاول مرة . . إنت لو وكيل نيابة فى بلدى كنت حابقى سعيد جدا  
 بوجودك ، لكن أرجو تقدير موقفى انت عارف أوضاع فى مصر بعد  
 احتلال ملخبطة كتير ، وانا زيك أخدم بلدى .  
 قاسم : جناب رئيس المحكمة . العدالة مالهاش دعوة بالسياسة .  
 وبصراحة انا حيجمى الوقت اللى اهاجم فيه وجود المحكمة  
 المختلطة واتادى بعدم التمييز بين المصريين والاجانب فى  
 القضاء .  
 ر . المحكمة : مستحيل دلوقت انتم مش عندكم قضاة متعلمين كفاية ،  
 والوضع السياسى لن يسمح .  
 قاسم : حتى لو كان الوضع لا يسمح دلوقت فلا بد من طرح الفكرة تمهيدا  
 للتغيير .  
 ر . المحكمة : واضح انك وطنى تمام مستر قاسم .  
 قاسم : ارجو هذا .  
 يعطيه قرارا  
 ر . المحكمة : Any bow اتفضل . . ده قرار نقلك لقضايا الحكومة .  
 قاسم : شكرا .  
 رئيس المحكمة يحييه بحرارة .

## قطع

مشهد / ٣٣ المقهى القديم الذى كانت الشلة تجلس عليه قبل السفر نهار / داخل

نفس المقهى تتوقف عربة حنطور وينزل منها قاسم وسعد وفتحى . قاسم يدفع للعربجى  
 يجلسون على المقهى .

فتحى : انت اللى حتدفع يا عم قاسم بمناسبة نقلك ما تنساش ان وشنا  
 حلو عليك .

قاسم : حاضر يا سى فتحى .

سعد : المهم يا فتحى افندى حضرتك عاوز تتعين فىين ؟

فتحى : فى المحكمة المختلطة .

سعد : رغم كل الكلام اللى سمعته من قاسم ؟  
فتحى : قاسم ده محببها لكن انا لازم اعمل جسر مع الانجليز .  
قاسم : مش ممكن يا أخي انا انت اللى بتبنيه ده .  
فتحى : انا واحد وصولى انتم مالكم ؟  
سعد : اقلل الكلام مع الجدع ده يا قاسم الا مزودها قوى .  
قاسم : احسن برضه .

قطع

---

مشهد / ٣٤ مكتب رئيس قلم قضايا الحكومة نهار / داخلي

قاسم يسير نحو المكتب الذى يجلس عليه رئيس القلم . يقدم اليه ورقة . يأخذها . ينظر فيها يرفع راسه ويخاطب قاسم وفي حديثه إعجاب واضح .

رئيس القلم : إنت قاسم أمين ؟

قاسم : ايوه يا افندم .

رئيس القلم : أولا أهلا وسهلا بيك فى قضايا الحكومة .

قاسم : أهلا بحضرتك .

رئيس القلم : ثانيا أحب أحبيك على موافقتك فى النيابة المختلطة لأنها بتدل على وطنية عظيمة . وعلى فكرة كل موافقتك كانت بتوصلنا أول بأول .

قاسم : أنا يا فندم ما عملتش غير الواجب .

رئيس القلم : عموما هنا الأمور مختلفة . إحنا هنا المفروض اتنا بتدافع عن مصالح الحكومة ، بدل المحاكم المختلطة اللى كانت بتدافع عن مصالح الأجانب .

قاسم : ان شاء الله يا افندم اكون عند حسن ظنك .

قطع

---

قاسم على المنصة ، أمامه طفل كفيف في حوالى السادسة عشر . هناك محام يتكلم  
المحامى : المشكلة يا سيدى أن القانون ينص على أن المعاش لا يعطى  
لابن المتوفى بعد أن يبلغ هذا الابن ١٥ عاما . . ومع احترامنا  
للقانون فإننا نسأل

يشير للولد الكفيف

كيف يستطيع ابن مثل هذا الرجل الكفيف ، أن يكسب معاشه ؟  
هل نريده أن يمد يده على ابواب المساجد ونواصى الشوارع ليسأل  
الناس ؟ هل كان والده يدفع اشتراكه فى المعاش ليكون ولده بعد  
موته شحاذا ؟ لقد رفعنا قضيتنا أمام عدالتكم لتطلب انصاف هذا  
الابن المسكين . . ونحن فى انتظار حكمكم العادل . . شكرا .

قاسم ينظر لأوراقه يقلبها

قاسم : يستمر منح المعاش للابن غير القادر على الكسب .  
الولد الكفيف يهتف قبل أن ينصرف هو ومحاميه  
الكفيف : يحيا العدل . . يحيا العدل

قاسم يتشم . ينظر للحاجب

قاسم : اللى بعده

الحاجب بنادى

الحاجب : الشيخ عبد المعبود محمد عبد المعبود .  
يدخل شيخ بياض رجال الدين . يتجاوز الخامسة والستين ، ويستند على عصاه .  
عبد المعبود : سلام عليكم .  
قاسم : عليكم السلام ورحمة الله . . انت يا مولانا الشيخ عبد المعبود  
محمد ؟

عبد المعبود : أى نعم يا حضرة القاضى

ويقدم له أوراقا . ينظر قاسم إليها . يعيدها له

قاسم : فىن محاميك يا شيخ عبد المعبود ؟

عبد المعبود : المحامى محتاج لأتعب وأنا يا سيدى لا أملك شيئا فبعد  
الخامسة والستين أخرجتنى الحكومة على المعاش ، وبخلت على



بالمعاش .

قاسم يقلب الأوراق

قاسم : امال مين اللى كاتب لك المذكرة دى ؟

عبد المعبود : أنا يا حضرة القاضى . . وهل المحامى أقدر منى على كتابة

شكواى ؟

قاسم يهز راسه

قاسم : بتقول فى الشكوى ان لك مدة خدمة سابقة فى الحكومة مش عايزين

يحسبوا لك .

عبد المعبود : أى نعم .

قاسم : كنت فىن مدة الخدمة دى ؟

عبد المعبود : فى وزارة الاشغال فقبل أن أحصل على الشهادة من الازهر

كنت اعمل أمين مخزن فى الاشغال وبعد الشهادة نقلت على

الاقواف واعظا . . فهل مدة العمل فى الاشغال التى أخذت

الحكومة منى أثناءها اشتراكا شهريا للمعاش غير قابلة للضم ؟

قاسم يقلب الأوراق

قاسم : الورق اللى عندى بيقول انك قعدت عشر سنين فى الاشغال

عبد المعبود : ولو ضمموهم لخدمة الاوقاف حاستحق المعاش .

قاسم يقلب الأوراق

قاسم : حقك واضح يا شيخ عبد المعبود

عبد المعبود : الحمد لله .

قاسم يكتب

قاسم : تضم مدة الخدمة السابقة ويمنح الشاكى المعاش المستحق .

عبد المعبود : الله يكرمك . . الله يدعك للعدالة . . الله يبارك لك .

قطع

المساعد : جناب المستشار . . الذى بيعمله قاسم ده مستحيل . .  
 رئيس القلم : ايه هو المستحيل يا حضرة المساعد ؟  
 المساعد : بيعحكم ضد الحكومة .  
 رئيس القلم : المهم . . بيعحكم طبقا للعدالة ولا عكسها ؟  
 المساعد : لكن الحكومة بالشكل ده . .  
 رئيس القلم : لو سمحت . . أكرم للحكومة الف مرة انها تتوصف بالعدل  
 من إنها توفر أى أموال على حساب إنسان مظلوم .  
 المساعد : جناب المستشار احنا وظيفتنا الدفاع عن مصالح الحكومة .  
 رئيس القلم : فعلا لكن لازم تعرف ان من مصلحة الحكومة انها ما تظلمش  
 رعاياها . . وده الذى قاسم أمين بيعمله .  
 قطع

---

مشهد / ٣٧      بهو قصر خضر بك      نهار / داخلى

خضر وجلنار يستعرضان السراى الفاخر  
 خضر : ايه رأيك يا جلنار ؟  
 جلنار : ثجتن . . سراية باشوات صحيح . أنا مش حيهداالى بال غير لما  
 أخلى حريم القصر يجيبوا لك الباشوية  
 تداعيه

جلنار : يا باشا  
 ينظر فى مرآة بالحائط  
 خضر : تليق على الباشوية . . مش كده ؟  
 قطع

---

مشهد ٣٨      بهو قصر امين بك      ليل / داخلى

الام وتفيدة هانم تجلسان متدثرتين بالمعالبس الثقيلة . تقومان بشى أبى فروة على مدفأة  
 ينزل قاسم أمين ومعه أوراق .

الأم : تعال يا قاسم هنا .

قاسم يجلس ، تفيدة تقدم له واحدة أبى فروة ساخنة

تفيدة : خذ قاسم . . أبو فروة ملهلبة إدفى ولد .  
ياخذها

قاسم : شكرا يا أمى

يضعها على جنب

قاسم : إسمعوني شوية . . انا الحمد لله سويت كل ديون والدى .

يقدم ورقة لأمه وأخرى لتفيدة

قاسم : دى الحاجات اللى فاضلة لك ودى الحاجات اللى فاضلة لك .  
الام تعيد الورقة إليه .

الام : حاجات إيه يا ابنى ؟ هو فيه بينى وبينك فرق ؟

تفيدة تعيد الورقة أيضا

تفيدة : ولدنا قاسم انت دلوقت راجل البيت . انت اتصرف فى كل شىء .

احنا مش عايزين حاجة غير الستر افندم

قاسم : ما ينفعش الكلام ده . انتم لكم حقوق لازم تاخذوها .

الام : اسمع يا ابنى انا حاكثب لك نصيبى

تفيدة : وانا كمان ولدنا قاسم . احنا مش نفهم حاجة فى أرض وزرع وكلام

من ده ، ومش لنا حد يورثنا غيرك ، هات حد أفندم يعمل إجراءات

بيع وشرا بيتنا وبينك

للأم وتفيدة

قاسم : يا أمى . . يا ستى . . اللى عايزين تعملوه ده غلط . . إفرضوا إنى

خدت حاجتكم وما سألتنس فيكم . كل واحدة أولى بحاجتها .

تفيدة بحده

تفيدة : ولد قاسم . . مش عايزه كلام كثير . . اللى بنقول عليه يتنفذ . .

فاهم والا لا ؟

قاسم : الامر لله . . حاضر .

تفيدة للأم

تفيدة : إدى له أبو فروة أفندم خليه اتغذى

يتناول أبا فروة وبينما هو يأكل يخاطب نفسه

قاسم : الغريب ان الستات لعدم خروجهم للحياة العامة بيرفضوا ياخدوا  
حقوقهم لانهم عارفين انهم مش حيقدرنا يتصرفوا فيها . .  
صحيح ان عاطفة الامومة فى حالتنا هى الأساس لكن حتى بدون  
عاطفة الامومة صعب قوى ان أى ست فى مصر تعرف تدير  
مصالحتها .

قطع

---

نهاية الحلقة الحادية عشر

## الحلقة رقم (١٢)

مشهد / ١ ممر بقلم قضايا الحكومة نهار / داخلي

قاسم يدخل ، الساعة يحيونه اثناء دخوله يرد عليهم التحية يقابله موظف التحقيقات يستوقفه

موظف : قاسم افندى ؟ صباح الخير يا قاسم افندي

قاسم : صباح النور .

موظف : السيد رئيس القلم عايز حضرتك قال اول ما تيجي تدخل له

قاسم : حاضر

يتجه لباب رئيس القلم . .

قطع

مشهد / ٢ مكتب رئيس القلم نهار / داخلي

رئيس القلم ينهض من على مكتبه متجها نحو قاسم متهللا

رئيس القلم : انا يا سيدى باعت لك عشان ابشرك

قاسم : بايه يافندم

ر . القلم : بالترقية

قاسم : لى انا

ر . القلم : طبعاً انا رشحتك عشان تكون رئيس نيابة فى الحركة الجاية

قاسم : رئيس نيابة مرة واحدة ؟ انا يدوب جاي من فرنسا بقى لى ثلاث

سنتين ونص

رئيس القلم : انت قدها وقدود راجل دارس قانون فى اوروا متفوق فى

دراستك ده غير انك قانونى كفاء ولازم تاخد فرصتك انا رشحتك

وانا واثق انك حبيبى وشى  
 قاسم : الحقيقة يافندم دى ثقة اعتر بيها وربنا بقدرنى واكون عند حسن  
 ظنك .  
 ر . القلم : ربنا بقدرنا كلنا عشان نعمل حاجة للبلد .  
 قطع

---

مشهد / ٣      غرفة نوم محمد عبده (بالشقة الجديدة)      نهار / داخلى

محمد عبده يدخل على زوجته رضا التى ترقد على السرير وبجانها طفلتها . . يجلس  
 بجانبها ويخاطبها برفق .  
 محمد : حمدا على السلامة يا رضا .  
 رضا : يسلمك الله .  
 محمد : اتنى بخير ؟  
 رضا : نعمه .  
 كأنها تعتذر اليه .  
 رضا : لكن  
 محمد : لكن ايه  
 رضا : بخاطرك جيت لك بنت . . كان نفسى اجيب لك ولد تفرح بيه .  
 محمد : ولد ولا بنت كله نعمة من الله .  
 رضا : ما انت زعلان يا شيخ محمد ؟  
 محمد : حد يقدر يعترض على ربنا سبحانه يهب لمن يشاء أناأنا ويهب لمن  
 يشاء الذكور .  
 رضا : قالوا لى إن الفلاحين فى مصر بيعجوا الصبيان .  
 محمد : حين يشاء الله سيرزقنى بالولد . . المهم . . حمد الله على  
 سلامتكم .  
 رضا : تسلم لى يا شيخ محمد .  
 قطع

قاسم يخرج من مكتب رئيس القلم يمشى عدة خطوات ليسمع صوتا من الخلف ينادى ،  
يتوقف ينظر للخلف يصل اليه فتحى

فتحى : قاسم افندى . . قاسم افندى عرفت اخر خبر

قاسم : خبر ايه .

فتحى : رئيس النظار اتغير .

قاسم : يتغير اهو كلهم العن من بعض .

فتحى : لا يا حبيبى رئيس النظار الجديد مش اى حد ده رياض باشا حبيب

الشيخ محمد عبده

قاسم : والله الشيخ محمد عبده يستاهل كل خير المهم الخديوى توفيق

يغير رايه فيه

فتحى : فيه حاجة كمان تهملك .

قاسم : حاجة ايه .

فتحى : مصطفى باشا فهمى بقى ناظر الحرية والبحرية باقول لك ايه

الراجل ده ماعندوش بنات فى سن الجواز ؟

قاسم : حتى لو عنده الراجل ده متعصب للاتراك والانجليز ما بيعجبش

المصريين .

فتحى : خسارة لكن ولو وحياتك انت لانتجوز واحدة بنت اكابر بحيث

تكون واسطة ابوها زى الطلقة مافيش حاجة تقف قصاها .

قاسم : عارف مين بقى اللى ينطبق عليها الشروط دى ؟ . بنت المعتمد

البريطانى . سلام

يتركه وينصرف

فتحى : بتتريق ؟ طيب يا عم قاسم انا ايه . . وانت ايه .

قطع

يفتح الباب لتدخل الاميرة نازلى على سعد الذى ينهض . . مفاجأة

سعد : سمو الاميرة ؟

نازلى : ممكن ادخل ؟

سعد : ايه المفاجآت الطيبة دى ؟

نازلى : عندى لك خبر هایل

سعد : خبر ايه ؟

نازلى : الوكيل اللى بيدبر املاكى استعفى النهارده قال انه كبير فى السن

وعاوزه يرتاح

سعد : والخبر ده يهمنى ؟

تزغده

نازلى : كل الاخبار اللى تهمنى لازم تهملك .

سعد : اذا كان كده انا موافق .

نازلى : عارف مين حيكون وكبلى الجديد ؟ أنت

لا يرد . . ويظل على صمته

ما بتكلمش ليه ؟

سعد : بصراحة ؟

نازلى : بصراحة كاملة اياك تخفى حاجة .

سعد : خايف .

نازلى : خايف من ايه ؟

سعد : المثل بيقول اذا كان لك صاحب لاتعامله ولا تناسبه . . عشان كده

خايف الوكالة دى تأثر على علاقتى بيكى .

نازلى : لازم تعرف ان مافيش حاجة فى الدنيا ممكن تأثر على علاقتنا .

سعد : سمو الاميرة

تضع اصبعها على فمه

نازلى : شش

يصمت

نازلى : انا نازلة دلوقت ابعت الناس بتوعك لمكتب الوكيل القديم يجيبوا



الاوراق من هناك واعمل الاوراق اللازمة عشان التوكيل يكون  
رسمى .

مستسلما

سعد : امرك

تنظر حولها حتى لا يسمعها حد

نازلى : وحاستناك يوم الجمعة فى القصر من الصبح وحتتغدى سوا

سعد : الدعوة دى اجبارية ؟

نازلى : زى اوامر مفهوم ؟

سعد : مفهوم يا افندم .

قطع

---

مشهد / ٦ حدائق قصر نازلى نهار / خارجى

سعد ونازلى على الخيل يجريان يصلان للبرجولا ينزلان ويتجهان اليها بعد ان يأتى  
السياس لاختد الخيل منهما

نازلى : سعد . . لحد امتى حنفضل انا وانت كل واحد فى ناحية ؟

سعد : تقصدى ايه يا نازلى ؟

نازلى : احنا لازم نتجوز

نلمح وجها يتلصص من وراء الشجر والنباتات

سعد : تانى

نازلى : تانى وتالت وعاشر

سعد : وانا قلت لك راى الف مرة . . عيلتك كلها حترفض انك تتجوزى

فلاح

نازلى : انا اللى حاتجوز مش عيلتى

سعد : حتتحديهم ؟

نازلى : ايوه .

الوجه المتلصص يظهر من وراء النباتات

سعد : صعب قوى اننا نعيش محاطين بالاعداء

نازلى : يعنى بترفض

سعد : هو ده اليوم اللى كنت عامل حسابه من زمان . . فاكدة لما قلت لك ويعدين ؟

بيتسم بمرارة هادئة

نازلى : لأمش فاكدة ومش عايزة افكر . اسمع يا سعد ايه رأيك لو نسافر اوروبا ونتجوز ونعيش هناك ؟

سعد : نتفى نفستا بايدينا ؟

نازلى : نهرب بحبنا

سعد : لا يا نازلى انا حياتى هنا فى مصر ولا يمكن تكون فى حتة غيرها انا زى السمك شفتى سمك يقدر يعيش برة المياه ؟

نازلى : ليه بتعقد الدنيا يا سعد ؟

سعد : باعقدها ؟ اتنى لو تعرفى قد ايه انا باتعذب بحبك وحرمانى منك ما كنتيش قلنى الكلمة دى ، انا الود ودى يتلم شملنا دلوقت قبل اللحظة الجاية لكن اصعل ايه ؟ من بين كل ستات مصر ما احبش غير اميرة ؟ احبها وانا عارف ان حى من غير امل

تمد له يديها

نازلى : الاميرة مادة لك ايديها

لا يمد يديه

سعد : لو كان بايدى ماكتش مديت ايدى بس كنت خطفتها من بين الحراس وخدتها بعيد بعيد عن كل العيون وعشت معاها حكاية ولا حكايات الف ليلة لكن . .

نازلى : لكن ايه ؟

ينهض

سعد : ائذنى لى يا سمو الاميرة

تقف وتتثبت به

نازلى : ارجوك يا سعد ما تسبينش انا محتاجة لك .

يخلص نفسه منها ويمضى تناديه

نازلى : سعد سعد

لا يرد تسيل من عينيها الدموع

تقطع

قاسم يضع هدومه فى الشنطة وامه تقف امامه

الام : يا ابنى انت مش خلصت علام .

قاسم : ابوه خلصت

الام : طيب رايح فرنسا تانى تعمل ايه

قاسم : ازور الناس

الام : وتسب امك يا قاسم ؟ اللى انت رايح تزورهم دول اغلى من أمك ؟

قاسم : يا امى قدرى الموقف انا حياتى هنا مكررة مافيهاش جديد لازم اغير

اروح للناس اللى عرفتهم واللى فارقتهم ارجو كى يا امى ده اسبوع

ولا اسبوعين بالكثير .

تفيدة قادمة من اعلى ووراءها كهرمائة التى اخبرتها

تفيدة : فرنسا يوك سفر يوك انا مش موافق افندم

قاسم يضحك تأتى اليه وتقول اثناء المجيء

تفيدة : يعنى ايه افندم تسافر وتسب اثنين ستات لوحدهم ؟

كهرمائة تتابع

تفيدة : نعيش ازاي من غير راجل يشوف مصالحنا ؟ مين يراعيانا ؟ مين

يخلى باله مننا

تصل اليه

تفيدة : دى وصية ابوك افندم ؟

قاسم : اهدى شوية يا ست الكل واسمعينى لازم تتعودوا بقى انكم تعتمدوا

على نفسكم شيلوا من دماغكم ان حد يخلى باله منكم . . انتم

زيكم زى الرجاله بالضبط لا ناقصين ايد ولا ناقصين رجل وكل

اموركم انا موضيها قبل ما سافر يبقى عايزين راجل يعمل لكم ايه ؟

تفيدة : سامعة ابنك سنه هانم ؟

الام : ايه اللى بتقوله ده يا قاسم ؟

كهرمائة تتابع

قاسم : يا امى الست فى اوروبا دلوقت مش مسؤولة عن نفسها ويس دى

مسئولة عن ميت حاجة مش معقول حتفضلوا على طول كده

عازرين تعتمدوا على حد . . طب افرضوا انى مت حتعملوا ايه ؟

كلمة الموت تزعجهما

تفيدة : بعد الشر افندم ما تقولش كده . . تانى حبيبي قاسم .

الام : الشر بره وبعيد ان شاء الله اللى يكرهك .

قاسم : ياللا بقى وسعوا ما تعطلونيش

الام : راجع نفسك يا ابنى

تفيدة : قاسم حبيبي انت لو مافرت وسيتنا انا اتوه احس انى يثيمة

الام : احنا عمرنا يا ابنى ما عشنا لوحدها

قاسم : لازم تعلموا عارفة يا امى مرة النبى عليه الصلاة والسلام خرج

للحرب هو وكل الرجالة وساب الستات لوحدهم ومعاهمش غير

راجل واحد وبعدين جه واحد من الاعداء يلف فى المدينة والراجل

المسلم الوحيد ما قدرش ينزل يحارب العدو عارفين حصل ايه ؟

تفيدة : حصل ايه يافندم ؟

قاسم : نزلت صفية بنت عبد المطلب حاربت العدو وقتلته وحمت المدينة

تفيدة : عفارم عليها

قاسم : شغتم الستات بقى ازاي يقدرُوا يحموا نفسهم وازاي يقدرُوا يعملوا

اللى يعجز عنه بعض الرجاله

الام : يا ابنى احنا فين وستات اهل البيت فين ؟

قاسم : انتم مش اقل منهم لكن لازم تشجعوا وتعتمدوا على نفسكم

تفيدة : ما اتعودناش حبيبي

قاسم : اتعودوا

يحمل حقييته مرة اخرى

قاسم : ياللا وسعوا خلونى اتوكل على الله

الام : برضه محكم رأيك ؟

يقبلها

قاسم : اشوفك بخير

تسيل دموعها

الام : اوعى كده . . مش عاوزه اسلم عليك .

يقبلها مرة اخرى وياخذها فى حضنة

قاسم : ما اقدرش امشى واتنى زعلانة منى  
الام : لا اوعى  
قاسم : عشان خاطرى بقى ما تخلينيش امشى زعلان ياللا . . ادعى لى  
تسكت  
قاسم : ياللا . . ادعى لى  
على مضض  
الام : تروح وتيجى بالسلامة  
يقبل جبينها ويتجه لتفيدة التى تلقى بنفسها فى حضنه  
تفيدة : ما تغيش قاسم حببى عشان أمك تفيدة قاسم  
قاسم : حاضر يا أمى . . مش حاغيب  
يسحب نفسه من حضنها يحمل الحقيبة ويخرج بينما هما واقفتان تبكيان  
قطع

---

مشهد / ٨ الممر المؤدى لقاعة نازلى نهار / داخلى

أحد ياوران الخديو يسير فى ثيابه الفاخرة حتى يصل الى الباب يخاطب الخادم  
الياور : سمو الاميرة موجودة  
خادم : موجودة افندم  
الياور : قل لها ياور جناب ولى النعم  
خادم : لحظة  
يدخل الياور يروح ويحجى يخرج اليه الخادم  
خادم : اتفضل افندم  
يدخل  
قطع

---

مشهد / ٩ قاعة الاميرة نازلى نهار / داخلى

الأميرة تسقى بعض الأزهار . الياور يقف بأدب ينتنح تستدير له ينحنى

الياور : تحياتى سمو البرنيس

نازلى : اهلا بيك .

الياور : حضرة ولى النعم الخديو توفيق طالبك للمقابلة

نازلى : امنى ؟

الياور : بكرة الساعة ستة مساء افندم

نازلى : ما قالش ليه ؟

الياور : لا يا سمو البرنيس

يتحنى وينصرف

نازلى : قل لسموه انى حاكون عنده فى الميعاد بالظبط ايه اللى فكر توفيق

بى دلوقت ؟ اول مرة يطلبنى من يوم ما قعد على العرش . . على

كل حال يا خير بفلوس بكرة يبقى يبلاش .

قطع

ليل / داخلى

قاعة عرش توفيق

مشهد / ١٠

الحاجب يعلن

الحاجب : سمو الأميرة نازلى هانم فاضل افندى

تدخل الأميرة فى أبهى صورة تسير نحو توفيق الجالس على العرش تنحنى انحناءة رقيقة

نازلى : تحياتى لافندينا

توفيق : انتى خليشى فيها تحيات ولا سلامات ؟ ايه اللى بتعمله ده

يا نازلى ؟

نازلى : من فضلك ما ترفعش التكليف بيننا احنا صحيح ولاد عم لكن

الأميرة نازلى هانم افندى

توفيق : ولما انتى عارفة انك نازلى هانم افندى بنت عم الخديوى ازاى

تسمحنى لنفسك باللى بتعمله ده ؟

نازلى : ايه هو اللى باعمله ؟

توفيق : حصلت تحبى ولد فلاح خرسيس ما ارضاش اخليه ضمن

خدمى ؟

نازلى : تقصد مين يا افتدينا ؟ خلى الكلام واضح بيتا .  
توفيق : اقصد الأفتدى دة اللى اسمه سعد زغلول  
نازلى : سعد زغلول مش ولد ده راجل محترم ووكيل اعمالى  
توفيق : وكيل اعمالك يقابلك فى اى وقت وتتغدوا سوا وتتبادلنى انتى وهو  
عبارات الغزل ؟ ما فكرتيش ان الكلام ده لو انتشر حيتى فضيحة  
للأسرة العلوية كلها ؟  
نازلى : اسمع يا ابن عمى انا مش قاصر ولا عيلة صغيرة ولو فى يوم من  
الأيام قررت اصمل حاجة حاصملها فى التور وانت عارف كده  
كويس

توفيق : بتتحدثين يا نازلى ؟  
نازلى : ارجو ان الأمور بينا ما توصلش للتحدى ولأنى حريصة على انها  
ما تبقاش علاقة تحدى حاسمخ لنفسى انتهى المناقشة بينا لحد كده  
قبل ما تطير سهام تانية ممكن تسبب مزيد من الجروح . . عن اذنك  
تنصرف بعصية  
توفيق : بسبب نازلى دى بالذات انا باكره تعليم المرأة . . باكرهه  
قطع

---

مشهد / ١١ عند قبر سلافا نهار / خارجى

يبدأ المشهد بياقة ورد جميلة تملأ الكادر ثم تتبع الكاميرا الباقة وهى توضع على قبر سلافا  
ثم تتبين ان الذى يضع الباقة هو قاسم أمين  
بعد أن يضع الباقة يقرأ الفاتحة رافعا يديه ويكمل قراءتها فى سره  
قاسم : بسم الله الرحمن الرحيم . . الحمد لله رب العالمين . . صدق الله  
المعظيم  
يسير الى الشاهد يضع يده عليه  
قاسم : سلافا . . انا جيت لك زى ما وعدت . . من آخر الدنيا جيت لك  
جيت عشان اقول لك انى لسه على العهد . . مانستوش وحافضل  
طول عمرى وفى لحبنا سلام يا سلافا . . يا أجمل من عرفت

وأغلى من قابلت . . سلام .

قطع

مشهد / ١٢

مكتب لرنود للمحاماة

نهار / داخلي

لرنود يرحب بقاسم

لرنود : اهلا بك في فرنسا مسيو قاسم . . هيه . . بقيت ايه في مصر ؟

قاسم : عضو في قلم قضايا الحكومة ومرشح لرئيس نيابة .

لرنود : خسارة .

قاسم : كنت متوقع ايه بروفيسر لرنود ؟

لرنود : كنت متوقع لك حاجات كتير تبقى صحفى مشهور مثلا أو مفكر

تقدم دراسات لتطوير بلدك .

قاسم : الحقيقي يا استاذ الحياة شغلتنى

لرنود : قاسم . . الحياة بتشغل الناس كلها ما تدورش لنفسك على

تبريرات

قاسم : تفتكر يا بروفيسر انى قصرت ؟

لرنود : أكيد . . انت كده تبقى خبيث أملى

قاسم : لا يا استاذ اوعدك انى ما اخييش املك ابدا

لرنود : مش بالكلام

قاسم : ان شاء الله المرة الجاية اعرض عليك اللى عملته

لرنود : ارجو انك تفتكر وعدك ده

قطع

مشهد / ١٣

قاعة نازلى

نهار / داخلي

نازلى تسير مع السير بيرنج

نازلى : زيارة غير متوقعة سير بيرنج ؟

بيرنج : الحقيقة هى زيارة غير بريئة



نازلى : اذن اسمع لى اسأل ايه السبب ؟

بيرنج : جناب خديو غضبان جدا

He is very angry. It seems you were very rough with him

نازلى : هو اللى بدأ

I Know, but ... بيرنج

نازلى : عاوز تقول ايه your excellency

بيرنج : عاوز اتكلم معاكى بصراحة . . رغم انى فكرت فى وقت من الاوقات انى استخدمك لاشعار خديوى بالضعف الا انى غيرت رأيى I changed my mind انه من الأفضل ان تكون علاقتك به حسنة حتى لا يخشى الناس من الحضور لصالونك .

نازلى : Sir, I am not a doll أنا مش لعبة عشان حد يحركها زى ما هو

عايز . . انا انسانة واقدر اختار لنفسى

Sure princess, Sure but بيرنج

نازلى : لكن ايه سير بيرنج

بيرنج : لكن انتى مهمة جدا بالنسبة لنا صالونك ده هو عيننا اللى ينشوف بيها رجال مصر وقادة الفكر فيها هو المكان اللى بيسمح لنا بمعرفة اهتمامات ناس وأفكارهم عشان كده ارجوك بلاش تفكرى فى جواز من سعد افندى دلوقت .

نازلى : انا أرفض أن حد يختار لى وأؤكد انى لو اتفقت انا وسعد على

الجواز مش حنعمل حساب لحد .

بحزم بضغط على كل كلمة

بيرنج : غلط wrong and don't forget yourself ما تتجوزيهوش

Don't marry Saad now Don't challenge Khedewi ده أمر

نازلى : مالكش امر عندى

بيرنج : لالى . . احنا اتفقنا من بدرى انك حتتعاونى معانا وانا مش اعرف

هزار فى الشغل

نازلى : your excellency

بيرنج : انتهينا Finished

يخرج بخطوات عسكرية

نازلى : معقول كده ؟ كل الستات تقدر تحب وتتجوز وانا الاميرة نازلى  
فاضل سليمة محمد على باشا ما تقدرش تعمل الحاجة اللى تقدر  
تعملها اى ست معقول الكلام ده ؟  
قطع

---

مشهد / ١٤ صالة منزل حسن وجوليا نهار / داخلى

صوت خيط على الباب . خادمة تتجه لفتح الباب ترتدى مريضة شيك . تدخل أم حسن  
أم حسن : متك وسيدك موجودين ؟  
الشفالة : سيدى موجود ..

يأتى حسن من الداخل

حسن : أهلا يا أمى ..

أم حسن : ما دام انت ما بتجيش قلت أجى أنا .

حسن : تشرفى وتنورى يا أم حسن .. أهلا بيكى .. تشربى ايه ؟

أم حسن : شاي ..

حسن : شاي يا حميدة .

ص حميدة : حاضر .

أم حسن : فى كوياية يا حميدة مش فتجان .

ص . حميدة : حاضر .

أم حسن : امال فىن مراتك ؟

حسن : جوليا بتخرج بعد الغدا لمدة ثلاث ساعات بتدرس فرنساوى فى  
ملجأ للأيتام ..

فى حدة ..

أم حسن : بتشتغل يعنى ؟

حسن : لا يا أمى ده عمل تطوعى .. من غير فلوس .. انسانى يعنى .

أم حسن : أهى حجة للخروج ..

حسن : يا أمى صعب ابنى أجيب واحدة فرنساوية .. واخدة تدخل وتخرج

على حريرتها وأحبسها فى قفص ..

أم حسن : فى قفص ما هو كلنا على دى الحال . .  
حسن : انتوا اتعودتوا على كده يا أمى هي لا . .  
تأنى حميدة بالشاى وتقدم للأم وحسن . حسن يتكلم بعد خروج حميدة . .  
حسن : لكن تعرفى ان جوليا بقت واحدة ثانية لما اصبحت بتخرج يوميا  
الثلاث ساعات دول

أم حسن : ازاي معنى ؟  
حسن : سعيدة ومفرشة والأحوال بيتنا أحسن كثير . .  
أم حسن : أحسن ازاي معنى . . ده انتوا يا ابنى قربتوا على اربع سنين مع  
بعض . . وما جيتلكش حته عيل يعملى عليكم البيت .  
حسن : إن شاء الله لما يؤون الألوان . .  
أم حسن : وامنى حيؤون الألوان ؟  
حسن : واحنا حندخل فى إرادة رينا . . عموما أنا مش مستعجل .  
أم حسن فى غضب . . وهي تضع كوبها  
أم حسن : اربع سنين وتقوللى مش مستعجل . . كان زمانك عندك عيلين  
ولا ثلاثة أبوك زعلان . . وأنا زعلانة . . نفسى أشوف عيالك . .  
أشيلهم اخدهم فى حضنى . . إذا كانت مراتك ما بتخلفش . .  
طلقها واتجوز غيرها . .

حسن . . 'ق جوليا'

فى سخرية

أم حسن : اذا كنت مش قادر تستغنى عنها اتجوز عليها  
حسن : ولا اقدر اتجوز عليها  
أم حسن : جرى ايه يا حسن . . يا ابنى ده حقك وعذرك معاك . . ده أبوك  
بيطلق ويتجوز عمال على بطل ومن غير أى اعدا  
حسن : وهو ده كويس يا أمى ؟ ولانت عايشة متهنية ؟ ده ما حدش مكوى  
من نار الضراير قدك . .  
صوت خبط على باب الشقة . يلتفت  
حسن : يظهر جوليا وصلت . . ارجوك يا أمى ما تجيش سيرة الموضوع  
ده قصادها .

فى سخرية

أم حسن : خايف منها ؟  
 حسن : خايف على احساسها  
 أم حسن : يا ابني اخشن شوية .  
 تدخل جوليا  
 جوليا : أهلا يا طنط  
 أم حسن : أهلا بيك  
 ننظر للمائدة التي بالحجرة  
 جوليا : شاي بس . . ليه يا حسن ما قلتش لطنت حميدة تدوق الكيكة اللي  
 انا عملها النهاردة . .  
 حسن : على فكرة يا أم حسن . . جوليا بتعمل كيك حلو قوى  
 جوليا : عن اذنك يا طنط . . حروح اجيب الكيك  
 أم حسن تتبعها بنظراتها ثم تستدير لحسن . .  
 أم حسن : جرى ايه يا حسن . . هي مراتك حتفضل تخرج بالشكل ده على  
 طول  
 حسن : شكل ايه ؟  
 أم حسن : هم الرجالة اللي بيسافروا بره دمهم بيبقى ميه . . فستان  
 محزق . . ووش مكشوف . . وشعر عريان . .  
 حسن : ما هي لابسة برنيطة على شعرها ؟  
 أم حسن : يا ابني عيب خلى مراتك تغطى وشها وجسمها وهي  
 خارجة .  
 قطع

---

مشهد / ١٥ حجرة نوم حسن وجوليا ليل / داخلي

حسن يبدو مهموما  
 جوليا : مالك يا حسن . . فيه حاجة ؟  
 حسن : أمي شايفة انه ما يصحش تخرجي من غير ما تلبسي فوق لبسك  
 الحبرة واليشمك .

جوليا : حسن . . انت عرفتني وانا لبسي زي ما هو وطلبت تتجوزني زي  
 مانا . . ايه اللي جرى ؟  
 حسن : ما انتي عارفة تقاليد المجتمع  
 جوليا : تقاليد المجتمع ده تخصكم انتم تخص حريم بتاعكم انا لا  
 حسن : خلاص انتھينا  
 قطع

---

مشهد / ١٦                      المقهى                      ليل / خارجي

سعد ، حسن ، فتحى يجلسون  
 سعد : يعنى امك حتمعمل حما حتى على الخواجات ؟  
 حسن : انا محتار يا اخوانا انا جوايا راجل شرقي نظرات الناس لمراتي  
 وتعليقاتهم بتضايقني ، لكن في نفس الوقت حاسس ان الست  
 الاوروبية افضل من المصرية . الاوربية متعلمة مثقفة بتفيد  
 المجتمع انما اللي قاعدة في بيتها ما بتشوفش الشارع دي بتفيد  
 المجتمع بايه ؟  
 فتحى : يا ابني خليك مع التقدم ما تضعفش قدام ملاحظات كل واحد  
 حسن : بس انا في الاخر ابن الحاج يوسف  
 فتحى : واحنا اللي ولاد الخواجا بنى ما احنا ولاد الشيخ ابراهيم زغلول  
 الفلاح القرارى  
 سعد : يا حسن انت خدت قرار الجواز وانت عارف ان مصر مختلفة عن  
 فرنسا ولازم نتحمل نتيجة قرارك  
 حسن : انا محتار . . محتار  
 قطع

يدخل قاسم ووراءه الخدم وبينهم سباعى وكهرمانة يحملون الحقائب . تستقبله الأم  
وتفيدة هانم يحتضنهما معا

الأم : قاسم .. ابنى

تفيدة : ولد قاسم حبيبى

قاسم : ازيكم .. وحشتونى .. وحشتونى قوى

الأم : يا حبيبى ما تبقاش تغيب كده البيت من غيرك مالوش حس

تفيدة : ولدنا قاسم افندى .. بعد كده انت تسافر احنا نساافر معاك  
يداعبها

قاسم : عايزة تروحى اورويا عشان الشباب هناك يعاكسوكى  
تضربه ضاحكة

تفيدة : مش لكى دعوة خلبوصة

كهرمانة تغف وراء الحاجز تنصت

قاسم : شايقة يا أمى ؟

الأم : يا قاسم يا ابنى اسمع الكلام احنا من غيرك بنلوص البنت كهرمانة دى

هى اللى بتتحكم

قاسم : وتخلوها تتحكم فيكم ليه ؟

كهرمانة تشير بيدها متوعدة

تفيدة : عشان هى تطلع سوق وهى تمسك مصروف احنا مش نعرف حاجة

قاسم : شوفوا انا ما عنديش تفاهم لازم تتعلموا الاعتماد على نفسكم

الأم : بعد ما شاب ودوه الكتاب يا ابنى

قاسم : مافيش حاجة اسمها شاب كل الحكاية عشان دى أول مرة اسبيكم

فيها بعد كده حتتعلموا وتبقوا اخر عظمة

تفيدة : انت ولد عنيد لكن اعمل ايه ؟ انا احبك خلبوص .. ووحشتنى قوى

الأم : قلبى على ولدى انفطر

قاسم : بس قلب ولدى مش حجر

تفيدة : اعمل معروف قاسم حبيبى مش سيبنا تانى .. اعمل معروف

الأم تنادى

الأم : كهرمانة . . . كهرمانة حضرى الأكل والحمام لسيدك  
تأتى من حيث تنصنت  
كهرمانة : حالا يا ستى

قطع

---

مشهد / ١٨ مكتب قاسم فى قلم قضايا الحكومة نهار / داخلى

قاسم بعد مذكرة يفتح أحد الموظفين الباب ويدخل  
الموظف : قاسم افندى حضرة رئيس قلم القضايا فى انتظارك  
قاسم : حاضر . . حاروح له حالا  
يغلق أوراقه ويتجه للباب

قطع

---

مشهد / ١٩ مكتب رئيس قلم القضايا نهار / داخلى

قاسم يدخل على رئيس القلم الذى ينهض ويسير اليه مهللا تجحظ عيناه  
رئيس القلم : ميروك يا سيادة رئيس النيابة  
قاسم : نعم ؟  
رئيس القلم : باقول لك ميروك يا سيادة رئيس النيابة . . صدرلك ياسيدى  
قرار ترقية رئيسا لنيابة بنى سويف  
بمسك القرار من على المكتب  
قاسم : انا باشكر سعادتك على ترشيحك لى مش حانسى جميلك ايدا  
رئيس القلم : انت تستاهل كل خير يا قاسم افندى  
يصافحه بحرارة

قطع

قاسم يدخل مهللاً على أمه وتفيدة يقول لكل منهما  
 قاسم : أمى . . . . . أمى . . زغردوا . . افرحوا . . هللو . . ابنتكم  
 بقى رئيس نيابة  
 تحتضنه ثم تنظر اليه باعتذار  
 الأم : صحيح يا قاسم . . اترقيت ؟ ألف مبروك يا ابنى كبرت يا قاسم  
 وبقيت راجل ملو هدمك  
 تفيدة تأخذه منها تحتضنه تقبله  
 تفيدة : مبروك ولدنا قاسم اتنى تستاهلى بقى ناظر  
 قاسم : من بلك لباب السما  
 تفيدة : لكن فيه حاجة مهمة ولد لازم اعملها  
 قاسم : حاجة ايه ؟ اوعى تقولى تتجوز  
 تفيدة : لا حاقول اتجوز  
 الأم : يا ابنى انت ماعدتش صغير انت عندك ٢٦ سنة دلوقت يعنى داخل  
 على الثلاثين  
 قاسم : يا أمى الجواز ده حرية شخصية  
 تفيدة : حرام عليك ولدنا قاسم اللى بتعمله فينا ده . .  
 قاسم : يا ناس قدروا مشاعرى . . حرام عليكم  
 الأم : سيبه يا تفيدة يا اختى . . ريتا يهديه  
 بصمت لحظة يتجاوز فيها الموقف . يقول وهو لا يزال متأثراً  
 قاسم : على فكرة استعدوا للسفر انتم حتيجوا معايا بنى سوف  
 الأم : بنى سوف  
 تفيدة : ونسيب ابوك لوحده هنا ؟ مين يزوره افندم ؟ مين يخلى مشايخ  
 يقروا على تربته افندم ؟  
 قاسم : حنبقى نيجى فى الاجازات  
 الأم : والبيت اللى طول عمره عامر يتقفل ؟  
 قاسم : يا ناس دى فترة مؤقتة  
 تفيدة : مش ممكن يخلوا الترقية دى فى مصر ولدنا قاسم ؟



قاسم : لا مش ممكن .  
تفيلة : اسمع . . انا اروح لحضرة قائد عظيم بتاعك اقول له خلى ولدنا  
قاسم جنب امه تفيلة فى مصر  
قاسم : ما تتعبوش قلبى مش عايزين تيجوا خليكم هنا وانا اجيلكم فى  
الاجازات  
الأم : وتهون عليك أمك يا قاسم ؟  
قاسم : لا اله الا الله . . اقول لكم تعالوا معايا مش عايزين اقول لكم خليكم  
فى مصر مش راضيين طيب اعمل لكم ايه ؟ اروح اعتذر عن الترقية  
تفيلة : لا قاسم . . ابن أمين بك لازم يكون كبير عشان يعيد تاريخ أبوه  
قاسم : يعنى خلاصة الكلام . . حتيجو معايا ولا حتفضلوا هنا ؟  
الأم : حتيجى معاك يا ابنى . . احنا ما نقدرش نعيش من غيرك  
قاسم : يبقى اتفقنا حضروا حاجتكم  
قطع

ليل / داخلى

مكتب سعد

مشهد / ٢١

سعد فرحا يخاطب قاسم  
سعد : يعنى حسيبنا ؟ داحتا لازم نعمل لك حفلة وداع بقى  
قاسم : وداع مين يا حبيبى ؟ انا كل شوية حانط لكم دول كلهم ١٢٠ كيلو  
سعد : بس تعرف ده خبر كويس النهاردة رئيس نيابة بكرة مستشار بعد  
شوية تبقى من كبارات البلد ومش بعيد تبقى ناظر  
قاسم : مين عارف ؟  
يدخل فتحي زغلول مهللا  
فتحي : انتم قاعدين هنا والدنيا بتجرى ؟ عرفتم اخر خبر ؟  
سعد : لأ ماعرفناش . الانجليز رحلوا عن مصر ؟  
فتحي : الانجليز مين وفرنساويين مين أخوك يا استاذ لحق بالبيه  
يشير لقاسم  
فتحي : أخوك بقى رئيس نيابة

سعد : الله الله الله الله . . خلى الأخبار الحلوة تهل مبروك يابو الفتوح

يحتضنه ويقبله

فتحي : الله يبارك فيك

قاسم : مبروك يا فتحي

فتحي : يا سيدى الله يكرمك

قاسم : المهم عينوك رئيس نيابة ايه ؟

فتحي : أسيوط

قاسم : هايل أنا ماسك أول الصعيد وأنت ماسك الوسط عايزين كمان

واحد يمسك أسوان عشان تبقى الشلة حاكمة الصعيد كله

يضحك

سعد : على فكرة يا جماعة فيه حاجة مهمة عايز اقولها لكم بخصوص

محمد عبده .

قاسم : ماله ؟

سعد : رياض باشا يسعى له بشدة عند الخديو ومن المؤكد ان كرومر مش

معارض وجود محمد عبده فى أى مركز مهم .

فتحي : أنا مش قلت لكم ان الانجليز حيهتموا بتكوين فريق مصرى عشان

يحققوا بيه التوازن قصاص الفريق التركى ؟

سعد : المهم ان رياض باشا ينجح فى مساعيه مع الخديوى

قطع

ليل / داخلى

قاعة العرش

مشهد / ٢٢

رياض والخديو توفيق . يبدأ المشهد بتوفيق يتكلم وكأنه يرد على اخر جملة فى المشهد

السابق

توفيق : تانى يا رياض باشا بتتكلم عن محمد عبده ؟

رياض : يا ولى التعم انا مش باتكلم عن اى حد أنا باتكلم عن أكبر عالم

دين موجود فى مصر عن راجل بينادى بالاصلاح

توفيق : الراجل ده بيعارضنى

رياض : الرجل ده من ساعة ما رجع من المفتى ما قالش كلمة واحدة ضدك  
يا افتدينا  
توفيق : قبل هوجة عرايى برضه كان هادى لكن فجأة انضم لعرايى  
ولا نسيت  
رياض : الانجليز اللى انضم لعرايى عشان يحاربهم عفوا عنه . . والعفو  
من شيم الكرام يا صاحب السمو  
توفيق : خلاصة الكلام عايزنى اعمل له ايه ؟ ؟  
رياض : اولاً : . . . . .  
توفيق : هو فيه أولاً وثانيا ؟  
رياض : ارجوك يا مولاي اسمعنى للاخر  
توفيق : اتفضل  
رياض : اقترح اناك تعينه مفتى الديار المصرية  
توفيق : يعنى ايه مفتى الديار المصرية ؟ ده منصب ما عرفتش مصر قبل  
كده  
رياض : اذن تعرفه فى عهدك يا سيد البلاد  
توفيق : ويعمل ايه المفتى ده ؟  
رياض : يكون مسؤول عن الافشاء فى كل الامور اللى تهتم الناس ويحتاجوا  
فيها لرأى الدين  
توفيق : وتفكر ان محمد عبده هو الشخص المناسب ؟  
رياض : من ناحية التعليم محمد عبده حاصل على العالمية وهى أعلى  
مؤهل علمى فى الأزهر اما من حيث التفتح والاستشارة محمد عبده  
هو الوحيد الذى عاش فى أوروبا ورأى التقدم الحديث وأفكاره  
تسبق عصره  
توفيق : طيب يا رياض باشا أدبنى مهلة أفكر فى اقتراحاتك  
قطع

الباب حتى تركبا ثم يركب وراءهما

قطع

ليل / داخلي

ديوان قطار

مشهد / ٢٤

كهرومانه وقاسم وأمه وتفيد هانم يجلسون  
الأم : متأكد يا قاسم ان الحاجة اتشحتت فى نفس القطر  
قاسم : ان شاء الله يا أمى  
تفيدة تبكى

قاسم : بتعطى ليه بس ؟  
تفيدة : أول مرة أسافر من غير أبوك . . دلوقت بس ولدنا قاسم حسيت انى  
عشت عمر طويل وسافرت كتير من تركيا لكرديستان لاسكندرية  
لمصر سافرت كتير . . لكن كل السفر كان مع أمين بك . . أمين  
بك كان عمرى

الأم تربت عليها  
الأم : طيب بس يا اختى امسحى دموعك . . بس  
تمسح دموعها . . دق على باب الديوان  
قاسم : ده أكيد سعد زغلول . . عن اذنكم  
يخرج ويغلق الباب

قطع

ليل / داخلي

ممر فى قطار

مشهد / ٢٥

قاسم يخرج من الديوان ليجد سعدا فى انتظاره يسلم عليه بحارة  
سعد : سلام يا بطل  
قاسم : سلام يا ابو السعود  
سعد : ما تنساك الجوابات

قاسم : الجوابات والزيارات  
سعد : وأنا حائلكك على أى قضية فى بنى سويف واجى لك اوعى بس تشد  
على المتهم بتاعى اكمنك انت النيابة وأنا الدفاع .

قاسم : أنا حاسيب المتهم واطلب حبس المحامى  
يضحكان

سعد : فتحى قاعد فى عربية قدام ابقى عدى عليه  
قاسم : أكيد

قطع

---

مشهد / ٢٦ المحطة ليل / خارجى

كلوز على يد تدق جرس السكة الحديد . مدخنة القطار تنفخ الدخان فى الهواء وهى تصفر  
قطع

---

مشهد / ٢٧ عمر فى قطار ليل / داخل

سعد يسلم على قاسم بسرعة  
سعد : سلام بقى الا القطار حيتحرك  
قاسم : سلام  
سعد يهبط والقطار يتحرك

قطع

---

مشهد / ٢٨ صالة شقة قاسم بنى سويف نهار / داخل

صالة الشقة واسعة مؤتة بأثاث لا بأس به كهربانة تعمل فى تنظيف البيت وغسل الشبايبك  
تقيدة تقف لتهندس عليها

تفيدة : كى ميه كمان على الأرض بنت كهرمانة

كهرمانة : حاضر يا ستى

تغرق الأرض ماء من جرادل موجودة

تفيدة : شبابيك كمان بنت . . كى عليها ميه

كهرمانة : حاضر يا ستى

تمسك كوزا وترش الماء على الشبايك . الماء يفرق تفيدة هانم

تفيدة : أمان يا رى . . مش تحاسبى بنت ؟

كهرمانة : خشى انتى جوه يا ستى وانا حاعمل كل حاجة

وهى تجفف الماء

تفيدة : خلاص اناح ادخل لكن اذا نضافة مش عجبتنى انتى تعيدها كلها

كهرمانة : حاضر

تستدير لتدخل لكنها تتزحلق وتصرخ

تفيدة : الحقينى بنت كهرمانة . . الحقى سنك بنت

قطع

---

مشهد / ٢٩ الممر المؤدى لمكتب رئيس نيابة بنى سويف      نهار / داخلى

العسكر والسعاة يؤدون التحية لقاسم وهو يتجه لمكتبه يرد التحية . يصل لمكتبه . أحد العساكر يفتح الباب وهو يؤدى التحية يرد التحية ويدخل

قطع

---

مشهد / ٣٠ مكتب حكمدار أمن بنى سويف      نهار / داخلى

حكمدار الأمن برتبة أميرالاي يجلس على مكتبه أمامه ضابط برتبة بكباشى يؤدى التحية بكباشى : تمام يا سيادة الحكمدار

الحكمدار : وصل ؟

حكمدار الأمن يرد التحية

بكياشى : وصل يا افتدم وأول ما دخل مكتبه : قال فين سيادة الحكمدار ؟  
الحكمدار : لما تروح نرحب بيه .  
ينهض ويضع الطربوش على رأسه

قطع

---

مشهد / ٣١ مكتب رئيس نيابة بنى سويف نهار / داخلي

قاسم وحكمدار الأمن

قاسم : أهلا بيبك يا سيادة الحكمدار  
الحكمدار : أهلا بيبك يا قاسم بك فى بنى سويف . الحقيقة العلاقة دايما  
بين الداخلية والنيابة هنا متينة وأنا متأكد أن العلاقة دى حستمر فى  
وجودك .

قاسم : أكيد  
الحكمدار : بلغنى ان سعادتك أول مرة تشتغل رئيس نيابة .  
قاسم : واضح انكم عارفين عنى حاجات كتير  
الحكمدار : فعلا انت عارف ان النيابة والداخلية ما يستغنوش عن بعض  
عشان كده اهتميت بالسؤال عنك بنفسى  
قاسم : على الله تكون لقيت الاجابات كويسة  
الحكمدار : جدا . .

قاسم : عظيم . . ما دام حضرتك عارفنى كده يبقى مافيش داعى لمزيد من  
التعريف ندخل فى الشغل على طول  
الحكمدار : شغل ايه سعادتك ؟ انت تقعد هنا مرتاح ٢٤ قيراط وتأكد اننا  
حنشيل عنك كل حاجة مش حتوصل لك غير الحاجات اللى لايد  
انها توصل لك . . حضرتك ابن أكابر متعلم فى فرنسا مش معقول  
حتشغل نفسك بالفلاحين ومشاكلهم

قاسم : واضح انك ما سألتنش عنى كويس يا سيادة الحكمدار  
الحكمدار : ازاي ؟

قاسم : انا درست فى فرنسا عشان أخدم الفلاحين اللى بتتكلم عنهم دول

يفاجأ الرجل

قاسم : لو سمحت يا سيادة الحكمدار أومر بتحضير المركبات عشان  
حتنزل تلف على سجون المديرية .

الحكمدار يرتيك

الحكمدار : بت .. بتقول ايه سعادتك ؟ تلف على السجون ؟

قاسم : ايوه .. وحنبدأ الأول بسجن الحكمدارية هنا ..

قطع

نهار / داخل

السجن

مشهد / ٣٢

السجن فى منتهى القذارة به خمسون سجيناً تقريباً يقفون فى طايور . قاسم عند أول واحد  
فى الطايور ويجواره الحكمدار وخلفهما البكباشى ومأمور المركز وكلاهما فى غاية  
الضيق .. قاسم يسأل فلاح ١

قاسم : اسمك ايه يا سيدى ؟

فلاح ١ : حسنين أبو محمد

قاسم : محبوس ليه يا حسنين ؟

فلاح ١ : علمك يا بيه

قاسم : يعنى ايه ؟ مش عارف اتسجنت ليه ؟

فلاح ١ : والله يا بيه لو كنت اعرف لكنت قلت لك . أنا حاخى ليه ؟

يهمس الحكمدار للمأمور

الحكمدار : اشرح للسيد رئيس النيابة يا حضرة المأمور

المأمور : الراجل ده بيعا سريح فاصلته الخدمة بتاعة الحكيمباشى راح

ناتش من ايدها الحاجة واتخاقت معاها .. الحكيمباشى طلب اتنا

ناديه

قاسم : ويعدين ؟

المأمور : جاملنا الحكيمباشى طبعاً

قاسم : بسم الله ما شاء الله .. عملتم للراجل ده محضر ؟

المأمور : باقول لسعادتك بنجامل الحكيمباشى



يكتب في نوته

قاسم : للدرجة دى الناس عندكم مالهمش قيمة يفرج فوراً عن حسين  
أبو محمد

يشير للتالى

قاسم : تعالى

يتقدم فلاح ٢

قاسم : اسمك ايه يا سيدى ؟

فلاح ٢ : جرجس فانوس نخلة

الحكمدار يهمس

المأمور : ده شغال عند الدكتور ميشيل الأجزجى وحابسيته عشان شتم  
الدكتور

فلاح ٢ : والله ما شتمته

قاسم : أmaal ايه اللي حصل ؟

فلاح ٢ : اتا يا بيه كنت بانضف الحمار اللي بيركبه الدكتور قام رفسنى قلت  
له اقف عدل يا بتاع الكلب . . دى شتيمة دى يا بيه ؟

قاسم للمأمور :

قاسم : عملتوله محضر ده ولا برضه زى اللي قبله ؟

المأمور : زى اللي قبله

قاسم يكتب فى النوتة

قاسم : يفرج عن جرجس فانوس نخلة

للمأمور

قاسم : يا سيادة المأمور ؟ دانت فاتح السجن لخدمة الحباب بقى

يشير لفلاح ٣

قاسم : تعالى

قطع

الحكممدار : مش ممكن اللى حصل ده . . بقى ده اللى متعلم فى فرنسا  
 وفاكر انه مش حيبهدل نفسه مع الفلاحين ؟  
 البكباشى : ده أفرج عن معظم المساجين .  
 الحكممدار : دى حتبقى فوضى . . نحكم الناس ازاي واحنا ما نقدرش  
 نجس فلاح الا بأمر نيابة . . ده كلام فارغ .  
 البكباشى : المشكلة يا أفندم انه مصر على زيارة كل السجون .  
 الحكممدار : ابعت إشارة تلغرافية حالا لكل المأمير يفرجوا عن المساجين  
 اللى مافيش أمر نيابة بحبسهم . . لما نشوف آخرتها ايه مع البيه  
 ده .

### قطع

مشهد / ٣٤ مكتب سعد زغلول نهار / داخل

سعد يسير مع نازلى ليجلسا على الكنية  
 سعد : معنى كلامك ده يا نازلى اتنا محطوطين تحت المراقبة .  
 نازلى : اتا ماتهمنش المراقبة وما يهمنش حد  
 سعد : عموما أنا حاقلل زيارتى فى الفترة الجاية مش عايز حد يجيب  
 سيرتك  
 نازلى : No Saad لو قللت زيارتك تبقى بتأكد كلامهم . . وانا مش خايقة  
 من حد . . أنا مش باعمل حاجة غلط .  
 سعد : لكن العادات والتقاليد .  
 نازلى : مش مهم . . أنا مش ضعيفة . . ولازم الكل يعرف كده .  
 سعد : أنا عندى اقتراح للحفاظ عليكى ايه رأيك لو اتجوز اى واحدة مناسبة  
 وبكده تنتهى الشبهة  
 تضربه فى صدره  
 نازلى : تتجوز حد غيرى ؟ عارف لو اتجوزت غيرى حاعمل فيك ايه ؟  
 حاختقك  
 تشهر أظافرها كالمقطة . بضحك

سعد : شرسة وتعملها

قطع

---

مشهد / ٣٥ مدخل المدرسة التي تعمل فيها جوليا نهار / خارجي

تقف عربة مغلقة وتنزل منها جلنار بثياب الهوانم تدخل  
قطع

---

مشهد / ٣٦ غرفة الناظرة (الراهبة) نهار / خارجي

الناظرة تخاطب جلنار التي تجلس أمامها

الناظرة : تحت أمرك هانم

جلنار : عايزة مدرسة تدرس لبتنى فى السرايا حادفك اللى تطلبه المهم تكون  
المدرسة أخلاقها كويسة .

الناظرة : موجودة هانم . . عندى مدرسة كانت بتشتغل فى القصر الملكى  
وربت أميرات لكن . .

جلنار : لكن ايه ؟

الناظرة : أجرها غالى جدا

جلنار : كام ؟

الناظرة : خمستاشر جنيه

جلنار : موافقة .

الناظرة : طبعا ده غير السكن والأكل

جلنار : موافقة

الناظرة : مش حتتكلم فى الهدايا يا هانم دى حسب ذوق حضرتك

جلنار : طبعا . . بالمناسبة اسمها ايه ؟

الناظرة : بريجيت

جلنار : أشوفها لو سمحتنى

الناظرة : لحظة واحدة .

قطع

نهار / داخلي

بهو قصر خضر

مشهد / ٣٧

المدرسة بريجيت تجلس للتدريس للبنات افراج بنت جلنار وخضر . جلنار تجلس كالهوانم على أحد المقاعد تشرب القهوة وتتابع شاعرة بالزهو

بريجيت : Repetes

تشير للأم Maman

افراج : Maman

تشير للقاعة

بريجيت : La Salle

افراج : La Salle

تشير لرف عليه أنتيكات

بريجيت : Tablette

افراج : Tablette

جلنار تخاطب نفسها

جلنار : معقول يا جلنار الزمن يسعدك وتبقى بتك بتتعليم فرنساوى زى

بنات الأمرا والأكابير ؟ صبرنى ونلتى . .

قطع

نهار / داخلي

صالة الشقة

مشهد / ٣٨

كهرمانة تفتح الباب بينما الأم تشتغل قطعة كنفاه وتفيدة تجلس لتطحن البن بمطحنة نحاسية . ترى ساعى قاسم يحمل صندوقا به أطعمة

الساعى : قاسم بيه باعت الحاجات دى

كهرمانة : هات

يعطيها الصندوق  
 كهرمانة : طيب  
 الأم : اسأليه البيه راح فين ؟  
 الساعى لكهرمانة بصوت يصل للام  
 الساعى : اشترى سنارة وحاجات للصيد وراح يصطاد فى النيل  
 كهرمانة للساعى  
 كهرمانة : متشكرين ياخويا  
 ينصرف تغلق الباب تقف بالأشياء لحظة قائلة  
 كهرمانة : جديدة حكاية الصيد دى على قاسم افندى  
 قطع

---

مشهد / ٣٩ شاطئ النيل بينى سويف نهار / خارجى

بجانب طريق زراعى يجلس قاسم أمين ليصطاد تحت صفصافة . يجذب السنارة ويخرج سمكة يضعها فى قفة صغيرة وهو بيتسم . توجد عربتان حنطور تقتربان . يلقي بالسنارة فى النهر يرى صورة الشمس فى النهر

قاسم : طبيعة ساحرة النيل والصفصاف وصورة الشمس فى المية شىء  
 ساحر

ينتظر حتى تغمر السنارة ، تصل عربتا الحنطور الى مكانه . يأتيه خلفه صوت أنثوى فيه سوقية

صوت : قل لى يا أخويا يسعدك ما تعرفش فين عزبة عبد المجيد بيه  
 ينظر خلفه فى فرقة مغنيين متواضعة المستوى جدا ويرى السائلة صورة طبق الأصل من حبيته سلافا يفاجأ

قاسم : مش ممكن . . سلافا ؟ . . الحلم . . الحلم . . معقولة ؟

صوت : حلم ايه يا أفندى .

قاسم : اه اه حاضر . . بيت عبد المجيد بيه . . بيت عبد المجيد بيه قدام

شوية . . عند الزينة اللى هناك .

صوت : تشكر

للعربجي

صوت : ياللا يا اسطى

العربجي يبدأ فى الحركة . قاسم يتابع العربتين غير مصدق

قاسم : هى سلافا . . هى بعينها . . صحيح كل حاجة فيها مختلفة لكن  
هى

قطع

---

نهاية الحلقة الثانية عشرة

## الحلقة رقم (١٣)

مشهد / ١ صالة شقة قاسم بينى سويف ليل / داخلي

قاسم يتناول العشاء مع امه وتفيدة هانم وكهرمانة تقوم بدور السفرجى . قاسم سارح تماما  
الأم تلاحظ

الأم : مالك يا قاسم ؟ ما بتاكلش ليه ؟

قاسم : باكل اهه

الأم : لأ ما بتاكلش وسرحان من ساعة ما جيت .

تفيدة : فيه ايه ولدنا قاسم ؟

قاسم بحدة

قاسم : قلت لكم مافيش

قاسم يترك المنضدة وينهض

تفيدة : خلاص افندم . . مافيش . . مافيش

الأم : رايح فين يا ابنى ؟ كمل أكلك

قاسم : بطلوا أسئلة شوية أنتم ايه ؟ ما بتسكتوش ؟

يدخل غرفته . الأم وتفيدة هانم يتبادلان النظرات

قطع

مشهد / ٢ أمام بيت عبد المجيد بك الربقى ليل / خارجى

الفرقة الغنائية تجلس على مسرح محاط بالفراشة والفلاحون يستمعون وعيد المجيد بيه

يستقبل ضيوفه . يتقدم قاسم أمين من عبد المجيد بيه الذى يرحب مهللا

ع المجيد : يا الف اهلا وسهلا باليه رئيس النيابة . . شرفتنا يا قاسم بيه

قاسم : الله يكرمك

يقوده للجلوس

ع المجيد : اتفضل يا قاسم بيه . . اتفضل ارتاح يا بيه  
يدبر له مقعدا فى الصف الاول حيث نرى العريس يحى المعازيم

قاسم : شكرا

يقوم مقدم البرنامج معلنا

مقدم البرنامج : ودلوقت مع ملكة الطرب فى الوجهين القبلى والبحرى مع

الحنجرة الذهب والصوت الالماظ مع المطربة وسيلة

تعزف الموسيقى وترقص وسيلة على الموسيقى ثم تغنى عن الحب بصوت جميل  
وتتحدث عن انها كانت تبحث عن الحبيب مثلما كان يبحث عنها وانها فى غيابها اصابتها  
العله ولم يتمكن الأطباء من تشخيص علتها حتى رأت حبيبها فتم شفاؤها

الأغنية

خلال الاغنية الناس تهلل . قاسم ينصت ويمكن خلال الغناء ان يحدث مزج بين صوت  
وسيلة وصورة مع سلافا فى مونتيليه وباريس . يأتي فلاح مسرعا لعبد المجيد والد العريس

فلاح : عبد المجيد بيه يابو العريس . . عبد المجيد بيه . . يابو العريس

قاسم : فيه ايه ؟

فلاح : العروسة هربت ؟

ع المجيد : هربت ؟ بتقول ايه ولد ؟

فلاح : والله العظيم هربت

ع المجيد : وقين أبوها ؟ فين اخواتها ؟

فلاح : طلعموا يدوروا عليها .

عبد المجيد ينادى على مقدم البرنامج الذى يقف ليقدم الفقرة التالية للمعازيم

ع المجيد : سك على الليلة خلاص . . مافيش فرح . . كتر خيركم

يا رجاله مردودة لكم فى الأفراح .

أصوات : فيه ايه يا بيه ؟ ايه اللى حصل ؟ ايه اللى جرى ؟

الفلاح يقول للناس الذين ينهضون ويخرجون

فلاح : العروسة هربت . . والله هربت . .

أصوات : الله يكون فى عون أهلها . .

صوت ١ : تلاقيها هربت مع الواد عليوة ابن حمدية كان فيه اشاعات

حوالين الموضوع ده

صوت ٢ يهمس



صوت ٢ : اصلها ما كانتش بتحب العريس ده' لكن أبوها غصبها  
صوت ١ : بنات عايزة حش رقبتها . . من امنى الفلاحين بيعرفوا الحب  
وقلة الأدب ؟

قاسم يتصرف

قطع

---

مشهد / ٣ شاطئ النيل بينى سويف ليل / خارجى

قاسم يسير وحده يخاطب نفسه  
قاسم : ليه يجوزوا البنت غصب عنها  
يسمع أصوات وراءه ينظر خلفه فيرى المعازيم والفرقة  
مقدم البرنامج : ليلة باينة من أولها . . طلعتنا حتى من غير عشا  
وسيلة : ياكلوا عرق الناس ؟ منهم لله  
قاسم يتمهل حتى تصل اليه وسيلة  
قاسم : انت منين يا ست وسيلة ؟  
وسيلة : من طنطا لكن زى ما انت شايف واخدة السكة قياسة كل يوم فى  
بلد . . وياريتة بفائدة  
قاسم : هو بقية حسابكم كان قد ايه ؟  
وسيلة : سبعة جنيه . . منهم لله  
يمد يده فى جييبه ويخرج نقودا  
قاسم : طب خدى  
وسيلة : ايه ده يا بيه ؟  
قاسم : دى مساهمة منى فى تمن تذاكر القطر  
وسيلة : وانت ذنبك ايه ؟  
قاسم : خلاص بقى ما ترديش ايدى  
تأخذ النقود  
وسيلة : من يد ما نعدمها . . .  
لأصحابها

وسيلة : ياللا يا ولاد خلونا نلحق القطر

لقاسم

وسيلة : متشكرين يا بيه

يسIRON مبتعدين

قاسم : سبحانك يارب .. هي هي سلافا .. لكن الصورة غير

الصورة .. قد ايه الدنيا دي غريبة ؟

قطع

---

مشهد / ٤      غرفة نوم قاسم امين في بنى سويف      ليل / داخل

قاسم بثياب النوم ، ملابس الخروج ملقاة على السرير دون نظام .. قاسم يذرع الغرفة  
جثة وذهابا يقف بحرك يديه في استغراب وكأنه يقول : معقول .. كيف حدث هذا ؟  
تدخل عليه أمه

الأم : لسه صاحى لحد دلوقت ؟

قاسم : حانام ايه

الأم : مالك يا ابني ؟ فضفض لى أنا أمك

قاسم : معقول يا أمى يبقى فيه اتنين شبه بعض الخالق الناطق ؟

الأم : المثل بيقول يخلق من الشبه أربعين .

قاسم : ولو .. مش للدرجة دي

الأم : درجة ايه يا ابني ما توضح كلامك

قاسم : ما تشغليش بالك يا أمى .. أنا خلاص حانام تصبى على خير

يدخل سريره ويغطى رأسه . تأخذ ثيابه الملقاة وتعلقها وعلى وجهها تعجب

الأم : وانت من أهله

تخرج ، يعرى رأسه يستند على ظهر السرير

قاسم : يا ترى ممكن رئيس نيابة زىى يجرى وراء واحدة زى وسيلة دي ؟

كان لحظة اللقاء محكوم عليها تكون لحظة الفراق .. سبحانك

يارب

قطع

محمد ، زوجته رضا سعيدة تضع يدها على بطنها

رضا : شيخ محمد

محمد : نعم يا عين الشيخ محمد ؟

رضا : يظهر ان ربنا أذن انا نجيب الولد

محمد : حصل يا رضا ؟

رضا : حصل

محمد : الحمد لله

رضا : لو جيت لك الولد حتبسط ؟

محمد : ولد ولا بنت كله من عند الله وأنا مبسوط وراضى فى كل الأحوال .

رضا : ونعم بالله .. لكن الناس دايمًا تفتخر بالولد هو اللى بيطلع للعالمية ويتعلم ويتعرف ويكسب وما فيش خوف عليه انما البنات ..

محمد : رضا .. اقللى السيرة دى .. ده كلام الجهلة .. البنت والولد فى نظرى ما يفرقوش عن بعض وفى بلاد الفرنجة البنت بتتعلم زى الولد وتشتغل ايدها بايده وتكسب زيه تمام العيب مش فى خلقة ربنا العيب فى الطريقة اللى الناس بتبص فيها للبنت فى بلدنا

رضا : احنا فين وهم فين ؟

محمد : واحدة واحدة كل شىء حيتغير المهم ما تشغليش بالك بالكلام ده وكملى الحمل على خير لأن كل اللى يجيبه ربنا كويس .

رضا : أنا سعيدة انا اتجوزتك يا شيخ محمد .. سعيدة صحيح .

يربت عليها وهو يتسم

قطع

نازلى تسير مع سعد

نازلى : أنا زهقت . . الخديو من ناحية والمعتمد البريطانى من ناحية  
مش عارفة اتنفس  
سعد : أنا أسف اذا كنت السبب فى المضايقات دى يا نازلى  
نازلى : أنا قررت اسافر يا سعد  
يطل وجه الجاسوس الذى كان يطل من قبل  
سعد : حتروحي فين ؟  
نازلى : اى مكان بره مصر  
سعد : وحتقدرى تبعدى عن مصر ؟  
نازلى : أنا بعدت عنها قبل كده سنين لكن مصر عمرها ما غابت عنى .  
البعد بالجسم مش معناه ابدا النسيان . . النسيان معناه البعد بالروح  
الوجه المتجسس يتابع  
سعد : رغم ان بعدك حيكون قاسى على لكن أتمنى لك كل سعادة لان كل  
اللى يهمنى هو راحتك  
نازلى : من فضلك يا سعد اعمل لى اجراءات السفر لباريس  
سعد : أمرك

قطع

---

مشهد ٧ / مكتب رئيس نيابة بنى سويف / نهار / داخل

قاسم على مكتبه ، الجندى يقود رجلا فى حوالى الأربعين مكبلا بالحديد . . يؤدى  
التحية لقاسم  
الجندى : تمام يا افتندم الراجل اللى قتل بته  
يدخل عبد المجيد بك  
ع المجيد : السلام عليكم يا قاسم بيه  
قاسم : وعليكم السلام ورحمة الله  
ع المجيد : الراجل ده يهمنى . . ده أبو العروسة اللى هربت .  
قاسم : يا عبد المجيد بيه يهملك أو ما يهملكش احنا بيتنا وبيتنا القانون .  
قاسم للرجل

قاسم : ايه اللي خلاك تجوز بتك لو احد ما بتحوش يا راجل انت ؟  
القاتل : بنات الأصول مالهمش رأى فى الجواز يا بيه . . البنت المترية  
ترضى باللى أبوها يختاره .

قاسم : جيتم الكلام ده متين ؟  
القاتل : سلو بلدنا يا بيه .  
قاسم : ما حدش قال لكم ان سلو بلدكم ده مش من الدين ؟  
القاتل : مش من الدين ؟

قاسم : أبوه  
ع المجيد : ايه يا بيه الكلام اللي بتقوله ده ؟  
قاسم : ورد فى الأحاديث الصحيحة أن النبي عليه الصلاة والسلام قال  
« لا تنكح الأيم حتى تستأمر ولا تنكح البكر حتى تستأذن » يعنى  
تاخذوا اذنها مش تجوزوها غصب عنها وقال البخارى فى  
صحيحه عن خنساء بنت خدام الأنصارية أن أباه زوجها وهى ثيب  
فكرهت ذلك فأنت رسول الله صلى الله عليه وسلم فرد نكاحها يعنى  
حكم بأن الجوازة باطلة لأنها تمت من غير موافقتها

يصمت الرجلان . . قاسم للجندى مشيراً للقاتل  
قاسم : وديه لحسين أفندى وكيل النيابة يحقق معاه .  
الجندى يؤدى التحية

الجندى : تمام يا أفندم

يخرجان

قاسم : لو يعرف الناس دينهم قبل ما يغفلوا فى حق بناتهم ؟ ليه ما ابدأش  
دراساتى اللى وعدت بيها استاذى البروفيسير لرنود بدراسة عن  
المرأة المصرية وأوضاعها المغلوطة ؟ ليه ؟

قطع

---

مشهد / ٨ شقة قاسم ببنى سويف . حجرة المكتب ليل / داخلى

تفيدة هانم تصنع القهوة على السبرتاية . وقاسم على المكتب . . يكتب . تفيدة تصب

القهوة وتمضى بفنجان لقاسم  
 نفيدة : اشرب قهوة من ايد أمك نفيدة عشان تعرف تفكر تمام  
 قاسم : تسلم ايدك  
 نفيدة : هيه . . بتكتبي ايه ؟ قضية ؟  
 قاسم : لأ . . بافكر ألف كتاب  
 نفيدة : كتاب دين ؟  
 قاسم : تقريبا  
 نفيدة : يعنى ايه تقريبا ؟  
 قاسم : يعنى دين ودنيا ؟  
 نفيدة : ازاي أفندم ؟  
 قاسم : عايز ألف كتاب عن المرأة . . الدين قال عنها ايه واحنا بنعاملها  
 ازاي  
 نفيدة تجلس باهتمام  
 نفيدة : عفارم ولدنا قاسم . . كلمنى كمان عن كتاب ده .  
 قاسم : عايز ابحت فيه عدة نقط . . النقطة الاولانية حق الست فى الموافقة  
 على الرجل اللي حتجوزه  
 نفيدة : والنقطة ثانية أفندم  
 قاسم : حق المرأة فى التعليم ، فى العمل ، مشكلة الحجاب ، مشكلة  
 تعدد الزوجات  
 نفيدة : عفارم أفندم . . اكنتى الكتاب ده عشان انصف سنات . . سنات  
 مظلومين تمام أفندى فى زمن ده .  
 صوت دق على الباب الخارجى

قطع

مشهد / ٩

صالة المنزل

ليل / داخلى

ثأتى كهربانة من الداخلى . تفتح نرى بنتا صغيرة ١٦ سنة  
 كهربانة : نعم يا حبيبى

البنيت : عايزة الهانم  
 أم قاسم تعبر الصلاة . . تتوقف لتستمتع  
 كهرمانة : انتى مين ؟  
 البنيت : انا خدامة البيه وكيل المديرية  
 الأم : خليها تدخل يا كهرمانة  
 كهرمانة : حاضر يا ستى . . اتفضللى  
 البنيت تدخل تقف أمام أم قاسم بأدب  
 الأم : نعم يا بنتى  
 البنيت : الهانم مرات وكيل المديرية داعياكى نشربى معاها القهوة بكرة  
 العصر  
 تتجه الأم الى الداخل خارجة من الكادر  
 قطع

---

مشهد / ٩ ب حجرة المكتب ليل / داخل

الأم تدخل حجرة المكتب التى يجلس بها قاسم ومعه نفيدة  
 أم قاسم : مرات وكيل المديرية . . داعياتى أشرب معاها القهوة . . بكرة  
 العصر  
 قاسم مرحبا  
 قاسم : كويس قوى . . روى زوريها  
 تخرج الأم ويوجه كلامه لنفيدة  
 قاسم : وروى انت كمان معاها  
 نفيدة : لا ولدنا . . أنا مش أحب أخرج من البيت  
 قاسم : ليه بس ؟ ما هو مش معقول تفضللى محبوسة فى البيت ليل نهار . .  
 لازم يكون لكم هنا أصحاب تزورهم ويزوركم  
 نفيدة : لا . لا . زيارات . . ستات قلبان دماغات يوك . . مش احبه . .  
 مش احبه .

قطع

الأم تسير مع زوجة مدير المديرية

الهائم : اهلا بيكى يا بنت الاكابر . . أنا عرفت انك من عيلة عامر فى المنيا  
الأم : ده صحيح .

تجلسان

الهائم : احنا فيه بين عيلتى وعيلتكم نسب عيلة عامر نسبها يشرف  
الأم : ده من أصلك

الهائم تدق جرسا صغيرا تأتى الخادمة

البنت : نعم يا ستى ؟

الهائم : القهوة يا بنت

البنت : من عينى

البنت للأم

البنت : قهوتك ايه يا هائم ؟

الأم : مضبوطة

البنت : حالا

تخرج

الهائم : الباشا المدير قال انه سمع عن امين بك الله يرحمه . . أصل احنا  
جيرانكم فى الحلمية ما جابناش هنا غير وظيفة الباشا

الأم : سرايتكم فى فى الحلمية ؟

الهائم : الباشا يقول اننا بعدكم بتلات أربع شوارع

الأم : ان شاء الله لما ترجع مصر نزور بعض

الهائم : ده يشرفنا

تدخل بنت فى الثالثة عشرة هى هانزاده

هانزاده : مساء الخير

الهائم : اهلا يا هانزاده . . تعالى سلمى على طنط

تسلم

هانزاده : اهلا يا طنط

الأم : اهلا يا بتى



الهانم : هانزاده بنت وحيدة على أربع صبيان عشان كده خطاها فى عيني  
الأم : ربنا يخليها لك

الهانم : العرسان كل يوم داخليين خارجين عشانها لكن الباشا قال لا يمكن  
أجوزها غير لواحد من ولاد الأصول

الأم : عنده حق

هانزاده تشعر بالخجل

هانزاده : ماما

الهانم : مكسوفة من ايه يا حبيبتى . . هى طنط غريبة ؟

تدخل الخادمة بالقهوة

البنت : ان شاء الله قهوتنا حتمعجب حضرتك يا سنى . . الباشا بيعت

يجيب البن من مصر طازة بطازة

الأم : كتر خيرك

تكاد تصب القهوة الهانم تمنعها ، تقول لايتها

الهانم : هانزاده بتعرف تلعب على البيانو قومى يا هانزاده سمعى طنط

حاجة من اللى حافظاهم . بنتنا بتكسف قوى

الأم تشرب شفضة . هانزاده تتحرك الى البيانو الموجود بالحجرة . . ويدو عليها

الخجل . الهانم اثناء ذهابها الى البيانو تواصل الكلام

الهانم : بنتنا بتكسف قوى . . أصلها ما بتخرجش من السرايا الامعايا . .

وأنا نادر ما بخرج

البنت تفتح البيانو وتبدأ العزف .

صوت العزف

قطع

نهار / داخل

مكتب المعتمد البريطاني

مشهد / ١١

نازلى تجلس أمام بيرنج

نازلى : yes sir قالوا الى انك هايزنى ضرورى

بيرنج : yes ضرورى جدا . . بلغنى انك ناوية تسافرى

نازلى : ايوه . . فيه مانع ؟

بيرنج : of course :

نازلى : وايه المانع ؟

بيرنج : انا محتاج لك هنا . . فى مصر you aren't allowed to leave Cairo

نازلى : ليه ؟

بيرنج : قلت لك أسباب قبل كده وانتى ست ذكية .

نازلى : وانا زهقت اتم لازم تعرفوا انى بنى آدمه وان من حقى انى انتفس

مش ممكن تعاملونى المعاملة دى ما تنساش يور اكسلاى انى

أميرة

بيرنج : oh, my princess, I don't forget ما نسيش ابدأ لكن انا محتاج

خدماتك

نازلى فى تحد

نازلى : جناب السير الخدمات دى انا باقدمها متطوعة مش بالاكراه انا

زهقت so I am leaving

بيرنج بهدوء

بيرنج : All right you can leave please لكن ارجوك ما تتأخرش

تخرج فى عصبية . يقول

بيرنج : للأسف لازم استحملها . . ما عنديش وسيلة غيرها دلوقت

قطع

ليل / داخلى

حجرة نوم قاسم

مشهد / ١٢

قاسم قد خلع ملابسه ويستكمل لبس جلبابه ولبس الطاقية بينما الأم ترفع ملابسه لتعليقها بالدولاب

الأم : البنت حلوة ومؤدبة وصغيرة . .

قاسم : عندها كام سنة . .

الأم : بيجى ١٣ سنة . .

قاسم : عيلة يعنى . .

الأم : أبوه عجيبة في ايديك تشكّلها زي ما أنت عايز . .  
 قاسم : يا أمي أنا مش عايز عجيبة أشكّلها أنا عايز واحدة تشاركني حياتي  
 تاخد وتدي معايا . . مش حفضل ادي في أوامر . . وهي عليها  
 السمع والطاعة . .  
 الأم : أنت غريب يا ابني . . من ساعة ما سافرت بره . . وحالك اتبدل  
 الناس كلها بتفكر بشكل . . وانت دماهلك في سكة تانية . .

قاسم يضحك

قاسم : انا عارف . . وهو ده الموضوع اللي بافكر فيه .  
 قطع

---

مشهد / ١٣ محطة السكة الحديد      نهار / خارجي

الخدم يصعدون القطار بالحقائب ، نازلي تسير في أبهى زينة تركب القطار  
 قطع

---

مشهد / ١٤ ديوان بالقطار      نهار / داخلي

نازلي تفتح الديوان فتفاجأ بسعد  
 نازلي : سعد ؟  
 سعد : ما كانش ممكن تسافري من غير ما أودعك  
 نازلي : وانا لو كنت سافرت من غير ما اشوفك كنت حافضل زعلاية طول  
 الرحلة  
 سعد : عموما . . اتمنى لك رحلة سعيدة .  
 نازلي : كانت حبيبتي سعيدة صحيح لو جيت معايا .  
 سعد : كل شيء بأوان . .  
 نازلي : سعد . . فكر في  
 سعد : اوعدك .

نازلى : كل يوم الساعة انا نشر بالظبط لما تدق الساعة آخر دقة قول اسمى  
 سعد : حاقوله . . وانتى ؟  
 نازلى : اوعدك انى حافظل افكر فيك ليل ونهار . . مش حاخليك تفارقنى  
 لحظة واحدة .

قطع

---

مشهد / ١٥	جرس السكة الحديد	نهار / داخلى
-----------	------------------	--------------

---

يد تقرع الجرس

قطع

---

مشهد / ١٦	ديوان بالقطار	نهار / داخلى
-----------	---------------	--------------

---

سعد ونازلى . . يخلص يديه من يديها  
 سعد : للأسف . . لازم أنزل  
 نازلى : حتوحشنى . .  
 سعد : ح افترك دايمًا  
 نازلى : مع السلامة . . مع السلامة  
 يخرج من الديوان

قطع

---

مشهد / ١٧	محطة السكة الحديد	نهار / خارجى
-----------	-------------------	--------------

---

القطار بترك المحطة نافخا دخانه . سعد يسير حزينا الكاميرا ترصده وهو يسير . .

قطع

قاسم على مكتبه يدخل عليه الجندى يؤدى التحية

الجندى : تمام يا افندم

قاسم : نعم ؟

الجندى : خال سعادتك بره عاوز يقابلك .

قاسم : خالى ؟

ينفض يتجه للباب ينظر للخارج ليتأكد . . يقول

قاسم : اهلا يا خالى . . اتفضل

يدخل خاله الكبير يسلم عليه

الخال : ازيك يا قاسم يا ابنى

قاسم : الحمد لله يا خالى . . اتفضل

يجلسان على الانترية فى جانب الغرفة

الخال : لما عرفت انك بقيت رئيس نيابة بنى سويف قلت مش معقول يبقى

بيتنا وبينك فركة كعب وما نجيش نبارك ونهنى

قاسم : الله يبارك فيك

الخال : كان المفروض تدبنا خبر ما نعرفش من بره

قاسم : لا يا خالى انا زعلان

الخال : عارف وجاى لك النهاردة عشان اصالحك

قاسم : وحتصالحنى ازاي ؟ حتدى امى أرضها ؟

الخال : لأ

قاسم : امال ايه ؟

الخال : حاشريها منك

قاسم : طب ما اشتريتهاش من زمان ليه

الخال : الفلوس كانت شحيحة

قاسم : ولاد خطاب بيه كانت فلوسهم شحيحة

الخال : اسمع يا ولدى احنا ما قصرناش ابدا فى حق امك حقها كان بيروح

لها سمن وقمح وطيور وخزين يقضيها السنة ويفيض لكن انت ما

تعرفش الأرض بالنسبة للفلاحين معنى ايه مافيش حد يا ابنى يطلع

ارضه بره وعموما خلينا ننسى اللي فات

قاسم : ننساه

يخرج محفظة ضخمة يخرج منها نقودا

الخال : عد دول

قاسم : كام دول ؟

الخال : ميه وخمسين جنيه

قاسم : نصيب امي كله بميه وخمسين جنيه

الخال : لا . . انا طالع من ذمتي خمسمية جنيه لأملك دول المقدم بس . .

قاسم : والباقي

الخال : حادفعهم لك على مهلى . . كل سنة حاديلك خمسين جنيه .

قاسم : بس احنا كده ما نقاش بعنا الأرض نبقى رميناها

الخال : أرض امك لما تروح لخالك ما تبقاش اترمت . . لكن تبقى فضلت

مع الكبير عشان اسم العيلة يفضل زى ما هو

قاسم : ناخذ رأى صاحبة الشأن

الخال : وماله ؟ ناخذ رأيها .

قطع

نهار / داخلي

صالة شقة قاسم بينى سويف

مشهد / ١٩

قاسم وامه وخاله . يبدأ المشهد بالأم وكأنها ترد على آخر جملة فى المشهد السابق . .

الأم : أنا موافقة

الخال لقاسم

الخال : مش قلت لك ؟

قاسم ينظر لامه مستغربا . الأم تقف وتقول لقاسم . .

الأم : تعال معايا شوية

الخال : قوم اتفاهم مع والدتك . . المشاورة كويسة برضه

قاسم ينهض ويسير معها لركن بعيد يتهامسان

قاسم : ازاي توافقى على السعر ده ؟

الأم : يا ابني قضيا الأرض بناخذ سنين والمحاميين والمحاكم بينكلفوا  
الشيء الفلاني وخالك أولى من الغريب .

قاسم : بالسعر ده ؟ وبالتنقيط المريح كده ؟

الأم : اسمعنى يا ابني خالك مش عبيط خالك جاي النهارده يشتري منك  
الأرض لأنك بقيت رئيس نيابة ولك نفوذ ممكن تستخدمه وتعمل  
له مشاكل انما فى الصعيد ما بيورثوش البنات فخذ الفلوس  
بالتراضى وريح دماغك وريحنى

قاسم : يعنى ده رأيك ؟

الأم : ايوه . . ناخذ اى حاجة بدل ما احنا خسرانين كل حاجة ويرضه  
يا ابني يبقى لك خيلان تتشرف بيهم بدل ما تبقى مقطوع من شجرة

قاسم يبتسم قائلا

قاسم : انت عارفة يا امى ابويا خسر كثير اته ما كانش بياخذ مشورتك  
أو رأيك فى أى أمر من أموره

الأم فى استغراب

الأم : غريبة . . ايه اللى خلاك تقول كده

قاسم : الكلام اللى قلتهولى دلوقت وخلصتني اقتنع واغير رأى

الأم فى حيرة

الأم : الله يرحمه بقى . . كان صوته من دماغه . . ما يسمعش لرأى غيره  
أبدا

قاسم : مش هو بس . . ده أغلب الرجالة فى مصر اتربوا على كده

يا امى . . مش بس اتربوا ده اتحكموا بالأسلوب ده . . الحاكم ما

يسمعش لأى رأى غير رأيه . . والراجل فى بيته ما يسمعش برضه

لرأى غير رأيه . . سلسلة من الحكم المطلق

الأم تضحك وهى لا تدرك ما يقوله ابنها . .

الأم : كل ده عشان اقتنعت بالكلام اللى قلتهولك . .

قاسم : كل ده يفتح لى حاجات فى الموضوع اللى باشغل فيه دلوقت .

صاحكة .

الأم : والموضوع اللى شاغلك ده نسانا خالك اللى مستتينا بره . .

الأم تتجه نحو الباب لتخرج وهو فى أعقابها قائلا . .

قاسم : أهو خالى ده جوه الموضوع  
قطع

---

مشهد / ٢٠      غرفة نوم سعد      ليل / داخلى

يبدأ المشهد بشمعة تسيل مع التركيز على الشعلة ثم تتحرك الكاميرا الى سعد الذى يتقلب على السرير غير قادر على النوم يجلس مستندا على ظهر السرير وينفخ كأن فى جوفه نارا .  
الخادم يقف على باب

الخادم : لسه ما نمتش يا سعد افندى

سعد : حانام ايه

الخادم : لازم شربت قهوة كتير النهاردة

سعد : يظهر كده .

يمضى الخادم . يقول سعد بصوت يفيض بالالم

سعد : ولا ينام الليل الا ابو قلب خالى شبكتينى بحبك ليه يا نازلى ما كنت

مرتاح وخالى

كلوز على نار الشمعة

قطع

---

مشهد / ٢١      بهو قصر يوسف      ليل / داخلى

يوسف يعطى حسن بعض المال فى حضور الأم . حسن يضع النقود فى جيبه

حسن : من يد ما نعلمها بابا

أم حسن : اسمع بقى يا سى حسن الكلام بتاعك انت ومراتك ده . .

ما يتفعلش

حسن : ايه اللي ما يتفعلش فيه يا امه ؟

أم حسن : كلمه انت يا حاج

يوسف : يا ابنى انت متجوز بقى لك أربع سنين ولحد دلوقت ما جبتو لناش



حنة عيل نفرح بيه بالذمة ده كلام

حسن : الخلفة دى بابا حاجة بتاعة ربنا

يوسف : ربنا قال مثنى وثلاث ورباع عشان دى ما تخلفش التانية تخلف ،

الست لما بتلاقى ضررتها خلفت بتموت نفسها عشان تخلف هى

كمان انت مش متعلم وعارف . . ستنا سارة عملت ايه لما هاجر

خلفت ؟

حسن : ما هو جايز بابا مش هى السبب

يوسف : ولاد الحاج يوسف لا يمكن ما يخلقوش انا مخلفكم صاغ سليم

حسن : حاضري بابا احنا حنسا فرى الصيف ان شاء الله فرنسا ونعرض نفسنا

على الدكاترة هناك

يوسف : ومصر مافيهاش حكما ؟

أم حسن : دى الست أم رتيبة الدباية

حسن : خلاص يا امه . . اهدى شوية

أم حسن : طيب ياخويا هديت لما اشوف اخرتها معاك

حسن ينهض

حسن : سلام عليكم . . لما أمشى قبل الحكاية ما تسخن اكر من كده

حسن يقبل يد والده

يوسف : سلام ورحمة الله

أم حسن : لا سلام ولا كلام

حسن يتجه للباب

أم حسن : انا عارفة عاجبه فيها ايه الناشفة المعصصة دى

قطع

ليل / داخل

صالة حسن وجوليا

مشهد / ٢٢

جوليا تضع صينية العشاء حسن لا يأكل . مداعبة كمن تعرف حمايتها وما تفعله

حسن : كلى أننى أنا كلت عند أمى

جوليا : دلوقت فهمت ليه انت تتكلم عن خلف

حسن : انا قلت لهم اتنا حنسا فرنسا نعمل فحوص  
جوليا : ولية نستنى ؟ ممكن نروح لذكاترة فرنساويين موجودين فى مصر  
حسن : بصراحة انا راى انه مافيش داعى  
جوليا : ليه ؟  
حسن : احنا كده ما بتفكرش فى مين السبب ما فيش حد معين فىنا مسؤول  
عن عدم الخلفة قدام التانى . . لكن لو كشفنا وطلع واحد فىنا هو  
المسؤول الحياه بيتنا حتبقى مزروعة شك  
جوليا : ده تفكير غير علمى جايز يكون السبب شىء بسيط ممكن علاجه  
حسن : جوليا . . انا بحبك ومش عايز اى حاجة تفسد علاقتنا حتى  
لو كانت عدم الخلفة .  
جوليا : d'accord نسيب الموضوع ده احسن  
حسن : نسيه

### قطع

---

مشهد / ٢٣                      مدخل عمارة فخمة                      نهار / داخلى

تدخل جوليا بثقة تصعد الدرج حيث توجد لافتة عليها اسم طبيب فرنسى بالعربية  
والفرنسية . . اميل فاليرى . أمراض النساء والولادة . تقرأ اللافتة . . تدخل

### قطع

---

مشهد / ٢٤                      قاعة انتظار فى عيادة                      نهار / داخلى

حسن يجلس فى انتظار الدور تأتى الممرضة اليونانية لحسن  
الممرضة : مسيو حسن سيلقويليه  
بتنهض يدخل للدكتور

### قطع

يبدأ المشهد بنار تتأجج في المدفأة ثم نرى جوليا تجلس أمام النار على كرسى بينما حسن يجلس على كرسى هزاز والكرسى يهتز به . تنظر اليه

جوليا : مالك يا حسن ؟

حسن : ماليش . . انتى مالك ؟

جوليا : بافكر شوية

حسن : فى ايه

جوليا : فى الصيف . . امتى الصيف يبجي عشان اسافر مونبلييه

حسن : الشتاء خلاص . . بيودع . . الصيف مواعيده قريب

جوليا : انا مستتياه على احر من الجمر

تعود الكاميرا الى نار المدفأة

قطع

قاسم يصطاد من حوله الناس يعملون فى الحقول ويلاحظ ان بينهم بعض النساء ، الجميع يشتركون فى اغنية من اغانى الحصاد .

اغنية حصاد

قاسم يتأملهم . يصطاد سمكة

قاسم : اول مرة الاحظ ان الست الريفية يتمتع بحق العمل زيه زى

الراجل

توضع يد فوق كتفه ينظر فيرى سعدا ومعه عسكري اتى به يقفز مهللا

الجندي : البيه يسأل عنك يافندم . .

قاسم : أبو السعود ؟ ازيك يا سعد

أحضان سلامات

سعد : ازيك يا قاسم طبعاً يا سيدى قاعد هنا فى بنى سويف سلطان

زمانك

قاسم : اكيد عندك قضية فى بنى سويف  
سعد : لا بنى سويف ولا المنيا . . انا جاي لك مخصوص  
قاسم : خير . انت مش غريب يا راجل . . اتفضل اتفضل  
يجلسان إلى المائدة ويبدءان الأكل  
سعد : ايه رأيك فى اللي قلتها لك ده يا قاسم ؟  
قاسم : حاجة تعير . . الست بتحكك . . وانت بتحبها لكن الكلام اللي  
بتقوله ده عن الخديوى والمعتمد البريطانى يخوف . . انت كده  
مش حتجوز ست انت حتجوز منظمة عامة  
سعد : عشان كده عايز رأيك  
قاسم : انا مش ضد ان الست تبقى شخصية عامة لكن دى مش شخصية  
عامة بس . . دى بتفكرنى بشخصيات البلاط الفرنسى فى عصر  
الملكية . .  
سعد : يعنى رأيك ايه ؟  
قاسم : مش عارف .  
سعد : بقى انا جاي لك عشان انت عشت برة ودماغك متفتح وانت تقول لى  
مش عارف ؟

سعد يهمس

سعد : عندى كلام كتير مش لاقى حد ممكن اقوله له غيرك  
قاسم : طب ياللا بيتنا نروح البيت

سعد للمجندى

أتوكل انت على الله

يؤدى التحية وينصرف قاسم يجمع أشياءه

قطع

---

مشهد / ٢٧ صالة شقة قاسم بنى سويف نهار / داخل

يبدأ المشهد بالسفرة معدة ويد نسائية تضع اللمسات الأخيرة . تتسع الكاميرا للنرى الام  
تقف لتعد السفرة تساعد كهرمانة بينما تقف تهندس عليهما . .

تفيدة : كده تمام افندم عزومة ملوكى سفرة تركية معتبر  
الأم لكهرمانة

الأم : ناديهم بقى وتخليكى جنبهم يمكن يحتاجوا حاجة  
كهرمانة : حاضر يا ستى

الأم لتفيدة

الأم : ياللا بيتنا احنا يا تفيدة ندخل جو

تفيدة : ياللا

تدخلان حجرة معينة . كهرمانة تدق باب غرفة المسافرين منادية

كهرمانة : قاسم افندى . . السفرة جاهزة

يفتح الباب ويخرج هو وسعد

قاسم : تعالى يا ابو السعد

سعد : ما كنا اكلنا جو وخلاص عشان الناس ياخدوا حريرتهم

قاسم : انا شاغل نفسى بالفلاحين وستات البيوت واخر حاجة فكرت فيها

ان المرأة المصرية تبقى زى البنات الللى كانوا معانا فى الجامعة لكن

النموذج الللى بتكلمنى عنه ده ما فكرتش فيه ابدا

سعد : دلوقت بقى لازم تفكر

قاسم : نفكر

ياكلان

قطع

---

مشهد / ٢٨ شاطىء النيل بينى سويف ليلى / داخلى

سعد وقاسم يسيران

قاسم : فى ضوء كلامك ده يا سعد يبقى رأى انك تبعد عن الست دى

سعد : طب ليه ؟

قاسم : انت مش شاكر انها على علاقة بالانجليز .

سعد : انا مش شاكر انا واثق لكن المؤكد انها بتستغل علاقتها بيهم عشان

تلعب دور وطنى باقول لك لولا ضغطها على المعتمد البريطانى

ما كانش الشيخ محمد عبده رجع من المنفى

قاسم : حاجة تحير

سعد : انا جاي لك من اخر الدنيا عشان تقول لى حاجة تحير ؟

قاسم : مانا ما اقدرش افشك واقول لك اى كلام

سعد : والعمل

قاسم : خدت رأى الشيخ محمد عبده ؟

سعد : الوحيد اللى كلمته فى الموضوع ده هو انت

قاسم : انا رأى انك تأخذ رأيه هو برضه أكبر متنا وتجاريه أوسع

سعد : ولو انها محرجة لكن آخذ رأيه

قطع

نهار / داخلى

صالة بشقة محمد عبده

مشهد / ٢٩

محمد عبده يرحب بسعد تبدو على الشيخ السعادة . ينادى

محمد : اهلا بيك يا سعد الشربات لسعد يا أم الخير

سعد : شربات ؟ اذن فيه مناسبة سعيدة

محمد : فعلا

سعد : طب فرحنى

محمد : مراتى جابت لى ولد النهاردة

سعد : ولد ؟ الف مبروك يا مولانا . . ده خير يستحق وليمة مش شربات .

محمد : الوليمة جاية وحقك محفوظ فيها . . يوم السبوع ان شاء الله .

سعد : انا مش حاكل لحد يوم السبوع

محمد يضحك . . تانى أم الخير بالشربات

أم الخير : اتفضل

سعد : شكرا يا ستى

يشرب ويعيد الكوب

أم الخير : هنيا

تنصرف

محمد : هيه يا سى سعد . . فيم جتتنا اليوم ؟  
 سعد : عايز أخذ رأيك يا مولانا فى موضوع لكن شايف ان الوقت مش مناسب . . نأجله أحسن  
 محمد : ولم التأجيل ؟ هات ما عندك دون تأجيل  
 سعد : لا أريد أن أشغلك  
 محمد : اشغلتى يا سيدى ولا تهتم . . هات ما عندك  
 قطع

مشهد / ٣٠ مكتب المعتمد البريطانى نهار / داخل

بيرنج غاضب يخاطب أحد السعاة  
 بيرنج : انا طلبت حكممدار البوليس . . ما جاش ليه ؟ where's he  
 الساعى : He's coming soon my lord جاي حالا  
 يدخل حكممدار البوليس يؤدى التحية  
 الحكممدار : yes sir  
 بيرنج يرد التحية يقول له  
 بيرنج : اتفضل  
 للساعى  
 بيرنج : Shut the door. I am not here أنا مش هنا . . فاهم ؟  
 الساعى : Yes Excellency  
 يخرج ويغلق الباب  
 الحكممدار : تحت أمرك  
 بيرنج : أنا عندى مشكلة My dear نازلى فاضل كانت هى الشباك اللى  
 بابص منه على مصر . . نازلى دلوقت متمردة أنا ما عنديش غيرها  
 السؤال . . مين ممكن يقوم بدور نازلى ؟  
 الحكممدار : البديل موجود  
 بيرنج : مين ؟ Who  
 الحكممدار : راجل انجليزى . . اسمه بلنت علاقته ممتازة بكل المصريين

الثوار الى في العنفي والمعتدلين الى تم العفو عنهم . . علاقته  
ممتازة بالكل .

بيرنج : يقدر يوصل أفكارى وينقل لى أفكارهم ؟

الحكممدار : Sure

اللورد : Then I want him now هانتهولى حالا

قطع

ليل / داخلي

صاله بيت محمد عبده

مشهد / ٣١

محمد عبده وسعد

محمد : الراى عندى يا سى سعد أن تتزوج بامرأة أخرى غير نازلى .

سعد : والسبب ؟

محمد : الأسباب كثيرة .

سعد : زى ايه ؟

محمد : اولاً : الخديوى لن يوافق على زواجها منك ثانياً : لو تزوجتما

رغم اتف الخديوى فلن تعرف السعادة . . ثالثاً : ان علاقتها

بالاتجلىز قد تحسب عليك فى يوم من الايام .

سعد : كل الحاجات دى عارفها لكن حاسس انى باحب نازلى رغم كل

شئ .

محمد : اذن . . اختر لنفسك

سعد : المشكلة انى مش قادر اختار

محمد : حكم العقل . . العاطفة وحدها يمكن ان تدمر الانسان

سعد : حاحاول يا مولانا . . حاحاول

قطع

ليل / داخلي

عيادة دكتور ١

مشهد / ٣٢

حسن يجلس أمام دكتور فرنسى . الدكتور يتصفح اوراقا . حسن يترقب



الدكتور ١ : مسيو حسن . . انت مش عندك أى شىء يمنعك من خلفه  
بلهفة

حسن : صحيح ؟

يمسك الأوراق

الدكتور ١ : الفحوص بتقول كده

حسن يقف يشد على يديه . بفرح

حسن : متشكر جدا يا دكتور . . ألف شكر . . ألف شكر

قطع

---

مشهد / ٣٣ عيادة دكتور ٢ ليل / داخلي

جوليا تقف أمام الدكتور منكسة الرأس

جوليا : يعنى مش ممكن اخلف دكتور ؟

الدكتور ٢ : . .

جوليا : ولا بعملية ؟

الدكتور ٢ : مافيش عملية لحد دلوقت تعالج حالتك .

جوليا : ولا فى فرنسا ؟

الدكتور ٢ : للأسف ولا فى فرنسا .

تأخذ التقرير وتسير للخارج حزينة .

قطع

---

مشهد / ٣٤ غرفة نوم جوليا وحسن ليل / داخلي

حسن نائم مفتوح العينين . جوليا بقطعة تستند على ظهر السرير كل منهما يخاطب نفسه فى حوار صامت بين الاثنين

جوليا : يا ترى لو حسن عرف انى مش باخلف ممكن حياىي تستمر ؟

حسن : انا فعلا باحب جوليا لكن هل اقدر اصمد كتير قدام الحاح أمى

وأبويا ؟

جوليا : انا عارفة ان الراجل الشرقى بيحب الاولاد خصوصا الصبيان .

حسن : أقول لعيلتى ان السبب منى ؟

جوليا : الجواز هنا سهل . . هل ممكن حسن يتجوز على واحدة ثانية

عشان يخلف ؟

حسن : من الاول ما كنتيش عايز اروح لدكاترة عشان ما افتحش باب

البحيم . . ليه اصريتى يا جوليا ؟

جوليا : يارب . . انا ما اختارتش انى اكون غير قادرة على الحمل والولادة

زى كل الستات . . يارب . . انا باطلب رحمتك يارب

قطع

---

مشهد / ٣٤ مكرر صالة شقة قاسم بينى سويف نهار / داخلى

قاسم يتجه للباب وفى يده خطاب بينما الام وتفيدة مشغولتان باشغال الابرة . . يتوقف قاسم

قاسم : عايزين حاجة ابعتها لكم

الام : عايزين سلامتك

نفيدة : بنت كهروانة ينزل تشتري كل طلبات .

قاسم : طيب انا نازل

الأم : آمال الجواب ده لمين ؟

نفيدة : أكيد لحد من أصحابه فى مصر محروسة

قاسم : لا ده جواب لاستاذى لرنود فى فرنسا باعت له اخذ رايه فى كتاب

ناوى ألفه

نفيدة : كتاب ستات اللى قلت عليه ؟

قاسم : الله ينور عليكى

نفيدة : ابعتة حالا افندم

الأم : تعرف يا قاسم عمرى ما ندمت على شىء قد ما ندمت على سفرك

لفرنسا لو ما كنتش سافرت كان زمانك متجوز ومخلف ومالى علينا

البيت ولاد .

قاسم : انا اخرج احسن اصل الموضوع ده لما بيتفتح ما بيتقلش . .  
سلام عليكم

يخرج

الام : ما فيش فائدة فيه . . ما فيش فائدة  
قطع

---

مشهد / ٣٥      المر المؤدى لمكتب رئيس النيابة      نهار / داخلي

حركة جرى . اضطراب . الجنود يجهزون بنادقهم للاطلاق . قاسم يفتح بابه . يسأل  
الجندي الواقف على الباب

قاسم : فيه ايه ؟ ايه الهيصه دى ؟

جندى ١ : المظاهرات مالية البلد يا بيه وجاية على هنا

قاسم : مظاهرات ؟ ليه ؟

جندى ١ : عشان النهاردة ذكرى احتلال الانجليز لمصر

يبدو عليه الاعجاب بالخبر

قاسم : عظيم . . الشعب بياكد انه لسه حى

جندى ١ : نعم ؟

قاسم : ما تشغلش بالك انت .

يدخل ويغلق الباب . يبدأ صوت المظاهرات والهتافات يقترب

قطع

---

مشهد / ٣٦      امام مبنى مديرية بنى سويف      نهار / خارجى

جموع المتظاهرين تقترب من المديرية تهتف

زعيم ١ : عاشت مصر حرة مستقلة

مجموعة ١ : عاشت مصر حرة مستقلة

زعيم ١ : عاشت مصر للمصريين

مجموعة ١ : عاشت مصر للمصريين

مجموعة ثانية على رأسها زعيم آخر

زعيم ٢ : اخرجوا من بلادنا

مجموعة ٢ : اخرجوا من بلادنا

زعيم ٢ : يسقط الاحتلال

مجموعة ٢ : يسقط الاحتلال

مجموعة أخرى على رأسها زعيم ثالث

زعيم ٣ : يا عزيز يا عزيز لازم يخرج الانجليز

مجموعة ٣ : يا عزيز يا عزيز لازم يخرج الانجليز

زعيم ٣ : اصحوا اصحوا يا احرار لازم نطرد الاحتلال

مجموعة ٣ : اصحوا اصحوا يا احرار لازم نطرد الاحتلال

قاسم أمين فى نافذة مكتبه وعلى وجهه علامات الاعجاب . مدير المديرية على باب المديرية وحوله الجنود وتفصل بينه وبين الجماهير عدد آخر من الجند

المدير : يا شباب .. يا ابناء بنى سويف .. اسمعوا لى .. أنا مدير

المديرية .. وأنا أقول لكم عودوا إلى مدارسكم .. عودوا إلى

دروسكم .. لن يخرج الانجليز بالمظاهرات ونحن لسنا

أعداءكم .. فليتنصرف كل منكم من حيث جاء .

حكمدار بوليس بنى سويف يصدر أمره للجنود الذين يحملون البنادق

حكمدار المديرية : استعد لضرب النار

المدير يصيح فى الجنود

المدير : نزل البندقية أنت وهو مافيش مصرى بضرب أخوه بالنار .

ح . المديرية : حضرة مدير ..

المدير : أنا المسؤول هنا وأنا بأقول مافيش ضرب نار انجلترا بتسمح

بالمظاهرات على أرضها عايزين تحرموها فى مصر ليه ؟

الحكمدار يتميز غيظا .. المدير للمتظاهرين

هيا يا أبنائى .. عودوا إلى مدارسكم وحافظوا على بلادكم من أى

تخريب

زعيم ١ : عاش أبناء مصر الأحرار

مجموعة ١ : عاش أبناء مصر الأحرار  
 زعيم ١ وهو يقود المجموعة للابتعاد  
 زعيم ١ : الحرية لمصر  
 مجموعة ١ : الحرية لمصر  
 زعيم ١ : الحرية لمصر  
 مجموعة ١ : الحرية لمصر  
 قاسم يتتسم

قطع

---

مشهد ٣٧      أمام سكن قاسم بينى سويف      نهار / خارجى

قاسم ينزل من عربة حنطور يتقدم منه ضابط مصرى شاب  
 ضابط : لو سمحت سعادتك  
 قاسم : أنا ؟  
 ضابط : أيوه  
 يقترب منه

ضابط : الضباط الانجليز ملوا السجون بالولاد المتظاهرين من غير  
 ما يرجعوا لأى حد . . أنا عارف أن حضرتك وطنى أظن مش  
 ممكن حتسب الشباب يتبهلوا فى السجون  
 قاسم : أكيد ، اتوكل أنت على الله وسبب لى المهمة دى  
 يعود للعربة الحنطور

قطع

---

مشهد / ٣٨      أمام سجن المديرية      نهار / خارجى

الطلاب المحبوسون يقفون طابورا . قاسم عند أول الطابور ويجواره الحكمدار وعلى  
 مقربة منه المقدم وبعض الضباط الانجليز . .

قاسم يسأل المحبوسين

قاسم : تهمنتك ايه ؟

محبوس ١ : مسكونى فى المظاهرات

لمحبوس ٢

قاسم : وأنت ؟

محبوس ٢ : مسكونى فى المظاهرات

يهز راسه يقول لكاتب النيابة

قاسم : اكتب . . يفرج فوراً عن كل المقبوض عليهم فى المظاهرات عدا

من كان متهما فى قضايا أخرى

يتقدم منه الحكمدار

الحكمدار : قاسم بيه . . ده تحدى للانجليز

قاسم : انا باطبق القانون اللى اتعلمته

يتصرف شامخا . الضباط فى شدة الغيظ . مقدم البوليس الذى رأيناه من قبل يبدو عليه

الاعجاب بقاسم

قطع

---

نهار / داخلى

سلم المديرية

مشهد ٣٩

قاسم أمين يصعد . أحد الأفندية يقترب منه

أفندى : قاسم بيه . . سيادة مدير المديرية طالب حضرتك

قاسم : حاضر

يواصل الصعود .

قطع

---

نهار / داخلى

مكتب مدير المديرية

مشهد / ٤٠

مدير المديرية يشد على يد قاسم

المدير : احبيك يا سيادة رئيس النيابة على موقفك الوطنى العظيم فى  
الافراج عن المحبوسين

قاسم : أنا الذى يا حى موقفك الرائع الذى حافظ على دم شبابنا المشتركين  
فى المظاهرة

المدير : يا قاسم يا ابنى أنا عارف أنى حادفك منصبى تمن الموقف ده لكن  
ابعادى لأنى وطنى أشرف ألف مرة من بقائى فى المنصب لأنى  
باخون وطنى لصالح الانجليز

قاسم باسم

قاسم : على أى حال أنا شخصيا حاروح دلوقت أحضر حاجتى استعدادا  
لأى عقاب

المدير يبييه مرة أخرى

المدير : احبيك يا ابنى . . مصر فى حاجة حقيقية للشباب الذى زيك .  
قطع

نهار / داخلى

غرفة نوم حسن وجوليا

مشهد / ٤١

حسن يخاطب جوليا التى تعد حقائبها

حسن : فهمينى بس يا جوليا . . ليه مصممة تسافرى لوحذك ؟

جوليا : أنا حرة .

حسن : طب مش عايزانى أجى معاكى ليه ؟

جوليا : وتيجى معايا ليه ؟

حسن : لأنى جوزك

جوليا : حسن . . من فضلك . . أنا مختوقة . . محتاجة أقعد لوحدى

شوية

حسن : أنا مش فاهم موقفك أبدا

جوليا : بعدين هتفههم

حسن : جوليا . . انتى رحتى للدكتور من ورايا ؟

جوليا : ده أمر يخصنى

تغلق الحقائب

حسن : قولى لى الدكتور قال لك ايه وتتفاهم  
جوليا : حتتفاهم يس مش دلوقت . . عن اذنك  
تحمل الحقائب الثقيلة لتخرج . حسن يتقدم ليحمل عنها الحقائب  
حسن : طب هاتى عنك  
جوليا : لا  
حسن : حاجى أوصلك لحد السفينة  
جوليا : أسفة . . أنا أقدر اعتمد على نفسى  
تخرج وحدها حاملة الحقائب

قطع

---

مشهد / ٤٢ صالة شقة محمد عبده نهار / داخل

الباب يذق محمد عبده ينادى وهو يجلس وأمامه المصحف على حامل

محمد : مافيش حد يفتح ؟ الأمر لله . . افتح أنا

ينهض ليفتح يجد رجلا انجليزيا

بلنت : سلام عليكم شيخ محمد

محمد : مستر بلنت ؟ أهلا بيك . . اتفضل

بلنت : شكرا

يدخل . . محمد عبده ينادى للدخول

محمد : القهوة يا اولاد لمستر بلنت

بلنت : شيخ محمد أنا جاي لك فى مهمة محددة

محمد : مهمة ايه ؟

بلنت : اللورد كرومر سأل عن الراجل اللى ممكن يساعده فى مهمته

الاصلاحية فالكل أجمع أن الوحيد اللى ممكن يقوم بالدور ده هو انت

عشان كده بعتنى اسألك : هل ممكن تتعاون معاه ؟

محمد : اذا كان التعاون فى صالح مصر فلا مانع عندى

بلنت : وتقديرا لك هو اصدر أوامره بأن تعامل معاملة خاصة فى دار



المعتمد البريطاني . . ومن النهارده تقدر تروح له بأى مشروع  
تحب تنفذه

محمد : أنا لن أذهب اليه الا اذا دعاني للاستشارة

بلنت : لكن لا مانع لديك من التعاون معاه

محمد : محمد عبده مستعد ان يتعاون مع أى انسان لصالح مصر

قطع

---

نهاية الحلقة الثالثة عشرة

## الحلقة رقم (١٤)

نهار / داخلي

مكتب اللورد كرومر

مشهد ١ /

يبدأ المشهد باللورد يضحك ثم تتسع الكاميرا لنرى بلنت يجلس أمامه متعجبا

بلنت : بتضحك على ايه جناب اللورد

اللورد : واضح أن محمد عبده أكل الطعم

بلنت : No

اللورد : What?

بلنت : محمد عبده عارف أنك بتتاور : you don't know him

ما تعرفوش . . : He is a very intelligent man شيخ محمد عبده

واحد من حكماء العصر

اللورد : واضح أنك معجب بيه جدا

بلنت : Sure

اللورد : انت معانا ولا معاه : My god!!

بلنت : معاه

اللورد : What?

بلنت : Look my lord, من مصلحة انجلترا انه فيها ناس مؤمنين بحقوق

الشعوب الاخرى فى الحرية ويقفوا جنب زعماء الحرية فيها وانا

هنا لانى مؤمن بالحرية

اللورد : لكن انت انجليزى

بلنت : كوني انجليزى ما يمنعنى انى مؤمن بحرية الانسان فى اى زمان

ومكان ومن مصلحة انجلترا ان يقول التاريخ انه كان بها رجال

يدافعون عن حرية الشعوب فى عصر الاحتلال

اللورد : Any how.. اسمع مستر بلنت استمر مع محمد عبده خليه يكمل

تصوره احب اعرف الزعماء المصريين القادمين اللى حتعاون

## قطع

مشهد / ٢ مكتب رئيس نيابة بنى سويف نهار / داخلى

قاسم - الباب يدق

قاسم : ادخل

ينفتح الباب ويدخل مدير المديرية . مرحبا

قاسم : اهلا وسهلا سعادة الباشا . . معقول سعادة مدير المديرية بنفسه

جاي مكتبى المتواضع

الباشا يمد يده بورقة ويقول بأسى

المدير : للأسف يا قاسم افندى اللى كنت متوقعه لتفكك حصل

قاسم : نقلونى من بنى سويف

المدير : ابوه

قاسم : هيه . . وسعادتك

المدير : سابونى مكانى لقوا ان تصرفى منع إسالة الدماء واعتبروه تصرف

حكيم .

قاسم : على اى حال انا مش زعلان من النقل وبصراحة كنت متوقع ما هو

أشد

يتناول الخطاب يقرأ

قاسم : هيه ودونى طنطا ؟ كويس شى الله يا بدوى

المدير يمد يده محييا

المدير : انا سعيد جدا بمعرفتك يا قاسم افندى

قاسم بحرارة

قاسم : أنا اللى سعيد بأن مصر فيها مديرين زى سعادتك

قطع

القطار يجرى عائدا للقاهرة يصدر صفارة ويواصل طريقه  
قطع

الام وتفيدة . قاسم  
الام : ما تتعش نفسك تروح طنطا تروح طوكر رجلى على رجلك  
تفيدة : تمام افندم  
قاسم : لا لا لا . . أنا ما أقدرش أبهدلكم معايا كل شوية فى حته انتم  
تقعدوا فى مصر معززين مكرمين وأنا أجى لكم فى الاجازات  
واديكوا اتعودتوا تمسكوا مصروف البيت وتديروا شتونه  
بنفسكم .  
تفيدة : اسمع ولد كلام كتير يوك . . انت تروح اى مكان روح احنا كمان  
روح معاك  
قاسم : حلاوتك انت يا تركى يا شديد  
تفيدة : هزار يوك  
مداعبا وان كان جادا  
قاسم : ما دام هزار يوك يبقى تسمعوا الكلام انتم الاتنين . . أنا دلوقت  
راجل البيت وكلام راجل البيت لازم يتسمع مفهوم  
تفيدة تشيح بيدها غير راضية  
الام : ولو ان البعد صعب لكن زى بعضه الامر الله  
قطع

سباعى وكهرمانة يحملان الشنط متجهين لاعلى . الام تنزع البياضات التى تغطى الاثاث  
تقول لهما

الام : اعملوا لكم همة عشان نعرف نبات فى البيت ده

سباعى : حالا يا هاتم

كهرمانة : ياللا يا سباعى اتحرك

يصعدان السلم . خلال هذا نرى تقيدة تتحسس حوائط البيت وأثاثه وهى تتمتم

تقيدة : وحشنى قوى البيت افتدم وحشنى

قاسم يتابعها صامتا

قطع

سعد يتقلب فى فراشه معذبا يتنفس بحرقة . الباب يفتح ويظهر الخادم

سعد : عايز حاجة ؟

الخادم : فيه ضيف جاى لك

سعد : مش شايفنى نايم ؟

يظهر قاسم

قاسم : نايم صاحى مش مهم . . أنا جيت

سعد يقفز مهللا

سعد : قاسم ؟ ايه يا ابنى فيتك ؟

قاسم : دلوقت فى القاهرة لكن بعد كده فى طنطا

سعد : نقلوك ؟

قاسم : ادينا بتفرج على مصر . . المهم . . ايه اخبارك أنت ؟

سعد : مش مبسوط . . من ساعة ما نازلى ما سافرت الدنيا مالهاش طعم

قاسم : جربوا الحب عشان تعذرونى

سعد : ادينا بنجرب . . وانت ايه آخر اخبارك غير النقل .

قاسم يخرج خطاباً من جيبه

قاسم : البروفيسور لرنود بعث لى جواب مهم التهاردہ أصلی كنت ناوى  
ألف كتاب عن المرأة فبعث له الخطة بتاعة الكتاب عشان يقول لى  
رأيه فيها فرد على بالجواب ده .

سعد : وبيقول ايه فى الرد .

قاسم : قال لى لأجل الكتابة عن المرأة لانى كده حابداً من حاجة فرعية  
والمفروض انى أبداً بنظرة كلية للمجتمع نظرة كلية ونقدية يعنى  
اناقش الاقتصاد والسياسة والنواحي الاجتماعية مع بعض الأول  
واحدد العيوب وبعد كده ابقى اتكلم عن الفرعيات زى تحرير  
المرأة وغيرها من الموضوعات .

سعد : انت لو نفذت الكلام ده حتدخل التاريخ من أوسع أبوابه حتبقي  
عملت البناء الفكرى للمجتمع المصرى الجديد .

قاسم : حانقله . . انا عارف انه حياخد منى وقت طويل لكن حانقله

قطع

نهار / داخل

صاله شقة حسن

مشهد / ٧

حسن يفتح الباب لاهه وعلى وجهه حزن

حسن : اهلا يا امى

أم حسن : قلت اجى معاك بدل ما انت قاعد لوحذك

حسن : أهلا

أم حسن : مالك كده يا ولد بتتكلم من غير نفس .

حسن : انتى السبب فى كل اللى حصل ده كنا عايشين وكويسين عايزة حتة  
عيل . . خلى مراتك تروح تكشف مبسوطة دلوقت ؟

أم حسن : جرى ايه يا سى حسن ؟ ايه الحكاية ؟ عاملة لك ايه الخوجابة ؟  
سحرالك ؟ والنبي تلاقيها سحرالك مش قادر على بعدها  
خلاص ؟ ما تعقل يا ابن يوسف .

حسن : ما اتم معذورين الجهل اللى اتم فيه مغليكم مش حاسين بمعنى

ان الراجل المتعلم يعيش مع واحدة فاهماء . . جهلكم مغليكم ما  
بتفكروش غير فى السحر والهم الذى انتو فيه  
أم حسن : جهل ؟ بقول لامك يا جاهلة ؟ كتر خيرك يا سى حسن . . كتر  
خيرك يا متعلم  
حسن : يا قولك ايه أنا مش طايق نفسى دلوقت وممكن اغلط واقول كلمة  
كده والا كده  
أم حسن : خلاص يا ابن جوليا . . مش قادر على بعدها روح جيبها . .  
اجرى وراها وطمعها فيك  
حسن : ايوه حاروح اجيبها وحاجرى وراها ما حدش له دعوة بى  
أم حسن : أنا غلطانة اتى جيت لك  
تفتح الباب لتخرج  
أم حسن : عيال آخر زمن . . ريتا يعوض علينا فى ذريتنا  
تهيد الباب . يجلس على الكتبة ويضع يديه على رأسه  
حسن : لازم اعترف انى باحب جوليا . . باحبها رغم كل شىء .  
قطع

---

مشهد / ٨ حقول + محطة طنطا نهار / خارجى

قطار يعجرى بين الاراضى الزراعية . قاسم يجلس بداخله ناظر الحقول . (مزج إلى) لوحة  
محطة طنطا

قطع

---

مشهد / ٩ مكتب مدير الغربية نهار / داخلى

المدير فى مكتبه أمامه الحكمدار  
الحكمدار : سعادة الباشا حضرتك مدير المديرية المسؤول ومن واجبى  
انى أبلغك .

مدير الغربية : تبلغنى بايه يا حضرة الحكمدار .

الحكمدار : ياخيار رئيس النيابة الجديد

م . الغربية : ما له هو كمان ؟

الحكمدار : شاب من الولاد اللى اتعلموا فى فرنسا وما حدش مالى عينه

تصور يا باشا انه فى بنى سويف أفرج عن كل المتظاهرين .

م . الغربية : احنا كنا ناقصينه ؟ ما كفاية البلاوى اللى عندنا .

الحكمدار : أنا بعد اذنك يا باشا ناوى اخليه معزول ولا هوش دريان بأى

حاجة

م . الغربية : المهم مش عايز مشاكل . . اعمل اللى يعجبك المهم اتك

ما تعملش مشاكل

الحكمدار : اطمن يا باشا

الباب يفتح ويدخل الساعى

الساعى : حضرة رئيس النيابة الجديد يا باشا

المدير للحكمدار

م . الغربية : خليه يتفضل

قاسم : السلام عليكم

الاثنان : وعليكم السلام ورحمة الله

يتبادلان التحية

م . الغربية : اهلا بالسيد رئيس النيابة . . الغربية كلها نورت

قاسم : منورة بأهلها

يشير له بالجلوس

م . الغربية : اتفضل . . استريح . . تشرب قهوة

قاسم يجلس

قاسم : اشرب قهوة مظلوبة

الحكمدار : استأذن أنا

م . الغربية : اتفضل

الحكمدار يخرج

م . الغربية : شوف يا أستاذ قاسم ؟ أنا لى عندك كلمتين فى بداية التعاون

بيننا أنا راجل أحب الهدوء وأرجو أنك تساعدنى على تحقيق



الهدوء المديرية كبيرة ومشاكلها كثيرة ولو ما كناش حتهدى الامور  
الدنيا حتخرب

قاسم : ان شاء الله ربنا ما يجيبش خراب وتأكد انى حالتزم بالقانون تماما  
م . الغريبة : وانا اديت تعليمات قاطعة للحكمدار انه يتعاون معاك ويحافظ

على الهدوء اللى بتتمتع بيه المديرية

قاسم : اوعد سعادتك انه ما يكونش فيه مشاكل ابدا بينى وبين الحكمدار  
طالما كان هو ورجاله بيحترموا القانون

قطع

ليل / داخلى

مكتب سعد

مشهد / ١٠

سعد على مكتبه . يفتح الباب ينظر ليرى القادم فيرى نازلى تفاجئه

سعد : نازلى ؟

ينهض ويجرى إليها

سعد : نازلى ؟

تدخل وتغلق الباب . . تتلاقى الايدى

نازلى : سعد

سعد : طولنى ليه بره ؟

نازلى : زهقت يا سعد من الخديوى والانجليز ما كنتش عايزة اجى لولا

انك وحشتنى

سعد : لو بتعنى لى كنت سافرت لك ما كنتش عارف انى باحبك كل الحب

ده

نازلى : ربنا يعلم انا كمان باحبك قد ايه لكن

سعد : لكن ايه ؟

نازلى بانكسار

نازلى : انا اقتنعت اخيرا برأيك . . جوازنا مستحيل يا سعد

سعد : أقسى شىء فى الدنيا اننا نحب من غير أمل .

نازلى : بالعكس . . الأدباء الفرنسيين الرومانسيين دايمًا يصوروا العشاق

على انهم يحبوا من غير أمل . . حيناً يا سعد حيكون قصة  
رومانسية جديدة .

سعد : حيناً حيكون قصة عذاب .

نازلى : العذاب عشائك حيكون جميل .

دق على الباب . سعد يقول

سعد : ادخل

يفتح الباب يظهر الخادم

الخادم : واحد انجليزى سمو الاميرة

تبادل النظرات هى وسعد ثم تقول بتحفظ

نازلى : خليه يدخل

الخادم ينظر للخارج

الخادم : اتفضل

يدخل رجل انجليزى

انجليزى : good evening Madam good evening Mr Saad

نازلى : نعم عايز ايه ؟

انجليزى : عايز ابليج سعادتك ان جناب اللورد طالبك

نازلى : قول لجناب اللورد بتاعك ان اللى بيعمله ده عيب واتى مش حاروح

له وما ينساش تانى مرة انه بيتعامل مع أميرة

الانجليزى ينحنى

انجليزى : Ok. princess Excuse me

ينسحب

نازلى : شايف يا سعد اللى بيعمله الراجل الملعون ده ؟

سعد : للاسف . . شايف . .

قطع

ليل / داخلى

مكتب مدير الغريبة

مشهد / ١١

المدير على مكتبه ، الحكممدار أمامه

الحكممدار : سعادة الباشا لا يمكن اللى حصل ده . . رئيس النيابة الجديد  
أفرج عن كل المسجونين بدون اذن نيابة  
م . الغربية : وانت مش عارف ان اول حاجة جيعملها انه حيزور السجن  
بتاع المديرية ؟ مش قادر تنقل المساجين فى أى زريبة لحد ما  
يخلص مرور ؟  
الحكممدار : عملت كده يا بيه وزرت معاه السجن الصبح لكن فوجئت بيه  
بيفاجىء السجن مرة ثانية بالليل .  
م . الغربية : واضح انه مش حيكون فيه هدوء عموما اصبر على شوية انا  
حاطلب نقله من الغربية كلها .  
قطع

---

مشهد / ١٢      غرفة نوم سعد      ليل / داخلى

سعد فى ثياب النوم يلقى بنفسه على الاركة يتأوه  
سعد : آه . . لو كنت شاعر كنت كتبت قصيدة عن لوعة الحب المحكوم  
عليه بانه ما يكتملش أبدا . لكن يا ألف خسارة . . ماعتدش  
موهبة الشعر  
يرفع يديه بالدعاء  
يارب . . أنت أعلم بحالى . . اذا كان الحب محكوم عليه بالفشل  
ادبنى القوة عشان اعدى بحوره الغريقة . . يارب  
قطع

---

مشهد / ١٣      الممر المؤدى لقاعة نازلى      ليل / داخلى

اللورد يسير مشدودا ، الخادم يسرع أمامه مرحبا  
الخادم : اتفضل افندم . . اتفضل افندم  
يصلان للباب يدخل كرومر  
قطع

نازلى تقف وعلى وجهها امارات التحدى بينما كرومر يقبل يدها

كرومر : My princess القاهرة نورث . . صدقيني I missed you

نازلى : جناب اللورد من فضلك أنا رافضة تماما الاسلوب اللى استعملته

معايها النهارده سعادتك باعت واحد يتجسس على ومش متنظر لما

اوصل بيتى عشان توصلنى رسالتك I am a princess I refuse all of this

princess أنا مش موظفة عندك

كرومر : I am very sorry my princess أنا أسف ، أنا مش يقدر يزعلك

الموظف اللى ضايقتك ده غبي حارجه انجلترا صدقيني أنا باعته

القصر لكن هو شاف عربيتك قدام مكتب سعد فظلمك فوق أنا

لازم اعاقبه

نازلى : وبعدين ؟

كرومر : سمو الاميرة صدقيني انا حريص جدا على صداقتك وارجو كى

بلاش تاخذى على انها عبء عليكى . . احنا الاثنين هدفنا نبيل

بتعاون عشان مصر . مش ممكن نضحي بصداقتنا

نازلى : Ok. My Lord, but please من فضلك ما تنساش اتى أميرة وانى

بتعاون معاكم متطوعة

كرومر : أكيد سمو الأميرة . . أكيد

يغير الموضوع

كرومر : ايه . . مش حتقدمى لى حاجة أشربها ؟

تدق جرسا يدويا يدخل الخادم . الخادم ينحنى أمام اللورد

نازلى : شوف جناب اللورد يشرب ايه

خادم : جناب اللورد يؤمر بايه ؟

كرومر : قهوة تركى مطبوط

الخادم يخرج

كرومر : هيه سمو الاميرة امنى حترجمى الصالون بتاعك ؟

نازلى : مش عارفة

كرومر : No ارجو كى لازم ترجمى الصالون بسرعة الخديوى ناوى يغير

مجلس النظار وانا عايز مجلس النظار الجديد يطلع من هنا .  
نازلى : حاضري يا جناب اللورد . . حابداً نشاط الصالون تانى من بكره .  
قطع

---

مشهد / ١٦      غرفة نوم قاسم أمين بطنطا      ليل / داخلى

---

قاسم أمين يمسك الريشة ويرتب الأوراق  
قاسم : نتوكل على الله ونبدأ الكتابة . . لازم انفذ مشروعي بالكتابة عن  
مصر واحط أسس الانطلاق للمستقبل نبدأ بالكلام عن المجتمع  
المصرى .

يبدأ الكتابة

قاسم : ما هي العناصر التي تكون المجتمع المصرى الحالى ؟ هناك اولاً  
المصريون الحقيقيون - مسلمون وأقباط - الذين يشكلون الغالبية  
العظمى من السكان وانما اسميهم المصريين الحقيقيين لانهم  
يتبعون الى نفس الجنس . . ويشكل المسلمون والاقباط كلا  
متناسقاً يتحدث نفس اللغة ويرتدى نفس الثياب ويمارس نفس  
العادات . ولم يحدث قط منذ بدأوا يعيشون معاً جنباً الى جنب ان  
وقع بينهم خلاف جاد . . لقد ربطت المآسى المشتركة بينهم  
بمعاطفة وطنية ليتهم يرتفعون بمصلحة الجماعة فوق الاختلافات  
الدينية

دق على الباب

قاسم : وده مين اللي جاى فى نص الليل كده ؟

دق

قاسم : طيب . . طيب . .

يخرج من الباب

قطع

قاسم يسير يفتح الباب ليرى فتحى زغلول أمامه

قاسم : فتحى زغلول ؟ ايه المفاجأة الجميلة دى ؟ انفضل

يدخل يغلق قاسم الباب يجلسان

قاسم : ايه اللى جابك طنطا ؟

فتحى : لو كنت بتتابع أخبارى كنت عرفت : اولاً انى سببت نيابة أسيوط

وبقيت مفتش فى لجنة المراقبة القضائية

قاسم : وكنت عرفت كمان انك جاي تفتش على حاجة فى طنطا

فتحى : الله يتور عليك

قاسم : عموماً اهلا بيك

فتحى : المهم يا سيدى لكن عندي اخبار حتبس قوى

قاسم : أخبار ايه ؟

فتحى : عمك مصطفى باشا فهمى بقى رئيس النظار .

قاسم : بتكلم جد ؟

فتحى : اه والله التكليف صدر النهارده من الخديوى وبكره حيبقى فى كل

الجرائد

قاسم : يبقى لازم اسبب كل حاجة واروح الصبح انا والعيلة نبارك له

فتحى : تبارك له على ايه ؟ ده بدأ القصيدة بالكفر

قاسم : ازاي معنى ؟

فتحى : ضم نظارة المعارف لنظارة الاشغال . . مش كفاية علينا دنلوب

اللى خارب التعليم كمان يضم المعارف للأشغال

قاسم : يا عم فتحى مصطفى فهمى ده فى مقام عمى وحتى لو اختلفت معاه

سياسياً فالعلاقة اللى بيني وبينه تحتم على انى ازوره وابارك له

فتحى : طيب يا عم . . جايز برضه تحتاج لعمك ده فى حاجة . . روح

بارك له .

قطع

مصطفى فهمى وقاسم يجلسان يشربان الشربات

مصطفى : قاسم ابنى انا سعيد جدا بزيارتك دى . . واعتبر نفسك أخى اى  
حاجة عايزها تيجى فوراً .

قاسم : انت عمى

مصطفى : ايه رأيك لو تسبب النيابة وتيجى تشتغل فى مكتبى ؟

قاسم : اشكرك يا عمى لكن انا الحمد لله ناجح فى النيابة واحب استمر فيها

مصطفى : عموما فكر ولو حبيت تنتقل فى اى وقت قل لى

قاسم : طيب يا عمى

مصطفى : انت لسه رئيس نيابة .

قاسم : ابوه

مصطفى : ده كلام ؟ بقى لك ست سنين متخرج من فرنسا ولحد دلوقت

رئيس نيابة ؟ اكتب لى بياناتك عشان اشوف وضعك .

قاسم : أنا مش مظلوم يا عمى . . أنا ماشى فى دورى مع زمابلى

مصطفى : دماغك ناشفة زى أبوك أنت حر .

يدخل خادم

خادم : فيه ضيوف فى أوضة الضيوف جايبين يهتوا يا سعادة الباشا

مصطفى : حاخرج لهم حالا

لقاسم

مصطفى : تعالى معايا يا قاسم

يسيران لغرفة الضيوف

قطع

يدخل مصطفى باشا وقاسم للضيوف . يقفون للسلام . الضيوف هما : مدير الغربية  
وحكمدار البوليس

يفاجأ بقاسم . . . مصطفى باشا يسلم على الرجلين  
مدير الغربية : الغربية كلها بتبوس الايادى يا سعادة الباشا  
الحكمدار : وجود نظارة الداخلية فى ايد سعادتك شرف عظيم لكل رجال  
البوليس .

لقاسم

مصطفى : اشكركم . . اشكركم تعال يا قاسم سلم . . قاسم ابنى . .  
قانونى عظيم

قاسم يسلم

مدير الغربية : طبعاً يا باشا  
الحكمدار : قاسم افندى منور الغربية كلها . . القانون فى عهده ماحدش  
يقدر يمسه .

مصطفى : انتم طلعتكم معرفة بقى ؟ عظيم دلوقت أنا مطمئن ان الغربية فى  
ايدين أمينة . . . مش كده ولا ايه يا قاسم ؟

قاسم : أكيد يا سعادة الباشا . . أكيد

يدخل الخادم برسالة فى صينية . مصطفى باشا يقرأ الرسالة

مصطفى : طيب يا جماعه حاسناذن منكم لانى مطلوب فى عابدين فورا  
م . الغربية : اتفضل يا سعادة الباشا

الحكمدار : اتفضل يا فندم .

مصطفى : قاسم . . مش ح اتكلم تانى فكر فى الموضوع اللى قتلته لك  
عليه ورد على

قاسم : ان شاء الله يا سعادة الباشا

يتجه مصطفى للباب

قطع

---

مشهد / ٢٠      عمر بقصر عابدين      نهار / داخلى

حركة . باشوات ، أطباء ، ضباط كبار ، يقفون يتحدثون بتقديم مصطفى فهمى من أحد  
كبار الياوران



مصطفى : فيه ايه ؟  
الياور : افندينا تعبان جدا  
مصطفى : مرة واحدة كده ؟  
يتجه إلى غرفة معينة . الياور يلقى الباب ثم يفتحه يدخل مصطفى باشا  
قطع

---

مشهد ٢١ / غرفة نوم الخديوى      نهار / داخلى

---

توفيق على سريريه وعليه ملامح التعب ، مصطفى فهمى بالقرب منه  
مصطفى : سلامتك يا افندينا  
توفيق : الله يسلمك يا باشا  
مصطفى : حاسس بايه ؟  
توفيق : تعبان لكن الدكاترة طمنوني  
مصطفى : الحمد لله يا ولى النعم  
توفيق : انا باعت لك دلوقت عشان اقول لك حاجة مهمة السبب الرئيسى  
الى خللاتي عيبتك رئيس النظار هو علاقتك الطيبة بالانجليز انا  
عايز تنسيق تام بينك وبينهم مش عايز احتكاك بينهم وبينك ومش  
عايز احراج .  
مصطفى : مولاي فيه مثل مصرى بيقول الايد اللى ما تقدرش تعضها بوسها  
وانا بوصفى وزير سابق للحريية . عارف ان الحل الوحيد قدامى  
هو اناى ابوس ايد الانجليز  
توفيق : لكن فيه حاجة يا باشا . ما تبعينش للانجليز  
مصطفى : مولاي انا مش قليل الأصل أنا طول عمرى خادم أمين للأسرة  
العلوية .  
توفيق : اعتبر ان كلامى ده هو تكليفى لك وللنظارة  
مصطفى : اطمن يا مولاي . . اطمن  
قطع

تفيدة والام وقاسم داخلون من الباب

تفيدة : بيت مصطفى باشا بيت عظيم . . يعرف أصول ضيافة تمام  
الام : الست ما اتغيرتش معاملتها معانا مهما جوزها كبر  
تفيدة : ولدنا قاسم انت ليه مش تتجوز واحدة من بنات مصطفى باشا . .  
بنت صغيرة اللي فاضلة . .

تفيدة للام

تفيدة : اسمها ايه افندم ؟

الام : صفية

تفيدة : صفية دى قمر افندم . . ليه مش تتجوزها ؟

قاسم : عندها كام سنة ؟

تفيدة : ١٣ أفندم

قاسم : يا ناس قلت لكم ألف مرة أنا لما أنوى اتجوز حاتجوز واحدة  
ناضجة مش عيلة .

الام : يا ابني مافيش بنات بيتجوزو اكثر من ١٥ سنة . . البنت اللي تعدى

الخمستاشر يقولوا عليها بايرة

قاسم : يقولوا

تفيدة : دماغك حديد

قطع

قاسم يسير والحكممدار يسير بجواره

الحكممدار : قاسم بيه معقول تبقى قريب كده من رئيس النظار وما تقولش ؟

لا لا لا . . أنا عاتب عليك

ينظر اليه متعجبا ويكون قد وصل لمكتبه فيفتح ويدخلان

قطع

قاسم يجلس على أحد المقعدين الموجودين أمام المكتب . الحكمدار يظل واقفا  
الحكمدار : قاسم بيه ارجو انك من دلوقت تعتبرنى واحد من مساعديك  
أى شىء عايزه من البوليس أنا ورجالتى كلهم تحت أمرك  
قاسم : اقعد يا سيادة الحكمدار  
الحكمدار يجلس

قاسم : أنا ماليش أى مطالب شخصية الطلب الوحيد اللى عايزه هو تطبيق  
القانون من غير ظلم لحد  
الحكمدار : تأكد سيادتك انى من اللحظة دى فى خدمة القانون . . بس . .  
بس فيه حاجة صغيرة لى عندك ارجو انك تساعدنى فيها .

قاسم : خير  
الحكمدار : أنا متأخر قوى فى الترقية . . وطالب ان سعادة الباشا يؤمر  
بانصافى

يخرج ورقة من جيبه ويقدمها له  
الحكمدار : العريضة دى فيها كل شىء بالتفصيل ارجو بس أن حضرتك  
تديها له مع كلمتين كويسين عنى  
قاسم : وانت ما تديهاالوش بنفسك ليه ؟

الحكمدار : سيادتك برضه لك خاطر عنده ده سعاده بيقول عليك ابنه  
قاسم : حاضر يا سيدى حادياها له لكن لو مالکش حق ما تزعلش لو  
ما عملکش حاجة

الحكمدار : أنا لا يمكن أزعل منك يا افندم مهما كانت الاحوال . .  
لا يمكن

يقف بأدب جم .

بعد اذن سيادتك .

يخرج . قاسم يقول

قاسم : النفاق . . مصيبة البلد دى النفاق

يدخل أحد الجنود يحى

العسكرى : تمام يا فندم

قاسم يرد التحية

قاسم : نعم ؟

العسكري : عرض الناس الممسوكين تحرى

قاسم : هاتهم

العسكري ينادى عليهم من الخارج

العسكري : ادخل يا مشبوه انت وهى

تدخل وسيلة وفرقتها

وسيلة : بريئة يا بيه

رجل ١ : والله ما عملنا حاجة

وسيلة : يا بيه احنا ناس بنغنى ونبسط الخلق . . هو الغنا دلوقت شبهة ؟

قاسم يتمتم

قاسم : سلافا ؟

رجل ٢ : يا بيه احنا ناس أشراف . . طب يقولوا لنا بس ايه تهمتنا ؟

قاسم للعسكري

قاسم : ايه تهمتهم دول يا عسكري ؟

العسكري يقدم له ورقة

العسكري : اتفضل

يقرا

قاسم : وايه معنى كانوا قاعدين على القهوة ؟

وسيلة : يا بيه كنا قاعدين على القهوة بنوزع النقطة اللى لميناها فى الفرح

قاسم يسأل

قاسم : عملتولهم فيش وتشبيه ؟

العسكري : تمام يا افندم واتحرينا عنهم

قاسم : ولقيتم حاجة ؟

العسكري : لا يا افندم

قاسم : يفرج عنهم بضممان شيخ الحارة

وسيلة : ربنا يتصرك يا بيه . . ربنا يعلى مراتبك . . الهى ما تتضام ابدًا .

قاسم : قولى لى يا وسيلة . . ما فكرتيش ابدًا تسيبى الشغلانة دى وتشوفى

شغلانة غيرها

وسيلة : يا ريت كنت اعرف غيرها .  
 قاسم : تقدرى تشتغلى فى اى بيت  
 وسيلة : لا يا بيه انا صوتى بسم الله ما شاء الله . . جميل يرضيك اسيب  
 المغنى وابقى خدامة ؟  
 قاسم : لا ما يرضينش ويرافو عليكى انك عارفة قيمة الفن وقيمة صوتك  
 للعسكرى  
 قاسم : ياللا خدها وخليهم يفرجوا عنهم فورا  
 العسكرى يحيى  
 العسكرى : تمام يا افتدم  
 يخرجان  
 قاسم : رغم الخلاف اللى بينها وبين سلافا لكن فيها حاجة بتشددنى . .  
 صحيح مستواها الاجتماعى بييجبرنى على البعد عنها . . لكن  
 ما اقدرش أنكر ان فيها حاجة شىء خفى بييجبرنى على الربط بينها  
 وبين سلافا

قطع

---

مشهد / ٢٥ صالة شقة محمد عبده نهار / داخلي

محمد عبده ، بلنت  
 بلنت : شيخ محمد I am sorry أنا مش طبعى خداع لكن لورد كرومر  
 خدعنا . . الاتنين . . طلب اسماء نظار مصريين ووافق خديوى  
 على نظار أترك I am sorry sheikh Mohamed  
 محمد عبده يتسم  
 محمد : كنت عارف انه حيعمل كده  
 بلنت : طب ليه ؟  
 محمد : لان مصطفى فهمى هو رجل الساعة . . هو انجليزى يتكلم العربية  
 بلنت : كلامك دقيق تماما شيخ محمد  
 محمد : انس هذا الموضوع واخبرنى . . هل لديك أخبار عن حالة

## الخدوي الصبحية ؟

بلنت : سمعت انه التحسن كثير وبدأ يمارس أعماله .  
محمد : على بركة الله بالمناسبة ما آخر أخبار انجلترا  
بلنت : اسمع يا سيدى

قطع

---

مشهد / ٢٦ صالة شقة حسن وجوليا نهار / داخلي

حسن وجوليا يدخلان

حسن : حمد الله على السلامة نورتي بيتك

جوليا : ميرسى حسن

تظهر أم حسن وتقول بشيء من السخريّة

أم حسن : أنتم جيتم ؟ حمد الله على السلامة

حسن مندهشاً

حسن : أمى ؟

أم حسن : ايه مش عايزين تشوفوني ؟

حسن : ابدأ لكن ما كنتش متوقع انك هنا

أم حسن : قلت اجى أشقر على الشقة وانتم مش هنا بدل ما تسرق

حسن : كتر خيرك

لجوليا

حسن : خشى انتى يا جوليا غيرى هدومك

جوليا : ادى لطنط هديتها الاول

تفتح الحقيبة تخرج روب جميل وقميص نوم عاريا تهمس لها مداعبة

جوليا : ده مش توريه لحد

تأخذه أم حسن وتمسك الحمالات ثم تشق

جوليا : قلت لك مش توريه لحد

حسن : فيه حاجة ثانية ولا ادخل الشنطة

جوليا : انا حادخلها خليك انت مع ماما

تحمل الشنطة وتدخل . الأم نهمس

أم حسن : اتعالت في بلدها ولا ؟

حسن : سبحان الله . . انتى ما بتسكتيش أبدا ؟

أم حسن : الحق على اللى عايزه يكون لى حفيد ؟

حسن : ارحمىنى بقى . . ارحمىنى

قطع

نهار / داخلى

مكتب رئيس نيابة طنطا

شهد / ٢٧

قاسم يرتب اوراقا أمامه ويخاطب نفسه بصوت مسموع

قاسم : نأجل مشروع كتاب المرأة ونقدم كتاب نقد المجتمع نسميه ايه

الكتاب ده ؟ عايز اختار له اسم يخلى الناس تقراه . . اسميه ايه ؟

اسميه ايه ؟

الباب يندق ويتفتح ويدخل الحكمدار وفى عينيه فرحة طاغية

الحكمدار : استاذ قاسم خبطة مدهشة خبطة العمر

قاسم : خبطة ايه ؟

الحكمدار : الخبطة اللى حتدخل اسمى سجل البوليس من أعظم أبوابه

قاسم : واحدة واحدة بس وفهمنى

الحكمدار : افهمك . . فاكر الراجل اللى كان بيهيج الناس أيام هوجة

عرايى ؟

قاسم بعدم رضا

قاسم : هوجة عرايى ؟ لأ مش فاكر

الحكمدار : الراجل اللى اسمه عبد الله التديم

قاسم يقف

قاسم : التديم ؟ ماله ؟ ده هريان بقى له سنين

الحكمدار : تسع سنين بالتمام والكمال

قاسم : المهم . . ماله التديم ؟ لقيتوه ؟

الحكمدار : لقيناه فى قرية اسمها الجميزة وبعث القوات تحاصره وتقبض

عليه من امبارح وعلى رأسها وكيل الحكمدار .

قاسم : هه ؟ . . انت . . أنت متأكد ان هو عبد الله النديم اللي حقبضوا عليه ده ؟

الحكمدار : باقول لك القوات محاصرة المكان من امبارح وزمانهم قبضوا عليه وكلها ساعة زمن ويكونوا هنا انا بس من حبي فيك جيت ابلغك عشان تستعد لاهم تحقيق حتمعله في حياتك

قاسم : فعلا القضية دي حبقى قضية العمر بالنسبة لى

الباب يدق ثم يفتح ويدخل عسكري يؤدي التحية

عسكري : السيد وكيل الحكمدار ومعه المقبوض عليه

قاسم : دخلهم

يؤدي التحية ويقول وهو يؤدي التحية لوكيل الحكمدار

عسكري : اتفضل يا افندم

يدخل وكيل الحكمدار برتبة عقيد ومعه النديم فى الحديد يحيط به جنديان

و . الحكمدار : المتهم الهارب عبد الله النديم

دخل رجل فى حوالى الستين منفلتا من يد الحرس بالخارج . تلتقى عيناها تتكلم فى صمت

الفراجى : أنا لازم ادخل . . اوعى كده

قاسم : انت مين ؟

الفراجى : أنا حسن الفراجى يا افندم

قاسم : حسن الفراجى مين يعنى ؟

الفراجى : المرشد اللى دلتي البوليس على مكان المجرم الهرمان حاكم

انا يا بيه كنت بوليس سرى قبل كده بس طلعت معاش بقى لكن

برضه لسه خدام الحكومة

قاسم : طب بس بس خلاص . . اطلع بره لما اتادى لك

الفراجى : حاضر بس لا مؤاخلة يعنى انا عايز الالف جنيه أنا عارف ان

الحكومة كانت عاملة جايزة ألف جنيه للى يدلهم على المجرم ده

قاسم ينادى على العسكري يأتى

قاسم : يا عسكري

العسكري : افندم



قاسم : خد اخينا ده بره

الفرارجى : يا بيه أنا المرشد . .

قاسم : خده بره . .

العسكرى : اتفضل يا أخينا انت لما السيد رئيس النيابة حيموزك حتنادى لك

الفرارجى أثناء خروجه يقول مستغربا

الفرارجى : هو ايه الحكاية ؟! أنا مش فاهم حاجة

قاسم للحكممدار ووكيله مشيرا للنديم

قاسم : سيبنى شوية لو سمحتهم معاه

ينظران لبعضهما الحكممدار يتعجب ثم يقول

الحكممدار : أمرك

يخرج هو ووكيله . قاسم للعسكرى

قاسم : ما تدخلش حد حتى لو مدير المديرية مفهوم ؟

العسكرى : مفهوم يا أفندم

خرج ويغلق الباب . . قاسم يحتضن النديم بقوة

قاسم : أستاذى

النديم : ازيك يا قاسم . . ازيك

يربت قاسم عليه بحرارة

قاسم : واحشنى قوى يا استاذ

النديم : وانت كمان يا قاسم . . يا الله . . عمر فات من ساعة ما كنا بتتعد

فى متاتيا حوالين الافغانى كنت لسه انت طالب فى مدرسة الادارة

لكن شوف الزمن جرى ازاي ؟ انت بقيت رئيس نيابة قد الدنيا وانا

المجرم الهريان

قاسم : لا يا أستاذ أنت مش مجرم أنت أشرف من كل اللى طاردوك

ورصدوا الجوايز عشان يقبضوا عليك .

النديم : معقول ؟ تعرف عمرى ما خطر بيالى انى لما يتقبض على ح اتعامل

بالشكل ده لكن انا دلوقت فى غاية السعادة أهل البلد اللى كنت

مستخى فيها طلوعوا كلهم يودعونى والدموع مالية عنيهم وكيل

الحكممدار محمد افندى فريد عاملنى بمتهى الرقى منع العساكر

يمدوا ايدهم على ما حطش الحديد في ايدي ودلني ودل اهلتي على  
اللي حتمعله بعد القبض على وآخر المطاف انت . . معقول اللي  
بيحصل ده ؟

قاسم : الدنيا لسه بخير يا أستاذ ومصر لا يمكن تنسى أبطالها  
النديم : يعنى الناس لسه فاكريني ؟

قاسم : فاكرينك وفاكرين كل الابطال اللي ضحوا عشانهم  
النديم : الحمد لله . . الحمد لله تقدر تبدأ التحقيق

يمسح النديم دموعه

قاسم : حاضر . . بالمناسبة أنت حر فى كلامك فقل ما شئت  
النديم : توكل على الله

قطع

---

مشهد / ٢٨ المر المؤدى لمكتب رئيس نيابة طنطا ليل / داخلي

الحكممدار ووكيله يسيران

الحكممدار : أنا ما شفتش تحقيق بالشكل ده يوم كامل بيحقق معاه ؟  
و . الحكممدار : أكيد عنده أقوال تستاهل كل الوقت ده .

حسن الفراجى يجرى وراءهما

الفراجى : سعادة الحكممدار . يا سعادة الوكيل أنا حسن الفراجى اللي  
بلغت عن النديم . . أنا عايز الالف جنيه .

الحكممدار : وسع كده احنا فاضيين لك أنت كمان ؟

يصلان لمكتب قاسم ، العسكرية يفتح لهما . حسن الفراجى يضرب كفا بكف  
الفراجى : هو ايه اللي بيحصل ده ؟ أنا مش فاهم حاجة .

قطع

---

مشهد / ٢٩ مكتب رئيس نيابة طنطا ليل / داخلي

قاسم على مكتبه أمامه النديم يشرب فنجانا من القهوة . الحكممدار ووكيله واقفان . .

يتحرك قاسم نحوهما

قاسم : التحقيق خلص خلاص . . المهم السجن اللى تحتفظ فيه  
الاستاذ .

الحكمدار : أستاذ ؟ تقصد المتهم ؟

قاسم : الاستاذ المتهم . . سيادة الحكمدار لازم تعرف ان عبد الله نديم  
مش مجرم جنائى ده متهم سياسى راجل كان بيدافع عن وطنه يعنى  
بطل

الحكمدار : سيادة رئيس النيابة . . أرجوك . . حاسب على كلامك . .  
احنا فى مكان عمل رسمى

قاسم : عارف . . وبالمناسبة أحب أقول لكم انى واخذ اجازة من بكرة  
وتازل مصر اعمل كل المساهى للافراج عن عبد الله افندى النديم  
الحكمدار ووكيله يتبادلان النظرات

الحكمدار : عموما بالنسبة للسجن تحتفظه فى سجن المديرية .

قاسم : اسف . . الاستاذ النديم لازم يتحط فى سجن يليق بيه .

و . الحكمدار : على كل حال ما تحملش هم يا حضرة رئيس النيابة أنا  
عندى أوضتين التوبتجية حافضى واحدة منهم عشان تكون سجن  
للمتهم .

قاسم : يكون فيها سرير

و . الحكمدار : حاضر .

قاسم : ونور .

و . الحكمدار : ونور .

قاسم : ويصرح له بالكتب والجرايد والمجلات .

الحكمدار : ده كثير يا سيادة رئيس النيابة .

قاسم : لا مش كثير يا سيادة الحكمدار ده القانون .

الحكمدار يشير بيده غير راضى

وكيل الحكمدار : عموما اطمئن سيادتك حننك تعليماتك بالنسبة للسجن  
بالحرف الواحد

قاسم : وأنا مش حاتاخر فى مصر على ما أجى بالعفو

قطع

محمد عبده وسعد زغلول وقاسم أمين

محمد : التديم وقع فى ايدين البوليس ؟

قاسم : الخيانة سلمته لايدى أعدائه

سعد : الخيانة دايمًا ورائنا . . حتى عرايى ما هزمتوش غير الخيانة

قاسم : المهم دلوقت مش البكا . . المهم حنعمل ايه عشان نخلصه من الموقف ده ؟

محمد : أنا حاخلى الصحف الوطنية كلها تكتب وتطالب بالافراج عنه ومن المؤكد ان رأى العام حيكون له تأثير فى الموضوع ده .

سعد : وأنا حاخلى نازلى تكلم كرومر والخدويى وتطلب له العفو .

قاسم : وأنا حاروح لمصطفى باشا فهمى رئيس النظار . . هى صحيح مهمة صعبة . . لكن لايد منها

قطع

نازلى وسعد

نازلى : التديم يا سعد ؟ عايزنى اتوسط للتديم ؟

سعد : ليه ؟

نازلى : لان التديم ده مهيج

سعد : مهيج ضد مين ؟ ضد الانجليز اللى احتلوا بلدنا ؟ بالمنطق ده يبقى

لازم الانجليز يقبضوا على أنا كمان . . مش كنت فى يوم من الأيام

بأقوم بأعمال فدائية ضدهم ؟

نازلى : سعد . . أنت عصبى ليه كده ؟ ارجوك افهمنى . . أنا اتكلمت

عشان الشيخ محمد عبده لانه معتدل لكن التديم . .

سعد : ماله التديم ؟ حرض الناس على قتال الانجليز ؟ ما هو محمد عبده

كمان حرضهم ؟ ؟ انتم فاهمين الوطن ده ايه ؟ لعبة ؟ نسيب الغرب

يحتلوه ونقف نتفرج عشان ما نزعلهمش متنا ؟  
 نازلى : من فضلك يا سعد أنا حرة فى آرائى ما تحاولش تفرض رأيك على  
 سعد : أنا مش محتاج أفرض رأيى عليكى أنا أعرف اتصرف لوحدى .  
 ينصرف عصيبا تناديه  
 نازلى : سعد . . سعد

قطع

مشهد / ٣٢ مكتب رئيس الوزراء نهار / داخلى

يبدأ المشهد بقبضة مصطفى فهمى تضرب المكتب محتجا مع صوته نرى أن المتحدث هو  
 مصطفى فهمى والمخاطب هو قاسم  
 مصطفى : أنت بتقول إيه يا أفندى . أنا مصطفى فهمى أعفى عن عبد الله  
 النديم ؟

قاسم يبرود

قاسم : ليه لأ ؟  
 مصطفى : لولا انك فى منزلة ابنى كنت اتصرفت معاك تصرف ما يخطرش  
 على بالك .

قاسم : رغم ثورتك يا باشا أنا مصر أناقش معاك الموضوع بهدوء  
 مصطفى : وأنا غير مستعد للمناقشة

قاسم : بص يا باشا عبد الله النديم ده بطل بمزاجنا أو غصب عتنا تاريخ مصر  
 حايكتب عنه . . ليه تخلى نفسك على صفحات التاريخ فى صورة  
 الشرير الى وضع نهاية لحياة بطل

مصطفى : تاريخ ؟ تاريخ مين يا أفندى ؟ تاريخ الفلاحين .  
 قاسم : حندخله قصب عتنا يا باشا لاتنا عشنا على أرضها وأكلنا من خيرها  
 واتعلمنا فى مدارسها واخذنا أكبر المناصب فى حكومتها .  
 مصطفى : بسم الله ما شاء الله دى أفكار الجيل الجديد من الأتراك .  
 للأسف . . أمثالك هم اللى حيزيعوا هبة الأتراك فى مصر .  
 قاسم : هبة الأتراك حتضيع بالتكبر والتعالى و التعاون مع أعداء البلاد

ضدنا .

مصطفى بحسم قاطع

مصطفى : قاسم .. كفاية كده .. المناقشة انتهت .

قاسم : خلاص يا باشا أنا خارج لكن لعلم سعادتك أنا مش ح أسكت غير

لما تفرج عن النديم .. عن اذنك .

قاسم يخرج في عصبية

مصطفى : الواد اتجنن .. أكيد اتجنن .

قطع

---

مشهد / ٣٣      عمر بقصر الدوبارة (مقر اللورد كرومر)      نهار / داخل

سعد يسير مع أحد الموظفين الانجليز

الموظف : اللورد كرومر حيقابلك حالا .. اتفضل .

سعد : شكرا .

بلنت قادم من الاتجاه الاخر ، يقف أمام سعد

بلنت : مستر سعد زغلول .. صح ؟

سعد : صح

بلنت : أنا بلنت صديق شيخ محمد عبده

سعد : عارفك كويس يا مستر بلنت

بلنت : هايز اى مساعدة ؟

سعد : أنا جاى أقابل اللورد كرومر عشان اطلب الافراج عن عبد الله

النديم .

بلنت : أنا اجى معاك .. اتفضل .. أنا أعرف نديم كويس ..

اتفضل

يسيران

قطع

بلنت وسعد يجلسان أمام كرومر الذى يجلس على مكتبه

اللورد : Oh, Nadeem? Impossible. He's our enemy

سعد : حتى لو كان عدوكم يكفيه تسع سنين من الهرب والخوف .

بلنت : جناب لورد . التديم كان يبدافع عن بلده . . لو فيه حد هاجم انجلترا

هل أنت شخصيا حثقف ساكت ؟

اللورد : بلنت من فضلك احتفظ برأيك لنفسك

بلنت : دى مش ديمقراطية انجليزية

اللورد : ديمقراطية انجليزية هناك فى انجلترا

سعد : جناب اللورد من فضلك أنا طالب مساعدتك وطمعان منك فى وعد

بالمساعدة . . يا ترى حتساعدنى ولا لا ؟

لا يرد مباشرة يفكر يمسك بفتاحة الخطابات يضرب بعرضها على يده يستدير لسعد

اللورد : قل لى يا سعد افتدى لو كنت مكانى كنت تعمل ايه ؟

سعد : كنت أعفى عن التديم

اللورد : ببساطة كده ؟

سعد : انت بتداوى جرح غويط يا جناب اللورد والمراهم بطبيعتها حنينة .

اللورد : مدعش سعد . . تعبير مدعش . . مرهم Ok. Look Saad أنا

حافكر اذا أعفى عن التديم يبقى أنا كلمت الخديوى . واذا عوقب

يبقى أنا كلمته وهو ما وافقش

سعد يضحك ضحكة صفراء ساخرة ويقف

سعد : شكرا يا جناب اللورد الرسالة وصلت

يسلم وينصرف

قطع

جلنار نازلة من السلم بينما قاسم ينتظر في البهو  
تسلم مرحبة

جلنار : قاسم اخويا ؟ اول مرة تجيى من يوم ما سكنت هنا

قاسم : جلنار . . انا عايز منك خدمة

جلنار : خدمة ؟ أنت تؤمرنى

قاسم : أنت مش تعرفى الأميرات بتوع القصر ؟

جلنار : أعرف عدد كبير منهم

قاسم : انا عايزك تروحي لهم وتطللى منهم يكلموا الخديوى عشان يعفى  
عن عبد الله النديم

جلنار : النديم ده اللى كان مع عرايى ؟

قاسم : ايوه انتى عارفة ان فيه عدد كبير منهم كانوا متعاطفين مع عرايى  
وأكيد حيمطفوا على النديم .

جلنار : من عيني يا اخويا من الصبح حاكون فى عابدين وحافوت على  
الأميرات واحدة واحدة اللى أعرفهم واللى ما أعرفهمش

قاسم : أصيلة يا جلنار . . أصيلة

قطع

مصطفى فهمى يقبل يد توفيق منحنيا وحين يعتدل يقول له

مصطفى : تؤمرنى يا أفندينا

توفيق : ايه الحكاية ؟ مصر كلها ما لهاش سيرة غير النديم ومجلس النظار  
واقف يتفرج

مصطفى : لا يا ولى النعم النديم مقبوض عليه وحيثحاكم بالقانون .

يتمتم وكأنه يخاطب نفسه

توفيق : لأ . . مش عايز محاكمة أنا حاسس انى حاموت قريب ومش عايز



أشيل ذنبه هو كمان  
مصطفى : طب نتصرف ازاي يا افتدينا ؟  
توفيق : اعفى عنه بأمر من مجلس النظار  
مصطفى : ونسيه بهيج الناس تاني ضد الاتجليز ؟  
توفيق : خلاص اعفى عنه على أن يفادر البلاد بس اصرف له اعانة كبيرة  
له مية وخمسين جنيه يستعين بيهم على الغربة  
مصطفى : اسمح لى سعادتك أنا ما اقدرش اخذ قرارات زى ده تخص  
مجرم زى عبد الله النديم  
توفيق : يتخالف أوامرى ؟  
مصطفى : العفو يا ولى النعم لكن اقصد اقول لسعادتك انى مش حاقد  
احضر الجلسة دى حاخلى عبد الرحمن باشا رشدى يراس الجلسة  
دى وحاقول له القرارات اللى ياخذها  
توفيق : موافق

قطع

---

مشهد / ٣٧ أمام زنزانة النديم نهار / داخلى

يبدأ المشهد بفتح باب الزنزانة وخروج النديم ليجد فى انتظاره قاسم أمين ووكيل  
الحكمदार

قاسم : حمد الله على السلامة يا استاذ

و . الحكمदार : مبروك العفو عنك

النديم : عفوا عنى ؟ كنت متوقع غير كده

قاسم : هو الحقيقة مش عفوا تام . .

النديم : يعنى ايه ؟

قاسم : القرار هو ابعادك عن مصر للشام .

يضحك بمرارة

النديم : يعنى يرضه اعدام . . الله يسامحهم

و . الحكمदार : فى الظروف الحالية ماكانش ممكن نوصل لنتيجة أحسن

من كده .

النديم : رغم كل شيء لازم اسلم بالأمر الواقع . . امتى الرحيل ؟  
و . الحكمدار : فوراً .

النديم لقاسم

النديم : سلم على الشيخ محمد عبده . . وعلى سعد زغلول . . وعلى كل  
الحباب والصحاب . . سلم لى عليهم وقل لهم مصر أمانة فى  
رقيبتكم . . مصر أمانة فى رقيبتكم .  
يحتضنه وتسيل الدموع

قطع

---

شهد / ٣٨      مكتب سعد      ليل / داخل

نازلى تدخل على سعد الذى يقابلها بوجوم

نازلى : سعد . . أنا آسفة . . لازم تعرف انى ست عاطفية وانى أحيانا  
باتصرف بدون تفكير لكن انت عارف ان النديم وعرايى دول هم  
اللى جابوا الاحتلال .

سعد : السبب الأكيد فى الاحتلال هو الخيانة وعموما ده مش موضوعنا  
دلوقت بيتهيالى ان فيه سبب تانى لتصرفك

نازلى : سبب ايه ؟ ؟

سعد : مش عايزة تعرضى العلاقة بينك وبين الانجليز لهزة قوية . . كل  
أهوان الانجليز اتصرفوا بنفس طريقتك .

تقاطعه

نازلى : سعد . . أنا مش من أهوان الانجليز . . انت عارف انى باتعاون  
معاهم لصالح مصر .

سعد : على أى حال النديم خلاص غادر البلاد . . الكلام مالوش أى  
فائدة .

نازلى : معقول يكون قلبك أسود كده ؟

سعد : أنا عمر قلبى ما كان أسود وريتنا يعلم أنا باسامح قدايه لكن لما يكون

الأمر بخصوص البلد فالأمر يختلف .

نازلى : يعنى برضه زعلان ؟

سعد : لا . . لا زعلان ولا راضى . . ولا فى نيتى انى أقطع علاقتى

بيكى . . أنا رغم كل شىء وكيلك وأحد رواد صالونك

نازلى : بس ؟

سعد : أظن كده كفاية .

تنظر إليه بغیظ ثم تنصرف مندفعة غاضبة . بينما سعد يقف جامدا

قطع

---

مشهد / ٣٩ مكتب رئيس النظار ليل / داخل

ياور الخديو يدخل على مصطفى فهمى متزعجا

الياور : سعادة الباشا . . الحق أفندينا

مصطفى : تعب ثانى ؟

الياور : أشد التعب وطالبك فورا

مصطفى : أنا جاي حالا

قطع

---

مشهد / ٤٠ سلم بقصر عابدين ليل / داخل

مصطفى باشا والياوران يصعدان قفرا

قطع

---

مشهد / ٤١ عمر أمام غرفة نوم الخديو ليل / داخل

الياوران والخدم ورجال الدولة يقفون حزانى . مصطفى فهمى يأتى ووراء الياور . يصل

للباب الا أن كبير الياوران يقول له  
 كبير الياوران : خلاص يا باشا . . البقية فى حياتك  
 مصطفى : انا لله وانا اليه راجعون  
 مصطفى يصيبه الحزن

قطع

---

مشهد / ٤٢ سور قصر عابدين ليل / خارجى

الاعلام منكسة مع موسيقى حزينة

قطع

---

مشهد / ٤٣ داخل القلعة نهار / خارجى

الشمس تتألق فى السماء . . بالونات ملونة فى الفضاء . أحد المدافع يطلق الطلقات  
 اعلانا بوصول الخديوى الجديد . . المدفع عليه زينة

قطع

---

مشهد / ٤٤ ساحة بقصر عابدين نهار / خارجى

الخديو عباس حلمى (١٨ سنة) يطل من شرفة فى أعلى القصر على الجيش المصطف  
 لتحيته مع أصوات هتافات

صوت : عاش الخديو عباس حلمى

الجميع : عاش الخديو عباس حلمى

صوت : عاش الخديو عباس حلمى

الجميع : عاش الخديو عباس حلمى

يرتفع علم مصر على صوت ترومبيت

عباس حلمى يحيى العلم  
كلوز على عباس حلمى وهو يؤدى التحية  
عباس : تحيا مصر

قطع

---

نهاية الحلقة الرابعة عشر

## الحلقة رقم (١٥)

---

مشهد / ١ شارع في طنطا نهار / خارجي

الناس على الصغين يتفرجون على فرقة سلامة حجازي التي تسير بثياب ألف ليلة في الشارع وأمامها عازفو الموسيقى  
أصوات : الشيخ سلامة حجازي . . ملك الطرب  
جاي يشخص رواية في طنطا بمناسبة مولد السيد  
: شيء الله يا سيد  
: متور يا شيخ سلامة  
الشيخ سلامة يحيى الناس بيديه

قطع

---

مشهد / ٢ مكتب مدير الغربية نهار / داخلي

سلامة حجازي يدخل على المدير بثيابه المسرحية فينهض المدير مرحبا  
المدير : اهلا اهلا بالشيخ سلامة حجازي . . نورت طنطا  
حجازي : متورة بيك يا سعادة الباشا  
المدير يشير لمقعد  
المدير : اتفضل  
حجازي : لا يا باشا مش حاعطلك أنا جاي بس اعزم سعادتك وصحبتك  
عشان تشرفوني الليلة وتفرجوا على الرواية اللي باقدمها  
يعطيه مجموعة تذاكر  
حجازي : اتفضل سعادتك  
المدير : شكرا يا شيخ سلامة . . ان شاء الله حنكون عندك في الميعاد تمام

قطع

المأذنة مزينة بالأنوار والزينات مع صوت موسيقى المولد  
قطع

باعة الحمص والحلوى والطراوير والحواة والمراجيح . لافتات الملاهي التي تضم  
السيرك والغناء وبعض الألعاب لجذب الجمهور . إلى جانب الصوفية بالبيارق . على  
الحوائط ويعرض الطريق لافتات التهنئة بالمولد . الحاج السمودي يهنئ أهالي الغربية  
بمولد السيد البدوي . حلوى الغريباوي تهني مديرية الغربية بالمولد . أهلا يزوار البدوي  
مرحبا بضيوف الله . مدير الغربية والحكمدار ووكيل الحكمدار وكبار المسؤولين وقاسم  
أمين على الخيول يتفقدون المولد . والجنود يوسعون لهم . على أحد السراقات صورة  
لسلامة حجازي والاعلان يقول : سلامة حجازي مطرب الملوك في رواية : أجمل  
الأغنيات ١٠ قروش . يتوقف الركب يتزلون . الجنود يأخذون الخيل يفتحون البوابة  
القماش ليدخل البهوات والباشا . . ضابط للأهالي  
ضابط : وسع يا راجل أنت وهو . . وسعوا السعادة الباشا . . وضيوفه  
اتفضل يا باشا . . اتفضلوا يا بهوات

يدخلون

قطع

المدير والحكمدار ووكيله وقاسم والآخرين يجلسون في الصف الأول . الفرقة تعزف  
يصعد سلامة حجازي على المسرح . الجمهور يهلل . . بشير اليهم فيصمتون  
حجازي : تبدأ الليلة بالصلاة على النبي وتحية جمهور السيد البدوي اللي

شرفنى بالحضور . . والباشا مدير الغريبة وصحبته اللى نوروا  
ليلتنا . . لكن قبل ما أقدم لكم روايتى اسمحوالى أقدم لكم مطربة  
من الغريبة حيكون لها شأن عظيم فى الغنا . . اسمحوالى أقدم لكم  
المطربة وسيلة

تدخل وسيلة الجمهور يهلل يصفر . حجازى يسير اليها يأخذ بيدها حتى تقف فى منتصف  
المسرح يشير للبطانة فتدخل وتبدأ الغناء الأغنية تخاطب الخديوى بشكل غير مباشر  
باعتباره محبا تخاطبه بأفندينا وتقول له انه يملك القلب وله أن يأمر وعلى المحب أن يطيع  
وتشير للعوازل الانجليز وانهم لا مكان لهم . أثناء الغناء ترصد الكاميرا رد فعل قاسم أمين  
والجمهور الذى فهم الرسالة وراح يبتسم . المدير والحكمدار قلقان

المدير : لو الانجليز سمعوا الاغنية دى ممكن تتشال فيها أنا وأنت

الحكمدار : ربنا يستر يا باشا

تنتهى الاغنية الناس تصيح وتقذف بطرايشها

أصوات : الله . . ربنا يكرمك يا شيخ سلامة . . أحسنت يا ست الكل

الغريبة أم الفن طول عمرها

المدير يهمس للحكمدار وهو يقف للاتصراف وقاسم يسمع

المدير : البنت دى ما تغنيش هنا تانى

الحكمدار : أمرك يا باشا

وسيلة تحى الجمهور تلتقى عيناها بعينى قاسم تحيه . تدخل وسط التصفيق

قطع

---

مشهد / ٦ صالة استراحة قاسم بالغريبة ليل / داخلى

قاسم يخلع جاكته وطربوشه الباب يدق

قاسم : مين ؟

صوت وكيل الحكمدار هامسا

و . الحكمدار : افتح يا قاسم افندى

يفتح

قاسم : محمد افندى فريد وكيل الحكمدارية ؟ اهلا بيك مش عادتك

تشرفى بالزيارة . . خير ؟



و . الحكمدار : البنت المغنية دى حسنتى بالخجل من نفسى تخيل  
 مطربة لا تعلمت ولا دخلت مدارس ويتقول ان احنا لازم نقف  
 جنب الخديوى الجديد ونطلع الانجليز من بيتنا ؟  
 قاسم : عارف يا محمد افندى ايه معنى ده ؟ معناه ان الناس زهقت من  
 السيطرة الانجليزية الكاتمة على نفسنا بقى لها عشر سنين . وأن  
 الناس نفسها ان الخديوى ده يبقى الزعيم اللى يلتفوا حواليه عشان  
 يتحرروا من الاحتلال .

و . الحكمدار : هل الخديوى عباس عارف الكلام ده ؟  
 قاسم : حتى لو مش عارفه لازم يعرفه  
 و . الحكمدار : وحيفه ازاى ؟  
 قاسم : مافيش غير راجل واحد يقدر يقوله له  
 و . الحكمدار : ويطلع مين الراجل ده ؟  
 قطع

---

مشهد / ٧ صالة شقة محمد عبده بهار / داخلى

محمد وقاسم  
 محمد : والله يا قاسم معاك حق احنا لازم نسبق ونلتف حوالين الخديوى  
 قبل ما يسبق عملاء الانجليز ويلتفوا حواليه  
 قاسم : المهم مش الكلام يا مولانا المهم اتنا نوصل له الرسالة ونكون جوه  
 الدائرة فعلا  
 محمد : أنا حاوصل له الرسالة دى  
 قطع

---

مشهد / ٨ قاعة العرش بهار / داخلى

الخديوى عباس ومحمد عبده

الخديوى : أنا موافق على كل كلمة قلتها يا شيخ محمد . . صحيح أنا صغير فى السن لكن أنا عارف حقوقى وواجباتى كويس وارقض انى أكون جواناتى فى ايد الانجليز زى ما كان والدى محمد : ده كلام عظيم وأنا سعيد انى باسمعه منك .  
الخديوى : المهم . . قل لى الكلام ده ازاي نحوله لفعل ؟  
محمد : تلم حواليك المخلصين وتنزل للشعب وتهتم بالصحافة لانها هى اللى حتوصل صوتك للناس وتدافع عن افكارك قصاد الصحافة الموالية للانجليز .

عباس : مين الصحفى اللى ممكن اعتمد عليه يا شيخ محمد ؟  
محمد : للاسف مافيش غير الشيخ على يوسف صاحب المؤيد عباس : كويس نعتبره هو البداية عندى لك سؤال تانى : هل ممكن تساعدنى فى جمع بعض الشباب المتعلمين الفيورين على وطنهم بحيث أشاورهم أكلفهم بأعمال آخذ منهم أفكار عشان اهرب من محاولات الانجليز بأنهم يحاوطونى بشباب وبنات من عندهم ؟

محمد : الشباب موجودين  
الخديوى : طب مستنى ايه ؟ الحقنى بيهم فورا  
قطع

---

ليل / داخل

عمر بقصر عابدين

مشهد / ٩

يسير سعد وقاسم وفتحى وراء كبير الياوران حتى يصلوا إلى قاعة العرش خلال السير نلاحظ انهم يشعرون بالرغبة ينظرون حولهم لابهة المبنى والاعمدة والثريات عندما يصلون لقاعة كبير الياوران يشير لهم الياور : اتفضلوا يا افندية  
يدخلون

قطع

الخديو عباس يضع يد على قاسم وأخرى على سعد وفتحى يسير بجواره وهم يسرون بعيدا عن العرش والود واضح من الخديوى الذى يقول

عباس : قولوا لى بقى باعتباركم من الشباب الذى تتلمذوا على ايدين

الافغانى ومحمد عبده ايه رأيكم فى التعاون معايا ؟

قاسم : يا مولاي احنا معاك ورهن اشارتك . . لاتنا نعرف معنى الحرية

سعد : عار على كل مصرى انه يستسلم لحكم الانجليز

عباس : وانت يا فتحى . . ما جاوبتش على سؤالى

فتحى : الناس يا ولى النعم محتاجة بطل يخلصها من الاحتلال وانا زى زى

كل الناس باحلم تكون انت البطل ده

يجلسون

عباس : طيب . . عشان كلامنا يبقى له ثمرة عايز كل واحد منكم يقدم لى

فكرة

ينظر لسعد

عباس : سعد

سعد : اتزل لف على المدارس العليا والمدارس الثانوية الشباب دول اكتر

ناس محتاجين لقدوة لزعيم أو قيمة يؤمنوا بيها ويضحوا بالروح

عشاتها

لفتحى

عباس : فتحى

فتحى : اعمل اى تصرف يقول للناس انك ضد الانجليز لازم تشعل نار

الحلم بين الناس بعد الانجليز ما حاولوا سنين يطفوها

يشير لقاسم

عباس : قاسم

قاسم : اعف عن التديم يا افتدينا

عباس : اشمعنى التديم

قاسم : احنا كلنا يا مولاي ناس بتوع قلم وورقة ومكاتب . . التديم هو

الوحيد الذى مارس العمل الجماهيرى . . يعرف يخطف فيهيح

المشاعر أو يعمل مجلّة يلهب بيها النفوس وماحدث في مصر  
يعرف بعمل الحكاية ده زيه اذا كنت عاوز تصحي الناس خلى  
النديم يولع الشرارة

يمسك بكتفه

عباس : معقول .. نخليه يولع الشرارة .. وتبقى هي دى البداية  
قطع

---

مشهد / ١١ رصيف قطار نهار / خارجى

بائع صحف ينادى .

بائع : العفو عن النديم العفو عن النديم .. اقرا يا افندم آخر خبر اقرا العفو  
عن النديم . اقرا يا افندم اخر خبر .

قاسم يطل برأسه من نافذة القطار .

قاسم : ادينى المؤيد يا عم

يعطيه المؤيد ويأخذ الثمن ويواصل الصباح

بائع : اقرا المؤيد .. اقرا الأهرام .. العفو عن النديم

قطع

---

مشهد / ١٢ ديوان القطار نهار / داخل

قاسم ينظر للماتشيت : الخديوى عباس يصدر قرارا بالعفو عن عبد الله النديم . يتسم

قاسم : يظهر ان الخديوى ده حيطلع فارس بجد

تقف المطربة وسيلة على الباب باحثة عن مقعد خال تجده تدخل

وسيلة : كويس .. كرسى فاضى ايه عواف يا افندى

ينظر اليها ويكتشف كل منهما الآخر .. يتمتم

قاسم : وسيلة ؟

وسيلة : حضرة وكيل النيابة ؟ ازيك يا بيه ؟

قاسم : ازيك يا وسيلة .. ايه .. كنتى بتعملى ايه فى مصر ؟  
وسيلة : الشيخ سلامة حجازى ربنا يكرمه قال لى لازم تيجى مصر . مصر  
أم الطرب والمغنى جيت معاه .

قاسم : عال عال .. وراجعة طنطا تعملى ايه ؟  
وسيلة : حاجيب حاجتى واشوف رجالتى اللى عايز ييجى معايا مصر اهلا  
بيه واللى مش عايز اراضيه اشتغلوا معايا العمر كله ما يصحش  
اصحابهم فى الوحشة والحلوة لأ

قاسم : أصيلة يا وسيلة ..  
وسيلة : ما قتلش يا بيه .. عجبتك اغنيتى الجديدة ؟  
قاسم : جدا .. انتى متعلمة يا وسيلة ؟  
وسيلة : ياريت

قاسم : آمال ازاي خطر فى بالك تعملى الاغنية دى ؟  
وسيلة : يا بيه احنا مزروعين بين الناس وعارفين اللى جواهم .  
قاسم : عارفة يا وسيلة انتى لو اتعلمتى حتبقى كويسة قوى  
وسيلة : الشيخ سلامة الله يكرمه قال لى حيجيب لى حد يعلمنى القرابة  
والكتابة لما اقعد فى مصر

قاسم : عظيم

فترة صمت

وسيلة : عايزة اقول لك حاجة يا بيه بس ما تضحكش على  
قاسم : قولى يا وسيلة  
وسيلة : من أول ما شوفتك فى بنى سويف وانا حاسة ان فيه حاجة بتشدنى  
ليك .. مش عارفة اسميها ايه الحاجة دى .. لكن والله العظيم ده  
اللى انا حساه

قاسم : خلاص يا وسيلة مش مهم تسمى احساسك المهم انك بتحسبه  
وسيلة : أصل أنا فكرت فى الحكاية دى لقيتها غريبة وانا فىن وانت فىن ..  
وانا ايه وانت ايه ؟

قاسم : شش .. متكملش .. انتى فنانة والفن ده بيرفع أصحابه ويخلي  
راسهم براس أكبر كبير ..

وسيلة : كتر خيرك يا بيه .. أول واحد من الافندية المتعلمين يقول لى

الكلام ده .

قطع

مشهد / ١٣ طريق زراعى نهار / داخلى

القطار يسير

قطع

مشهد / ١٤ مكتب اللورد كرومر ليل / داخلى

كرومر غاضب يخاطب مصطفى فهمى

اللورد : ايه اللى بيحصل ده يا باشا ؟ هى حصلت ؟ يعنى عن التنديم ؟  
مصطفى : انا قلت لسعادتك من الاول انه شايف نفسه قلت لى ما تديهوش  
أكبر من حجمه

اللورد : وما زال ده رأى . . عباس ده حته عيل لو خطبته تحت درسى افرمه  
مصطفى : Please excellency اهذى شوية . انا شايف ان عباس مش هين  
للدرجة دى . . اللى بيتصل بمحمد عبده ويعنى عن التنديم ويقرب  
الشيخ على يوسف عشان يصوره فى جرناله على انه المخلص  
ما يصحش نتعامل معاه على انه حته عيل .  
اللورد : No انا مازلت مصر على انه عيل وعند اللزوم حاعرف اعلمه درس  
ما ينساهوش .

مصطفى : اللى تشوفه سعادتك لكن انا حذرت .

قطع

مشهد / ١٥ صالة مكتب سعد ليل / داخلى

نازلى تسير وعلى وجهها علامات العزم . تدق الباب ثم تفتح وتدخل بينما الخادم يسرع

نحوها لكنها تدخل دون ان تعطيه فرصة .

### قطع

ليل / داخلي

مكتب سعد

مشهد / ١٦

سعد يقف مندهشا بينما نازلي تدخل عليه

سعد : دي غارة مفاجئة ؟

نازلي : تقريبا

سعد : طب ليه ؟

نازلي : تقدر تقول لي ماعدتش بتيجي ليه ؟ حتى الأوراق اللي عاوز

تمضيها مني بتعتهالي مع حد . . ممكن أفهم ليه ؟

سعد : مولاني . .

نازلي : بلاش الكلمة المستفزة دي . . اسمي نازلي .

سعد : بيتيالي بعد اتفاق آرائنا احنا الاثنين على ان جوازنا مستحيل لازم

نتكلم في حدود الرسميات

نازلي : كلامي عن استحالة الجواز ولا لسه زعلان عشان عدم تدخل في

موضوع الافراج عن النديم ؟

سعد : احنا قفلنا الصفحة دي خلاص .

نازلي : طب ليه ما بتجيش الصالون ؟

سعد : بصراحة حسيت انه بعد رحيل الخديوي توفيق لازم الواحد يقف

شوية مع نفسه ويفكر في المستقبل .

نازلي : تقصد ايه

سعد : الفترة اللي عدت كان توفيق والانجليز حاجة واحدة عشان كده

الناس اختصرت الطريق وراحوا الكرومر مباشرة لكن في ظل عباس

واضح ان فيه أمور بتتغير

نازلي : تفتكر ان عباس ممكن يقف قصاد الانجليز ؟

سعد : لو قدر يجمع الناس حواليه حيقدر يقف قصاد الانجليز

نازلي : سعد ما تحلمش

سعد : من حقى احلم  
نازلى : احلم على كيفك بس انا بانبهك لان الحلم ساعات بيضر اكثر  
ما بيثقع ولازم تعرف ان الانجليز هم القوة الوحيدة الموجودة فى  
مصر دلوقت .

سعد : كلام مش غريب عليكى

نازلى : تقصد ايه ؟

سعد : لا ابدا ما اقصدش حاجة لكن ارجوكى افكرى دايمًا ان القوة  
الحقيقية فى مصر مش الانجليز ولا حتى الخديو لكن المصريين  
نفسهم .

نازلى : انت بقيت فظيع يا سعد

سعد : عارف

نازلى : انا غلطت انى جيت لك تانى

تخرج وتغلق الباب وراءها . يتسم

قطع

ليل / داخل

غرفة نوم نازلى

مشهد / ١٧

نازلى جالسة على سريرها والدادة تغطيها . . ثم تنحنى

الدادة : خدعة ثانية سمو البرنيس ؟

نازلى : من فضلك يا دادة اقملى شوية عايزة حد اكلمه

الدادة تجلس

الدادة : مالك نازلى هاتم ؟ مشاكل فى السياسة ؟ انجليز ؟ خديوى ؟

نازلى : كل ده يهون يا دادة . . أنا . . أنا بعد ما قربت من سعد بقيت

بأتخبط مش عارفة احافظ عليه .

الدادة : أنا فاكدة اننا لما كنا فى اوروا قلنى انك خلاص حتقطعى العلاقة

معاه

نازلى : كنت باكذب على نفسي لكن لما رجعت مصر اكتشفت انى مش

قادرة أبعد عنه



الدادة : الست لما تكون ناوية تحتفظ برأجل مافيش حاجة تقدر تحوشها .  
نازلى : السياسة تحوشها .

الدادة : سيبى السياسة وحافظى على الرجل اللى بتحبيه

نازلى : صعب يا دادة . . صعب

الدادة : ما دام صعب يبقى اتحملى وما تشكيش تصبى على خير

تنجه للخروج

نازلى : استنى ارجوكى ما تسيينيش

الدادة بحزم

الدادة : فيه حاجات ما تحتاجش كلام مع الناس تحتاج تفكير الواحد مع

نفسه . . فكرى لوحدك سمو البرنيس . .

تنحنى

الدادة : تصبى على خير

تخرج الاميرة تقذف بأقرب شىء زجاجى الى الأرض . . وتقول بثورة

نازلى : أنا غبية . . غبية ماقدوتش احافظ على الرجل الوحيد اللى حبيته

بجد غبية .

قطع

نهار / داخل

مكتب رئيس نيابة طنطا

مشهد / ١٨

وكيل حكمدار الغربية يدخل على قاسم

و . الحكمدار : سيادة رئيس النيابة أنا جايب لك قضية مدهشة

قاسم : قضية ايه يا محمد افندى ؟

و . الحكمدار : اطلب من العسكرى اللى على الباب يدخل لك الناس اللى

سيبتهم بره .

قاسم ينادى

قاسم : يا عسكرى

يدخل العسكرى يحى

العسكرى : تمام يا افندم

قاسم : هات لى الناس اللى محمد افندى سابهم بره

يؤدى التحية

العسكرى : تمام يا افندم

يفتح الباب ويقول لمن بالخارج

العسكرى : ادخل انت وهو وهى كلموا البيه رئيس النيابة . . خشوا

يدخل شاب ١٨ سنة وآخران ٣٥ سنة افندية من الطبقة المتوسطة وبنت ٢٥ سنة تغطى

وجهها وامرأة فى حوالى الأربعين وأخرى ٣٥ سنة

قاسم : مين فيكم صاحب الشكوى ؟

افندى ١ : أنا يا بيه

قاسم : ايه شكواك ؟

يشير الى افندى ٢

افندى ١ : الافندى ده ضحك علينا غشنا

افندى ٢ : ما حصلش يا بيه . . الراجل ده كذاب

قاسم لافندى ٢

قاسم : اسكت خالص يا راجل انت ضحك عليك ازاي ؟

يشير للمرأة الأربعينية

افندى ١ : الست الخاطبة دى يا بيه قالت لنا على عروسة لابنى سيد

يشير للشاب الواقف

قاسم : كويس

افندى ١ : العروسة دى يا ست بنت مين ؟ قالت بنت عبد السميع افندى

كاتب الصحة اللى هو ده يا بيه

يشير للافندى ٢

قاسم : كويس . . وبعدين ؟

يشير لزوجته ولسيد

افندى ١ : رحنا يا بيه نتفرج عليها انا والست وابنى سيد جابوا لنا بنت فلقة

قمر ولا بنات الخواجات

قاسم : هيه

افندى ١ : جيتا يا بيه يوم الفرح بعد ما كتبنا الكتاب أم العريس دخلت مع

الستات تحضر الحفلة بصت لقت عروسة تانية وشها يقطع الخميرة

من البيت البنت دى يا بيه

يشير للبنت الصغيرة

قاسم : الله أكبر . .

للبيت

قاسم : اكشفى وشك يا بنت

البيت : عيب يا بيه .

بشخط

قاسم : اكشفى وشك

تكشف وجهها فتبين قبحها الشديد فيقول قاسم للماشطة وأم العريس

قاسم : هى دى العروسة اللى شفتوها ؟

الخاطبة والام : لأ يا بيه .

لأفندى ٢

قاسم : بتغشهم ليه يا راجل أنت ؟

افندى ٢ : ما حصلش يا بيه هى دى العروسة اللى شافوها واللى كتبوا

كتايبها وقسيمة الجواز باسمها وعليها شهادة الشهود

قاسم : واضح انك مزور قرارى .

ينادى العسكرى

قاسم : يا عسكرى

يؤدى النحية

العسكرى : تمام يا افندم

لوكيل الحكمدار

قاسم : هم دول تبع قسم ايه ؟

و . الحكمدار : قسم أول

يكتب ورقة ويعطيها للعسكرى

قاسم : وديهم لوكيل نيابة قسم أول

العسكرى : حاضر يا افندم

للمتهمين وهم يخرجون

العسكرى : قدامى

و . الحكمدار : ايه رأيك بقى ؟

يخرجون . وكيل الحكممدار يضحك

قاسم : رأى ان عدم الاختلاط التام والنقاب اللى بيخلى ما حدث يعرف  
حد يسببوا بلاوى تفكر ان حاجة زى دى ممكن تحصل فى أى  
مجتمع أوروبى مفتوح ؟

و . الحكممدار : أكيد لأ

قاسم : مش عارف امتى المجتمع حيخرج من حالة الفصل بين الجنسين  
والنقاب دول ؟

و . الحكممدار : تفكر ان ده ممكن ؟

قاسم : على الاقل لازم نتوقع انه حيجى يوم فى المستقبل يبقى فيه الكلام  
ده ممكن .

و . الحكممدار : قبل اليوم ده لازم تقوم زوايع من المشايخ والمحافظين  
باعتبار ان عدم الاختلاط والنقاب هم جوهر الاسلام

قاسم : مين اللى قال ان الاسلام ما كانش فيه اختلاط فى أحوال كثير ؟

رفيدة . . أول طيبة فى الاسلام كانت بتعالج الجرحى من غير

اختلاط ؟ السيدة عائشة . . رضى الله عنها ما خرجتش على رأس

للجيش يوم واقعة الجمل . السيدة أم سليم الصحابية الجليلة

رضى الله عنها ماكانتش جنب النبی عليه الصلاة والسلام فى مواقع

عديدة ؟ اللى بيروجوا للفصل التام بين الجنسين والنقاب دول

بيدافعوا عن أوضاعهم المتخلقة باسم الدين .

و . الحكممدار : لكن أنا أعرف أن النقاب شىء جوهرى فى الاسلام .

قاسم : محمد افندى حجاب المرأة فيه خلاقات عديدة بين الفقهاء

وأغلبهم يبيح للمرأة كشف الوجه والكفين والقدمين .

و . الحكممدار : واضح انك مهتم بالموضوع جدا .

قاسم : أنا تلميذ مباشر للامام محمد عبده وجمال الدين الأفغانى .

و . الحكممدار : عشان كده . . وأنا أقول رئيس النيابة ده ايه حكايته . .

أهو دلوقت فهمت .

قطع

حسن يجلس بين يوسف وأم حسن

يوسف : جيت يا فالح ؟

حسن : ايه بابا ؟ بتكلمنى كده ليه ؟ فيه ايه ؟

أم حسن : مانتش عارف فيه ايه ؟ فيه اهلك ساكت على البرنسية اللى معاك

وما خلقتش لحد دلوقت

حسن : وده تاعبك فى ايه يا أمه ؟

يوسف : أبوه تاعبنا .. اسمع يا ابنى .. يا تتجوز واحدة غيرها وتجبب لنا

ولاد نفرح بيهم يا اما مافيش المعونة اللى بتاخدها كل شهر .

حسن : بابا .. أنا باحِب جوليا

يوسف : وانا ما قتللكش طلقها اتجوز عليها

حسن : صعب بابا

يوسف : وقمادك من غير خلقة مش صعب ؟

أم حسن : والنبي ومن نبي النبي ان الخواجاية ده ساحرة لك

حسن : يا امه سحر ايه بس ؟ الخواجات كمان حيسحروا ؟

أم حسن : وما يسحروش ليه ؟

يوسف : خلاص يا أم حسن أنا قلت آخر كلام .. يتجوز اهلا وسهلا

يعصانى لاهو ابنى ولا اعرفه

أم حسن : والعروسة موجودة بنت زى القمر وأصغر من الخواجاية بتاعتك

وعليتها باسم الله ما شاء الله بيخلفوا بالدستة

حسن : دستة ؟ ليه .. حافظ مدرسة ؟

يوسف : وما تفتشش ليه ؟ الخير كثير والحمد لله .

حسن : باقول لك بابا .. سلام عليكم

أم حسن : بس برضه حاروح اخبط لك البنت اللى حاطه عينى عليها

يخرج يوسف معلقا

يوسف : رجالة ايه الخرعة دى ؟

قطع

الناس تتجمع من كل الفئات فلاحين وأقندية ومشايخ .. إلخ . الجنود يشكلون حاجزا بينهم وبين القطار الذي لم يصل . الحكمدار يسير متابعا النظام . قاسم أمين يفتح سلسلة الجنود الحاجزة ويعبر فيراه وكيل الحكمدار الذي تبدو عليه البهجة  
و . الحكمدار : شايف الناس قد ايه منتظرة مرور النديم فى القطار ؟

قاسم : الروح المصرية لسه بخير  
ينظر على الرصيف كأنه يبحث عن شخص معين  
قاسم : آمال مدير المديرية ما جاش ليه ؟  
وكيل الحكمدار يضحك

و . الحكمدار : يبحى ؟ يا قاسم افندى المدير بتاعتنا راجل انجليزى متكرر  
فى ثياب مصرية ويخاف يبحى بعدين الخبر يوصل لاسياده يشيلوه  
ولا حاجة .

قاسم : خسارة .. اذل الحرص أعناق الرجال .  
صوت القطار الناس تهلل

الناس : القطار وصل يا رجاله القطار وصل  
زغاريد تنطلق من الفلاحات الرجال يهتفون بينما القطار يتوقف وعلى باب النديم  
(ملحوظة : النديم منذ هذا المشهد يلبس عمامة خضراء)

افندى : عاشت مصر حرة  
الجميع : عاشت مصر حرة  
شيخ : عاش النديم البطل  
الجميع : عاش النديم البطل  
فلاح : يا عزيز يا عزيز .. كبه تاخذ الانجليز  
مجموعة : يا عزيز يا عزيز .. كبه تاخذ الانجليز  
الحكمدار وجهه يتلون ويجواره وكيله

الحكمدار : بتقولوا ايه الله يخرب بيوتكم ؟  
و . الحكمدار : فوت يا سيادة الحكمدار كلمة وعدت  
قاسم يصل للنديم يسلم عليه  
قاسم : حمد الله على السلامة يا استاذ

التديم : قاسم ؟

التديم يحتضن قاسما . قاسم يركب معه الهاتفات متواصلة والتديم يحيى ووراءه قاسم بينما القطار يتحرك وسط الهاتفات

رجل ١ : عاش التديم

الجميع : عاش التديم

رجل ٢ : عاشت مصر

الجميع : عاشت مصر

القطار يسرع

قطع

---

مشهد / ٢٢ ديوان بالقطار نهار / داخلي

يدخل التديم وقاسم الديوان نجد فى الديوان رجلا مهيبا هو لطيف بك سليم يقوم التديم بتعريف لطيف وقاسم . قاسم يسلم

التديم : لطيف بك سليم واحد من العربيين الاصلاح

قاسم : غنى عن التعريف

التديم : قاسم افندى أمين رئيس النيابة اللى ربنا بعتة لى عشان يرحمنى لما

وقعت فى ايدين البوليس

قاسم : استغفر الله يا استاذنا

يجلسون

لطيف : على فكرة انا متابع أخبارك من بعيد وسعيد بانك لسه محافظ على

نفسك من انك تترمى فى أحضان الانجليز

قاسم : الحمد لله

التديم : وعلى فكرة كمان لطيف بك سليم مصر انه يكون ولى أمرى فى

القاهرة

لطيف : ما تقولش كله يا أستاذ نديم

قاسم : لكن ايه العمة الخضرة دى ؟

التديم : دى شعار أهل البيت النبوى ما تعرفش اتى منسب ؟

قاسم : وايه اللي فكرك بالحكاية دي دلوقت ؟ دروشة ؟  
التديم : مش بالظبط . . لكن ربما لاتي وصلت لحالة من الصفاء النفسى  
خليتني احس بان الواحد لازم يعرف انه لا اله الا الله . . وكل ما  
عدا الله بشر زى زيهم ومهما حاولوا اتهم بضرونى مش حيقدرؤا  
يعملوا حاجة غير اللي ربنا كاتبهالى

قاسم : نسميها تصوف ؟

التديم : ممكن

لطيف : يا عم سميتها استبياع . . التديم بيفلسف طريقته فى الحياة . . انما  
هى مهما فلسفها مالهش غير اسم واحد : استبياع

يضحكون

قاسم : لكن فيه سؤال مهم يا أستاذنا . . هل حترجع زى ما كنت تهاجم  
الانجليز ؟

التديم : مش من أولها يا حضرة رئيس النيابة . . لازم ابدأ هادى وادرس  
وكفاية على فى الاول جلسة أسبوعية مع الشباب الجديد

لطيف : الجلسة حتكون فى بيتى انا ابنى فؤاد طالب فى مدرسة الحقوق  
حاخليه يجيب زمايله اللي يثق فيهم عشان ييقوا جمهورك

التديم : وده كفاية قوى دلوقت .

قطع

نهار / داخل

صالة شقة حسن وجوليا

مشهد / ٢٣

الأم تدخل بعد ان فتح لها حسن تجلس ويجلس أمامها تهمس

أم حسن : مراتك هنا ؟

حسن : لسه ما جاتش

أم حسن : احسن انا اتفقت مع أهل العروسة اتنا نروح بكرة نشوفها

حسن : عروسة ايه ؟ يا امه قلت لك مراتى عاجباتى وباحبها

أم حسن : يعنى ايه ؟ يعنى حتماندنى انا وأبوك ؟

حسن : أبوه حاعاندكم



أم حسن : تخسر أهلك عشان مراتك ؟  
حسن : اسمعى يا أمى أنا مش حاطلق جوليا ومش حاتجوز عليها  
ولو ماسكتوش حاسيب لكم البلد كلها واسافر فرنسا أنا وجوليا  
نشير بكتفها  
أم حسن : اقطع دراعى من هنا اذا ما كانتش البت دى ساحرة لك لكن  
ولو . . اتاح افك سحرها ده حتى لو عاملاه عند ملك الجان .  
تفتح الباب مندفعة لتخرج فتقابل جوليا داخله  
جوليا : اهلا طنط  
أم حسن : لا أهلا ولا سهلا  
تخرج . جوليا لحسن وهى تضع حقيبتها على منضدة  
جوليا : فيه ايه حسن ؟  
حسن : مافيش  
يغلق الباب يسحبها للداخل  
حسن : ياللا بيتنا نحضر الغدا الا انا ميت من الجوع  
قطع

---

مشهد / ٢٤      بهو قصر أمين بك      ليل / داخلى

الام وتفيدة تجلسان فى ثياب صيفية للعشاء وقاسم يدخل عليهما  
قاسم : سلام عليكم  
الأم تقف  
الأم : قاسم ؟ مش ميعاد مجيك  
تفيدة تشخط  
تفيدة : تعال هنا ولد . . انت ولد متعب افتدم . . خلاص . . تفيدة هاتم  
مش تحبك بعد كده . . حب يوك  
يجلس بجوارها باسم  
قاسم : أهون عليكى ؟  
تفيدة : تهون افتدم . . انت سايبنا هنا وحدنا لمين ولد ؟

قاسم : العرق التركي لما يطلع بيقي شديد قوى لكن تعرفى قلبك ابيض  
برضه .. صح ؟

نفيدة : مش لك دعوة بقلبي

للأم

قاسم : ما تقولى حاجة يا ست أم قاسم

الأم : انا كمان زعلانة منك

قاسم : ليه بس ؟

الأم : يا ابني حرام عليك الناس بتخلف الولاد عشان يسعدوهم ليه انت

تاعب قلبنا ؟ لا هايز تاخذنا معاك ولا هايز تتجوز وتجبب لنا اولاد

يملوا علينا البيت ده حرام عليك كده يا ابني

قاسم : لا .. داتتم متفقين على بقى

نفيدة : ايوه متفقين

قاسم : طب باقول ايه ؟ انا جاي من السفر هلكان اجلوا المناقشة دى لوقت

تاني .. انا يادوب اطلع اخد حمام وانام للصبح .. تصبحوا على

خير

يتجه للسلم صاعدا

الأم : عاجبك اللى بيعمله ده ؟

نفيدة : اسمع افندم انا جات لى فكرة تخليه يتجوز غصب عنه

الأم : فكرة ايه ؟

قطع

نهار / داخل

بهو قصر مصطفى باشا فهمى

مشهد / ٢٥

نفيدة والام تسيران بزي الاتراك واليشمك ومعهما زوجة مصطفى باشا ، الثلاث قادمات

من الداخل على مصطفى باشا

الزوجة : اتفضلى نفيدة هانم .. اتفضلى ست أم قاسم هانم

مصطفى باشا واقفا للترحيب . تسلمان

مصطفى : اهلا وسهلا بريحة الحبايب ..

الأم : ازيك يا دولة الباشا

نفيدة : اهلا بك افتدم

مصطفى يشير لزوجته

مصطفى : الهانم بتقول لى انكم جايبين تشتكوا من ابتنا قاسم

نفيدة : تمام افتدم . . انت محل ابوه . . احنا مش قادرين عليه

مصطفى : قولوا لى بيعمل ايه وانا اشد لكم وداته الاتنين

الأم : يا باشا سايبنا لوحدنا لا عايز ياخدنا معاه ولا عايز يتجوز ويملا علينا

البيت .

مصطفى : ابوه صحيح ايه حكاية الولد ده ؟ ده دلوقت داخل على

التلاتين . . مش عاوز يتجوز ليه ؟

الام : اصعل معروف يا باشا كلمة انت . . احنا تعبنا

مصطفى : لا لا لا . . . انا حاشوف شغلى معاه . . هوفين دلوقت ؟ هنا

ولا فى طنطا ؟

الأم : هنا

مصطفى : ابعتوه لى فورا .

قطع

ليل / داخل

يهو قصر لطيف بك

مشهد / ٢٦

يبدأ المشهد بكلوز على النجفة ثم نرى التديم يسير مع لطيف بك بينما القاعة بها حوالى اثنى عشر مقعدا فى الصدارة عن يمين ويسار المقعد ثلاثة مقاعد يجلس عليها ثلاثة شباب متميزون يقدمهم لطيف للتديم .

لطيف : فؤاد . . ابنى

التديم : بسم الله ما شاء الله . . ريتا يخلى

فؤاد : اهلا وسهلا بالاستاذ العظيم

التديم : أهلا

الشاب الثانى (من مواليد ١٨٧٢ = ٢٠ عاما)

لطيف : احمد لطفى السيد من الشباب التابه

النديم : اهلا يا أحمد

لطفي : اهلا يا استاذنا

الشاب الثالث (من مواليد ١٨٧٤ = ١٨ عاما)

لطيف : وده بقى اشهر طالب فى مدرسة الحقوق . . قدم نفسك يا سيدى

مصطفى كامل : مصطفى كامل

النديم : منين فى مصر يا مصطفى ؟

مصطفى كامل : من حى الصليبة

النديم : بتدرس فى الحقوق الخديوية ولا الحقوق الفرنسية ؟

مصطفى كامل : الاتنين

النديم : بسم الله ما شاء الله . . وايه هوايتك يا مصطفى ؟

مصطفى : القراءة وكتابة الشعر

فؤاد : مصطفى يا استاذنا بيلقى الشعر بطريقة تخلى التلاميذ يقطعوا ايديهم

من التسقيف

النديم : جميل

لطيف للنديم

لطيف : نكمل تعارف

تلميذ ١ : اسمحوالى يا أفاضل . . احنا جايين نسمع الشيخ النديم . . أما

التعارف فحيتم بالضرورة استريح يا استاذ وسمعنا كلامك اللى

كلنا شوق اليه

النديم : اول كلامنا يا اولاد : مصر واخره : مصر . . مصر هى المحبوبة

اللى تستحق اننا نقدم لها الروح هدية . . هى ليلى . . وهى عزة . .

وهى لبنى . . واحنا كلنا عشاق وهدفنا . . ان كل الغافلين عنها

يصحوا ويتعلموا الحب وتبقى هى ليلاهم هدفنا . . اننا نقول لهم

ازاى يكون وصل الحبيب وامنى يتحقق رضاه . .

مصطفى كامل : الله يا استاذ هذا الكلام شعر

النديم : نكمل

قطع

مصطفى وقاسم يسيران للكتابة . . يجلس مصطفى

مصطفى : أقعد يا قاسم

قاسم : تحت امرك يا عمي

يجلس قاسم

مصطفى : انت تاعب والدتك ليه يا ابني ؟

قاسم : أنا ؟

مصطفى : امال أنا ؟ الشبان بيتجوزوا وهم لسه تلاميذ واللى قذك عندهم

ولاد فى الابتدائية وانت ايه حكايته ؟

قاسم : ولا حكاية ولا حاجة يا باشا . . كل شيء بأوان

مصطفى : امنى الأوان ؟

قاسم : لما ربنا يأذن .

مصطفى : خلاص . . ربنا أذن

قاسم : يا باشا . . . . .

مصطفى : اسمع يا ولد . . انا مش امك حتناكفى . . انت تسمع الكلام

من غير مناقشة . . أنا طلبت من الهانم مرات عمك انها تشوف لى

مين من ولاد الباشوات والأكابر عندهم بنات ولقيت فيهم واحدة

مناسبة جدا

قاسم : حضرتك حتختارلى ؟

مصطفى : ليه لا ؟ احنا هنا مش فى أوروبا الولاد بيشفوا البنات وكل واحد

يتقى اللى تعجبه . . احنا هنا مجتمع شرقى ماحدش بيشف حد

عشان كده لازم الأهل يساعدوا فى الاختيار

قاسم : يا باشا أنا لى شروط فى البنت اللى حتاجوزها

مصطفى : قل لى شروطك

قاسم : اولاً تكون متعلمة

مصطفى : عظيم العروسة اللى باكلمك عنها متعلمة كان عندها مربية

انجليزية ويتعرف انجليزى زى العربى بالقطب ويمكن احسن . ايه

الشروط التاني ؟

قاسم : ما تكونش طفلة زى العرايس اللي الواحد بيشفوهم  
مصطفى : مش طفلة . . كبيرة وناضجة وتعرف معنى ايه بيت وزوج عندك  
شروط تانى ؟

قاسم يصمت

قاسم : اشوف شكلها

مصطفى : حاضر

يخرج من جيبه أوراقا يبحث فيها يخرج منها ورقة  
مصطفى : ادى عنوان القصر بتاع والدها فى الاسكندرية  
قاسم : اسكندرية ؟

مصطفى : ابوه ابوها أمير البحر التركى أمين توفيق

قاسم صامت

مصطفى : بالمناسبة ده يعرف أبوك كويس ساكت ليه ؟

قاسم : مافيش .

مصطفى : تحب تسافر تشوفها امتى ؟

قاسم : الدنيا ما طارتش يا عمى

مصطفى : لا طارت . . حدد ميعاد دلوقت حالا عشان ابعت تلفراف

لوالدها يستناك اتت والهاتم مرات أبوك

قاسم : يا عمى . .

مصطفى : مفيش عمى حاسافروا امتى

قاسم : نخلى الميعاد يوم الخميس الجاى .

قطع

---

شهد / ٢٨ شاطيء البحر المتوسط نهار / خارجى

قاسم وأمه وتفيدة يركبان مركبة مغلقة تخصص للحريم تسير على البحر ويقودها عربجى  
حسن المظهر . تقف أمام قصر جميل العربجى يلقى جرس العرية عدة مرات . يخرج أمين  
توفيق باشا ويقف على الباب للاستقبال . العربجى ينزل ويفتح باب العرية ينزل قاسم وأمه  
وزوجة أبيه يصعدون السلم . أمين توفيق باشا يصافحهم محييا

أمير البحر : أهلا بك يا قاسم يا ابني . . يا ابن العزيز الغالى

قاسم : أهلا يا عمى

أمير البحر : أهلا يا هوانم . . اتفضلوا

يدخلون

قطع

---

مشهد / ٢٩ غرفة أمير البحر مظلة على الشاطئ نهار / داخل

أمين توفيق يسير مع قاسم نحو النافذة المظلة على البحر  
أمير البحر : البحر ده حياتى يا قاسم افندى . . أنا لفيت الدنيا . . مافيش  
مينا مارحتوش . .

قاسم : وليه اخترت اسكندرية بالذات عشان يكون لك فيها سكن مع ان كل  
عملك ومصالحك فى استابول

أمير البحر : اسكندرية مدينة لها طعم ولها تاريخ ولها سحر . تعرف  
يا قاسم افندى لو كان بايدى كنت خليت اسكندرية مقرى الدائم .

قاسم : والدى الله يرحمه برضه أول ما جه من تركيا سكن فى اسكندرية  
وأول ما بقيت فى سن الدراسة وداتى مدرسة راس التين .

أمير البحر : الله يرحمه كان راجل صحيح .

الباب يدق

أمير البحر : ادخل

تدخل زينب فى ثوب طويل وعلى راسها حجاب

أمير البحر : أهلا يا زينب . . تعالى سلمى

ياخذ منها الصينية ويضعها على أقرب منضدة . يقدمها لقاسم

أمير البحر : بنتى . . زينب

قاسم يسلم

قاسم : أهلا وسهلا يا زينب هانم

تطأطئ رأسها بخجل

زينب : أهلا

يدقق النظر لها تظل ناظرة للأرض

أمير البحر : ما تتكفّيش قوى كده . . قاسم افندى مش غريب

تجرى للخارج والدها يضحك يقدم القهوة لقاسم

أمير البحر : لما رحت اخطب والدتها كانت التقاليد بمنع أن الشاب

يشوف خطيبته . . الدنيا دلوقت اتغيرت كثير .

قاسم : زينب هانم سافرت مع حضرتك أوروبا ؟

أمير البحر : سافرت لكن الهانم والدتها من يوم ما بنيت القصر ده فى

اسكندرية رافضة تروح أى مكان ثانى غيرها .

قاسم : معاها حق

أمير البحر : على فكرة احنا محضرين لكم جناح عشان تبيتوا معانا .

قاسم : لا معلش يا باشا اسمع لنا عشان نلحق نرجع مصر الليلة .

أمير البحر : انتم ما قعدتوش

قاسم : معلش

أمير البحر : خلاص اتغدوا ويعددين امشوا

قاسم : اذا كان على الغدا معلش .

قطع

نهار / داخل

ديوان قطار

مشهد / ٣٠

الأم وتفيدة وقاسم يجلسون فى الديوان . قاسم سارح مع نفسه

قاسم : معقول يا قاسم تتجوز غير سلافا ؟ معقول

تفيدة : سرحان فى ايه ولدنا قاسم ؟

الأم : يا ابنى الحى ابقى من الميت والله لو كانت زميلتك الفرنساوية دى

موجودة لكنت رحت خطبتها لك لكن انت كده متعلق بالمستحيل

قاسم : ارجوك يا أمى خلاص

الأم : يعنى نرد على عمك مصطفى باشا نقول له ايه ؟

قاسم : حافكر وارد عليكم

الأم : تانى حضرك ؟



نفيدة : قاسم حبيبى احنا عملنا لك كل حاجة انت قلت عليها . . كفاية بقى

حبيبى

قاسم : حاضر . . حاضر والله حارد عليكم قوام

نفيدة : حترد علينا ازاي وانت نازل طنطا مش تيجى معانا مصر

قاسم : ان شاء الله حاجى الخميس والجمعة . . مش ح اتأخر

قطع

---

ليل / داخل

قاعة نازلى

مشهد / ٣١

نازلى تقدم كأسا لكرومر . الصالون خال الا من بعض الانجليز

اللورد : سمو البرنيس . . الصالون فاضى ليه ؟ صالونك كان دايمًا

مليان

نازلى : الأمور اتغيرت

اللورد : يعنى ايه ؟

نازلى : الناس حاسه ان الخديوى اتجاهاته غير انجليزية وخايفين ييجوا

لا الخديوى يحسبهم عليكم

اللورد : Oh my god ! Is it possible?

نازلى : دى الحقيقة

اللورد : كل شىء بيعجل المواجهة بينى وبين الولد ده . .

It is necessary to crush his head

نازلى : لحد ما تكسر دماغه لازم نسلم بالأمر الواقع .

اللورد : لازم تنشطى الأيام دى أكثر من قبل كده اهتمى انك تدعى الناس

الى حوالين الخديوى ادعى التديم ومحمد عبده وسعد زغلول

وعلى يوسف اعملى أى شىء عشان تخلبهم ييجوا

نازلى : It is very difficult

اللورد : But you must try.

قطع

تدخل سلافا من باب الغرفة . قاسم عيناه تجحظان وتجلس سلافا فوق السرير

قاسم : سلافا

سلافا : رحت عشان تخطب ؟

قاسم : مش قادر عليهم . . كل الحجج خلصت

سلافا : يعنى خلاص نسيته ؟

قاسم : مستحيل انساكى

سلافا : طب لو اتجوزت حتسانى ؟

قاسم : مافيش شيء فى الدنيا يقدر يخلينى انساكى

سلافا : طب ايه رأيك لو قلت لك انا موافقة انك تتجوز ؟

قاسم : انتى ؟

سلافا : أبوه أنا

قاسم : اخر حاجة كان ممكن اتوقعها

سلافا : المحب صحيح اناى لكن مش ممكن يرضى بعذاب الحبيب .

المهم تفكرنى وتيجى تزورنى

قاسم : ده عهد

سلافا : وترعى وسيلة

قاسم : أوعذك

سلافا : مبروك يا قاسم . . مبروك

تبتعد وهى تلوح له تخرج من الباب . يتنادى عليها . قاسم على السرير نائم . يفتح عينه

ويستيقظ فجأة وهو يتمتم

قاسم : سلافا . . سلافا وبشبارك اناى اتجوز

قطع

قاسم يسير لمكتبه يأتبه أحد الساعة

ساعى : قاسم افندى . . سعادة الباشا المدير عايزك  
قاسم : حاضر . . ح اروح له  
يواصل سيره

قطع

---

مشهد / ٣٤ مكتب مدير الغربية نهار / داخلى

المدير وقاسم

المدير : مبروك يا استاذ قاسم

قاسم : على ايه يا باشا ؟

المدير : اترقيت بقيت نائب قاضى

قاسم : صحيح ؟

المدير : وانتقلت مصر كمان

يقدم له ورقة

المدير : ادى القرار يا سيدى . . ولو اننا كنا عايزينك معانا .

قاسم : ممنون جدا يا باشا لذوق سعادتك

المدير : ياللا بقى شد حيلك عشان تبقى قاضى وتأخذ البهوية

قاسم : ان شاء الله يا باشا

المدير : أنا اديت تعليمات بعمل اجراءات اخلاء الطرف فورا .

يقف ويسلم

قاسم : شاكر جدا يا باشا

المدير : أرجوك تبلغ تحياتى لمصطفى فهمى باشا وقل له ان الغربية كلها

رهن اشارته .

قاسم : حابلقه ان شاء الله .

قطع

---

محمد عبده وسعد

محمد : انا جاى يا سيدى أبشرك

سعد : بايه يا مولانا ؟

محمد : حضرتك اتعينت فى الحقانية

سعد : أنا ؟

محمد : أبوه أنا أوصيت وهم خدوا بالتوصية وعينوك نائب قاضى

سعد : لكن أنا باكسب من المكتب أحسن من راتب القضاء .

محمد : وماله . . الدنيا مش فلوس ويس . . ويعدين لازم تعرف ان دى

أول مرة يعينوا نائب قاضى بدون ما يكون معاه ليسانس حقوق وده

معناه اعتراف بعلمك .

سعد : كان لازم تاخذ رأى يا مولانا

محمد : على كل حال تقدر ترفض لكن أنا رأى انك تقبل لما تبدأ حياتك

القضائية نائب قاضى معناها انك بعد كام سنة حتوصل لأعلى

الدرجات القضائية ومعناها انك حتحصل على الرتب زى كبار

الموظفين

سعد : اختبار ما كانش على البال ولا فى النية .

محمد : أنت أهل للاختبارات الصعبة .

قطع

مصطفى لقاسم

مصطفى : يعنى موافق يا سى قاسم على الجواز ؟

قاسم : موافق يا عمى

مصطفى : على بركة الله . . كده بقى اقدر ابعت لأمين باشا أقول له ميعاد

الخطوبة . . ايه الميعاد اللي يناسبك ؟

قاسم : لا يا باشا ارجو ان حضرتك تشوف الميعاد اللي يناسبك اولاً لان  
حضرتك ولى أمرى بديل والدى .

يبحث فى توارىخ أمامه

مصطفى : الله يرحمه . . حاضر ياسيدى . . نخلى الميعاد . . نخليه . .

نخليه . . أبوه نخليه التلات الجاى ده اليوم الوحيد القاضى عندى

قاسم : على بركة الله يا باشا .

نسمع الموسيقى والزغاريد .

قطع

ليل / داخلى

يهو قصر أمير البحر

مشهد / ٣٧

يبدأ المشهد بصينية الشربات ثم نرى السفرجية يحملون الصواني لتقديم الشراب للمعازيم  
من الباشوات وقادة البحرية كما نرى سعد ومحمد عبده وحسن وفتحى زغلول .

قاسم يقف على الباب مع مصطفى باشا وأمير البحر لاستقبال المعازيم . فتحى يسير  
لقاسم ويهمس فى أذنه

فتحى : ايه يا عم قاسم مافيش حد يغنى يفرش القعدة ؟

قاسم : أنا جايب لكم مطربة ما سمعتوش جمال صوتها قبل كده

فتحى : طب ما تسمعنا

قاسم : حالا

فتحى يسير ليجلس مع رفاقه . قاسم يتهامس مع مصطفى فهمى وأمير البحر ثم يتجه لاحد  
كبار الأغوات الواقفين امرا

قاسم : نادى المغنية اللي جوه عشان تبدأ

الأغا ينحنى باحترام ويتجه للداخل . محمد عبده لسعد وفتحى

محمد : مش حنفيروا انتو كمان وتلحقوا قاسم ؟ انتم لو لسه فى مسجد

وصيف كانوا تبروا منكم عشان قاعدين لدلوقت من غير جواز

يضحكان

سعد : بصراحة الواحد غار النهاردة بس

فتحى : أنا شخصياً بعد ما اترقيت وبقيت رئيس محكمة المنصورة حاسس

انى لازم اكمل نص دينى

تدخل وسيلة وجوقها . . وتزغرد احدى العوالم لتلفت النظر فى البداية . . ثم تجلس

الفرقة ويبدأ الغناء . حين تقع عيننا حسن على وسيلة يهمس لفتحى

حسن : فتحى . . شايف اللي أنا شايفه ؟ دى صورة طبق الأصل من سلافا

فتحى : يخلق من الشبه أربعين يا سيدى .

يبدأ الغناء . يجلس قاسم ومصطفى وأمير البحر ليستمعوا

الأغنية

وتدور حول أن الزواج نصيب وانه لو كان بيدى ما تركتك لغيرى . دمع قاسم يسيل .

مصطفى باشا يهمس له

مصطفى : مالك ؟

قاسم : لا . . دى . . دى دموع الفرح

تواصل وسيلة الغناء .

بقية الأغنية

مع تأكيد الأغنية على معنى : افرح يا عريس واتهنى فعرسك لا يعيها شىء وانت أهل

لكل جميل . احدى السيدات فى التخت تزغرد . تنتهى الأغنية يحيون المطربة بينما قاسم

يمسح دموعه

قطع

---

نهاية الحلقة الخامسة عشر

## فريق العمل فى مسلسل قاسم أمين

قصة وسيناريو وحوار	محمد السيد عيد
إخراج	انعام محمد على
موسيقى تصويرية و الحان	عمار الشريعى
مؤلف الاغنى	سيد حجاب
مدير التصوير	د . محمد عسر
مهندس الديكور	م . نبيل سليم
مصممة ازياء	د . سامية عبد العزيز
المنتج	قطاع الانتاج اتحاد الاذاعة والتلفزيون

### توزيع الادوار

كمال ابو رية	قاسم امين
منال سلامة	الاميرة نازلى
ميرنا وليد	سلافا / وسيلة
جمال عيد الناصر	سعد زغلول
توفيق عبد الحميد	الإمام محمد عبده
نادية رشاد	سنية والدة قاسم امين
ماجدة الخطيب	نفيدة زوجة اب قاسم امين
احمد خليل	أمين بك والد قاسم امين
نورهان	زينب زوجة قاسم امين
عزة بهاء	جولنار اخت قاسم امين بالتبنى
ناصر سيف	خضر زوج اخت قاسم امين
احمد سعيد عبد الغنى	حسن
شريف خير الله	فتحي زغلول الاخ الاصغر لسعد زغلول
سعيد عبد الغنى	مصطفى باشا فهمى
خالد الصاوى	الخدوي توفيق
احمد الشافعى	الزعيم مصطفى كامل

ايمن عزب	أحمد لطفى السيد
محمد كامل	عبد الله النديم
محمد ابو داود	الشيخ على يوسف
احمد فؤاد سليم	الشيخ جمال الدين الافغانى
ممدوح رشوان	الزعيم احمد عرابى
هانى كمال	الشاعر احمد شوقى
خالد العيسوى	الشاعر حافظ ابراهيم
حسن كامى	اللورد كرومر
د. سامى عبد الحلیم	يوسف والد حسن
رجاء امين	والدة حسن
أحمد شاكر	فى دور الخديو عباس





المؤلف في سطور :

●● محمد السيد عيد

تاريخ الميلاد : ١٢ نوفمبر ١٩٤٧ .

محل الميلاد : إسكندرية

الوظيفة : وكيل وزارة الثقافة للشئون الثقافية/ هيئة

قصور الثقافة

● إسهامات في مجال المسرح ( كتب )

- ١ - التراث في مسرح صلاح عبد الصبور هيئة الكتاب
- ٢ - التراث في مسرح نجيب سرور الشعري هيئة الكتاب ، ط ١ ، ٢
- ٣ - التراث في مسرح عبد الرحمن الشرقاوي هيئة قصور الثقافة ، ط ٢ دار عين
- ٤ - دراسات في المسرح المعاصر هيئة قصور الثقافة ، ط ٢ دار عين
- ٥ - الاحتفالية في المسرح العربي مطبوعات ملتقى المسرح العربي
- ٦ - صوت صارخ في البرية عن « مؤتمر أدباء مصر في الأقاليم » هيئة قصور الثقافة

● تحقيق ودراسة

- ١ - مسرحية الكلمات المتقاطعة لنجيب سرور هيئة قصور الثقافة ط ١ ، ٢
- ٢ - مسرحية عقيلة ليبرم التونسي مجلة نصف الدنيا

● مسرحيات (غير مطبوعة)

- ١ - مسرحية « موكب النور » الهيئة العامة لقصور الثقافة أغسطس ١٩٩٨
- ٢ - مسرحية « الشيطان الأحمر يعلن اعتزاله » البرنامج الثاني
- ٣ - مسرحية « الفرس » معارضة لمسرحية اسخليوس البرنامج الثاني

● مقالات :

- حوالي مئة مقال في النقد التطبيقي عن العروض والنصوص في مجلات :
- « السينما والمسرح » ، « المسرح » ، « الفنون » ، « البيان الكويتية » . . وغيرها

● في مجال الإذاعة

جوائز :

- ١ - جائزة الدولة التشجيعية ١٩٩٧ في مجال التأليف الدرامي للإذاعة والتلفزيون
- ٢ - الجائزة الأولى في التأليف ١٩٨٤ / الإذاعة المصرية

٣ - الجائزة الأولى في التأليف ١٩٨٦ / إتحاد الإذاعات الإسلامية

٤ - الجائزة الثانية في التأليف ١٩٩٦ / إتحاد الإذاعات العربية

#### • المؤلفات :

١ - ٧٦ مسلسلاً إذاعياً في الإذاعات المصرية والعربية

٢ - أكثر من ٣٠ سهرة

٣ - عشرات البرامج الخاصة

#### • خبرات أخرى :

- أستاذ مادة الكتابة للإذاعة والتلفزيون « أكاديمية أخبار اليوم »

- محاضر ومدرّب في مصر وخارجها في مجال التأليف الإذاعي

#### • في مجال التلفزيون :

١ - جوائز

- أحسن كاتب سيناريو عن مسلسل الزيني بركات من إخراج يحيى العلمي ١٩٩٦

- أحسن كاتب سيناريو عن مسلسل قاسم أمين إخراج إنعام محمد على ٢٠٠٣

#### ٢ - مسلسلات تم تنفيذها

١ - الزيني بركات إخراج يحيى العلمي قطاع الإنتاج .

٢ - الشهاب إخراج أحمد خضر صوت القاهرة .

٣ - زمن العطش إخراج عليّة ياسين قطاع الإنتاج .

٤ - قاسم أمين إخراج إنعام محمد على قطاع الإنتاج .

٥ - شاطئ الخريف إخراج عليّة ياسين صوت القاهرة .

#### ٣ - مسلسلات لم تنفذ بعد

١ - ذات الهمة ٢ - أبو حامد الغزالي

٣ - مواكب الخالدين

#### • في مجال أدب الأطفال

١ - زرعنا شجرة

٢ - طابور الصباح

٣ - رحلة إلى الواحات

٤ - البوابة المسحورة

٥ - سمسار العجايب

#### • في مجال النقد الأدبي

هيئة قصور الثقافة

هيئة قصور الثقافة

هيئة قصور الثقافة

هيئة قصور الثقافة

هيئة قصور الثقافة

## مؤلفات :

- ١ - أحمد أمين ناقلاً أدبيًا هيئة الكتاب
- ٢ - رائحة اليود ( موجات من القصر السكندري ) دار الملتقى بالإسكندرية

## مؤلفات مشتركة :

- ١ - توفيق الحكيم الأديب المفكر الإنسان المركز القومي للآداب
- ٢ - توفيق الحكيم وداعًا المركز القومي للآداب
- ٣ - بيرم التونسي في ذكره المثنوية المركز القومي للآداب

## ● مقالات في النقد الأدبي

عشرات المقالات في نقد الشعر والرواية والقصة القصيرة ، بكتريات المجلات المصرية والعربية ، مثل :

الهلال ، القصة ، الشعر ، الثقافة الجديدة ، الأقلام العراقية ، الثقافة العربية الليبية ، صحيفة الراية القطرية ، الوطن الكويتية ، البيان الكويتية ، الكاتب المصرية ، عالم الكتاب ، إبداع . . . . وغيرها .

## ● مؤتمرات أدبية

- عضو مؤسس لمؤتمر أدباء مصر في الأقاليم ، وأمينه العام لسبع دورات ، ويبحث في عدد من دوراته .
- باحث في مؤتمر الأدب والمقاومة/ دمشق يوليو ٢٠٠٠ ( اتحاد الكتاب العرب )
- باحث في مؤتمر توفيق الحكيم ( المجلس الأعلى للثقافة )
- باحث في ندوات مهرجان القاهرة الدولي للمسرح التجريبي ( وزارة الثقافة ) ( عدد من الدورات )
- مؤسس لعدد كبير من المؤتمرات الإقليمية
- صاحب فكرة ملتقى الشعر العربى .

## ● فى مجال النشر

- صاحب مشروع النشر الإقليمى بهيئة قصور الثقافة ( من ٩٨ إلى الآن )
- مؤسس كتاب ومجلة قطر الندى للأطفال
- أمين عام النشر بهيئة قصور الثقافة

## ● بيانات أخرى

- عضو مجلس إدارة اتحاد الكتاب
- عضو نقابة المهن السينمائية

## صدر في هذه السلسلة

- ١ - قاموس السينمائيين المصريين ..... منى البندارى - يعقوب وهبى
- ٢ - مائة عام من السينما ..... د. محمد كامل القليوبى
- ٣ - السينما الفلسطينية في الأراضي المحتلة ..... سمير فريد
- ٤ - قراءة في السينما العربية ..... قصى صالح درويش
- ٥ - أفلامى مع عاطف الطيب ..... سعيد شيمى
- ٦ - نجوم وشهب في السينما المصرية ..... أحمد يوسف
- ٧ - من هموم السينما العربية إلى سينما الرؤية الذاتية ..... أمير العمرى
- ٨ - الواقعية في السينما المصرية ..... سعيد مراد
- ٩ - مخرجون واتجاهات في السينما المصرية ..... سمير فريد
- ١٠ - سينما الأطفال ( مقالات ودراسات ) ..... فريال كامل
- ١١ - أطياف وظلال ..... عبد الحميد حواس
- ١٢ - مدارس الأداء التمثيلى في تاريخ السينما المصرية ..... عبد الغنى داود
- ١٣ - الأعمال الكاملة للنقاد السينمائي سامى السلامونى  
الجزء الأول ١٩٦٩ - ١٩٧٥ ..... إعداد : يعقوب وهبى
- ١٤ - عالم نجيب محفوظ بين الرواية والسينما ..... د. وليد سيف
- ١٥ - الأعمال الكاملة للنقاد السينمائي سامى السلامونى  
الجزء الثانى ١٩٧٦ - ١٩٨٢ ..... إعداد : يعقوب وهبى
- ١٦ - المهنة كاتب سيناريو ..... سمير الجمل
- ١٧ - الأعمال الكاملة للنقاد السينمائي سامى السلامونى  
الجزء الثالث ١٩٨٣ - ١٩٨٨ ..... إعداد : يعقوب وهبى
- ١٨ - السيرة أطول من العمر ( ذكريات المخرج السينمائي كمال عطية )
- ١٩ - الأعمال الكاملة للنقاد السينمائي سامى السلامونى  
الجزء الرابع والأخير ١٩٨٩ - ١٩٩١ ..... إعداد : يعقوب وهبى
- ٢٠ - مختارات من كتابات الناقد السينمائي فتحى فرج ..... إعداد وتقديم : سمير فريد
- ٢١ - الخلدع والمؤثرات الخاصة في الفيلم المصرى - ج ١ ..... تأليف : سعيد شيمى
- ٢٢ - الشخصية العربية في السينما العالمية ..... أحمد رأفت بهجت
- ٢٣ - أزياء الاستعراض في السينما المصرية ..... مها فاروق عبد الرحمن

- ٢٤ - سيناريو فيلم « عرق البلع » ..... رضوان الكاشف
- ٢٥ - إخراج أفلام الحركة (تجربتي في السينما المصرية) ..... د. سمير سيف
- ٢٦ - الخدع والمؤثرات الخاصة في الفيلم المصري ج ٢ ..... سعيد شيمي
- ٢٧ - سعيد مرزوق عاشق السينما ..... طارق الشناوى
- ٢٨ - دليل السينمائيين في مصر ..... منى البندارى ويعقوب وهبى
- ٢٩ - سحر الكوميديا في الفيلم المصري ..... د. وليد سيف
- ٣٠ - في الدراما التلفزيونية ..... محمد الشربيني
- ٣١ - زمن محسن زايد ..... أيمن الحكيم
- ٣٢ - السينما في أدب نجيب محفوظ ..... د. عبد الثواب حماد
- ٣٣ - السينما في مرآة الوعي ..... د. حسن عطية
- ٣٤ - السينما وحقوق الملكية الفكرية ..... د. ناصر جلال
- ٣٥ - سيناريو مسلسل « قاسم أمين » جزء أول ..... محمد السيد عيد

الكتاب القادم :

- ٣٦ - سيناريو مسلسل « قاسم أمين » جزء ثانى ..... محمد السيد عيد



هذا هو سيناريو مسلسل  
« قاسم أمين » الذي حصل فى  
مهرجان الإذاعة والتلفزيون عام  
٢٠٠٣ على أربعة جوائز ، هى  
جائزة أحسن مسلسل ، وجائزة  
أحسن سيناريو للكاتب محمد  
السيد عيد ، وجائزة أحسن  
إخراج للمخرجة إنعام محمد  
على ، وجائزة أحسن تصميم  
ملابس للدكتورة سامية عبد العزيز



محمد السيد عيد



الشركة العامة للطباعة

التمن : جنيهاً